

R. P.
ANTONII
RVVIO RODENSIS,
DOCTORIS THEOLOGI
SOCIETATIS IESV,
Sacrae Theologiae
Professoris,



COMMENTARII IN LIBROS
Aristotelis Stagiritae de Calo, & Mundo: una
cum dubiis, & questionibus in
Schola agitari solitis.

NUNC PRIMUM IN GALLIA EDITI.



LVGDVNI;
SYMPTIBVS IOANNIS PILLEHOTTE;
sub signo Nominis I E S V.

M. DC. XXV.
CVM PRIVILEGIO.

177-9



ILLVSTRISSIMO D. D.
LVDOVICO DE VELASCO, SANCTI
IACOBI EQVITI, SALINARVM
Marchioni, & Regij Indiarum Senatus
Præsidi dignissimo.

Sapientes illi, quibus olim è Lycæo in superâ domos
scandere cura & studium fuit, cum viderens cale-
stes orbes ipsa magnitudine panè immensos, certis
semper, & perpetuis itineribus circumuehi, homi-
nem finxere, qui cum in calorū medio supinus de-
cuberet, caputq; in Polo Antartico, pedes in Arcti-
co haberet, dextera tamen vniuersam illam machinam rata & iugi
vertigine circumuolueret. En, Illustrissime Princeps, si antea tua
vita tua res præclare gestas, si magistratus eximios, si maiorum nobi-
litem nulli secundam expendamus, germanum planè & verum
tui ipsius symbolum: cum enim genus regium ab illustrissima Comi-
tum stabuli, apud nostrates familia deducas, supra terra filios non
modicū in cælum assurgis, proauitāque nobilitatem ipsis astris
vix terminas: hanc per tot rerum discrimina, per casus varios ex-
celsiorem efficiis, dum Salmanticensē Academiam studiis tuis illu-
stras, dum Germaniam, Angliam, Belgium, & Italiam, primis tue
militiæ rudimentis nobilitas, dum clarissima apud magnum He-
truria ducem legatione fungeris, dum Mexicanas prouincias victri-
cibus armis in pacem redigis: sed post tanta virtutum tuarum præ-
ludia dignum erat, ut reipublica molè, & vagos terreni huius celi
orbes in communem utilitatem moueres. Hinc factū ut prudentis-
simus Hispaniarum Rex Philippus Secundus te utriusque polo præ-
fecerit, dum modò noua Hispania Proregē, modò Peruana Prouin-
cie constituit: sic polos Arcticum & Antarticum complexus, in mo-
rē illius Peripatetici hominis utrūque polum gladio rexisti, pruden-
tia moderatus es: sic ipse innotus, & panè decumbens vastas illas
regiones equali, & iustissimo motu ad nutum Regis tui, ad populo-
rū salutem mouisti. Nec his tantis terminis virtus tua circumscripta
est, sed tertio maximus Rex noster Philippus Tertius te eiusdem no-

ue Hispania Proregem creauit, quod tibi iure veluti hereditario debebatur: profuit enim eidem nouæ Hispaniæ genitor tuus, nullis non sapientiæ bellique laudibus insignis D. Aloysius de Velasco, & rebus eam præclarissimis domi bellique gestis illustrauit, cuius merita cum tu nouo quodam auctario compleres quodammodo, & perficeres, ne tanta virtuti deesset, te munificus Rex, Salinarum Marchionatus titulum multis tuarum virtutum titulis adiunxit, & Regio Indiarum Consilio Præsidentem designauit, ut quas pedibus regiones obieras, & armis descenderas, nunc consilij tui equamine, directione, imperio tuearis, sic utrumque polum mouens, sic omnibus salutem recto caelestis prudentia motu inuehens, veri illius Peripatetici, sed ficti hominis effigiem nobis expressisti.

Sed quorsum hæc ad nostri Philosophici libri dedicationem? Planè nulli aliena videri debent, si librum hunc, posthumam Patris Antonij Rubij prolem esse consideret: ille enim à primo tui Mexicani regiminis exordio, tibi semper à consilio, semper in deliciis: nec annorum progressu mutuus iste inter utrumque amor consenuit, sed vegetiori ætate adoleuit in dies, dum tantum virum Indicis rebus gerendis Prorex admisces, dum sacris eius concionibus fruëris, dum mira sacram Theologiam docentis eruditione pascëris, & magni Pompeij æmulus nostri Philosophi Aulam Præsides ingrederis, sic cum florentissima illa Mexicana Academia emerito Patri post diuturnos in re literaria expensos labores, post susceptam felicibus auspiciis innumeram & sapientissimam sobolem rudem donare, & Doctoris gradum gratis impertiri voluit. Tu coram, nouo præsentia tua honore eius honores cumulasti, tu solitos amici in Theologica palæstra congressus præsidio tuo fouisti, suspexisti, veneratus es (haud ignota loquor, sed quæ ipsismet oculis vidi, suspexi & miratus sum.) Quem verò tunc Mexicana illa Academia patrem agnouit, nunc Complutensis, quæ illum genuit, aluitque feliciter, in iuniorum fratrum magistrum adsciscit, & quam nutrix prouida tenero alumno doctrinam infuderat, ad posterorū utilitatem à se nouo fœnore auctam vendicat, & totius Philosophiæ præceptorem alumnis suis proponit. Quodque magis mirere, cum ex præscripto supremi Senatus primum interpretata esset huius Auctoris librum, posteriores sua sponte tunc ob perceptum emolumentum, tum spe maioris vsuræ, exultans suscepit, hausit, arripuit; ut sic saniori veræ Philosophiæ lacte adolescentes, sensim solidam doctrinam imbibant, & ad sacratiora Theologia adyta aptiores se præparent. Amici igitur demortui rediuiam sobolem vix ab ipsius funeribus raptam, debito humanitatis tuæ præsidio fove, & vix spiranti ani-

mum, succum, sanguinem infunde; sic enim fiet, vt & iuuentuti Complutensi Magistrum, & Philosophis Doctorem, & tuo Antonio Rubio honorem solitum restituas, nouisque Societatem nostram, immò tot titulis tuam, beneficiis deuincias, cui semper in confesso erit, licet à te possit nouis affici muneribus, non tamen nouum inde ad gratitudinem cumulum accessurum: celsitudini enim tue, & maxima debet & innumera, quæ nulla temporum iniuria, nulla posteritas, à præsentis, à futuræ Societatis memoria delebit.

Franciscus de Figueroa.

A P P R O B A T I O.

Perlegi hos sapientissimi Patris ac Doctoris Antonij Rubio è Societate I E S V, *Commentarios in lib. Arist. de Calo, & Mundo*, ex supremi Senatus præscripto: in quibus nihil offendi orthodoxæ fidei, aut bonis moribus aduersum: quin opus esse putauì dignum tanto viro, & incepto labori apprime germanum in discurrendi subtilitate, inueniendi felicitate, vrgendi viuacitate, & styli tandem maiestate: Opus sanè non Philosophis tantum, sed Theologis etiam in doctrina D. Thomæ versatis perquam utile. Et vt aliis hucusque operibus Complutensis Academix, quin, & vbique gentium iuuentutem enutrit bono lacte doctrinæ, hoc demum labore vegetam reddet ad vltiores quasque disciplinas, quocirca præsentis Commentarios iudico typis, & cedro dignissimos. Datum Compluti 6. Idus Aprilis, anno Domini 1615.

Doctor Tribaldos.

Permissio P. V. Prouincialis Societatis I E S V in Prouincia Lugdunensi.

Michaël Coyssardus, Vice-Prouincialis Societatis I E S V in Prouincia Lugdunensi, permittit ad sex annos proximos Ioanni Pillehotte typis mandare, ac vendere P. Antonij Ruuij Rodensis, eiusdem Societatis, *Commentarium in libros Aristotelis de Calo, & Mundo*, idque iuxta Priuilegium Regum Christianissimorum Henrici III. die 10. Maij 1583. nec non Magni Henrici IV. 20. Decemb. 1606. arque etiam Ludouici XIII. iam regnantis, 14. Februarij 1611. eidem Societati concessum, quo Typographis, & Bibliopolis omnibus prohibetur, ne quis libros ab eiusdem Societ. Hominibus compositos, absque Superiorum permissione imprimant, vel imprimi curent. Lugd. 17. Cal. Februarij, Anni 1616.

M. Coyssardus.



INDEX

TRACTATVVM ET QVÆSTIONVM, qua in his libris Aristotelis de Cælo & Mundo continentur.

Quæstiones præliminares & primi libri.

Q uodnam sit huius operis subiectum.	pagina 1
Totius operis diuifio, & primi libri.	4
Cap. 1. Quæftio vnica. An mundus perfectus fit.	6
Quæft. 1. An diuifio motus in rectum, circulearem & mixtum, ab Aristotele tradita, fit adæquata.	11
Quæft. 2. An motus circularis quo mouetur cælum, fit naturalis, vel præter naturam.	13
Appendix, dubium: An quies cælorum post diem iudicij futura fit naturalis, aut violenta.	17
Quæft. 3. An cæleste corpus à sua fede extractum, vel pars eius ab eo diuifa moueretur naturaliter ad illam, vel naturaliter quiesceret.	19
Quæft. 4. An cælum fit diuerfæ naturæ à corporibus sublunaribus.	24
Quæft. 5. An cælum fit compositum ex materia & forma.	26
Quæft. 6. An materia cælorum fit eiusdem speciei, cum materia sublunarium corporum, vel diuerfæ.	31
Quæft. 7. An materia cælestis fit perfectior sublunari.	34
Quæft. 8. An materiæ cælorum sint diuerfæ speciei inter fe, vel solo numero distinguantur.	38
Quæft. 9. An quantitas cælorum & corporum sublunarium sint eiusdem, vel diuerfæ speciei.	40
Cap. 3. Quæft. 1. An cælestia corpora sint ex propria natura ingenerabilia & incorruptibilia.	44
Quæft. 2. An aliquando noua aliqua stella, vel mutatio alia in cælo apparuerit, & quomodo id contigerit.	49
Quæft. 1. An insint cælo vera raritas, & densitas eiusdem rationis cum sublunaribus.	53
Appendix, dubium. An cælum possit sua natura alterari.	56
Cap. 4. Quæft. vnica. An probauerit Aristoteles efficaciter, quòd motui circulari nihil sit contrarium.	58
Tractatus de mûdo seu vniuerso, & de his quæ ad ipsum pertinent.	66
Quæft. 1. An sit vnus mundus, vel plures.	ibid.
Quæft. 2. An per potentiam Dei absolutam possibiles sint plures mundi specie, aut numero distincti.	69
Quæft.	

Quæst. 3. An Deus possit efficere alios atque alios mundos in infinitum perfectiores. 72

Quæst. 4. An sit Deo possibile hunc mundum perfectiorem reddere. 76

Cap. 1. Quæst. vnica. An mundus solo generali concursu Dei perpetuare possit; an maiori indigeat ad perpetuitatem. 84

Tractatus de terminis potentiarum & qualitarum. 87

Quæst. 1. An potentia actiua terminis magnitudinis & paruitatis definitur quoad intensionem suorum effectuum. ibid.

Dubium. An necesse sit corpus naturale ad suum centrum naturaliter motu velocius semper moueri, quò magis ad ipsum appropinquat. 91

Quæst. 2. An potentiis actiuis concedendus sit terminus intrinsecus quoad extensionem suorum effectuum. 96

Quæst. 1. An potentia actiua, quoad resistantiam terminentur, & quibusnam modis. 102

Quæst. 4. An potentia passiua postulent terminos magnitudinis, & paruitatis quantum ad intensionem suorum effectuum. 107

Dubium. An potentia passiua obedientialis aliquid addat supra naturalem. 112

Quæst. 5. An qualitates secundum propriam rationem postulent terminos intentionis, & extensionis. 115

Dubium. An potentia obedientialis animæ ad recipiendam gratiam & dona supernaturalia sit infinita. 128

Quæstiones secundi libri.

Cap. 1. Quæst. 1. An cælestia corpora sint animata. 134

Quæst. 2. An cælestia corpora dignitate præstent cunctis rebus sublunaribus. 143

Cap. 2. Quæst. vnica. An sex positionum differentia conueniant cælo ab intrinseco, an solum per ordinem ad animalia. 150

Cap. 3. De cælestium corporum influxu, in inferiorem mundum. 158

Quæst. 1. An cælestia corpora verum, & realem influxum habeant circa effectus in inferiori mundo editos. 159

Quæst. 2. An cælestia corpora influant in inferiorem mundum per solam lucem, vel etiam per aliam virtutem. 161

Quæst. 3. An motus circularis cæli sit ratio agendi in inferiorem mundum, vel solum conditio. 165

Quæst. 4. An cessante motu cælesti, cessare debeant motus omnes, actionesque inferiorum corporum. 168

Tractatus 2. de effectibus cælestis influxus. 176

Quæst. 1. An cælestia corpora suo influxu producant metalla, & cætera corpora vitæ expertia, quæ non habeant aliam causam particularem ac sufficientem. 177

Quæst. 2. An cælum sit causa imperfectorum animalium, quæ generantur ex putri materia. 184

Quæst.

Quæst. 3. An animalia ex putri materia sint eiusdem speciei cum animalibus eiusdem nominis, ex semine productis. 190

Quæst. 4. An cælestia corpora aliquem influxum habeant circa futuros euentus casuales, ex concursu naturalium causarum euenientes. 196

Quæst. 5. An, & quoniam modo cælestia corpora in intellectum, & voluntatem nostram influant. 201

Quæst. 6. Possintne Astrologi ex syderum obseruatione futura certo præcognoscere, ac præuunciare. 204

Tractatus de figura, numero, ordine & motibus corporum cælestium. 216

Quæst. 1. An cæleste corpus sphaerica seu rotunda figura præditum sit. ibid.

Quæst. 2. De numero cælestium sphaerarum. 221

Quæst. 3. Quidnam sit de cælo Empyreo sentiendum. 229

Quæst. 4. An quò situ eleuatiore sunt corpora cælestia, eò sint natura perfectiora. 236

Quæst. 5. An quodlibet cæleste corpus sub primo mobili contentum duplici motu moueatur. 243

Quæst. 6. An Planetæ seu errantes stellæ sint partes continuæ componentres orbes quibus insident, & ad motum eorum moueantur. 247

Quæst. 7. An omnes cælestes orbes sint inter se contigui, nullo alio corpore interiacente. 255

Quæst. 8. An cælestia corpora moueantur à propria forma substantiali, vel ab intelligentia. 263

Quæst. 9. An quilibet orbis cælestis à propria intelligentia moueatur. 268

Quæst. 10. Qua facultate cælestes orbes ab intelligentiis moueantur. 276

Quæst. 11. Quomodo sphaeræ cælestes ab intelligentiis rotentur. 283

Cap. 7. Quæst. 1. An astrotum naturæ sint eiusdem rationis cum suis orbibus, & inter se. 290

Quæst. 2. Vtrum calor à luce, vel motu ortum ducat. 295

Cap. 8. Quæst. 1. An sint elementa, quot, & qualia. 318

Quæst. 2. An terra in medio mundi sita sit, habeatque idem centrum magnitudinis, & grauitatis cum ipso. 325

Quæst. 3. An terra sit altior mari depressiorve. 330

Quæst. 4. Vtrum terra in medio mundi quiescat, vel aliquo modo moueatur. 337

Ex libro 4.

Quæst. 1. De natura grauitatis, & leuitatis simplicium corporum. 344

Quæst. 2. Quomodo elementis facultas motrix conueniat, & an in naturalibus sedibus grauitent, vel leuitent. 348

F I N I S.



IN LIBROS ARISTOTELIS DE CÆLO.



PROOEMIUM.



QUOD hoc Aristotelicum de cœlo & mundo, quod nostris commentationibus illustrandum suscipimus, partem quandam esse totius naturalis Philosophiæ, perspicuum est, & in reliquis nostris Philosophiæ libris ostensum. Etenim cum naturalis eadem Philosophia in explicanda natura entis mobilis vniuersalissimi versetur, & libri isti partem eiusdem entis mobilis explicandam sibi assumant, iure optimo partem eiusdem scientiæ appellantur; non quidem primam, quia prima consideratio entis mobilis ea esse debuit, quæ circa primum, quod de eo occurrit considerandum, versatur, & id quidem certum est, non esse peculiare aliquod ens mobile, sed vniuersalem rationem principiorum, ex quibus constatur, & cuius notitiam tradidère physicornum libri, & propterea primam Philosophiæ partem, vocari debuerunt; sed post illam primam opus hoc secundum tenet locum, vt ex proprii subiecti, propriæve materiæ (circa quam versatur) expositione constabit.

Quodnam sit huius operis subiectum.

QUÆSTIO intelligitur de subiecto adæquato comprehendente omnia, quæ tractantur in scientiâ, à quo certum est speciem sumere; non de principali, quod semper est præcipua pars eius, vt constat in omnibus scientiis: maximam verò rationem dubitandi præbuit multitudo, atque diuersitas rerum, de quibus differeretur in his libris: nam in primo mundus, seu vniuersum, & proprietates eius considerantur: in secundo so-

lum cæleste corpus: in tertio, & quarto elementa. Hæc igitur diuersitas rerum in diuersas quoque sententias abire coëgit antiquos Aristotelis interpretes. Nam Iamblicus, & Syrianus cum eo, quorum meminit diuus Thomas in præmio huius operis, tenent, corpus cæleste esse subiectum eius. Quod probant ex inscriptione: nam apud Græcos inscribitur de cælo: sed inscriptio continet materiam totius operis; ergo corpus cæleste habet rationem completæ, seu adæquatæ materiæ, & subiecti totius operis. Secundo, quia subiectum scientiæ illud duntaxat esse potest, quod per se consideratur. Sed in his libris solum consideratur per se corpus cæleste, de cæteris verò corporibus quasi per accidens agitur, nempe vt sub eo contentis, vel ad cognitionem illius conducentibus, seu influxum eius participantibus: ergo solum cæleste corpus erit subiectum huius operis.

Hæc tamen sententia improbabilis visa est D. Thomæ, & meritò, quia non consuevit Aristoteles, nec vllus scientiæ auctor maiorem partem scientiæ assignare rebus, non per se, sed per accidens solum ab eo consideratis. Sed constat Aristotelem partem secundi libri, atque etiam tertium, & quantum integros solis elementis assignasse: ergo absurdum est dicere, quod non per se, sed per accidens ab eo considerentur, & solum cæleste corpus per se: præterea ab omnibus recentioribus reiiicitur.

Secunda sententia est, quæ asserit, non solum cæleste corpus, sed elementa considerari per se: & cum hæc omnia sint simplicia corpora, distincta à corporibus mixtis, subiectum adæquatum huius operis esse corpus simplex, sub quo comprehenduntur quatuor elementa, & cælum. Itaque subiectum huius operis iuxta hanc opinionem, est corpus simplex, vt mobile ad vbi. Hæc est opinio Simplicij in præmio huius operis, quam sequuntur ibidem Conimb. & alij. Probant ex progressu huius operis: nam in 1. & 2. lib. eius agit Aristoteles de cælo, & in 3. & 4. de elementis: mixta verò sub ratione non seorsim considerari oportuit, sed ad eandem considerationem simplicium reducere, quia ad eosdem situs elementorum pertinent, & iuxta naturam elementi in eis prædominantis mouentur; vt quæ terrestria sunt, ad situm terræ, quæ ærea, ad situm æris. Vnde sequitur sola simplicia corpora, in quantum ad proprios situs mobilia sunt, per se considerari. Deinde ratione: 1. quia euidentius est, considerationem corporis simplicis, in quantum mobile est ad vbi, per se pertinere ad naturalem Philosophiam, & non est minus euidentius, quòd in nulla alia parte, præter istam, hoc modo consideretur: ergo euidentius erit ad hanc per se pertinere, & ex consequenti esse subiectum adæquatum eius. Secundo, quia si totum vniuersum dicatur esse subiectum, vt plures opinantur,

(ait

(ait Simplicius) sequeretur in his libris agere debere Aristotelem de omnibus partibus vniuersi, vsque ad animantia, & plantas, alioqui non poterit naturam eiusdem vniuersi explicare: cum completa cognitio totius dependeat ex cognitione omnium partium. Sed constat, non de omnibus partibus vniuersi agere, sed solum de quinque corporibus simplicibus, videlicet, elementis, & cælo: ergo non vniuersum, sed corpus simplex subiectum erit.

Tertia opinio est Alex. quem sequitur D. Thom. in præmio huius operis, asserentis, mundum seu vniuersum vt est compositum quoddam ex quinque corporibus simplicibus, tanquam ex partibus, videlicet cælo, & elementis, esse subiectum huius operis adæquatum, ipsa verò elementa considerari præcisè, vt partes: & videtur nobis probabilior, & magis ad mentem Arist. Probatur vtrunque, quia subiectum est, cuius proprietates considerantur in scientia: sed in hoc opere considerat Arist. proprietates mundi, seu vniuersi: ergo hoc erit subiectum. Probatur minor ex text. 4. huius libri, vbi promittit se acturum de natura vniuersi, & disputaturum, an sit finitum, vel infinitum, & ex text. 77. vbi ostendit esse vnum, & eodem text. 4. esse perfectum, & in fine eiusdem primi libri, atque etiam in 1. probat esse ingenerabile, incorruptibile, atque æternum, & tandem cap. 1. text. 5. eiusdem 1. libri asserit, se acturum de corporibus simplicibus, in quantum partes sunt, ex quibus vniuersum componitur: ergo hoc per se primò considerat, tanquam primarium, & adæquatum obiectum, corpora verò simplicia præcisè, vt sunt partes eius.

Argumentum primæ opinionis difficultate caret, nam maior plane falsa est, quòd inscriptio operis, vel scientiæ, continere debeat omne illud, quod per se consideratur ab ea, vel quod à tota materia accipitur: sed sæpe ab vna aliqua parte principali accipi solet: & ita accipitur inscriptio huius operis à cælo, tanquam à principaliori parte vniuersi per se primò, & adæquatè considerati. Ad 1. neganda est minor; quod de solo cælesti corpore differatur per se in his libris, de reliquis verò corporibus per accidens: nam primaria, ac præcipua consideratio circa totum vniuersum versatur, & per se etiam considerantur elementa tanquam partes eius.

Ad primum verò opinionis secundæ respondeo, ex progressu Aristot. in his libris solum haberi posse, quòd consideret per se corpora simplicia, non tamen propter se, sed propter vniuersum, ad quod constituendum per se ordinantur: hoc est ergo per se, primò, & adæquatè consideratum, corpora verò simplicia, tanquam partes eius: partium autem rationem habent, ratione si-

tus, quem in vniuerso eis natura tribuit, & ad quem mouentur, quare idem est considerari, vt mobilia ad proprium vbi, vel locum, ac considerari tanquam partes vniuersi, quod sub eadem ratione constituere patet.

Secundum verò argumentum solum probat, quòd simplicia corpora in quantum mobilia ad vbi per se considerentur in hoc opere, quia hoc modo sumpta, partes sunt vniuersi, primò, & adæquate considerati, ex quo non habetur, quòd obiectum eius sint, sed solum quòd sint obiecti partes. Ad 2. neganda est consequentia, quòd agere debeat Arist. in hoc opere de omnibus corporibus mixtis vsque ad partes: quia sola simplicia corpora sunt partes per se primò constituentes vniuersum, in quantum ordinantur secundum situm in eo, mixta verò, quasi secundariæ partes censi possunt, quas primariæ comprehendunt, quia eis præbent situm in vniuerso; cum constet ad situm prædominantis elementi pertinere, & ad locum eius moueri naturaliter.

Ex his colligitur 1. opus hoc proximè post libros Phys. collocandum esse, quia vniuersum, de quo agit, omnia ferme, de quibus differunt cæteræ partes, continet. Quare statim post vniuersalia principia omnium naturalium corporum explicari debuit. Secundò, intelligitur dignitas eius, nam præter animam, & animata corpora (simplicibus absque dubio digniora) primum locum tenet inter partes philosophiæ; cum digniora sint corpora, ex quibus vniuersum componitur, præsertim cælestia, vt per se est manifestum. Intelligitur 3. quanta nobis proueniat utilitas ex opere hoc, vel certè ex notitia, seu cognitione vniuersi: nam cognitio cum primis horum corporum (præsertim cælestium, vt pote nobilissimorum) cognitio quoque effectuum in his omnibus inferioribus ex influxu eorum prouenientium rationali creatura dignissima est, valdeque utilis ad Dei notitiam consequendam, propriasque dirigendas operationes.

Totius operis diuisio.

Diuisio huius operis trimembris est, nam licet quatuor libris fuerit ab Aristotele ordinatum, atque distinctum, tria tantum in eis docet: in primo quidem naturam vniuersi, & partes, quibus componitur, in vniuersali explicans, atque etiam proprietates in particulari. In secundo præcipuam eius partem, nempe cæleste corpus, variòsque motus, atque virtutes, & influentias. In tertio, & quarto agit de elementis, & eorum motibus.

Diuisio primi libri.

Primum tandem librum in tres alias partes sic possumus distribuere: vt in prima ostendat Aristoteles vniuersum perfectum esse quinque corporibus constitutum; nam præter quatuor

tuor consueta elementa, quæ suis rectis motibus sursum, ac deorsum mouentur, quantum aliud ponendum esse probat alterius naturæ, cui non motus rectus, sed circularis naturaliter conueniat. In secundo ostendit mundum, & numero, & magnitudine finitum esse, ita ut neque ullum corpus actu infinitum compleatur, neque plures sint mundi, sed vnus duntaxat: & tandem ingenerabilem, & incorruptibilem, neque initium durationis habuisse, neque finem aliquando habiturum.

CAPVT I.

Textus Aristotelis.

Scientia de natura ferè plurima videtur circa corpora, & magnitudines, &c.

Breuis expositio textus.

INtentum Aristotelis in hoc capite primo, est ostendere, vniuersum esse perfectum. Diuiditur autem in duas partes: in priori quædam præsupponit, & probat, ex quibus in posteriori concludit intentum. Primum suppositum vniuersalissimum est, videlicet naturalem philosophiam maxima ex parte versari circa corpora, & magnitudines, & eorum proprietates: corpora scilicet prædicamenti substantiæ, & magnitudines prædicamenti quantitatis, quia philosophia naturalis versatur circa naturam, vel ens naturale: sed corpora, & magnitudines sunt entia naturalia, aut secundum naturam: ergo versatur circa hæc. Vnde etiam sequitur ad eandem philosophiam pertinere, quod de vniuerso probet perfectum esse, cum sit corpus naturale, atque ex naturalibus corporibus compositum.

Cætera, quæ præsupponit, particularia sunt, & tria: primum est definitio continui, quod sit diuisibile in semper diuisibilia, quæ definitio materialis vocatur, quia per eam explicatur continuum secundum partes integrantes, quæ sunt quasi materia eius: illa verò, quam assignauit Aristoteles ipse 5. lib. physico- rum, nempe continuum est, cuius partes copulantur ad vnum terminum communem, formalis dicitur; quia modi vnionis, quibus vniuntur partes, & vocantur indiuisibilia earum, quasi forma sunt eiusdem continui, ut talis, cum continuitatem eius constituent. Secundum præsuppositum est, quod corpus sit omniquaque seu omni ex parte diuisibile, hoc est, diuisibile secundum omnem dimensionem, quod sic probat: linea est diuisibilis secundum vnâ dimensionem longitudinis: superficies secundum duas, longitudinis, & latitudinis: corpus secundum tres, longitudinis, latitudinis, & profunditatis: sed præter has dimensiones nec datur alia, nec probabilis est, quod

fufius probat Aristoteles : ergo corpus est diuifibile , fecundum omnem dimensionem , & ideo omni ex parte diuifibile.

Ex his probat iam intentum , nempe vniuerfum effe perfectum quid in fua fpecie , & ordine . Primum quidem ex eo , quod est corpus , quia corpus est perfectum quid , cum complectatur omnem dimensionem : fed vniuerfum est corpus , immo ex quinque corporibus compositum : ergo est quid perfectum . Secundo , nam corpus , quod nec est pars alterius , nec ab eo continetur , aut circunfcribitur , perfectum quid est , cum careat imperfectione partis , & limitatione circunfcribentis : quod enim ab alio circunfcribitur , quafi limitari ab eo cenfetur : fed vniuerfum continet omnia corpora , & à nullo continetur , vt per fe patet : ergo perfectum quid est in fua fpecie , & ordine rei corporæ .

QVÆSTIO . VNICA.

An mundus perfectus fit , vt decernit Aristoteles .

EX tribus præfertim (omiffis aliis) ostendi poteft , mundum non effe perfectum , vt contendit Aristoteles . Primum ex definitione perfecti , ab omnibus admiſſa , videlicet perfectum est , cui nihil deest ; ex iis faltem , quæ fux naturæ conuenire apta sunt , ei que debita ; fed mundo defunt plura , quæ fux naturæ conuenire apta sunt : ergo imperfectum quid effe cenſebitur . Minorem probo , quia mundus est vniuerſum quoddam , ad cuius vniuerſalem rationem pertinent in primis omnes gradus effendi , atque etiam ſpecies omnes poſſibiles , atque indiuidua , in quibus iidey gradus effendi ſubſiſtere apti ſunt : fed conſtat , pluribus carere ſpeciebus , atque indiuiduis ſub eiſdem gradibus effendi comprehenſis , quæ à Deo fieri poſſunt : nam ſub quolibet gradu effendi naturaliter poteſt Deus plures ſpecies condere , vt ſub gradu effendi incorruptibilitium corporum , plures cælos numero , atque ſpecie diuerſos , & pariter ſub reliquis : ergo multa defunt huic mundo ei conuenire apta , & propterea perfectum effe non poteſt . Cui adiungi poteſt proprietas illa mali ab omnibus admiſſa , videlicet ex quocunque defectu conſurgere : ſed mundus plures defectus habet , vt monſtra , & peccata : ergo malum erit ſimpliciter , & ex conſequenti imperfectum . Nec ſoluit argumentum vulgaris reſponſio , quod ex his defectibus conſurgit mira quædam varietas , maiorem perfectionem eidem mundo conferens , quàm ſine his haberet . Nam contrà hoc eſt , quod longè perfectior foret mundus ſine hiſ , vt conſtaret , ſi in primo ſtatu innocentie duraret homo , & abſeſſent peccata , quibus non ſolum deordinatur homo à ſuo
fine,

siue, sed etiam suo modo reliquæ creaturæ, nam malus usus earum quandam deformitatem eis conferre notum est. Secundo, quia mundus ex vna parte caret perfectioribus modis essendi creaturarum, nam spiritualia, vt Angeli, extra mundum esse censentur, cum sub gradu essendi corporeo non comprehendantur. Vnde superhumanas mentes eos vocat D. Dionysius 3. cap. de cælesti hierarchia, quasi extra mundi ordinem consistentes, sed modi essendi censentur quasi partes essentielles eius: ergo aliquo ex eis carens mundus non erit perfectus. Ex alia verò parte multa habet superflua, qualia sunt mixta omnia, quibus carebit post diem iudicii, & sine quibus non erit minus, sed magis perfectus: nam quod perfectiorem statum tunc habiturus sit, docent sancti Patres, & ex sacra pagina id colligunt. Et tercio tandem probatur, quia rationes Aristotelis, quibus probauit vniuersum esse perfectum, nullius momenti sunt: ergo fundamento carebit id affirmare. Probatur antecedens: nam ratio prior eius est, quia corpus est perfectum quid, cum sit diuisibile secundum omnem dimensionem, nempe longitudinem, latitudinem, & profunditatem: ergo vniuersum ex corporibus constitutum perfectum quid erit. Sed quam friuola sit hæc ratio, constat: nam si hoc sufficeret ad perfectionem, etiam foret perfectum, quamuis confusè, & sine ordine haberet eadem corpora, quæ nunc habet, quia corpus esset, & ex corporibus constitutum. Ratio etiam posterior inefficax est, quod vniuersum sit perfectum, quia à nullo continetur, nam locus non continetur ab alio, & est quid imperfectum.

His tamen non obstantibus dicendum est, vniuersum esse perfectum, non quidem absolute, quia nulla creatura potest hoc modo esse perfecta, sicut nec potest carere imperfectionibus, in ratione ipsa creaturæ necessariò inclusis, sed in suo genere, & gradu, eo videlicet modo, quo creatura perfecta esse potest, si habeat quidquid naturæ suæ debitum, atque conueniens est.

Quod probatur 1. ex verbis sacre pagine Gen. 1. vbi postquam Deus vniuersum condidit, quasi actu quodam reflexo (nostro modo intelligendi) opus suum respiciens approbavit illis verbis: *Vidit Deus cuncta, quæ fecerat, & erant valde bona:* quasi dixerit consummatum, atque in suo ordine perfectum esse. Probatur etiam ratione, quia illud est perfectum in suo genere, & ordine, cui nihil perfectionis suæ naturæ debitæ, atque congruentis deest: vt homo vel Angelus perfecti dicuntur, si nihil debitum, aut congruens naturæ humanæ, aut angelicæ eis desit. Sed vniuerso nihil deest naturæ eius debitum: ergo in suo ordine perfectum censetur. Minorem probo, quia perfectior essentialis totius consurgit ex perfectione partium essentialium.

lium, debito modo ordinarum, & perfectio substantialis, seu integralis ex partibus integrantibus, quas eadem natura postulat; ab essentia verò sic perfecta emanant proprietates, aut passionibus eidem naturæ debitæ, & suo modo accidentia, spectantia ad ornatum: sed hæc omnia habet vniuersum: ergo perfectum censeretur debet. Probo iterum minorem, quia partes essentielles vniuersi sunt omnes modi essendi per genera, & species distributi, & in earum indiuiduis subsistentes. Quos vniuersum continere manifestum est, cum non sint alij modi essendi excogitabiles, præter eos, ex quibus prædicamentum substantiæ, & nouem accidentium coalescunt, sub quibus genera omnia, species, & indiuidua, continentur, & consequenter eorum proprietates, & accidentia, ut modi essendi corporeæ substantiæ, & spiritualis corporum simplicium, atque mixtorum, viuentium & vitæ expertium, modi item essendi naturæ sensitiuæ, atque insensibilis, & tandem modus essendi naturæ rationalis, cum proprietatibus, & accidentibus omnium. Ex quibus nouem prædicamenta accidentium constituuntur, & hæc sunt quasi partes materiales vniuersi: forma verò censetur esse debita ordinatio horum omnium, quam non est minus notum habere inter sese: nam hos omnes gradus essentialiter subordinatos esse constat, genera etiam, atque species, per quæ dispersi sunt, & singulis speciebus subordinantur indiuidua, à quibus participantur, & in quibus subsistunt. Proprietates verò, & accidentia eiusdem generibus, speciebus, & indiuiduis, à quibus emanant, atque dependent, & sustentantur; negari ergo non potest, vniuersum habere quidquid perfectionis essentialis, substantialis, & accidentalis, materialis, & formalis, postulat natura eius, & ex consequenti, quòd sit in suo ordine, & gradu perfectum, ut Aristot. cap. præsentis docet, & tenet cum eo communis consensus SS. Patrum, Scholasticorum, atque Philosophorum.

Ad primum argumentum neganda est minor, quòd vniuersum careat speciebus, & indiuiduis, quæ potest Deus efficere: nam licet ei plura ex his addere possit, non sunt tamen ei debita neque necessaria, quia ad finem cuius gratia illud condidit, & ad effectus, pro quibus præstandis conditum est, sufficiunt ei species, & indiuidua, quæ habet, per quem omnes gradus essendi sufficienter manifestantur. Ad aliud verò, quod de defectibus additur, fatemur eos habere, sed negamus, ita ab eis infici, ut imperfectius reddatur, ac foret, si eis careret: nam huiusmodi defectus duplices sunt, naturales, & liberi, & de naturalibus notum est, occasionaliter perficere vniuersum, nam bona quæ sunt in vniuerso, pulchriora ex eorum comparatione apparent, & ex vtriusque mixta quædam varietas consurgit, qua careret vniuersum

sum eis orbatum. De defectibus autem liberis non est minus manifestum, nam etsi vitia, & peccata in se, & per se mala sint, multis virtutibus exercendis occasionem præbent, ut vindicti-
uæ iustitiæ, patientiæ, & misericordiæ Dei, quæ etiam magis vi-
riorum comparatione splendet. Et quamvis aliis bonis occasio-
nem non præbuissem, id sufficeret profectò, quòd iuxta D.
Thomæ, & aliorum sententiam, valde probabilem, bono quo-
dam infinito careret mundus, nisi peccata adessent, nempe
Christi incarnatione, per quam Deum nostrum verum homi-
nem habemus, & veram vniuersi partem, à qua plus decoris ac-
cipit, quàm à cæteris omnibus speciebus, & indiuiduis. Vnde sit
maiorē longè perfectionem habere post peccatum, quàm ha-
buisset, si status innocentiae duraret: præterquam quòd hic ser-
mo est de perfectione vniuersi in esse naturali, non in esse mo-
rali. Ad secundum neganda est maior, quòd mundus careat gra-
du essendi rerum spiritualium; nam licet Angeli non sint par-
tes mundi elementaris, sed quibus mediis plura ad eum spe-
ctantia administrantur à Deo, sunt tamen partes vniuersi,
de quo præfens controuersia procedit ad plura se extendens,
& omnes gradus essendi complectens. Ad aliud verò, quòd
de mixtis additur, negamus, quòd superflua sint, immò in suo
gradu essendi, & ad humanos vsus pro statu præsentī necessa-
ria. In posteriori verò statu, videlicet post iudicium cessabit
posterior hæc necessitas conditione hominis (cuius gratia facta
sunt) variata, & sufficiet gradum essendi eorum in specie huma-
na permanere.

Ad tertium respondeo, vtrunque argumentum Aristotelis
probabile tantum esse, & quasi congruentiam quandam; nam
si corpus in suo ordine quantitativo perfectum quid est, quia
continet omnes dimensiones, sic vniuersum ex corporibus
compositum, & omnia corpora continens, perfectum in suo
genere erit, omnia verò continere intelligit ordinata, atque dis-
posita, ut postulat natura eorum: quare non sequitur perfectum
fore, etiam si confusa quadam ratione ea contineret. Ratio etiam
posterior duo assumit, primum, quòd omnia contineat vniuer-
sum, ordinata quidem, & à nullo contineatur. Ex quibus proba-
biliter sequitur esse perfectum, sed ratio à nobis adducta in
eisdem argumentis Aristotelicis virtute contenta efficax est.
Ratio posterior etiam vnum præsupponit, nempe quòd vni-
uersum omnia contineat iuxta eorum naturas ordinata, & aliud
assumit, quòd à nullo contineatur, ex quibus satis probabiliter
sequitur, quòd perfectum sit,

CAPVT II.

Textus Aristotelis.

*De his autem, quæ secundum speciem ipsius partes sunt,
nunc dicamus, &c.*

Expositio textus.

Ostenso in 1. capit. quod vniuersum sit perfectum, incipit in hoc 1. agere de partibus eius, & primò de calo, tanquam de perfectiori, de quo primò ostendit, quod sit in rerum natura. Diuiditur autem in duas partes, in priori quædam præsupponit necessaria ad id probandum, in posteriori id probat quinque argumentis.

Primum præsuppositum est, corpora omnia moueri motu locali, nam cum natura consent, quæ principium motus localis est, necessariò debent moueri tali motu. Secundò præsupponit motum localem in communi triplicem esse, nempe circularem, quo mouetur corpus ab eodem in idem, hoc est, in eodem loco, vel spatio circumuoluitur, & rectum, quo mouetur ab vno in alterum locum, & isti quidem sunt motus simplices, sed tertius, quasi ex utroque mixtus, vel compositus est, vt motus papyri, aut alterius rei, quæ hac, & illac mouetur, & non à determinato in determinatum locum. Probat verò motus simplices in communi duos tantum esse, videlicet, circularem, & rectum; aut spatia, seu magnitudines, per quas fiunt motus simplices, duæ tantum sunt, nempe circularis, & recta: sed in particulari sunt tres, quia rectus diuiditur in motum deorsum, & in motum sursum.

Quibus præsuppositis probat, quod præter quatuor elementa, ponendum sit quintum corpus simplex, quinque argumentis. Primum est, omnis motus simplex conuenit naturaliter alicui corpori simplici, sed circularis motus est simplex, & non conuenit elementis; ergo præter quatuor elementa dari debet aliud corpus simplex, cui naturaliter conueniat. Secundum, motus circularis conuenit calo naturaliter, seu violenter, si naturaliter ei conuenit, cum elementa habeant proprios motus naturales, sursum, vel deorsum, & vnum corpus vnum tantum motum habere possit, sequitur cælum elementum esse non posse: si violenter ei conuenit, & non est corpus distinctum ab elementis, cuilibet elemento erit duplex contrarium, scilicet motus sursum, aut deorsum, & circularis, cum tamen vnum plura contraria non habeat.

Tertium, nobilior motus, & natura prior cæteris, nobiliori corpori debet conuenire: sed motus circularis est nobilior,

lior, ac prior natuta cæteris motibus, utpote per lineam perfectiorem factus: ergo priori, ac nobiliori corpori, quàm elementis, debet conuenire.

Quantum, motus circularis naturaliter non conuenit elementis, cum ex propria natura moueantur motu recto sursum, aut deorsum: ergo conuenit eis præter naturam: sed motus conueniens alicui corpori præter naturam, non potest non alteri naturaliter conuenire: ergo præter illa datur quantum corpus simplex, cui conueniat motus circularis.

Vltimum argumentum, euidens est dari in rerum natura motum circularem, & simplicem, vel ergo datur corpus, cui sit naturalis, vel non: non dari repugnat, quia cum motus circularis sit perfectissimus, alicui corpori naturaliter accommodari potest, & cum sit perpetuus, ut 8. libro physicorum probauimus, non potest conuenire alicui violenter, quia violentum non est perpetuum, ergo necesse est naturaliter conuenire alicui corpori, quod cum non possit esse aliquod ex elementis, necesse est quantum aliud corpus præter illa ponere, cui naturaliter conueniat, & quod longè perfectioris naturæ sit cæteris omnibus corporibus sublunaribus.

Q V Æ S T I O I.

An diuisio motus in rectum, circularem, & mixtum, ab Aristotele tradita, sit adæquata.

Adnotandum est, simplicitatem vel compositionem motus desumendam esse ex simplicitate lineæ, seu spatij, aut contrapositione eiusdem, & ex simplicitate, aut contrapositione principij motiui: lineæ verò simplex mathematicè sumpta, si recta sit, ita definienda est, *Quæ ab uno ad aliud punctum, quàm brevissimè pertingit.* Circularis verò, *Cuius omnes partes ab aliquo uno puncto æquè distant.* Mixta autem erit, *quæ inter duo puncta non omnino brevissimè extenditur.*

Potentia autem motiua simplex ea est, quæ per se ad vnum tantum locum, seu vbi inclinat: potentia mixta, seu composita, quæ ad loca vel vbi diuersa tendit. Iuxta hæc igitur sic definiri debet motus simplex: *Qui fit à simplici virtute, seu potentia motiua physica super magnitudinem seu spatium simplex.* Motus verò mixtus: *Qui fit à virtute motiua mixta, seu composita, per spatium, vel magnitudinem, aut lineam compositam.*

Sensus igitur quæstionis talis est, an motus localis naturalis, ut distinguitur à motu progressiuo, & solum conuenit corporibus non viucentibus, rectè, & adæquatè sit diuisus ab Aristotele in tria illa membra, nempe, rectum, circulare, & ex utroque

que mixtum. Et videtur, non esse bonam diuisionem, quia præter hos tres motus dantur alij non comprehensi sub eis, nec ad eos reducibiles: ergo non est adæquata, nec bona diuisio. Antecedens probatur ex tribus; nam si portio aliqua ignis, vel terræ proiiciatur ab Oriente in Occidentem per lineam rectam, talis motus non erit rectus, quia nec est motus sursum, nec deorsum (in quos adæquatè diuiditur motus rectus ab Aristotele hoc loco) cum nec sit à medio, seu à centro, nec ad medium, seu centrum tendat. Præterea, si portio aëris moueatur à concavo Lunæ usque ad proprium locum, seu sphaeram per lineam rectam, talis motus, cum sit simplex, non est circularis, ut per se patet, sed neque rectus, cum nec sit à centro mundi, nec ad idem centrum tendat; ergo sub hac diuisione non comprehenditur. Et tandem, si formica moueretur in circulo iuxta centrum terræ, talis motus non esset mixtus, quia fieret æqualiter circa medium; sed nec simplex, cum esset corporis mixti, ergo nec potest comprehendi sub aliquo membro huius diuisionis.

His tamen non obstantibus, tenendum nobis est, diuisionem ab Aristotele constitutam bonam esse, & adæquatam; ita sentiunt omnes eius interpretes, capite præsentis. Alexander, Simplicius, Themistius, Albertus Magnus, D. Thomas, atque etiam D. Damascenus in sua Physica, capite 6. Et probatur hac ratione: motus naturalis propriè sumptus, hoc est, immediatè, & per se procedens à natura mobili, nec ab intellectu, voluntate, aut appetitu dependens, quem Aristoteles diuisit, solum habet tria illa membra, nempe, rectum, circularem, & mixtum ex utroque: ergo rectè, & adæquatè in ea diuiditur. Probatur minor, quia non est excogitabilis particularis motus naturalis, qui non procedat ab aliqua virtute simplici, aut mixta, & qui non fiat per simplicem lineam, aut mixtam, & qui non procedat à medio, vel in medium tendat, seu circa medium fiat, & ita qui non sit circularis, vel rectus, aut ex utroque mixtus, vel sub his membris comprehendatur. Quod probatur etiam ex solutione argumenti propositi: nam ad formam eius negandum est antecedens, quod sub motu naturali propriè sumpto (ut accipitur ab Aristotele) comprehendantur alia membra, præter illa tria: nam motus, quo moueretur portio ignis, vel terræ ab oriente in occidentem, non foret naturalis, nec à naturali virtute eorum procederet, sed purè ab extrinseco proiiciente, & quidem libero, vel casuali, aut contingente, ut per se est manifestum: quare nec sub diuiso eiusdem diuisionis comprehenderetur, & pariter dicendum foret de motu formicæ circa centrum, cum sit motus progressiuus ab appetitu, & cognitione sensitiva procedens, & ideo non naturalis propriè sumptus: motus denique particulæ
aëris

aëris à concavo Lunæ ad propriam sphaeram verè est motus rectus, inimò verò est motus sursum, quia ad locum, qui verè, ac secundùm naturalem ordinem, ac dispositionem mundi, sursum est, tendit per eum corpus, & quamvis à loco sursum proficiscatur, virtute dicitur, talis motus esse à centro mundi, eo ipso, quòd tendit in locum centro oppositum, quia motus naturalis inter terminos formaliter, aut virtualiter oppositos versari debet: ac propterea, quilibet locus, à quo tendit mobile, in proprium, ac naturalem, habet rationem oppositi. An vero tales motus & oppositi, quibus corpus naturaliter tendit in locum proprium, medium quidem inter centrum, & concavum Lunæ sint formaliter ad medium, vel à medio, ita ut mobile per se tendat in locum extremum, ad quem perveniret naturaliter, nisi impediretur à corpore medio, vel certè in medio ipso sisteret, quamvis ibi nullum foret corpus impediens, inferiùs discutietur.

QVÆSTIO II.

An motus circularis, quo movetur cælum, sit ei naturalis, vel præter naturam.

Qvæstio procedit in communi de cælesti corpore, ac motu eius circulari, & non inquirimus, an ei conveniat violentè, quia neminem unquam dixisse reperio violentum ei esse: cum enim constet, cælum esse præcipuum corpus simplex, ex quo uniuersum componitur, satis est per se manifestum, supremum situm, quem habet supra elementa, esse ei naturalem: quòd igitur in illo eodem situ circumvoluatur, non potest esse violentum, quia nec illum deserit per motum, nec motus ipse eum non deserendo contra aliquam inclinationem naturalem, eiusdem corporis esse potest, nec proinde violentus, quia violentum est contra inclinationem naturalem: solum ergo quærit titulus quæstionis, an sit ei naturalis, vel præter naturam.

Et prior sententia tenet motum circula rem non esse naturalem cælo, sed præter naturam: ita Anicena 9. libro suæ Metaphysicæ capit. 1. Albertus Magnus 2. libro Physicorum titul. 1. cap. 2. Scotus in 1. distinct. 2. quæst. 6. & in 4. distinct. 48. quæst. 1. Richardus in 1. distinct. 14. quæst. 6. Durandus ibidem, quæst. 1. & cum eis recentiores nonnulli. Probatur primò, quia non procedit ex naturali inclinatione cælo, nec ex contraria, sed à causa extrinseca mouente: ergo. Secundo, quia natura semper operatur propter aliquem finem, ut 1. libro Physicorum capit. 8. docuit Aristoteles: ergo omnis motus naturalis propter aliquem finem naturalem esse debet, ad cuius constitutionem ordinetur: sed nullus est finis naturalis, propter quem possit moveri cælum: ergo motus eius naturalis esse non potest.

potest. Probatur minor, quia si aliquis esset, maximè locus aliquis, aut ubi sibi adquirendum per motum, sed constat, in nullum locum naturaliter inclinari, sed in illo, quem à principio dedit illi Deus, supra omnia corpora contentum esse, nec appetere modum aliquem se habendi in eo diuersum ab eo, quem habuit in primo statu suæ conditionis, quia omnes modi, omnesque dispositiones, quas habere potest, aut variare in eo, sunt eiusdem rationis, & propterea nullam appetit potius, quàm aliam, ergo nec pro variatione earum potest naturaliter moueri. Immo, quod amplius est, nec locus ille, aut situs supremus potest esse ei naturalis, quare nec naturale esse potest ei in eo circunvolui. Probatur antecedens, quia solum esse potest locus naturalis corpori, ut in eo conseruetur, sed cælum non pendet à loco in conseruari, cum sit sua natura incorruptibile, & ideo eodem modo in quocunque conseruetur loco immò etiam si in loco non sit, ut de prima sphaera docuit Aristoteles 4. lib. physicorum: ergo nullus locus potest esse ei naturalis. præterea, quia si locus esset naturalis cælo; ergo naturaliter quiescit in eo, sicut terra, vel aqua in propriis, quare quies erit ei naturalis, motus verò nullo modo. Probatur tandem, quia motus sua natura perpetuus opponitur quieti, ergo cui naturalis est talis motus, violenta erit quies: ex quo inferitur, cælum non nisi violententer quiescere posse, & cum sit certum, motum eius, usque ad diem iudicii, & non amplius duraturum, sequitur violentam ei fore quietem, quod patet esse impossibile, cum perpetuo duratura sit, & nihil violentum sit perpetuum, ut inferius docet Aristoteles. Immo ex alia parte, si naturalis sit ei motus, videtur necessarii quietem quoque naturalem ei esse; quemadmodum quia naturalis est terræ motus deorsum, naturalis est ei quies in centro, & vniuersaliter loquendo cuicunque naturalis est motus, naturalis videtur esse quies ei opposita: quare si cælum mouetur naturaliter, quiescet quoque naturaliter, quod patet esse falsum, cum constet per miraculum quieturum post diem iudicii.

Secunda opinio opposita est asserens, motum circularem naturalem esse corpori cælesti, quam sequuti sunt omnes ferè antiquiores philosophi, Porphyrius, Auerroës, philo, quos refert, ac sequitur Simplicius 2. libro physicorum tex. 3. atque etiam D. Damascenus capit. 6. suæ Philosophiæ, Plotinus lib. 1. Æneidos 2. capit. 8. D. Thomas 3. contra Gentes, capit. 21. & ibidem Ferraricus 1. parte, & 12. quæst. 6. art. 5. ad secundum. D. Bonauentura in 2. distin. 14. artic. 1. Capreolus in 2. distin. 9. quæst. 1. artic. 3. Soncinas 12. Metaphysicæ, quæst. 11. ad 2. Sotus 1. lib. physicorum, quæst. 1. & ibidem Toletus. Vererius lib. 7. suæ Philosophiæ, cap.

cap. 7. & 10. Conim. lib. 1. de celo, capit. 2. quest. 3. artic. 2. Probatur ex illo principio Aristot. cap. præfenti, videlicet quicunque corpori naturali conuenit aliquis motus naturalis, quia natura est principium motus, sed cælum est corpus naturale, cum componatur ex materia, & forma, quibus conuenit ratio naturæ: ergo necesse est ei tribuere aliquem motum naturalem, nec habet alterum præter circula-rem: ergo hic erit ei naturalis. Probatur deinde ratione, quia perfectio propriæ naturæ quicunque est naturalis, & in eam inclinatur naturaliter: sed motus circularis est propria, & maxima perfectio cælestis corporis, cum se communicet per eum his inferioribus, & maximam perfectionem eis tribuat, quare necesse est, esse illi naturalem, & in eum inclinari naturaliter.

Nostra sententiâ duabus assertionibus explicatur: prior fit, considerato cælo, ut est particulare corpus ex tali materia, & forma compositum, non est illi naturalis motus, sed præter naturam eius ab agente extrinseco, ac libero illatus. Probatur, quia cum motus sit via in terminum, solum potest in eum inclinari corpus naturaliter; quia aliquem terminum per eum consequendum appetat: sed nullus datur terminus consequendus per motum, quem cælum appetat naturaliter: ergo nec potest motum ipsum naturaliter appetere, aut in eum inclinari, & ex consequenti, nec erit ei naturalis. Minorem sic probo, non est excogitabilis alius terminus, acquirendus per motum circula-rem, nisi nouus aliquis modus præsentie in eodem situ, per quem alio modo se habeat cælum, in ordine ad spatium secundum diuersam situationem partium, quam prius habebat, sed talis modus præsentie est eiusdem prorsus rationis cum eo, quem prius habebat, nec aliquam nouam perfectionem ei affert diuersæ conditionis ab ea, quam habebat: ergo nec talem modum, nec talem motum, per quem acquiratur, potest appetere, immò nec magis motum, quam quietem. Confirmatur, quia elementa, & alia corpora mixta, non appetunt moueri, nisi quando carent aliqua perfectione ad illam consequendam per motum: sed corpus cæleste non indiget alio ubi, ut conseruetur, & perficiatur: ergo per se, & ratione sui non appetit moueri, nec in motum localem inclinatur, ergo, &c. & hoc probant argumenta prioris sententiæ, quæ in hoc sensu vera est.

Assertio posterior: si cælum consideretur, ut pars præcipua vniuersi cum hac varietate, ac vicissitudine generationum, & corruptionum à Deo conditi, habens naturales virtutes, per quas influit in inferiora corpora, naturalis est ei motus, & in hoc sensu loquitur posterior sententiâ, quam veram esse censemus, & expressam ab Aristotele capite præfenti; ubi ex motu circulari pro

probasse vidimus, ponendum esse quintum corpus, præter quatuor consueta elementa, cui naturalis sit motus circularis. Ita enim arguit, motus recti naturales sunt aliquibus corporibus, & ideo necesse est ponere corpora aliqua, quæ moueantur naturaliter sursum, & deorsum, quæ elementa vocamus: ergo circularis motus debet alicui corpori naturaliter conuenire; sed constat, non esse naturalem elementis, cum moueantur naturaliter sursum ac deorsum: ergo præter illa ponendum est quintum, cui naturaliter conueniat, & hoc est cælum. Expressa est igitur sententia Aristotelis, quod motus circularis sit naturalis cælo, sed probatum est, non esse ei naturalem, considerato secundum rationem particularis corporis: ergo necessarium est, in doctrina Aristotelis asserere, quod sit ei naturalis, vt corpori vniuersali, hoc est, vt parti vniuersi supremæ habenti naturales virtutes, atque vniuersales, per quas vniuersalis est causa inferiorum effectuum. Quod etiam D. Thomas docet quæst. 5. de potentia, quæstiuncula 5. artic. 3. in 4. distinctione 48. artic. 1. & 3. contra gentes capite 13. affirmans, cælum æqualiter se habere ad omnia vbi, vel ad omnes modos præsentia, quos acquirit per motum, & ideo vnum habens non appetit naturaliter alterum, quia ex eius acquisitione non acquirit perfectionem alterius conditionis ab ea, quam habebat, nec pro eo acquirendo mouetur, nec morus, quem habet, naturalis est propter eum acquirendum, sed præcisè, vt diuerso modo applicatum secundum diuersas partes ad hæc inferiora, diuersam virtutem, diuersosque effectus eis communicet, & præsertim speciei humanæ, cui communicat noua indiuidua, in quantum sua virtute disponit materiam pro introductione nouarum animarum, & generatione nouorum hominum, simul concurrento cum particularibus causis generantibus, & hunc asserit esse finem intentum per motum cælestis corporis ex quo habet, quod sit ei naturalis.

Sed ratione probatur eadem assertio, quia pars quælibet naturalem habet inclinationem ad bonum totius, & longè maiorem, quò bonum totius maius, ac perfectius est bono cuiuslibet partis: sed cælum est pars vniuersi, & præcipua, ac prima, ergo habet inclinationem naturalem ad bonum eius, quod in generatione, & conseruatione sublunarium corporum consistere notum est, nec minus notum, quod idem bonum magna ex parte deriuetur ex virtutibus, atque influentiis cælestibus medio motu applicatis: ergo procedit idem motus ex naturali inclinatione cælestis corporis ad idem bonum communicandum, quare naturalis erit cælo, vt principio passiuo composito ex materia, & formâ, cum sit medium à natura ordinatum pro consecutione naturalis finis.

Et ex his constat ad primum argumentum prioris sententiæ. Ad secundum neganda est minor, & quæ adducuntur ad illius probationem solum probant nostram primam conclusionem. Ad tertium negamus antecedens, & illius probationem, licet enim cælo non sit naturalis locus aut præsentia ob illius conseruationem, quia incorruptibile est, tamen naturalis est præsentia super alia corpora & ratione propriæ dignitatis præ aliis corporibus simplicibus, & propter eius influxum in sublunaria transiliendum.

APPENDIX. DVBIUM.

*An quies calorum post diem iudicij futura sit naturalis,
aut violenta.*

Circa quietem verò in eodem loco, vel ubi, quæ tangitur in eodem argumento, atque etiam in postremo, diuerso modo loquuntur recentiores philosophi: nam quidam non esse cælo naturalem asserunt ex mente Aristotelis, qui tenuit, deum non liberè, sed ex necessitate applicare intelligentias ad mouenda cælestia corpora, & ideò non liberè, sed ex determinatione ad vnum ea perpetuò mouere, quo fit, non esse possibile à motu vnquam cessare, quod vt significaret lib. 9. Metaphysicæ c. 4. tex. 17. dixit non esse pertimescendum, ne cælestia corpora stent, quia non inest eis potentia contradictionis, hoc est, vt moueantur, & non moueantur: & ita docent, tenuisse cum Aristotele omnes fermè Græcos interpretes 2. li. physicorum. Vt Themistium, Philoponum, Simplicium, & Alexandrum 2. li. naturalium quæst. c. 18. & ex Latinis nonnullos. Ipsi tamen, recentiores putant, nō esse ita sentiendum, sed potiùs quietem esse naturalem cælo. Quod probant primò, quia cælum sic mouetur naturaliter, vt non à principio effectiuo intrinseco, sed extrinseco moueatur: ergo propria natura habet potentiam solum passiuam ad motum, & indifferentem quidem, vt moueri possit, & non moueri ab Angelo: quo fit, vtrunque esse ei naturale, nempe moueri ab eo, & non moueri, aut moueri, & quiescere. Secundò, omnis quies in loco naturali naturalis est corpori, vt elementis quies in propriis locis, ergo cælo erit naturalis quies in loco supremo ei proprio, ac naturali.

Ego vetò (quicquid sit de mente Aristotelis, circa modum, quo mouentur cæli ab Angelis, de quo suo loco dicam) cum D. Thoma in 4. dist. 48. q. 1. artic. 1. & cum omnibus ferè recentioribus assero, cælum nullum habere principium actiuum motus, sed passiuum duntaxat, vt docui 1. libro physicorum explicans definitionem naturæ, & ideò quietem non esse ei naturalem, sed præter naturam, quia solum ex propria natura, & di-

guitate primi, ac nobilissimi corporis postulat, supra cætera corpora esse, quod verò supra illa sit cuni motu, aut sine illo, à causa extrinseca solum habet; ergo si solum habere considerationem particularis corporis præter naturam foret moueri, atque etiam à motu quiescere: vt verò habet aliam considerationem partis vniuersæ cum mutabilitate, ac vicissitudine conditi, & partis quidem vniuersalis, ac primæ, habentisque virtutes naturales, per quas multa bona potest conferre eidem vniuerso in eodem vicissitudinis statu existenti, quod non potest ea præstare nisi medio motu, postulat motum naturalem, quandiu idem vniuersum in eodem vicissitudinis, ac mutabilitatis statu perseverat: statu tamen variato, & eadem vicissitudine cessante, cessat quoque inclinatio naturalis ad motum, quia cessante fine, cessat necessitas medij, & iam cælum non est pars mundi variabilis, aut vicissitudinem habentis, & cum varietur status mundi ab extrinseca causa, nempe diuina voluntate, ab eodem fit, vt quiescat cælum, & non à propria natura, & propterea quies non est naturalis, sed præter naturam.

Sed potest obijci aduersus hanc doctrinam hoc modo: inclinatio naturalis cæli ad motum prouenit ex situ naturali ad bonum mundi, quod tanquam pars eius sua virtute potest ei communicare: sed natura cæli est eadem, siue mundus perseveret cum transmutabilitate, ac vicissitudine, cum qua conditus est, siue eam amittat; ergo eadem est inclinatio naturalis in eundem finem, & ex inclinatione ad finem prouenit inclinatio ad medium, quod est motus: ergo eadem perseverat in eo inclinatio naturalis ad motum, contra quam erit quies, & consequenter violenta. Et vrgeri potest hæc ratio, quia cessatio generationum non erit naturalis, sed liberè facta à Deo: ergo non potest tollere naturalem inclinationem cæli ad motum, nec proinde efficere potest, quod non sit violenta quies. Respondeo, cælum secundum propriam naturam, & virtutes influendi naturales, naturalem quoque habere inclinationem ad illas exercendas, si adsint corpora inferiora in statu transmutabilitatis, & variationis, & hanc inclinationem nunquam amittit: his verò deficientibus, statumque eorum, non potest eam naturaliter exercere, quare nulla sit ei violentia, si ad eam exercendam non moueatur, aut auxilium ad operandum non tribuatur, quare nec violenta erit quies, nec cessatio ab operationibus, quas habuit in statu transmutabilitatis inferiorum corporum. Et possumus exemplum sumere in igne, naturalem habente inclinationem ad agendum circa passum sibi approximatum, cui absque dubio violentia fiet, si præsentem passum suspendatur ei concursus ad operandum, & tunc quies ab operando violenta erit ei, si verò nullum sit passum
circa

circa quod possit operari, vel certe non sit ei approximatum, nulla prorsus violentia fiet ei, si non conferatur auxilium ad operandum, nec dicitur ei violenta quies ab operando, etiam si eadem eius inclinatio ad operandum perseueret: pariter ergo dicendum est in nostro casu.

Ad primum argumentum *oppositæ* sententiæ distinguenda est posterior pars prioris consequentis, nam consideratum cælum, ut corpus particulare, verum est, indifferens esse ad utrumque, nempe, ut moueatur, & quiescat; sed neganda est posterior, quod utrumque sit ei naturale, immò potius ex indifferentia ad utrumque colligitur planè neutrum esse ei sic considerato naturale, quia quod naturale est respectu alicuius, non est indifferens, sed determinatum ad illud. Cæterum si consideretur, ut pars vniuersi cum transmutabilitate, & vicissitudine conditi, atque existentis, naturalis est ei motus, & violenta foret ei quies, si in tali statu rerum inferiorum sisteret à motu, quòd verò variato eodem statu sistat, violentum non est ei, sed præter naturam, ut expositum est.

Ad secundum verò distinguendum est antecedens, quod omnis quies in loco naturali, naturalis sit corpori: nā si corpus dependeat à loco in sua conseruatione, ita est, & propterea naturalis est quies sublunarium corporum in locis naturalibus: si verò corpus non dependeat in sua conseruatione à loco, ut constat de corpore cælesti, quod cum sit incorruptibile, & perfectissimum, non indiget loco ad propriam conseruationem, sed ubique conseruari potest, tali corpori non est naturalis quies: nam quòd naturale sit ei supra omnia corpora esse, non est quidem naturale propter indigentiam, vel propter ipsum locum, sed merito suæ dignitatis ei conuenit: eiusmodi autem conuenientia abstrahit à motu, & quiete, neutrum postulat, sed sufficienter completur, siue vno, vel alio modo supra illa sit. Ex quibus satis constat ad duo postrema argum. prioris opinionis quæstionis præcedentis.

QVÆSTIO III.

An cæleste corpus à sua sede extractum, vel pars eius ab eo diuisa moueretur naturaliter ad illam, vel naturaliter quiesceret.

Certa res est, nec posse cæleste corpus à propria sede extrahi, nec partem eius ab eo abscindi, atque in loco inferiori collocari naturali aliqua virtute, sed nec diuina per potentiam ordinariam: nec est ininùs certum, utrumque fieri posse per potentiam dei absolutam; nam licet sit naturæ eius dissonum, nullam tamen implicationem contradictionis inuoluit: eadem verò ratio est de toto cælo, & parte eius, ut docuit Aristoteles essequi. text. 19. in fine, quia eadem, inquit, est natura vtriusque.

Conueniunt omnes opinantes , quòd cælum, aut pars eius sic existens non moueretur ad propriam sedem motu naturali à principio intrinseco actiuo , sed ibidem permaneret immobilis, nisi ab extrinseco principio , nempe Deo, moueretur, quod probari potest, quia cum repugnet à propria sede remoueri, non fuit ei concedenda aliqua virtus, per quam possit se restituere, frustra enim foret. Quæ est doctrina Aristotelis cap. 3. huius libri. Quo præsupposito in duobus posita est difficultas quæstionis : vnum est, an quies in tali loco inferiori esset illi naturalis , vel violenta , aut præter naturam : alterum , an si restitueretur in propriam sedem , talis motus esset ei naturalis , vel violentus , aut præter naturam.

Et circa quietem sentiunt Patres Conimb. hic , nullam quietem fore violentam cælo , & ideo , nec in tali loco violenter quiesceret, quod etiam sentiunt recentiores illi , qui tenent non dari violentum, nisi illud, quod est contra impetum rei, hoc est, contra actiuam inclinationem ad oppositum , vt videtur sentire Aristoteles alibi à nobis relatus: sed supponimus non dari in cælo actiuam inclinationem ad motum: ergo repugnat vllam quietem fore ei violentam, iuxta horum sententiam. Alij verò, qui ad rationem violenti putant sufficere , quòd sit contra quamlibet inclinationem naturalem rei, actiuam, aut passiuam, seu formalem (quod & nos scripsimus 2. libro de anima) asserunt violentam esse quietem cælo , aut parti eius in inferioribus existenti. Probant, quia naturale est ei esse in superiori loco tota coniunctam: ergo separari à toto, aut loco eodem violentum est ei: cum sit contra inclinationem naturalem , saltem passiuam, ei, motus, quo separatur , erit quoque violentus: sed quies illa est terminus eiusdem motus : ergo necessario dicendum est esse violentam: probatur consequentia, quia motus quicumque à suo loco naturali, & quies per eum acquisita, violenti sunt.

Circa motum verò totius cæli , aut partis eius in eodem loco inferiori existentis , tenent recentiores quidam moueri posse ab Angelo ad supremum locum , in quo erat , motu naturali. Probant, quia cælo, aut parti eius naturaliter debetur supremum vbi: ergo existens in loco inferiori naturaliter illud appetit: sed motus quo monetur corpus in locum, quem appetit naturaliter, est naturalis : cum procedat ex inclinatione naturali in terminum: ergo talis motus naturalis foret, non quidem à principio actiuo intrinseco, quod diximus non habere cælum, sed solùm à principio passiuo intrinseco, & actiuo extrinseco, sicut mouetur in propria sede. Secundò , quia motus , quo à proprio loco naturali extraheretur, foret violentus: nam impossibile est aliquid separari à proprio loco naturali, nisi per violentiam: cum separatio sit con-

tra naturalem inclinationem eius:ergo motus, quo rediret in eundem locum naturalem,naturalis esse deberet;probatum consequentia, quia tales motus essent contrarij, & ideo si vnus esset violentus, alter deberet esse naturalis. Nostra sententia duplici assertionem explicanda,& probanda est.

Prior est, quietem cæli, aut partis eius in loco inferiori, non esse violentam, sed præternaturalem, quam sic probo. Quies est priuatio motus,& proprius terminus, in quem tendit:ergo eodem modo se habebit respectu eiusdem corporis, cui conueniunt,ita vt si violenta sit ei quies,ita etiam motus,atque ex opposito: sed talis quies est terminus motus, per quem cælum, vel pars eius in loco inferiori perueniunt; non ergo potest esse violenta, nisi violentus fuerit motus, quem terminat:sed talis motus non fuit violentus: ergo nec eadem quies violenta est: probatur minor, quia motus violentus debet esse oppositus motui naturali eiusdem corporis:sed talis motus, per quem cælum, vel pars eius in inferiorem locum peruenisset, non fuisset contrarius motui circulari eiusdem cæli in propria sede, quia motus rectus,& circularis non sunt oppositi, sed quasi disparati:ergo quies per talem motum acquisita non potest esse violenta, sed erit præternaturalis, quia à causa extrinseca præter inclinationem corporis. Secundò,quia si aliqua ratione foret violenta quies illa, & motus similiter, per quem ad talem locum peruenit corpus, ideo esset, quia per vtrumque extrahitur,vel extractum est à propria, & naturali sede:sed hoc non sufficit,vt violenta sit:ergo non est talis censenda. Probatum minor, quia extrahi corpus à proprio loco non est ei violentum,nisi extrahatur per motum oppositum proprio,ac naturali,& tendat in locum oppositum,aut contraria propria,aut propriæ naturæ, vel certè contra propriam inclinationem naturalem detineatur in loco alio: sed nihil horum reperitur in casu præsentis quietis; ergo non potest censi violenta: probatur minor,quia nec motus separationis (qui deorsum est) oppositum habet cum motu circulari cæli,quamuis diuersus sit ab eo, & quasi disparatus, sed nec locus inferior, in quo detinetur, est contrarius cælesti,aut naturæ eiusdem cæli,quia nec cælum, nec spatium eius contrarium habere potest, nec ratione dispositionum,aut qualitatum, nec ratione distantia, quia circulare spatium non potest per lineam rectam comparari alicui spatio inferiori,& ideo nec esse ei contrarium,vel oppositum, cum oppositio harum rerum secundum rectam lineam sumi debeat. Nec tandem violenta est talis quies, quia per eam priuatur corpus loco supremo sibi naturali, & ideo contra naturalem inclinationem:nam esse supra omnia corpora solum est naturale cælo propter congruentiam suæ naturæ perfectissimæ, non tamen vt ac-

quirendum per motum vel retinendum per quietem, quare nec motus ad tale ubi, naturalis esse potest, nec etiam quies in eo. Loquimur verò in quæstione hac de corpore cælesti, aut parte eius abscissa secundum se consideratis, & ut est particulare corpus, nam ut pars vniuersi in statu transmutabilitatis existentis, non potest quiescere, quin ei fiat violentia, non ex eo, quod priuatur supremo ubi secundum se: sed quia extra illud non potest influxum habere in inferiora corpora, ad quem exercendum naturaliter inclinatur.

Affectio posterior: cælum, aut pars eius in loco inferiori existens nullum motum naturalem habere potest, etiam ab extrinseca intelligentia, neque violentum, sed quicumque motus eius præter naturam foret. Hæc conclusio colligitur ex doctrina Aristotelis capite tertio huius libri, ubi negat expressè, quod cælum, vel pars eius possit moueri sursum, vel deorsum: sed talis motus, si daretur, sursum foret: ergo impossibilem esse sentit Aristoteles. Sed respondent recentiores, solum negare Aristotelem cælo, aut parti eius, motum naturalem sursum, ac deorsum à principio intrinseco actiuo, quia tale principium non potest esse nisi grauitas, aut leuitas, quibus carere affirmat corpora cælestia, sed non negat, quod possint moueri motu recto naturali à principio passiuo intrinseco, & actiuo extrinseco. Hæc tamen solutio omnino est insufficiens, & contra mentem, & verba Aristotelis, qui capite præsentis docuit, vni corpori vnam tantum lationem naturalem conuenire posse, & hanc respectu cæli esse circularem, quam ei docet conuenire à principio passiuo intrinseco, & extrinseco actiuo, nempe, intelligentia, ut ostenderetur inferius: ergo censet, nullam lationem rectam naturalem ei posse esse etiam à principio passiuo.

Maneret ergo illa particula cæli immobilis prorsus in loco, in quo per diuinam potentiam poneretur, quia elementa ita amant sua naturalia loca, ut non intendant ab illis expellere aliud, nisi quod fortè acquisitionem ipsius naturalis loci impediat, sicut aqua infusa vasi aërem expellit, ut locus inferior sibi vacet. Quod si elementum sit in sua regione, non intendit expellere aliquid, quod sibi admisceatur: si autem esset aliqua violentia ab extrinseco, posset pars cæli huc illuc circumferri, v. g. si ad implendum vacuum oporteret, ut cæli pars ascenderet, & utique, non tamen esset motus ille contra eius naturam, aliàs si motus sursum contra naturam esset, motus deorsum esset secundum naturam, quod falsum est. Præterea cum pars illa cæli neque grauitatem habeat neque leuitatem, nulli motui posituè resisteret, sed omnis motus ei esset præter naturam, non contra naturam.

Quod si obiicias. Idem est motus totius, & partis, sed totum cælum

cælum mouetur circulariter: ergo pars illa cæli in loco inferiori posita, etiam moueretur circulariter.

Huic obiectioni facile responderetur, illam cæli particulam ab intrinseco non posse moueri circulariter, sicut neque totum cælum ab intrinseco mouetur, sed haberet aptitudinem, vt ab extrinseco talem motum reciperet magis quam alium, & ita posset facile circumferri circa terræ centrum. Motus enim circularis, qui circa terræ centrum non fit, non est simplex, sed compositus ex sursum & deorsum.

Probatum deinde ratione: 1. quia aut talis motus conueniret naturaliter cælo, secundum rationem particularis corporis, vel vt pars est vniuersi cum transmutabilitate existentis, non sub consideratione priori, sub qua probauimus (& concedunt aduersarij) nec motum circularem in propria sede esse illi naturalem, sed præter naturam: ergo erit multò minùs naturalis ei motus rectus. Secundò, quia non est concessa à natura cælo quomodolibet considerato vlla inclinatio ad motum, per quem se restituat in propriam sedem, si ab ea extractum fuerit; nam cum repugnet naturaliter ab ea extrahi, vel extra eam fieri, frustrà daretur ei talis inclinatio, quam exercere naturaliter non posset: sed motus naturalis debet procedere ab inclinatione naturali mobilis: ergo repugnat talem motum fore naturalem cælo, sed præter naturam eius diceretur: & eisdem rationibus probatur violentum esse non posse, cum constet, nulli inclinationi naturali esse oppositum.

Ad primum argumentum contrariæ sententiæ distinguendum est antecedens, quòd naturale sit cælo, aut parti eius supremum vbi: nam si naturale accipiat pro congruenti dignitate, ac nobilitate naturali eius, verum est; si verò ad conseruationem eius necessarium, vel vt consequendum per motum ex inclinatione aliqua naturali; sicut terræ est naturale centrum, erit falsum, vnde quies in alio loco non potest esse ei violenta, nec motus ad proprium vbi naturalis. Ad secundum negandum est antecedens, quòd motus, per quem separaretur à propria sede, foret violentus, & cum dicitur fore contra inclinationem naturalem eius, etiam negamus, quia talis motus esset rectus, cum procederet mobile per eum de loco ad locum. Motus autem rectus non est circulari oppositus, neque alicui inclinationi cælestis corporis, quæ determinatur ad supremum vbi, & non ad motum, per quem illud consequatur, neque ad quietem in eo, cum sit priuatio motus, & ideo non possit habere inclinationem naturalem ad quietem, quod non habet illam ad motum, per quem acquirenda est.

QVÆSTIO IV.

An cælum sit diuersa natura à corporibus sublunariis.

EX motu circulari à posteriori probauit efficaciter Aristoteles cap. præsentis, dari in natura rerum quintam quandam substantiam corpoream, cælum vocatam, præter quatuor consuetæ elementa, & hanc sententiam primus inuexit in scholam Peripateticam, cuius parens, caputque ipse extitit, & ideo vulgò quasi in proverbium vocata est, quinta substantia Peripateticorum, & hoc pertinet ad quæstionem, an sit cælum. Quare ordine scientifico sequitur inquirendum, quidnam sit, ad quod pertinet proposita quæstio.

In qua fuit prior opinio Philosophorum Aristotele antiquiorum, ferè omnium, qui existimant cælum eiusdem naturæ esse cum elementis, aut cæteris corporibus sublunariis, vt Philo Iudæus retulit in libro de somniis, Plutarchus 1. libro de placitis Philosophorum, cap. 11. D. Theodoretus in libr. de materia, & mundo, & Picus Mirandulanus lib. 1. de examine vanitatum, cap. 11. Heraclenim dicebat, esse de natura ignis. Empedocles, quasi crystallum, ex aëre, & igne confectum. Thales, terreum quoddam corpus, & graue. Plato verò, & Diuus Augustinus retulit 8. libro de ciuitate Dei, capite 11. quasi compactum esse voluit, ex elementorum floribus, vel vt Proclus exponit, in libro, qui inscribitur, Observationes eorum, in quibus Aristoteles contradicit Timæo Platonis, ex elementorum deliciis, præsertim ignis, & terræ: & tandem plures ex sanctis Patribus Platoniam doctrinam sequuti, videntur cælum igneum posuisse, vt Ambros. 1. lib. Exameron, c. 3. Aug. 1. lib. de Genesi ad literam, cap. 3. & Theodoretus 9. lib. in Genesim. Fundamentum eorum videtur fuisse, quia accidentia oriuntur ex ipsamet natura substantiæ, vt eis ornetur ac perficiatur, eisdemque vtatur ad operandum. Sed cælestia corpora constant accidentibus eiusdem naturæ & rationis, ac sublunaria corpora: ergo sunt eiusdem naturæ substantialis cum eis. Antecedens probatur ex quantitate eorum, ex raritate, & densitate, ex diaphaneitate, aut transparentia: nam stellas, quæ partes cæli sunt, densiores esse constat cæteris partibus eius, & propterea splendorem in se receptum in nos reuerberant, ex colore, quem cæruleum esse videmus, & diuersos alios colores tribuunt Astrologi planetis, Marti rubeum, & pariter cæteris, & vniuersaliter docere videntur, planetas secundum frigus, & calorem vicissim se transmutare: vnde Lunam dicunt esse humidam, Saturnum frigidum, & siccum, Martem verò calidum. præterea lumen videmus esse commune accidens cælorum

cælorum atque elementorum, & soliditatem, per quam tangi possunt, communem quoque habent cum his corporibus tangibilibus, & ex consequenti mixtam substantiam ex elementis.

Secunda sententia asserit, corpora cælestia esse quintam substantiam, & naturam simplicem, ab elementis, & mixtis diuersam, & eis perfectiorem. Hæc est expressa Aristotelis capite 2. & tertio huius libri, quam receperunt Philosophi omnes, atque Theologi, & nobis tanquam vera tenenda est. Probatur primum ratione Aristotelis capit. 3. allata, ex loco, & motu desumpta: nam corporibus concessit natura locum, & motum iuxta propriam conditionem, & ideo corporibus eiusdem naturæ eundem locum, & motum; diuersæ verò naturæ diuersos, ut grauib. locum, & motum deorsum, leuib. sursum: sed cælo concessit diuersum locum, & motum ab elementis, ergo diuersam naturam. Probatur minor, quia locum ei concessit supra omnia elementa, motum verò circularem, qui valde diuersus est à motibus rectis sursum, & deorsum elementis concessis. Et speciali ratione de igne probauit idem Aristoteles, quod cælum non sit de natura eius, primo libro Metheor. capite 3. quia cum tam magna sit voracitas, atque acrimonia ignis, & ex alia parte tanta sit magnitudo, & densitas cæli, & astrorum, absque dubio operarentur ad longissimam distantiam, & iam pridem totus hic inferior mundus incendio deflagrasset. Probatur tandem ex influentiis vniuersalibus cæli, & astrorum circa omnia sublunaria corpora. Nam virtus influendi, & operandi tam varios, ac mirabiles effectus, & circa corpora tam diuersa specialis est in cælo, & elementis non concessa: sed talis virtus oritur ex natura eius, sicut aliæ virtutes aliorum corporum: ergo corpus virtutis adeo diuersæ, diuersæ etiam naturæ censi debet: & eisdem argumentis probatur efficaciter, quod cælum sit diuersæ naturæ ab omnibus mixtis.

Ad fundamentum oppositæ sententiæ distinguenda in primis sunt duo genera accidentium; nam quædam sunt quasi vniuersalia, quibuslibet corporibus communia, ut quantitas, densitas, raritas, & magna ex parte lumen, quo omnia ferè corpora aliquo modo capacia sunt, & cum hæc sequantur vniuersalissimam rationem corporum, non indicant diuersam naturam eorum, nec ideo ex eis colligi potest, nisi fortè ex particulari modo alicuius eorum, ut ex modo habendi lucem, tanquam fontem eius, colligimus, solem diuersæ naturæ ab aliis corporibus, eam ab eodem sole participantibus. Alia sunt specialiora accidentia orta à corporibus secundum specialiorem rationem, ut colores, qualitates tangibiles, grauitas, leuitas, & alia, quæ vocantur secundæ qualitates, quia ortum habent ex concursu

aut permixtione primarum : de prioribus igitur concedimus, communia esse cælo cum corporibus sublunaribus : sed ex eis non colligitur esse diuersa natura corpora, quibus conueniunt, vt vidimus : habent tamen alia cælestia corpora, ex quibus colligi potest, diuersæ naturæ esse à corporibus sublunaribus, vt probant argumenta, quibus nostram, atque communem sententiam corroborauimus. De posterioribus verò accidentibus negamus, quòd communia sint cælis, elementis, aut mixtis ; non enim habent veros colores, sed apparentes duntaxat, circa quos absque dubio fallitur visus noster eos pro veris accipiens ; nam lucem cælestem, quæ propter multitudinem materiæ, in qua recepta est, certo modo attemperatur, iudicat, esse colorem cæruleum, vel alium similem, & certa refractione lucis in nube apparent nobis rubei, virides, aliisque colores. De qualitatibus verò tangibilibus, præsertim actiuis, quas Astrologi attribuant Aristoteli, dicimus, non formaliter in eis esse, sed eminenter, aut virtualiter, in quantum speciali ratione eas producant in corporibus inferioribus. Quod verò ad sanctos patres attinet, satis bene exponit D. Bonauentura in 1. distin. 14. num. 6. asserens inter eos, & peripateticos philosophos ponentes cum Aristotele quantum corpus diuersæ naturæ ab elementis, de solo nomine, aut modo loquendi discrimen esse : nam quia ignis nimis est lucidus, per quandam cum eo similitudinem, in modo elucendi, cælos igneos appellarunt sancti : re tamen vera, alterius esse naturæ ab igne, & cæteris elementis crediderunt, sicut sentit peripatetica schola, quam sequimur.

QVÆSTIO V.

An cælum sit compositum ex materia, & forma.

QUamuis cælestia corpora sensu percipiamus, propter maximam tamen distantiam à nobis non est adeò explorata natura eorum, sicut aliorum corporum sublunarium, ideò non est vsquequaque certum inter philosophos, ac Theologos, an materiam habeant, ex qua simul, & forma sint composita, sicut cætera corpora. Et prima sententia habere negat materiam, sed formas quasdam esse velut subsistentes, atque completas in genere corporeæ substantiæ, quemadmodum Angeli sunt formæ subsistentes, & completæ in genere spiritali.

Primus auctor huius positionis videtur fuisse Auerroës in libro de substantia orbis, cap. 2. & 1. libro de cælo ad textum 7. & 10. quem secuti sunt postea ex Theologis non pauci. Durandus in 1. distin. 11. quæst. 1. num. 14. Gabriel ibidem, quæstione secunda, Aureolus apud Capreolum quæst. vnica, ad secundum, maior distinct. 14. quæst. 1. Bassalus quæst. prima, artic. 4. Godfre-

Jus quodlibeto 2. quæst. 1. Antonius Andreas 8. libro Metaphysicæ, quæst. 4. Iandun. ibidem quæst. septima, Saxonia libro de cælo, quæst. 4. artic. 1. immò & diuus Thomas in 2. distinct. 12. quæst. 1. artic. 1. ad 5. eam referens probare videtur. Scotus verò ad 14. eiusdem libri, quæst. 1. in principio asserit, secundum Theologos dicendum esse, cælum compositum esse ex materia, & forma: secundum Aristotelem verò, denegandam esse cælo omnem materiam: & addit Auerroem melius in hac re, quam ceteros philosophos, mentem Aristotelis assequutum fuisse. Probatur hæc sententia primò egregiis testimoniis Aristotelis. Primum habetur 9. libro Metaphys. textu 17. ubi incorruptibilibus, & æternis denegat potentiam, non quidem accidentalem ad qualitatem, vel ubi, aut motum, sed substantialem, quæ est materia: & reddit rationem huius, quia omnis potentia contradictionis est, hoc est, indifferentiæ ad esse, & non esse, & substantialis quidem ad esse, & non esse substantiale, accidentalis verò ad esse accidentale: sed repugnat æternis, & incorruptibilibus non esse substantiale: ergo repugnat eis habere materiam, quæ est pars substantialis, & cum confet, cælum esse incorruptibile, & ex mente Aristotelis, æternum, sequitur apud ipsum non habere materiam, quod hisce verbis concludit: *Nihil igitur simpliciter incorruptibilem simpliciter potentia est, secundum aliquid autem, nihil prohibet, ut quale, aut ubi, actu ergo omnia.* Vnde libro 12. textu trigésimo probat, intelligentias materia carere, quia sunt sempiternæ, idem ergo de corpore cælesti (apud ipsum æternum) sentire necessarium est. Secundum testimonium reperio in lib. de longitudine, & breuitate vitæ, cap. 2. sic habens: Impossibile est habenti materiam non existere aliquid contrarium: sed cælum caret omnino contrario, docente, & probante eodem Aristot. 1. lib. de cælo, cap. 3. & 4. ergo apud ipsum materia caret. Probatur deinde ratione, 1. quia gradus essendi pertinent ad essentiam vniuersi, ut supra statuimus: sed in natura spiritali datur duplex gradus formæ completæ, ut Angeli; incompletæ, ut animæ rationalis: ergo in natura corporea debetur duplex, alius, incompletus quidem, ut formæ rerum sublunarium; completus, ut cælestia corpora, quæ cum sint in tali genere perfectissima, non potest denegari eis ratio formæ completæ. Et vrgeri potest argumentum hoc modo: possibilis forma est completa in rebus corporeis, quia nulla poterit implicatio contradictionis designari, in eo quod datur, quandoquidem in genere spiritali datur; poterit ergo à deo fieri, & eo ipso probatur efficaciter esse factam, alioqui careret tali gradu essendi (satis perfecto) vniuersum: probatur, quia ex transmutatione substantiali corporum inuestigarunt Philosophi materiam, ergo solum in eis reperiri potest, quæ sunt

transmu

transmutabilia substantialiter : sed constat , cælum non esse hoc modo transmutabile ; nam transmutatio secundum substantiam est generatio , & corruptio ; à quibus alienum est corpus cæleste : ergo alienum quoque à materia : quia omnia , quæ in cælo desiderari possunt , saluantur sine materia , vt motus , diuersæque omnes influentiæ , & modus omnis concutendi cum inferioribus causis , ad suos effectus : ergo non est in eo ponenda , quia non debent multiplicari res sine necessitate , præsertim in hac parte : cum perfectius longè sit cælum sine materia , quàm cū illa. Probatur antecedens , quia virtutes influendi conueniunt cælo , vt est in actu , cum conueniant ei vt vniuersali agenti : non ergo ratione materiæ , quæ ideo nec est necessaria ei , nec tribuenda. Ad hanc sententiam ex parte reducitur ea , quæ distinguit cælos quantum ad materiam pertinet , asseritque de solo empyreo non habere materiam propter maiorem perfectionem , & simplicitatem eius , reliquis verò eam tribuit.

Secunda opinio omnes cælos ponit compositos ex materia , & forma : quam vniuersaliter docuerunt Plato , & cæteri Philosophi Aristotele antiquiores , vt testatur Diuus Thomas 1. part. quæst. 66. artic. 1. & docent omnes illi , qui tenent , materiam sublunarem eiusdem rationis esse cum cælesti , vel diuersæ rationis ; cum inter omnes conueniat , cælos habere materiam , vt videbimus quæst. seq. Eandem sequuti sunt plures ex sanctis patribus , vt Basilius , Chrysostomus , Augustinus , Ambrosius , & cæteri omnes , qui tenuerunt , prius tempore creatam fuisse à Deo materiam informem , hoc est , sine forma , quàm perficeretur per aliquam formam , vel non prius tempore , sed simul fuisse creatam , & informatam : quos citat diuus Thomas artic. 1. eiusdem quæstionis , loquebantur enim de materia tam sublunarium corporum , quàm cælorum , tanquam certum præsupponentes , cælos habere materiam. In speciali Abempace , quem citat Albertus magnus 1. libro de cælo , titulo 1. cap. 3. Abencembron. in libro fontis vitæ. Alexander libro primo naturalium quæstionum , capite 10. Simplicius in libro de cælo , commento 1. & 35. Diuus Thomas prima parte , quæst. 66. artic. 1. & ibid. Caietanus , Diuus Bonauentura , Ægidius , Capreolus , & cæteri scholastici in 1. distinct. 12. Heruzus quodlibeto 4. quæst. 3. Soncinas 12. metaphysicæ , quæst. 7. Iauellus lib. 1. quæst. 12. & omnes recentiores , ita vt opposita ab scholis prorsus sit relegata. Et in primis hæc sententia est expressa ab Aristotele 1. lib. de cælo , c. 9. textu 91. his verbis : *Calum autem est quidem eorum quæ singularia sunt , & eorum quæ ex materia.* Et lib. 8. cap. 1. text. 3. (Sensibiles verò cunctæ substantiæ materiam habent , est autem substantia id ipsum , quod subicitur , aliter quidem materia , aliter ratio :

ratio; materiam autem dico, quæ cum non, quod quid actu sit, potentia est quod quid.) Constat verò, & ab aduersariis præsupponitur tanquam euidens, quòd cælum sit substantia sensibilis, & per visum sentiat ab omnibus, ergo euidens est apud Aristotelem, habere materiam. Et tandem lib. 1. de generatione, docet expresse, eadem esse principia secundum numerum, ex quibus sunt generabilia & ingenerabilia, ac sempiterna, quæ sunt cælestia corpora, quia principia vtriusque duo sunt, vnum tanquam materia, & alterum tanquam forma, hisce verbis: Sunt igitur, & numero æqualia, & genere eadem, quæ & in sempiternis, & in primis: illud enim, vt materia est, hoc autem, vt forma.

Ratione verò (mea quidem sententia) non foret probanda, si vellent aduersarij his, quæ naturale lumen intellectus ostendit, ex sola notitia terminorum acquiescere. Nam cum per se sit euidens, & ab eis admissum, cælum esse corpus, eandem prorsus euidenciam habet per se, quòd sit materiale, quia corpus idem prorsus significat, quòd materialis substantia, propterea apud me principiorum veritatem continet, quòd cælum habeat materiam, ita vt probatione non indigeat. Et hæc fortassis est causa, quòd vix possit inueniri efficax ratio ad eam probandam. Et à priori nulla, quia non possunt principia à priori demonstrari, & vniuersaliter loquendo, quia quò principia euidenciora sunt, eò possunt minus efficaciter ostendi, aut probari: sed probatur à posteriori. Primò, quia cælum habet duas alias compositiones, longè inferiores atque imperfectiores, quàm compositio ex materia, & forma; hæc igitur tanquam perfectior non potest ei denegari: euidens est consequentia, quia propter solam imperfectionem ei denegatur; sed antecedens admittunt aduersarij, concedendo cælo quantitatem, & ideo partes integrantes substantiæ huius, ex quibus componitur, atque etiam compositionem ex subiecto, & accidentibus sensibilibus, vt ex substantia, & quantitate, luce, figura, raritate, ac densitate, de quibus speciali ratione conuincitur, non esse nisi in materia, aut composito ex ea. Probatur tandem, quia sensus, & operationes eorum, non solum corporei sunt, sed materiales: ergo repugnat sentire, nisi materialia: sed euidenci experientia constat, cælum esse sensibile ab eis, & sentiri actu: ergo euidens est, quòd sit materiale, & veram materiam sensibilem habeat.

Ad primum testimonium Aristotelis respondetur, ipsum negare cælo potentiam substantialem, quæ non sit semper coniuncta cum suo actu, sed indifferens, quia æternum, & incorruptibile est, non verò potentiam, cum eodem actu substantiali semper coniunctam, quia hæc non obstat æternitati compositi, vt patet,

paret, ac proinde, nec intentio Aristotelis. In alio verò testimonio colligit carentiam materiæ in intelligentiis, non ex sola æternitate, sed quia sunt puri actus sine principio mouentes.

Secundum testimonium, absque vlla expositione debet intelligi, quod habens materiam, aliquam contrarietatem habere debeat; sed minor neganda est, quod cælum careat omni contrarietate, nam licet actiua, & passiua careat, & omni ea, quæ principium est corruptionis, aliquam tamen habet ad corruptionem non disponentem vt rari, & densi, & secundum motum tardi, & velocis, & alias huius conditionis: de illis igitur, quæ ad corruptionem disponunt, asseruit, & probauit Aristoteles in hoc libro, non reperiri in cælo, non de omnibus: quare non probatur ex his testimoniis, quod ex mente eius contrarietate careat.

Ad primum argumentum negandum est, possibilem esse substantiam corpoream completam, & simplicem, hoc est, quæ sit sola forma, sicut Angelus in ordine spirituali, & non sit composita ex materia, & forma: primo, quia sicut probatum est, impossibile dari corpus sine materia, ita probatur impossibile dari formam corpoream, & non materialem; quod si materialis est, intelligi nequit, quin sit apta componere corpus cum materia. Secundo, quia si corporea forma est, & capax quantitatis, & accidentium sensibilium, (vt concedunt aduersarij) de corpore celesti, necesse est alias valde inferiores, atque imperfectiores compositiones habere ex partibus integranibus, atque ex subiecto, & accidenti, quæ non possunt esse in eo, quod caret compositione ex materia, & forma, neque in forma nisi materiali. Quod verò dicitur dari in genere spirituali completam, & incompletam formam, admittimus; sed negamus, quod sub genere corporis dari debeant: nam cum sit inferioris, & valde imperfectioris ordinis, corpus nequit esse compositum sine compositione ex materia, & forma; quod enim res inferioris ordinis sunt, eo maiorem compositionem habere debent, & simplicitatem minorem.

Ad secundum negandum est antecedens, quod ex sola transmutatione substantiali cognouerunt Philosophi materiam, quin potius nec eam cognouerunt primo ex tali transmutatione, sed ex accidentali, ac sensibili, vt ex alteratione, & latione, ex qua substantialem transmutationem in rebus sublunaribus assequuti sunt, & per carentiam eius distinxerunt corpora celestia à sublunaribus, iudicantes intransmutabilia esse illa secundum substantiam, & solum transmutari secundum accidentia sensibilia, ex quo satis efficaciter intulerunt, materiam habere, quamuis alterius conditionis à materia sublunarium.

Ad tertium negandum est etiam antecedens, quod sine mate-

ria saluentur omnia, quæ sunt in cælo; in primis enim, nec saluatur lux corporea, ac visibilis, nec saluatur raritas, & densitas, nec saluatur motus; & consequenter non saluantur influentiæ inferiora, quia plura influunt per lumen tanquam per virtutem agendi, plura per motum, tanquam per conditionem, immo & cæteras influentias constat esse corporeas, & materiales, quarum subiectum non potest non esse compositum ex materia, & forma, vt probauimus.

QVÆSTIO VI.

An materia calorum sit eiusdem speciei cum materia sublunarium corporum, vel diuersa.

IN præsentī controuersia tenet prior sententia, materiam sublunarem, & cælestem esse eiusdem speciei, quæ communis fuit in schola Philosophorum, Aristotele antiquiorum, vt testantur Theodoret. in lib. de materia & mundo, & Plutarc. 1. lib. de placitis Philosophorum: ita enim tenuisse aiunt Trimegistum, Empedoclem, Heraclitum, Thalem Milesium, Xenophanem, Anaximandrum, Xenocratem, Platonem, & alios, & eandem sequuti sunt postea Auicena 1. lib. suæ sufficientiæ, cap. 3. & ex Theologis L. Bonauentura in 2. distinct. 12. quæst. 1. Scotus distinct. 4. quæst. 1. §. secundum Theologos, Ægidius eadem distinct. & opusculo de materia cæli, Okam in 2. quæst. 12. Abulensis in caput 1. Gen. fol. 17. Titelmanus libro 1. philosophiæ, capite 12. Argentina tractatu de materia cæli, noster Molina 1. parte, tractatu de opere sex dierum, disputatione 5. & alij. probatur primò, quia actus est, qui distinguit species, vt docet expressè Aristoteles 7. libro Metaphysicæ, textu 49. Sed tam sublunaris, quàm cælestis materia, est pura potentia, nullum actum includens: ergo non potest inter vnā & alteram dari distinctio specifica: & certè si talis distinctio admittatur, verum esse non potest commune illud proloquium ab omnibus receptum, materiam esse infimum omnium entium, summè distans à Deo. Probatur ex alio principio Aristotelis 8. libro Metaphysicæ, textu 10. quòd species omnes sunt inæqualis perfectionis, sicut numeri: ergo si duæ sunt species materiæ sublunaris, atque etiam cælestis, inæqualis perfectionis erunt, & aliqua eorum perfectior altera, & ex consequenti non erit infimum ens, illa quæ ponitur perfectior, nec summè distabit à Deo, neque denique erit propè nihil, vt D. Augustinus asseruit 1. libro confes. c. 7. & 8. Secundò, quia si materia cæli debet poni distincta specie à sublunari, idèò erit, quia ex identitate specifica vtriusque, statim sequitur cælum non esse incorruptibile, vt supponimus, sed hoc non sequitur: ergo non est necessaria talis distinctio, & consequenter

quenter non est admittenda. Probatur minor, quia ut cælum sit incorruptibile, satis est, quod unio formæ cum materia sit naturalis, ex quo fit, ut indissolubile sit compositum ex utraque, & ideo ex propria natura incorruptibile: sed hoc potest stare absque diversitate materiæ, propter modum informationis formæ, & carentia dispositionum contrariarum. Nam si forma talis sit, quod expleat capacitatem materiæ, nec postulet in ea pro sui informatione contrarias dispositiones, nec materia appetat aliam formam, nec poterit recipere ab ullo agenti dispositiones contrarias. Ex quibus omnibus planè infertur, non repugnare, quod cælum sit incorruptibile ex propria natura, quamvis materia eius sit eiusdem speciei cum sublunari.

Posterior sententia distinguit specie materiam non solum cæli Empyreï, sed omnium corporum cælestium à sublunari. Ita D. Thomas 1. parte, quæst. 66. articulo 2. & ibidem Caietanus, Alexander Alensis 2. parte, quæst. 44. membro 2. Albertus magnus in 4. distinct. 6. articulo 8. Richardus in 1. distinctione 11. quæstione 8. Hispalensis & Capreolus ibidem quæstione unica, articulo 1. Henricus quodlibeto 4. quæstione 16. Ferrariensis 3. libro contra gentes, capite 20. Iabellus 8. libro Metaphysicæ, quæst. 11. Soncinas libro 11. quæst. 9. Alexander libro 1. naturalium quæstionum, capite 15. Pater Fonseca 2. libro Metaphysicæ, capite 3. Pater Suarez tomo 1. Metaphysicæ, disputatione 13. sectione 11. Patres Conimbricenses 1. libro de cælo, capit. 2. quæstione 6. (quamvis oppositam quoque partem ut probabilem defendant.) Et tandem hanc sententiam tenuit Diuus Dionysius 4. cap. de diuinis nominibus, quem citat pro ea Diuus Thomas in 2. dist. 11. quæst. 1. articulo 2. affirmans in hac re, sicut in aliis ferè omnibus philosophicis doctrinam Aristotelis sequutum fuisse. Et hæc est iam ferè communis sententia, quam ut longè probabilior sequimur, & imprimis expressa est apud Aristotelem 12. libro Metaphysicæ, textu 10. hisce verbis: *Cuncta verò quacunque mutantur, materiam habent, sed diuersam, nam & ipsorum sempiternorum quacunque non sunt generabilia. sed latrone mobilia, attamen non generabilem. sed unde quo.* Idem docet 8. lib. Metaphysicæ textu 12. Argumentum verò præcipuum huius sententiæ est, quia si materia cælorum, & sublunaris essent eiusdem speciei, sequeretur corpora cælestia corruptibilia esse, sicut sublunaria. probatur consequentia, quia materia cæli esset capax aliarum formarum, nempe elementorum: nam ubi eadem est natura materia, eadem est capacitas recipiendi easdem formas, ut patet in materia quacunque sublunari, & cum careat aliis formis, habebit priuationem earum: quare quantum est ex se eas appeteret. Sed constat, hanc priuationem & hunc appeti-

tum aliarum formarum esse totam radicem corruptionis elementorum: ergo pari ratione essent corruptibilia corpora celestia. Cui argumento non fit satis variis solutionibus. Non enim satis fit dicere, appetitum illius materiæ expleri per informationem formæ adeo perfectæ continentis alias eminentes; quia nec continet perfectiones aliarum formarum intensiue, nec extensiue, cum anima rationalis, & quælibet sensitiua perfectior sit forma cæli, ac proinde perfectius actu et materiâ. Et idem est de aliquibus formis cælorum comparatione aliorum, & omnes absque dubio perfectius actuarent extensiue: ergo.

Nec satisfacit, quod probabilius respondent alij, hanc incorruptibilitatem prouenire ex speciali modo informandi formæ cælorum, cum speciali, scilicet, accommodatione, & specialibus dispositionibus non habentibus contrarium, unde materia cæli non habet capacitatem proximam ad alias formas, sed solum remotam. Hoc, inquam, non sufficit, quia vel materia cæli respicit essentialiter formam inseparabili modo informantem, & cum talibus dispositionibus carentibus contrario, & ex hoc sequitur distinctio specifica materiæ, cum ex se respiciat actum specie distinctum in ratione formali actus, vel materia ex se indifferens est, & accidentaliter determinatur per tales dispositiones ad formam inamissibiliter informatam: ergo potuit recipere alias dispositiones, & aliam formam, & cum semper maneat eadem natura materiæ, modo poterit illas recipere naturaliter, cum cuiuslibet potentiæ passiue naturali respondere possit, & debeat potentia actiua naturalis, quæ illam ad actum reducat; igitur cælum erit corruptibile: ob hanc enim rationem indifferentiæ materia sublunarium est principium corruptionis.

Probatur secunda nostra sententia, quia si materiæ istæ sunt eiusdem speciei, sequitur corpora cælestia esse generabilia, sicut sublunaria. Probatur consequentia, quia si sunt eiusdem speciei, ergo habent potentiam passiuam essentialem eiusdem rationis. Ex quo efficaciter infero, easdem formas contineri in potentia vtriusque, ut forma solis continebitur in potentia materiæ ignis, quia capax illius est, non minus quam propria materia, & cum eam non habeat, habebit priuationem, & appetitum eius: sed cuiuslibet potentiæ passiue naturali debet correspondere actiua naturalis actu existens, vel saltem naturaliter possibilis, à qua possit reduci in actum, vel frustra erit; possibile est ergo agens naturale, quo educi possit forma solis, quantum est ex se, de potentia materiæ ignis, & ita erit sol secundum se generabilis ex materia ignis, quod patet esse falsum. Et si materia ignis habet capacitatem naturalem ad formam solis, habebit etiam ad dispositiones illius; quod enim respicit finem, debet etiam eadem

ratione respicere mediâ ad illum naturaliter ordinata, aliâ frustra erit capacitas proxima, vel remota perpetuò impedita naturaliter.

Ad primum argumentum dico, actum distinguere vel id, quod se habet ad modum actus, & ideò licet materia non habeat in sua essentia aliquem actum physicum, cum sit pura potentia, nec actum metaphysicum perfectum, & completum, cum sit pars, habere tamen aliqualem actum, nempe, aliquem gradum, seu prædicatum perfectiûm, & determinatiûm rationis communis, & imperfectissimæ materiæ ad talem rationem & speciem partialem imperfectam materiæ in ordine ad talem modum informandi formæ, cum hoc tamen semper manet materia imperfectissima aliorum omnium entium, licet in se habeat species inæqualis perfectionis. Ad secundum iam probauimus ex vnitæte specificæ materiæ cæli, & sublunaris rectè inferri, cælum esse corruptibile. Neq; nobis contrariatur locus ex primo Genesis, vbi videtur indicari ex communi materiâ aquæ facta fuisse corpora cælestia: nam etsi expositorum sensus varius sit, quem expendere à nostro instituto alienum est, tamen nihil contra nostram sententiam inferri efficaciter potest, vt bene adnotat sanctus Thomas 1. part. quæst. 68. artic. 1. 2. & 3. qui etiam quæst. 66. artic. 2. ad 1. probè docet, aliquos patres scholæ Platonis addictos illius sententiam retulisse, & ideò in hac parte non potiri plusquam Platonica auctoritate.

QVÆSTIO VII.

An materia cælestis sit perfectior sublunari.

Quia species iuxta Arist. sunt sicut numeri, de quibus constat, duos æquales dari non posse, ita repugnat dari duas species æqualis perfectionis, & propterea si materiæ specie distinguuntur, necesse est, vnam esse perfectiorem altera: vtra autem sit perfectior, hoc est, quod quærit titulus quæstionis.

Et quòd materia sublunaris sit perfectior, videntur efficaciter probare hæc argumenta: Primum, quia perfectio essentialis potentiae sumitur in ordine ad actum (vt 2. libro de anima, tract. de potentiis animæ in communi scripsimus) sed sublunaris materia respicit nobiliorem actum, quàm cælestis, nempe, animam, maximè rationalem, ergo erit nobilior. Secundum argumentum, quia actus adæquatus sumit suam perfectionem ex maiori extensione ad particulares actus, præsertim perfectiores, qui sufficiunt perfectiorem constituere rationem communem adæquatam eius, vt ratio adæquata potentiæ visus ex eo solùm foret perfectior rationibus adæquatis aliorum sensuum, quia se extendit

tendit ad perfectissimam qualitatem, quæ est lux: sufficit ergo quod actus adæquatus sublunaris materiæ se extendat ad animam rationalem, & cæteras forma cælesti perfectiores, ut perfectior censeatur actus adæquatus, quem respicit per se, actu adæquato cælestis formæ, quem respicit per se materia cælestis, & consequenter eadem ipsa materia sublunaris sit perfectior.

Tertium argumentum: quia si materia cæli esset perfectior, ex eo quod, licet forma in entitate sit minus perfecta, in modo tamen informandi inamissibiliter, sub quo formaliter à materia respicitur, perfectior est, ex hoc sequeretur, quod si materia lapidis foret capax solius formæ lapidis, & materia sublunaris esset capax aliarum omnium, sicut est modò, nihilominus materia lapidis foret perfectior sublunari nunc existenti, quod patet esse absurdum. Sed probatur consequentia, quia materia lapidis in eo casu haberet perfectiorem modum informandi, cum informaretur modo inseparabili, propriam tantum respiciente formam sicut materia cæli.

Oppositam sententiam, quod materia cælestis sit perfectior essentialiter sublunari, tenet Richard. in 2. distinct. 12. quæst. 2. & quodlibeto 3. quæst. 5. Durandus eadem distinct. 12. quæstione prima, in eamque videtur inclinare Scotus quæst. 1. in solutione argumen. quamvis dubius permaneat, Argentina in 1. distinct. 44. quæst. prima, articulo secundo, & Abulensis in caput 22. Matthæi, quæst. 121. & est communis in schola, & longè probabilior: nam in primis colligitur efficaciter ex doctrina Aristotelis 7. libro Metaphysicæ, c. 6. textu 22. ubi expressè docet, materiam sublunarem esse principium corruptionis rerum his verbis: *Cuncta verò, quæ aut natura, aut arte fiunt, habent materiam: possibile est enim esse, & non esse eorum unumquodque, hoc autem cuique materia.* Ex quibus ita arguo, corruptio rerum, cum tendat ad non esse, est maxima imperfectio earum: sed sublunaris materia est quasi principium, & fonte eius; ergo est imperfectissima, quam imperfectionem cum non habeat materia cælestis, minus imperfecta erit. Præterea maxima illa imperfectio provenit ei ex eo, quod habens vnam formam desiderat alias, quas non habet: unde sequitur esse eis priuatam, immò, ut docet Aristoteles 1. lib. textu 81. infinitis subditur priuationibus, quarum ratione turpis, & malefica vocatur, & malum, hoc est, corruptionem rei, in qua est, machinari dicitur: quibus omnibus imperfectionibus caret materia cælestis, quia vnam tantum formam habere potest, nec appetit aliam, immò nec capax eius est, ergo iuxta sententiam Aristotelis essentialiter est perfectior. probatur deinde ratione. Primò, quia materia ex propria natura est potentia passiva: sed potentia passiva est imperfectissima (quàm propterea Deo

nullo modo tribuimus) ergo , quò materia fuerit magis passiuà , erit imperfectior , sed constat , sublunarem esse magis passiuam , quàm cælestem , tum quia indifferens est , ad recipiendum omnes formas , & æquè potest vilissimam , ac nobilissimam recipere , immò & eas , quas semel habuit , potest quantum est ex se , iterum recipere : vnde potentiam passiuam quasi infinitam , hoc est , receptiuam sine termino habet , cælestis verò minimum habet de potentia passiuà , cùm vnius duntaxat formæ capax sit , & semel tantum possit eam recipere : ergo longè minis imperfecta erit .

Secundò , & efficacius probatur à priori ; nam perfectio passiuæ materiæ sumitur in ordine ad actum : sed materia cælestis recipit actum essentialiter , atque formaliter perfectiorem , ergo essentialiter , ac positiuè est perfectior . probatur minor , quia propria , & formalis ratio actus sumitur ex perfectiori modo actuan- di potentiam : sed forma cælestis perfectiori modo actuat materiam , ergo est perfectior actus formaliter , quare materia eum respiciens erit perfectior potentia , & materia perfectior . Minorem probo , quia forma cælestis actuat materiam satiando appetitum eius , & totam eius capacitatem complendo . Præterea actuat se vniendo materiæ vnione indissolubili , & sua natura perpetua , sublunaris verò forma nec explet capacitatem materiæ , nec vnione indissolubili vnitur , sed naturaliter dissolubili , illa ergo erit longè perfectior .

Ad primum argumentum , concessa maiori , distinguenda est minor , quòd materia sublunaris respiciat perfectiorem actum , vel formam , nam considerando naturam eius , atque essentialia prædicata , verum est ; sed sub ratione præcisa ac formali actus , & formæ , quæ sumitur ex modo informandi , falsum : nam licet forma sublunaris perfectiorem naturam habeat , & perfectius esse tribuat materiæ , & composito , modum informandi habet imperfectissimum , nempe , separabilem , non explendo capacitatem materiæ , cùm tamen cælestis forma , quamuis imperfectiorem naturam habeat , & imperfectius esse materiæ tribuat , perfectiori modo ei vniatur , nempe inseparabili , & satiando appetitum eius , explendòque omnem eius capacitatem .

Ad secundum respondetur , vt actus adæquatur formæ sublunaris perfectior sit , secundum esse , & quasi materialiter , sufficit , quòd se extendat ad animam rationalem longè perfectiorem sub hac consideratione formæ cælestis , non tamen sufficit , vt sit perfectior secundum modum informandi , quod est , esse perfectiorem sub formali , ac præcisa ratione formæ , sub qua non est verum , quòd eam excedat anima rationalis , immò ab ea exceditur , vt probauimus .

Ad tertium argumentum , de materia lapidis capaci solius
formæ

formæ lapidis, respondent recentiores quidam, non esse casum possibilem, quia cum forma lapidis corruptibilis sit, repugnat, quòd sola respiciatur à materia, sed eo ipso, quòd eam respicit, cæteras omnes corruptibiles, ac sublunares respicere debet, cum conueniat cum eis eadem forma in modo informandi: sed licet hoc verum sit, non satisfacit argumento, quod non solum loquitur de materia lapidis, & forma eius, vt nunc se habent, sed si per possibile, vel impossibile talis materia respiceret talem formam solum, & non alteram, nec eius capax foret, & forma eadem solam hanc materiam posset informare, & non alteram, tunc enim non foret eiusdem rationis cum cæteris materiis sublunariis, nec etiam forma cum cæteris formis. Quo supposito, respondeo in eo casu materiam lapidis fore eiusdem conditionis, & ordinis cum cælesti, atque etiam forma eius cum cælestibus formaliter, quia eodem modo inseparabili informaret, explendo capacitatem suæ materiæ, & se vniendo illi modo indissolubili, & mediis dispositionibus contraxio carentibus, atque constituendo lapidem naturaliter incorruptibilem: hæc enim omnia sequuntur per locum ab intrinseco ex casu sic proposito in argumento. Quod verò dicitur formam lapidis esse infimæ sortis secundum esse, verum est, non secundum modum informandi perfectissimum, quem haberet, & ex quo sumitur formalis, ac præcisa ratio formæ vt forma est.

Si autem aliquis dubitet, an materia sublunaris non solum sit imperfectior cælesti, sed imperfectissima omnium, quas potest Deus creare, ita vt nec per potentiam Dei absolutam creabilis sit alia inferior, aut imperfectior. Respondeo, valde probabile esse, quòd non sit creabilis altera imperfectior, quia non videtur excogitabilis altera potentia magis passiuæ, cum possit recipere omnes formas corruptibiles: nã de incorruptilibus euidentis est, nullam esse possibilem materiam, quæ possit vtrasque recipere, ita vt tam corruptibilium, quam incorruptibilium naturaliter sit capax, quia incorruptibiles sua natura inseparabiliter informant: quare vnã tantum earum respicit materia, ita vt plurium non sit capax, cum eo ipso quòd capax plurium foret, non posset ab aliqua modo inseparabili informari, nec satiari potentia eius: sed constat eò esse materiam imperfectiorem, quò magis passiuæ est, & eò magis passiuam, quò ad plures formas respiciendas indifferens est, & plures recipere potest. Ergo sublunaris materia à Deo creata omnium est imperfectissima, quæ creari possunt per potentiam Dei absolutam. Quod satis clarè docuit D. Aug. dicens, esse prope nihil, hoc est, nihil minus à nihilo distare, quod est dari non posse aliud intra genus substantiæ imperfectioris entitatis.

QVÆSTIO VIII.

An materia cælorum sint diuersæ speciei inter sese, vel solo numero distinguantur.

PRæsupponimus plures cælos dari specie distinctos, vel solo numero, vt ostendetur inferiùs, & de eorum materiis controuerſiam instituimus, an specie inter sese distinguantur, vel solo numero.

Et prima opinio non specie, sed solo numero distingui docet, quam sequuntur Capreolus in 2. distin. 13. quæst. 3. Hispalensis ibidem, Boncinas 12. Metaphysicæ, quæst. 10. Tabellus quæst. 11. libro 8. & vnica ratio eorum est, quia materiæ non distinguuntur specie per ordinem ad formas specie distinctas, secundum gradus essentielles, sed secundum modum informandi: sed formæ cælorum, etiam si specie distinguantur secundum gradus essentielles, habent eundem modum informandi materiam, quia omnes informant eam modo inseparabili, satiantes appetitum eius: ergo omnes sunt eiusdem speciei, in ratione præcisa formarum: ergo omnes etiam materiæ erunt eiusdem speciei, cum respiciant actum eiusdem speciei formaliter. Quod argumentum sic vrgeo, formæ sublunares (vt elementorum) distinguuntur specie secundum propriam naturam, & nihilominus non distinguunt specie proprias materias, sed eiusdem speciei censentur, quia formæ habent eundem modum informandi modo separabili non satiantes appetitum materiæ: ergo nec cælestes quantumlibet specie distinctæ secundum propriam naturam distinguunt specie materias proprias, quia habent eundem modum informandi inseparabilem. Quod facilius apparet iuxta aliquorû opinionem, existimantium formas cælorum adhuc secundum se, & corpora ipsa cælestia non distingui inter se specie, sed solo numero, de quo infra. Si enim formæ secundum gradum essentialem sunt eiusdem speciei, non possunt habere modum informandi specie diuersum, quia per eundem gradum essentialem non potest non satiari eodem modo appetitus materiæ.

Secunda opinio distinguit specie materias cælestes inter se, atque etiam formas in modo informandi inseparabiliter speciali cuiuslibet, & videtur mihi vera, quam sequuntur Albertus Magnus tractatu de quatuor cœuis, quæst. 2. artic. 6. Caietanus 1. par. quæst. 66. artic. 2. §. Ad euidentiā. Aquilinus lib. 1. de orbibus, quæst. 1. P. Suarez 1. tom. suæ Metaphysicæ, disputatione 13. sectione 11. num. 20. Patres Conimbricenses 1. lib. de cælo, cap. 2. quæst. 6. artic. 1. & est iam ferè communis inter recentiores, quam in primis colligo ex D. Thom. 1. part. quæst. 66. artic. 2. in
fine

fine corporis, & 2.2. quæst. 14. artic. 11. quibus locis docet, formam corporis cælestis ita replere totam capacitatem materiæ, ut nulla in ea remaneat potentia ad aliam formam: si autem omnes materiæ cælorum essent eiusdem speciei, quælibet esset capax formæ alterius: nam ubi eadem est natura materiæ, eadem est capacitas: quælibet ergo esset capax non solum propriæ formæ, sed aliarum, & ideo non satiaretur appetitus eius ab una. Sed ratione efficaci probatur: non potest saluari incorruptibilitas cælorum, si omnes materiæ eorum sint eiusdem speciei: sed corpora cælestia sunt incorruptibilia, ut concedit opposita sententia: ergo erit falsa ponens materias cælorum esse eiusdem speciei. Maiorem sic probo. Omnes istæ materiæ sunt eiusdem speciei: ergo habent capacitatem, potentiam & appetitum eiusdem rationis: consequentia evidens est, quia capacitas, potentia, & appetitus eadem ipsa materia sunt, sola ratione ab ea distincta, ut 1. Physicorum, tractatu de materia ostendimus: sed materia Lunæ capax est suæ formæ, ac dispositionum, quibus mediis eam informat: ergo eiusdem formæ, & earundem dispositionum capax erit materia Solis, & in eius potentia contineri necesse est, cum sit eiusdem rationis cum potentia formæ Lunæ: sed forma, quæ continetur in potentia naturali materiæ, potest naturaliter educi ex ea: ergo poterit educi forma Lunæ de potentia materiæ Solis, & ita poterit Sol ex materia Lunæ generari, & erit generabilis, & ex consequenti Luna ipsa corruptibilis. Et vrgeo argumentum hoc modo: in materia Solis est potentia passiva naturalis ad formam Lunæ, & dispositiones eius: ergo necesse est posse dari agens naturale, à quo possit per dispositiones conuenientes tali formæ disponi, & per educationem eiusdem formæ reduci in actum, quod non potest fieri sine corruptione compositi: probatur consequentia: cuicumque enim potentiæ passivæ naturali correspondere potest ac debet naturalis activa, à qua possit reduci in actum, vel frustra erit talis potentia. Et si dicatur, talem potentiam passivam esse remotam, nihil refert, quia etiam si remota sit, dicitur ordinem ad agens naturale, à quo potest fieri proxima: nulla est enim potentia passiva naturalis remota, quæ non possit fieri proxima ab agente naturali per dispositiones: nam eo ipso, quod non posset fieri proxima, esset frustra, cum non posset perducì ad actum. Secundò probatur, quia si in materia Solis est capacitas, & potentia naturalis ad formam Lunæ, & dispositionum eius: ergo sicut à principioeducta fuit de potentia eius forma Solis, posset educi naturaliter forma Lunæ, & induci dispositiones eius, ad quas etiā recipiendas habuit, & habet naturalem potentiam, & modò educi poterit naturaliter eadem forma & eadem dispositiones, & si eadem forma educi potuit tunc, a

modo potest, impossibile est capacitatem eiusdem materiae satisfieri esse per formam, quam habet, cum potuerit habere aliam. Et virgeo argumentum, quia potentia materiae sublunaris habentis unam formam, ad recipiendum aliam quancunque, nondum tamen habentis dispositiones alterius, sed eius tantum, quam habet, est potentia, seu capacitas remota, ac radicalis; & tamen est principium sufficiens corruptionis compositi per illam: ergo quaelibet materia caelestis, habens eandem capacitatem (licet radicalem, atque remotam) respectu cuiuscunque alterius formae caelestis (ut concedit opposita sententia, & conuincitur vi argumenti eam concedere) ergo erit principium corruptionis eiusdem calis. Quare euidenter conuincitur contra eam, per locum ab intrinseco omnia corpora caelestia habere principium radicale corruptionis, esseque corruptibilia ex suis principiis essentialibus, si materiae sunt eiusdem speciei: falsum igitur reputandum hoc est.

Ad primum argum. respondetur cum distinctione minoris: omnes enim formae calorum habent eundem modum inamissibiliter informandi genericum, per quem distinguuntur a sublunaribus, non specificum, per quem inter se formaliter distinguuntur, ac proinde earum materiae, ut ex dictis constat.

Ad aliud respondetur, formas elementorum habere eundem modum specificum, amissibiliter informandi: formae vero calorum licet habeant eundem modum genericum, gaudere tamen diuerso modo specifico, in ordine ad quem materiae diuersitatem specificam sortiuntur.

QVÆSTIO IX.

An quantitas calorum, & corporum sublunarium sint eiusdem speciei, vel diuersae.

Videbitur statim alicui, quæstionem hanc difficile ultate carere, præsertim cum non sit hucusque in schola agitata, nec proposita, nihilominus ex discursu eius patebit, difficultate non carere: nam affirmatiuam partem videntur probare hæc argumenta. Primum, quia quantitas est proprietas consequens corpoream substantiam, vel materiam primam; sed tam hæc, quam substantia corporea caelestis, & sublunaris distinguuntur specie; ergo quantitates utriusque specie distingui debent. Secundò, ad rationem intrinsecam quantitatis spectat, esse receptiuam aliorum accidentium, sed hæc potentia receptiua, aut passiuæ diuersæ speciei est in utraque quantitate: ergo distinguuntur specie: minorem probo, quia potentia passiuæ distinguuntur per diuersos actus, quos respiciunt: sed potentia passiuæ quantitatis caelestis ordinatur ad recipienda accidentia, neque actiua, neque contraria: quantitas

quantitas verò sublunarium corporum sua natura est receptiva qualitarum actiuarum, & contrariarum; ergo habent potentias passiuas diuersæ speciei, & ideò specie distinguuntur. Et vrgeo argumentum hoc modo: materia cælestis, & sublunaris eundem modum habent compositionis ex partibus sublunaribus integrantibus, & nihilominus distinguuntur specie per diuersas capacitates, vel potentias passiuas, quas habent ad recipiendas formas substantiales: pari ergo ratione licet quantitates istæ habeant eundem modum habendi partes extra partes, possunt differre specie per diuersas capacitates, vel potentias passiuas recipiendi accidentia valde diuersa.

Communis tamen, & vera sententia est, quantitatem corpoream cælestium, & sublunarium esse eiusdem speciei atomærita Soncinas 8. libro Metaphysicæ, quæst. 13. ad 4. probatur primò, quia ratio essentialis, & propria cuiuslibet accidentis colligitur euidenter ex effectu formali, quem tribuit subiecto; vt propria ratio caloris ex eo quòd natus est constituere subiectum formaliter calidum: ergo essentialis, & propria ratio quantitatis intelligenda est ex effectu formali, quem nata est tribuere substantiæ: sed eundem effectum prorsus tribuit substantiæ quantitas cælestis, & sublunaris; ergo erunt eiusdem speciei. Probatur minor: quia formalis effectus quantitatis est, constituere partes substantiæ extensas extensione molis, aut, quod idem est, constituere eas radicaliter impenetrabiles, quod constat eodem modo præstare vtrunque quantitatem suæ substantiæ: ergo erunt eiusdem speciei, nec distinguuntur ratione potentiae passivæ diuersæ, per quam vna potest recipere qualitates actiuas, & contrarias, alia verò non: in quo decipitur planè prior sententia, quia si secundum se accipiantur quantitates istæ, vtraque potest eadem accidentia recipere, quod euidenter constaret, si Deus separaret vtrunque à propria substantia, sicut separat quantitatem panis in Eucharistia: tunc enim nulla posset ratio repugnantiae assignari, cum circa quantitatem cæli possit naturaliter agere ignis ei applicatus, & producere in ea calorem, sicut producit naturaliter in quantitate hostiæ consecratæ: ergo quòd non possit naturaliter recipere similia accidentia, dum est in proprio subiecto, non prouenit ex parte eius sed substantiæ cælestis, quæ non est eorum capax, vt mox ostendetur: quare ex parte potentiae passivæ non potest sumi differentia specifica harum quantitatum. Et potest hoc exemplo valde simili ostendi, quia quantitas sublunaris corporis potest naturaliter diuidi in partes integrantes, & actu diuiditur, quoties eodem modo diuiditur substantia, in qua est, & tamen quantitas corporis cælestis dum in eo est, non potest diuidi naturaliter, quod non ex parte eius prouenire affir-

mant omnes, cùm sit euidens separatam per miraculum à suo corpore posse diuidi naturaliter, sicut diuiditur quantitas Eucharistiæ; sed ex incorruptibilitate substantiæ cælestis, cui inhæret, & quæ diuidi naturaliter non potest: ergo ex eadem causa prouenit, quòd non potest suscipere accidentia actiua, & contraria, & non ab essentia eius; quare non potest desumi argumentum ex hoc, ad probandam distinctionem specificam eius à quantitate sublunari. Secundò probatur: quia communis est, & vera sententia in prædicamento quantitatis, quòd tres illæ species quantitatis continuæ, videlicet, linea, superficies, & corpus sint atomæ sub genere quantitatis continuæ, ac permanentis, quia nec dantur lineæ distinctæ specie; nec superficies, nec corpora trinx dimensionis; sed quantitas cælestis, & sublunaris pertinent ad has species; ergo solo numero distingui possunt, specie verò nullo modo.

Ad primum oppositæ partis distinguenda est minor: quantitas enim non consequitur materiam primam, aut corpoream substantiam in specie, sed in genere, communi quidem materiæ cælesti, ac sublunari, vel vtrique substantiæ, non eisdem, vt specie distinctis. Itaque quasi proprietas subalterna censetur, sicut sensibilitas respectu hominis, & equi non atomæ, vt est risibilitas respectu hominis, vnde ex diuersitate materiæ, aut substantiæ, non infertur diuersitas specifica quantitatis.

Ad secundum neganda est minor, iuxta doctrinam traditam, ex qua constat, potentiam passiuam vtriusque quantitatis esse eiusdem prorsus rationis, & eorundem accidentium per se receptiuam, licet quantitati cælesti repugnet per accidens suscipere qualitates contrarias disponentes ad corruptionem, quia substantia cæli, cui inhæret quantitas, incorruptibilis est, ex quo constat ad confirmationem.

C A P V T III.

Textus Aristotelis.

Quoniam autem hæc quidem supponuntur, hæc autem ex dictis ostensa sunt, &c.

Breuis expositio textus.

Aristoteles in præsentī capite intendit constituere discrimen inter cælum, & alia corpora; ex omnibus speciebus motuum, & mutationum, localis videlicet, generationis, corruptionis, alterationis, augmenti, & diminutionis. Diuiditur autem caput hoc in duas partes, nam in priori id ostendit rationibus in posteriori verò autoritatibus, & præter dicta in præcedentibus capitibus, vnum aliud asserit esse præsupponendum, videlicet, quid

quid sit corpus graue, quid leue, quid grauissimum, & quid leuissimum: quorum rationes ex professio affert 4. lib. huius operis: graue corpus esse asserit, quod natum est moueri ad medium mundi, hoc est, ad cœtrum: leue, quod natum est moueri à medio, seu à centro: grauissimum, quod natum est esse sub omnibus, quæ ad medium, seu motu deorsum mouentur (vt terra): leuissimum, quod natum est esse supra omnia, quæ sursum mouentur, hoc est, immediatè infra lunam. Hæc præsupposito, probat, quod cælum non sit graue, aut leue, quia si haberet grauitatem, moueretur naturaliter ad medium, seu ad centrum motu recto, sicut elementa graua: sed talis motus naturalis est elementis, vt terra, & aquæ: ergo cælum esset eiusdem naturæ cum elementis. Si verò cælo conuenit motus deorsum præter naturam, ergo motus sursum contrarius motui deorsum erit ei naturalis, & si motus sursum sit ei præter naturam, motus deorsum erit ei naturalis. Et ita sequitur, cælum esse de natura elementorum, quia cum procedat motus à natura mobilis, eiusdem naturæ debent esse illa corpora, quibus idem motus est naturalis. Ex dictis colligit, non solum integrum corpus cæleste carere grauitate, ac leuitate, sed & quamlibet partem eius: quia eadem est natura totius, & partis, quantum ad hoc, & ideo si pars aliqua cæli separaretur ab eo, non moueretur separata motu sursum, nec deorsum: quia motus isti solum possunt conuenire corpori graui, aut leui.

Probat deinde, cælum non esse generabile, aut corruptibile, sic: Generatio, & corruptio fiunt ex contrariis, & inter contraria: sed cælo non conueniunt contrarij motus, vt inferius ostendetur: ergo nec potest ei cōuenire, quod generetur aut corrumpatur: vnde probat, non posse augeri aut diminui, quia quod augetur, ex parte generatur, & quod minuitur, ex parte corrumpitur, cum hæc nō accidunt, nisi cū acquisitione, vel perditione alicuius partis substantiæ. Inde etiam infert, repugnare cælo alterationem propriam: quia hæc, vt pote inter qualitates contrarias, disponit ad corruptionem.

In posteriori parte capituli autoritate probat, cælum esse ingenerabile, & diuersæ naturæ à corporibus aliis: illud quidem, quia apud omnes nationes etiam barbaras, cælum sedes Dei vocatum est, ex eo quod omnes arbitrantur, æterno Deo, æternam quoque, & nunquam interituram deberi sedem. Cui accedit, quod Astronomi à principio, quo motum cæli, & astrorum cœperunt contemplari, nullam vnquam mutationem, vel minimam adnotarunt, aut in motu supremi orbis, aut aliorum sibi subditorum. Quod verò diuersæ naturæ sit cælum à sublunaribus, tenuerunt antiqui Philosophi, qui propterea vocarunt cælestia corpora ætherea. non quasi ignita, vt malè interpretatus est Anaxagoras, & post eum Tullius l. de natur. deo. sed quasi semper,

ac perpetuò currentia, tanquam sua natura perpetua.

Colligit tandem Aristoteles, præter hæc quinque simplicia corpora, nempe, cælum, & elementa, non dari aliud in natura rerum, quia nec datur alius motus simplex, præter circularem, & quatuor rectos: quare necesse est, perfectionem mundi in his quinque corporibus sic ordinatis consistere.

QVÆSTIO I.

*An caelestia corpora sint ex propria natura ingenerabilia,
& incorruptibilia.*

Prima sententia fuit Platonis in Timæo, asserentis, cælos sua natura corruptibiles esse, sed liberè Dei voluntate perpetuò conservandos: quare Deum sic eos alloquentem introducit: *Natura vestra est dissolubilia, voluntate autem mea indissolubilia: neutrum tamen vos ulla mortis fata periment, quia mea voluntas maius, potentiusq; vobis est vinculum ad perpetuitatem vestram, quàm ad illud, quo fuistis, tunc cùm gignebamini, colligata, &c.* Platonem sequuti sunt omnes illi philosophi à nobis citati, qui caelestia corpora eiusdem naturæ cum elementis esse crediderunt. Immo ex sanctis Patribus plures, atque gravissimi, Basilii homilia 1. & 3. in Genesim, Ambrosii lib. 1. Hexameron, capite 6. Chrysostomus homilia 9. & 10. ad populum Antiochenum, Damascenus 2. libro Fidei, capite 6. Iustinus Philosophus & Martyr oratione Parænetica ad Gentes, & in opusculo contra Aristotelem, immò ex sacris literis eam accepisse Platonem docet in paran. ad Gentes. Irenæus libro 4. cap. 16. Theodoretus super 8. caput Epistolæ ad Romanos, Genad. de Ecclesiast. dogmat. capit. 7. Oecum. & Catherin. in 1. Epistola D. Petri, cap. 3. Eug. lib. 7. perennis Philosophiæ capite 49. Probatur primò ex sacra pagina, in qua insinuat, cælos aliquando corrumpendos: sed constat, Deum nihil prorsus ex propria natura incorruptibile destruere: ergo si destruendi sunt à Deo, sua sunt natura corruptibiles. Probatur maior ex illo Iob 14. *Homo postquam dormierit, non resurget donec attetur calum.* & Psalmo 101. *Opera manuum tuarum sunt cali, ipsi peribunt* Esaie 24. & 51. *Tabescet omnis milisia calorum, & cali sicut fumus liquefcent.* & Lucæ 21. *Calum, & terra transibunt.* Apocalypsis 21. *Vidi calum novum, & terram novam, prius enim calum, & prior terra iam abiit* Et tandem 2. petri 3. vbi cæli, qui nunc sunt, dicuntur igni reservati in diem iudicii: deinde additur: *Adueniet autem dies Domini. ut fur, in quo cali magno impetu transient, elementa verò calore solvantur.* & post pauca: *Cali ardentes solvantur, & elementa ignis ardore tabescent.* Quibus verbis exclusa videtur expositio eorum, qui cælorum nomine aërem intelligi hac in parte docent, nam cùm cæli distinguantur ab elementis, non potest

potest locum habere talis expositio, quamvis aliis in locis adimitatur. Et tandem D. Clemens libro 1. & 3. recognitionum, refert Petrum dixisse, supremum cælum, quod sedes est beatorum omnino immutatum permanens; sydereum verò, quod aspicimus, in consummatione sæculi dissoluendum. Probatum etiam ratione ex principio illo Aristotelis 8. libro Physicorum, capite 10. textu 78. quod virtus finita non potest persistere in motu tempore infinito, cum proportio seruari debeat inter virtutem mouentem, ac tempus, quo durat motus; sed constat, virtutem cælestis corporis esse finitam; ergo repugnat durare in motu tempore infinito à parte post, & ex consequenti repugnabit durare tempore infinito in suo esse, à quo emanat motus: quare necesse est aliquando fore corruptendam. Quod potest videri hoc modo, cælum non solum est, finitæ virtutis, sed habentis contrarium, ergo erit corruptibile: probatur antecedens ex accidentibus eius, ut ex densitate, & raritate naturali, enumerata ab Aristotele 2. libro de generatione, inter secundas qualitates, quæ naturaliter oriuntur ex permixtione primarum: necesse est igitur, has ponere in cælo, quæ cum sint propriè contrariæ, & actiue, mutuò possunt se expellere; quod non fiet sine corruptione subiecti.

Secunda opinio tenet, corpora cælestia non posse naturaliter corrumpi, quia naturalis corruptio fieri debet ab agente naturali, per inductionem contrariarum dispositionum in materia, quibus expellatur forma præexistens, & introducatur alia, & ideo corrumpatur compositum, & generetur aliud, aut etiam per diuisionem totius compositi in partes integrantes, in quibus non possit conseruari eius forma: sed neutro ex his modis potest corrumpi cælum, nec generari, quia forma cæli informat materiam omnino independentem à contrariis dispositionibus, ut à primis qualitatibus, quia neque his mediis introducta fuit à principio, neque ab eis conseruatur, sed à propriis contrario carentibus: ergo non potest ab aliquo agente naturali per eandem inductionem corrumpi, sed nec per diuisionem in partes integrantes, quia nullum est sublunare agens, potens sua virtute cælum diuidere. Vnde fit, quod si aliquo ex his modis corrumpere-
retur, non foret naturalis, sed supernaturalis corruptio, à Deo immediatè efficienda: nihilominus verum non est, corpora cælestia sua natura esse ingenerabilia, & incorruptibilia, quia naturale principium corruptionis habent, nempe, materiam ex se capacem contrariis dispositionibus: facta enim sunt à Deo in principio ex materia præexistente sub forma aquæ per generationem, & in die Iudicii innouanda sunt per aduentum nouæ formæ substantialis, sola antiqua materia aquæ in eis permanente,

nente, & ideò substantialiter corrumpenda, vt planè significant testimonia sacræ paginæ, in confirmationem primæ sententiæ relata. Ita sentiunt nonnulli de omnibus corporibus cælestibus, præter Empyræum, quos sequitur noster Molina 1. part. tractatu de opere sex-dierum, disputatione 2. 3. 5. & 10. addens, non repugnare doctrinæ Aristotelis, quia solum loquitur de generatione, & corruptione ab agente naturali faciendâ.

Communis tamen, & longè probabilior sententia affirmat, corpora cælestia ex principiis intrinsecis suæ naturæ ingenerabilia, atque incorruptibilia esse, ita vt non possint desinere per introductionem alterius formæ in materia eorum, etiam per potentiam Dei absolutam, sed solum per realem separationem miraculosam formæ à materia à deo immediatè efficiendam, vel per annihilationem, & hæc nobis placet, quam tenet expressè Aristoteles capit. 3. huius libri, vt vidimus, & libro 2. capit. 1. atque etiam in libro de mundo ad Alexandrum, capit. 2. & cui euident est repugnare expositionem Patris Molinæ, cum expressè teneat his locis Aristotelis, id prouenire ex parte materiæ diuersæ rationis à materia sublunari, & prorsus incapaci alterius formæ ab ea, quam habet: quare ex principiis propriæ naturæ repugnare censet. Ita sentit tota fere Peripatetica Schola, & in primis D. Thomas libro 1. de cælo, lectione 6. lib. 2. lectione 1. & 1. libro contra Genes, cap. 40. & 1. parte, quæst. 66. artic. 1. & quæst. 75. artic. 5. & cæteri Scholastici in 4. distinct. 44. D. Dionysius 4. cap. de diuinis nominibus, & tota iam Schola philosophica. Quod absque dubio senserunt D. Augustinus 14. libro de Ciuitate Dei, capit. 14. n. Hieronymus in illud Isaïæ 51. *Celi sicut fumus liquefcent*, & ad illa verba capit. 69. *Ecce ego creo celos novos*. Et D. Gregorius libro 17. moralium, cap. 1. quibus locis docent, cælos duraturos in perpetuum, cum eadem substantia, & solum habituros mutationem circa aliqua accidentia, & propterea D. Paulum 1. ad Corinthios 7. dixisse, *Præterit enim figura huius mundi*: nihil de substantia eorum locurus, utpote in perpetuum duratura.

Sed ratione probatur primò, quia si cæli ex principiis naturalibus fieri possunt per generationem, & desinere per corruptionem: ergo habent materiam natura sua transmutabilem per diuersas formas, ita vt habens vnâ, recipiat alteram; immò omnes, vt euidenter probatur in materia sublunari, & præterea sua natura capacem quarumlibet dispositionum earum; sed cuiuslibet potentiæ passiue naturali debet correspondere naturalis actiua, à qua possit reduci in actum; ergo potest talis potentia passiuâ reduci in actum ab agente naturali, & ab eodem disponi pro sua forma recipiendâ, atque introducendâ naturaliter

raliter : quare sequitur esse naturaliter corruptibilis. Quod hoc modo vrgeri potest ; si materia cæli Lunæ fuit naturaliter sub forma aquæ , & consequenter sub dispositionibus eius, vt affirmat secunda opinio , vel ex sua natura potuit esse , vt affirmat prima , sequitur euidenter , fuisse tunc naturaliter capacem materiæ ignis , ac dispositionum eius , & nunc esse, cum natura eius eadem perseueret ; sed elementum ignis contiguum est idem cælo , eique proinde sufficienter approximatum ; agente verò , & passio approximatis , sequitur necessitate naturæ actio , passio , introductio dispositionum , & formæ substantialis , atque expulsio præexistentium : ergo absque dubio foret iam corruptum cælum illud nimia actiuitate ignis , si haberet naturale principium corruptionis. Quod verò Plato aiebat, sola voluntate diuina , à corruptione præseruati, sola etiam voluntate humana absque vlllo rationis fundamento asseritur, immò contra ipsam rationem naturalem , admittendo perpetuum quoddam miraculum sine necessitate. Nec minùs friuola est solutio secundæ opinionis , quòd forma cæli informet materiam aquæ (ex qua factum est) independentem à dispositionibus contrariis primarum qualitatum , & ideo non possit eas recipere ab agente naturali : nam siue dependeat ab eis, vel non, certum est, vt præsupponit eadem sententia , tales dispositiones habuisse eandem materiam , dum fuit sub forma aquæ , & ideo non minùs posse modò eas habere. Probatur euidenter consequentia , quia forma, quæuis illa sit, non tollit capacitatem naturalem materiæ, immò nec impedit actionem agentis naturalis potèntis ei imprimere dispositiones sibi naturales, quas habuit naturaliter, vt euidenti inductione potest probari in quibuscunque materiis. Ex quo efficaciter colligitur, non posse impedire dispositiones cæli, nec formam eius , quin ignis approximatus imprimat materiæ quondam aquæ, & ideo capaci caloris, & siccitatis, has qualitates, & consequenter propriam formam.

Secundò , quia Deus condidit immediatè mundum , & præcipua corpora eius naturali modo, & ordine, hoc est, vt natura eorum postulabat ; ergo sicut singulis corporibus contulit formas naturales iuxta naturam speciei, in qua ea condere volebat, quia forma substantialis tribuit speciem ; ita eisdem formis contulit dispositiones sibi naturaliter conuenientes , quibus medijs adaptaretur naturaliter materia ad receptionem formæ. Sed formæ cælorum, & dispositiones, quas habent in materia, carent contrariis, vt probauit Aristoteles 1. lib. de cælo, cap. 1. docetque expetentia , & fatentur oppositæ sententiæ : ergo tales formæ , & tales dispositiones postulant naturaliter materiam incapacem formæ, & dispositionum habentium contrarias, alioqui non foter
accom

accommodata materia naturæ formæ, ac dispositionum, nec posset modo naturali componere cum ea compositum, sed talis debet esse, vt non sit capax contrariæ formæ, ac dispositionum, & ita constituat cum eis compositum ex suis naturalibus principiis indissolubile.

Testimonia Scripturæ adducta in fauorem Platonis duo continent: vnum pertinens ad dissolutionem, aut corruptionem cælorum, alterum ad imutationem eorum. Ad primum quidem non de cælo pro supremis corporibus, sed pro aëre accipiendum esse, docet D. Aug. 3. libro de Gen. ad litteram, cap. 1. & 3. & in expositione Psalm. 101. in quo etiam sensu de cælis iuxta eiusdem sacre paginæ consuetudinem, quæ Psalm. 103. *Volucres cali, ait, hoc est, aëris, & alibi sæpè*, loquitur D. Petrus, vt verba antecedentia euidenter ostendunt. Postremum verò de cælis posterioribus in fine mundi innouandis, aut immutandis, pro corporibus cælestibus accipit D. Petrus, sicut cætera Scripturæ testimonia: sed imutationem, aut innouationem, non de substantiali, sed de accidentaliter intelligendam esse docent idem August. 14. lib. de Ciuitate Dei cap. 14. D. Hieronymus in illud Isaia 51. *Cali sicut fumus liquefcent*, & ad illa verba cap. 69. *Ecce ego creo cælos novos*, & D. Gregor. lib. 17. *Moralium* cap. 5. & sic exponendum est testimonium Clementis. Eiusmodi autem accidentaliter mutatio, quantum ad lucem erit; nam tunc maiori luce fulgebunt, mutabuntur etiam quantum ad motum, & modum influendi, & elementa igne purgabuntur à vaporum, & aliarum qualitarum permixtione, atque etiam ab immunditiis, quas ex malo vsu iniquorum hominum susceperunt, permanente quidem integra substantia, tam elementorum, quam cælorum; quare nihil ex sacris literis probare potest incorruptibilitatem eorum ex suis principiis intrinsecis, sed neque ex sanctis patribus, qui oppositum videntur docuisse. Nam vt docet D. Thomas 1. part. quæst. 66. artic. 1. ex mente Platonis, cuius doctrinam sequuti sunt in hac parte, id protulerunt, nisi fortè verbum incorruptibile desumpserunt, vt significat omnimodam necessitatem essendi, & soli Deo conuenit, iuxta Paulum 2. ad Timotheum 6. *Qui solus habet immortalitatem*, in quo sensu nulla creatura incorruptibilis esse potest.

Ad argumentum respondeo, virtutem finitam in materia existentem, & quæ defatigatur in moriendo, non posse moueri tempore infinito, & de hac sola loquitur Aristoteles; si verò spiritalis sit, vel prorsus incorruptibilis, bene potest, & ideò absque fine potest moueri cælum ab Angelo, vel posset à principio intrinseco efficiente, si illud haberet, quantumlibet finitum, secundum virtutem intensiuam: non est enim necessaria proportio inter

inter eiusmodi principia, & tempus durationis motus, vt attentè consideranti faciliè constare potest.

QVÆSTIO II.

An aliquando noua aliqua stella, vel mutatio alia in cælo apparuerit, & quomodo id contigerit.

A Vctores primæ opinionis & sententiæ relata quæstione 1. vt adstruant cælorum corruptibilitatem, obiicere nobis solent aliquas reales mutationes, in cælo deprehensas, ex quibus inferri videtur, cælum generari, & corrumpi, & ideò de illis nobis ex instituto agendum est, in hac quæstione, vt præcedentis veritas magis eluceat. Et in primis anno nostræ salutis millesimo quingentesimo septuagesimo secundo, omnibus Astrologis illius temporis consentientibus, immò & vniuersis hominibus spectantibus, apparuit in Cassiopea noua quædam stella, quæ post biennium euanuit: interim tamen ingentem omnibus, qui rei nouitatem percipere, admirationem attulit; & ideò Astrologos ad sententiam de ea ferendam compulit. Quæ, vt ipsi notarunt, initio stellam Veneris magnitudine, & claritate vincere videbatur. Præterea post aliquot menses adeò decreuit, vt deinceps toto suæ existentie tempore non maior, quàm aliud sydus tertiæ magnitudinis apparuerit, nec alio, quàm diurno motu simul cum primo mobili cieri videbatur.

In ferenda tamen de hac stella sententia distracti sunt huius temporis Astrologi (quorum hæ partes maximè sunt) nonnulli existimarunt hoc iubar, non stellam, sed cometam fuisse infra Lunæ globum degentem: huiusmodi sunt manolicus Abbas messanensis, paulinus, pridianus, P. Christophorus Clavius, Thadæus, & Agæsius. Quorum fundamentum esse potest cæli incorruptibilitas, & ingenerabilitas, quæst. præcedenti stabilita, quæ stare nequit, si aliquid de nouo productum in ipso cælo admittamus. Horum tamen sententia admittenda non est: quia ignes qui in elementari mundo sub Lunæ globo videntur; non possunt eodem modo, & sub eodem aspectu, omnibus vndecunque cernentibus apparere, nec in eodem loco ab omnibus notari, si cum stellis inerrantibus conferantur, vt ratum est apud Astronomos, & per se apparet manifestum, cum linæ visuales, per quas fit visio, ex diuersis, & ferè oppositis partibus circumferentiæ ductæ nequeant idem medium seruare, ac proinde nec visiones per eas factæ possint corpus interruptum, præsertim maximè distans ab alio, quasi vltimo terminante, eiusmodi visiones sub eodem aspectu & positione cum illo pertingere. At omnes Astrologi stellam illam denuò ortam sub eodem aspectu, & distantia ad inerrantia astra ex diuersis mundi plagis conspexerunt. Ergo

ſequitur manifeſtè iubar illud non in elementari regione, ſed in ætherea apparuiſſe. Præterea cometæ non eadem velocitatè, quæ ſydera circumferuntur, vt in omnibus aliis liquidò conſtat; ſiquidem ær, in quo degunt (etiãſi ad motum cæli rapi dicamus) non eadem celeritate circumuoluitur, vt omnibus compertum eſt; ratione enim fluidæ naturæ totum cæli rapientis impulſum non excipit. Igitur cùm illud iubar eadem, quæ cælum velocitate circumageretur, non cometa æri inſidens, ſed vera ſtella cælo affixa, vel certè illic reſidens, cenſenda eſt.

Aliorum ſententia fuit, ſtellam illam in regione ætherea apparuiſſe, non tamen fuſſe de nouo productam, ſed quæ priùs ibi quaſi occultò conſtiterit, & tum denuò nobis apparuerit: ſed non eodem modo id explicant: quidam enim eorum exiſtimarunt, illud aſtrum fuiſſe vnum è tredecim, quibus Caſſiopeæ Syduſ conſtat: quod eo tempore ob ingentem exhalationum copiam, inter ipſum, & noſtrum aſpectum interceptam, maius & ſplendidius ſolito viſum fuerit. Alij verò ſibi perſuaſum habuerunt, ſtellam illam fuiſſe aliquam ex minimis octauæ orbis, quæ præ exiguitate aliàs non cadit ſub noſtrum aſpectum; tunc autè pluriù exhalationum interuentu ſeſe in conſpectum dedit. Hæc ſentètia ſtabiliri poteſt argumētis, quibus nos priorè reſellimus.

Verùm enim verò horum Auctorum placitum nobis placere non poteſt, quippe quod veritatis ſcopum non attingit. Et in primis priorum via præcluditur ex eo, quòd plerique Aſtronomi per otium rem attentè inſpicientes, ſe obſeruafſe teſtantur, alias tredecim ſtellas in Caſſiopea, præter illud nouum aſtrum, quod excitandæ controuerſiæ occaſionem præbuit: quibus ſanè in hac re fides eſt adhibenda: aliàs eadem facilitate omnibus poſſemus inſiciari apparitionem illam nouæ ſtellæ, vt nos à difficultatum tricis expediremus. Deinde contra omnes poſſumus argumentari. Nequit intelligi naturaliter, quòd tam inſignis exhalationum copia inter ſtellam aliquam, & noſtrum aſpectum intercedat, quin etiam inter vicinum aliud Syduſ, & eūdē aſpectum interiaceat: ac proinde ſi hæc expirationum terreſtrium multitudo in cauſa fuiſſet, vt ſtella illa ſolito ſplendidior, & maior apparuiſſet, effeciſſet quidem, vt propinquior alia lucidior quàm antea videretur, quod Aſtologi omnes vno ore inſician-
tur. Præterea credibile non eſt, tam longo temporis tractu tantam exhalationum multitudinem in eodem ſitu, & poſitione, in illa ſtella perſeuerafſe, & eadem celeritate continuò fuiſſe motam. Obefit enim eadem exhalationis conditio, quæ ſuapte natura ſenſum euaneſcit, & à quolibet contrario abſumitur, vel diſtrahitur, necnon inquieto & inæquabili motu huc illuc fertur: ac denique etiãſi tanto temporis ſpatio in eadem quanti-
tate

rate perseverasset, ac constanti & æquabili motu semper moueretur, nihil proderet ad præsens institutum: quia illa exhalatio, seu exhalationum multitudo moueretur ad motum æris, vel ignis, in quibus esset, ut per se patet: sed hæc elementa non eadem velocitate cientur, ac stellatum cælum, nec eadem proportionem, & commensurationem ad illud, nec huius extat aliquod fundamentum: ergo neque exhalatio illa in illis residens, quæ proinde non posset esse causa constantis apparitionis diuersæ eiusdem stellæ. Tandem contra hanc sententiam etiam militat efficax argumentum primo loco factum contra priorem. Quia si propter exhalationem existentem in sublunari plaga alterantem medium potentia visiva, stella illa diuerso modo apparuisset, cum ex diuersis terræ partibus, diuersa media ad eandem stellam conspiciendam occurrant, non vndique stella illa noua, aut quasi innouata videretur, ut per se patet; quod contradicit omnibus Astrologis illius temporis. Nisi quis ex suo cerebro plures velit in medio consingere exhalationes, pro diuersitate locorum, ex quibus Astronomi nouam illam stellam obseruarunt: verum hoc naturaliter est impossibile; & planè commentitium, ad eludendum argumentum: priorum tamen vim non effugit, nisi aliam fabricetur chimeram.

Tertia sententia est aliorum, qui conuicti argumentis à nobis factis contra duas præcedentes, statuerunt, hoc iubar effulxisse in octaua Sphæra, non tamen fuisse veram stellam, sed cometam solis naturæ viribus productum per transmutationem cælestis orbis. Hi tamen Auctores verè constituunt cælum corruptibile natura sua, contra Peripateticam Scholam, & ea, quæ in prima quæstione stabilita sunt, quibus refelli faciliè possunt; priuatim tamen, & breuiter refutandi sunt, quia nequit assignari in cælo causa naturalis eiusmodi effectus, & si adstruatur, non poterit non naturaliter similes effectus frequentius habere, quos Astronomi experti non sunt. Signum ergo est manifestum, talem causam fictitiā esse, ac proinde realem effectum in eam reduci non posse. Præterea ille cometa naturaliter genitus in octauo cælo, produceretur ex cæli materia, quæ tenuissima est, quod non videtur posse contingere, neque intelligi, nisi aliquæ partes cæli densarentur pro illius productione, aliæ rareficerent. At hoc nequit per naturam contingere, cum cælum non sit naturæ fluidæ, sed solidæ, & consistentis, ut alibi diximus, suffragante Iob: aliæ stellæ fixæ aliquando magis sibi appropinquarent, ut interdum à se recederent, & orbis inferiores non æquali celeritate à primo mouerentur, ut in elementis contingit, quæ cum planè falsa sint, falsa quoque censenda est prædicta sententia.

His igitur efficaciter confutatis sententiis, quarta, & vltima, quippe quæ verisimilior longè apparet, nobis amplectenda est: nempe nouam hanc stellam à Deo fuisse productam in octaua Sphæra, supernaturali virtute, à communi, & statuta lege libera. Hanc sententiam tradunt Patres Conimb. cum aliis in 1. libro de cælo, capit. 13. quæst. 1. artic. 4. quæ sufficienter probata manet ex refutatione præcedentium, illis nanque explosis, nulla aliâ superesse videtur, præter istam. Præterea hoc modo rectè potuit ortum habere stella illa, & omnia, quæ apparuerunt, optimè constant: quæ contra est difficultas alicuius momenti. Superest ergo, vt hac ratione contigisse pleno ore fateamur. Quod vno è duobus modis intelligi potest: aut ita vt producta fuerit per creationem nouæ materiæ, ex qua educeretur forma, & simul penetraretur cum aliqua parte octauæ Sphæra, in qua apparuit: qua ratione integrè, & perfectè saluatur incorruptibilitas cæli, & omnimoda incorruptio, etiâ respectu absolutæ potentiæ Dei, quapropter hic modus videtur congruentior, & magis consonus naturæ cæli. Aliter etiam potuit hoc euenire, videlicet si corrupta à Deo aliqua parte cæli formæ, in eius partiali subiecto, & materia, induceretur ab agente supernaturali forma illius stellæ, quæ biennio transacto ab eodem agente corrumperetur, informata iterum materia, aliâ partiali forma, quæ cū reliquis partibus formæ cæli integram constituit, qui modus, vel alius similis, etsi minùs consonet naturæ cæli, non tamen adeò dissonat, vt comparatione agentis supernaturalis aliquam contradictionem inuoluat. In hoc enim stat cælum esse per se incorruptibile natura sua, & comparatione cuiuslibet agentis naturalis. Nec mirum est, si difficultatis expediendæ gratia ad miraculum confugiamus. Cùm enim effectus insolens, & præter consuetum rerum naturalium cursum euenit, in quod, nisi in primum efficiens à communi lege liberum illud referemus? Id quod non semel ab omnibus necessariò admittendum est, & simili ratione philosophandum censeo in alia cælesti apparitione, si vera fuit, quam ex libris Marc. Varr. refert D. Augustinus 20. de Ciui. c. 8. fertur enim stella Veneris semel mutasse magnitudinem, cursum, & figuram, id quod Rege Ogyge contigisse Mathematici non vulgaris auctoritatis testantur, Adrastus Cycianus, & Dionysius Creapolites, id nanque non in naturæ vim, cansarumque naturalium cursum referendum est, sed in absolutam primæ causæ potentiam, quæ non sine causa, licet frequentius nobis ignota, talia exhibet portenta, vt ex sacris literis didicimus. Legimus enim Iosue 10. Solem diuina virtute constituisse, vt Iesus Naue inchoatam victoriam ad perfectum vsque statum perduceret; Isaia 38. eundem Solem retortum commeasse ad longioris Regis Ezechia vitam denotandam;

dam; & Christo domino moriente Solem fuisse obscuratum Euang. testatur historia. Hæc igitur ad diuinam, & absolutam dei potentiam præter leges rebus creatis statutas operantem referenda esse, quis ambiget? Ex his tamen non licet colligere, orbium cælestium naturam ex se esse corruptioni obnoxiam, contra quod supra stabilitum reliquimus.

QVÆSTIO III.

An insint calo vera raritas, & densitas eiusdem rationis cum sublunaribus.

Occasione alterius arg. quod 1. addidimus quæst. 1. pro opinione Plat. de rarit. & densit. exorta est quæst. 3. in qua duo quærentur: vnum est, an vera raritas, & densitas sint in cælo: alterum, an sint eiusdem speciei, cum his quæ reperiuntur in corporibus sublunaribus, vt in aëre, & aqua. Et circa primum sentiunt recentiores quidam, veram raritatem pro qualitate, quæ in corporibus sublunaribus reperitur, non esse in cælo, nec densitatem, sed quadam tantum ratione impropria pro maiori multitudine partium, sub minori præsentia, vel pro minori multitudine sub præsentia maiori. Probant primò, quia raritas, si vera est, separat partes corporis inter sese, & quasi eas compellit ad maiorem locum se extendere, & densitas magis eas coniungens, quasi cogit, vt ad minorem locum; sed omnia hæc repugnant partibus cæli, quod cum sit sua propria natura incorruptibile, non potest pati similes mutationes ex se tendentes ad corruptionem: ergo etiam repugnat cælo vera raritas, & densitas.

Secundò, vera raritas, & densitas sunt secundæ qualitates eorum habentes ex permixtione primarum, vt docet Aristoteles 1. libro de generatione, cap. 1. textu 8. Præterea sunt causæ grauitatis, & leuitatis, atque etiam mollitudinis, & duritiei, vt docet 4. libro Physicorum, capite 9. textu 35. Sed corpus cæleste caret primis qualitativibus, atque etiam grauitate, & leuitate, duritie, ac mollitudine: ergo carebit vera raritate, ac densitate.

Nihilominus posterior sententia longè probabiliôr ponit veram raritatem, & densitatem in corpore cælesti, non minus quam in sublunaribus. Ita Ægidius libro 1. Hexameron, capite 35. Partes Conimbricenses 1. libro de generatione, cap. 5. quæst. 17. articul. 1. ad finem, & plures alij, quod ratione probatur à priori, ex natura harum qualitatum. Effectus formalis veræ raritatis, & densitatis in corporibus sublunaribus reperiatur reperitur in cælo: ergo vera ipsa raritas, & densitas: euidens est consequentia ab effectu formali ad inhærentiam formæ. Sed probatur antecedens, quia effectus formalis raritatis est, partes corporis separare inter

seſe, & conſequenter, & quali ſecundariò ad maiorem præſentiam localem eas extendere: ſed vtrumque reperitur in cælo; ergo vera raritas, & denſitas. Minorem probo, quia in Sole, Luna, & ſtellis videmus plus materię reperiri ſub minoribus dimensionibus, quàm in partibus intermediis cæli, ſicut in modo tabulę reſpectu aliarum partium, ſed non poteſt reperiri plus materię ſub minoribus dimensionibus, niſi reperiantur plures partes inter ſe coniunctę, vt in corporibus ſublunaribus conſtat: ergo reperitur in cælo formalis effectus raritatis, & denſitatis, ac proinde vera ipſa raritas, & denſitas.

Circa ſecundum verò an raritas, & denſitas cæli ſint eiſdem, vel diuerſę ſpeciei, cum raritate, & denſitate corporum ſublunarium, non deſunt, qui negent eſſe eiſdem ſpeciei propter teſtimonia illa Ariſtotelis oppoſita in fauorem primę opinionis: nam diuerſitas ſpecifica effectuum procedentium ab vna & altera cauſa conuincit diuerſitatem ſpecificam earundem cauſarum, cum procedant per ſe ex virtutibus earum; ſed raritas & denſitas corporum ſublunarium habent effectus per ſe in eis diuerſę ſpeciei, nempe grauitatem, & leuitatem, molliitudinem ac duritiem, quos repugnat habere raritatem & denſitatem cælorum: ergo diuerſę ſunt ſpeciei. Quod etiam probari poteſt ex diuerſitate cauſarum per ſe, ex quibus procedit vtraque: nam raritas, & denſitas ſublunaris procedit ex permixtione primarum qualitatũ, ex qua non poſſunt procedere in cælo, in quo nec ſunt primę qualitates, nec permixtio earum, ſed ex aliis virtutibus, ac diſpoſitionibus in materia requiſitis ad vñionem formę, valde diuerſis, vel ex forma ipſa.

Oppoſitam ſententiam meritò tenent omnes citati pro poſteriori opinione, de exiſtentia verę, ac proprię raritatis, & denſitatis in cælo. probatur verò primum ex vtriuſque raritatis, ac denſitatis effectũ formali, hoc modo. Qualitates conferunt effectũ formalem ſubiecto, cui inhærent, iuxta propriam naturam, & eſſentiam, vt calor facit ſubiectum formaliter calidum, & albedo formaliter album: ergo implicat contradictionem, conferre eundem effectũ formalem illa, quę ſunt diuerſę ſpeciei, vel diuerſum, ſi ſint eiſdem ſpeciei. Sed raritas, & denſitas cęleſtis corporis, & ſublunaris, conferunt ſubiectis effectũ formalem eiſdem rationis: ergo repugnat eſſe diuerſę ſpeciei: minorem probo, quia effectus formalis raritatis eſt ſeparatio partium quantitatis inter ſeſe; ita vt pauciores partes, & minor multitudo materię contineantur ſub maioribus dimensionibus; & effectus formalis denſitatis, coniunctio eſt partium inter ſeſe ſita vt plures partes, maiorque multitudo materię contineatur ſub minoribus dimensionibus, vt probauimus.

baui 1. libro de generatione , capit. 5. tractatu de rarefactione , qu. 1. Sed tam raritas, & densitas cælestis, quàm sublunaris, præstant hos effectus suis corporibus, quod non est minùs manifestum in cælo, quàm in quocunque corpore sublunari: ergo sunt eiusdem speciei. Addendum verò est, quòd raritas, & densitas cælestis, nec sunt prima, nec secunda qualitas, nec sequuntur omninò ex commixtione primarum. Quod facillè probari potest, nam si in cælo non sunt qualitates verè contrariæ, & actiue, vt ferè omnes admittunt, & probabitur inferiùs, sequitur, nec dari in eo permixtionem earum, & ideò nec raritatem nec densitatem, quæ sit qualitas prima, vel secunda: nam secundæ qualitates dicuntur, quia ex prioribus oriuntur: primæ, ex quibus consurgunt aliæ: sed se habere, sicut se habet lux, de qua ostendimus 2. lib. de anima, cap. 7. nec esse primam, nec secundam qualitatem, nec diuisionem qualitatis in primam, & secundam esse adæquatam, sub qua proinde comprehendantur omnes.

Ad primum argumentum oppositæ sententiæ distinguenda est maior; nam si ita sint causæ productiue effectuum diuersorum, vt per se adæquatè, ac ideò semper producant diuersos, & in quocunque subiecto, arguit quidem distinctionem specificam earum, si verò nec eos producant semper, nec semper eodem modo, sed iuxta capacitatem & dispositionem subiecti, solum arguit distinctionem accidentalem, vt patet in cæteris qualitatibus, & ideò certissima regula cognoscendi specificam distinctionem, ex solo effectu formali primario statuenda est, quem implicat contradictionem non tribuere cuicunque subiecto, in quo inhærent, & eodem modo semper, & cum raritas, ac densitas, nec semper, nec eodem modo producant illos effectus, sed secundum dispositionem subiecti, non potest ex illis colligi distinctio specifica cælestis à sublunari, etiamsi in cælo eos non producant: sicut lux cæli non producit calorem in cælo, producit tamen in inferioribus, ob specialem eorum capacitatem, cum tamen ipsa sit eiusdem speciei.

Ad secundum negandum est, quòd raritas, & densitas per se procedant ex permixtione, aut concursu primarum qualitarum; sed talem causam efficientem habere, accidentale est eis, atque etiam hoc vel illo modo, secundum hunc, vel illum gradum à talibus causis procedere, quod prouenit ex tali dispositione subiectorum, & secundum diuersum modum eius variatur processio, & modus procedendi; quare licet procedant in corporibus sublunaribus ex permixtione, aut concursu primarum qualitarum, & in cælo non ex hac, sed ex alia causa diuersa, nempe ex dispositione, aut forma eius, non bene colligitur

esse diuerſæ ſpeciei. Et poſſumus exemplum ſumere in diaphaneitate, aut transparentia corporum, quæ in elementis procedit ex concurſu duarum qualitatũ primarum; in mixtis, ex permixtione quatuor, vt in cryſtallo, & in pupilla oculi; in cælo vero ex nulla cauſa harum, ſed ex alio diuerſa, & tamen in omnibus (abſque dubio) eſt eiũdem ſpeciei, & pari ratione in opacitate eſt maniſeſtum. Ariſtoteles ergo in omnibus illis teſtimoniis loquitur de raritate, & denſitate, quantum ad cauſam à qua procedit, & effectus, quos producit non in toto ſuo ambitu, ſed ſolum de ea, quæ eſt in corporibus ſublunaribus; quare non poteſt colligi ex eis, quod ſpecie diſtingnantur à raritate, ac denſitate cæleſti, quamuis procedant à diuerſis cauſis efficientibus, & diuerſos effectus habeant, iuxta diuerſam diſpoſitionem corporum.

APPENDIX. DVBIUM.

An cælum poſſit ſua natura alterari.

DVplicem alterationem in primis oportet diſtinguere, communem, & propriam: communis eſt illa, per quam producitũ qualitas, ita alterans ſubiectum, vt non diſponat ad introductionem formæ contrariæ, & expulſionem propriæ, ſed potiùs ipſum perficiat, vt conſtat de lumine, quare illuminatio non eſt propria alteratio, ſed communis. Alteratio propria illa, per quam producitũ qualitas diſponens ſubiectum ad introductionem formæ contrariæ, & expulſionem propriæ, vt calefactio, aut inſtigidatio, per quas calor, aut frigus produciuntur, diſponentia ſubiectum ad expulſionem propriæ formæ, ac introductionem contrariæ. Et de altera impropria certa res eſt, cælum ex propria natura eſſe alterabile, cum conſtet experientia illuminari à Sole, & illi, qui tenent, cælum habere principium corruptionis; quia conſtat materia aquæ, ex qua à principio fuit factum, conſequenter tenetur fateri, quod poſſit ſua natura ſuſcipere qualitates, per quas diſponatur materia eius ad ſuſcipiẽdas formas elementares, vel ſaltem, quod talis alteratio non repugnet naturæ eius, ſi adſit naturale agens approximatum, à quo alterari poſſit: cuius ratio eſt maniſeſta, quia ſi habet materia eius naturalem capacitatem ad formam aquæ, & aliorum elementorum, neceſſe eſt eandem habere ad diſpoſitiones per ſe ordinatas ad illam, quales ſunt eadẽ qualitates elementorum. Et hoc idem tenentur concedere, qui tenent, materiam cæli eiũdem rationis eſſe cum ſublunari, vt ſuperiùs probauimus. Vel dicendum eſt, capacitatem, ſeu potentiam paſſiuam naturalem, quam neceſſe eſt habere materiam cæli ad ſublunares formas, & conſequenter ad earum diſpoſitiones, otioſam, ac fruſtraneam eſſe, cum non poſſit ab aliquo

quo agente naturali reduci ad actum.

Nihilominus dicendum nobis est, materiam cæli, cum sit diuersæ naturæ à sublunari, incapacem esse omnium formarum sublunarium, & consequenter repugnare illi naturaliter suscipere qualitates contrarias earum, per propriam alterationem. Quod sic probō. Qualitates istæ contrariæ ex propria natura sunt dispositiones materiæ ad introductionem formarum, à quibus emanant, ut calor ignis est dispositio per se ordinata ad introductionem formæ ignis in materia, & expulsionem præexistentis in ea. Præterea eadem qualitates, cum sint sua natura actiue, sunt etiam instrumenta substantialium formarum, per quas alias similes educunt de potentia subiecti, easque in eo producant, ut per eas expellant formas oppositas: sed materia cæli non est capax substantialium formarum sublunarium, sed ei repugnant: ergo repugnabunt etiam dispositiones per se ordinatæ ad introductionem, & expulsionem præexistentium. Probatur consequentia, quia cui repugnat finis, non potest non repugnare medium per se ordinatum ad illum, quare repugnabunt cælo quæcunque alterationes propriæ, quæ media sunt per se ordinata ad easdem qualitates producendas; in cælis autem ipsis non sunt similes qualitates actiue, & propriæ contrariæ, quare neque alterationes propriæ ad eas producendas. Quare non potest vnum cælum alterari ab alio, neque alterare aliud propria alteratione. An verò alteretur vnum cælum ab altero per impulsum, quem ab eo recipiat, ut moueatur, vel quodcunque cælum à sua intelligentia, à qua mouetur per impulsum ab ea impressum, vel sine tali impulsu moueatur ab ea, per immediatam applicationem suæ virtutis, discutietur in secundo libro: illa tamen alteratio, si datur, non est propria, sed communis.

Ex dictis colligitur, in cælo non esse grauitatem, nec leuitatem, nec minùs colores, odores, & lapores, ut communis omnium sensus tenet: quia hæ omnes secundæ qualitates ortum habent necessariò ex quatuor primarum permixtione. Et ideo cum cæli primarum qualitarum capaces non sint, nec affici possunt secundis ex illis naturaliter ortis, quod de grauitate &

leuitate in specie probat Aristot. hic: quia corpus graue mouetur ad medium, & leue à medio, quo-

rum neutrum cælo conuenit, ut con-

stat & latius profequitur ipse.

CAPVT IV.

Textus Aristotelis.

Quòd autem non est circulari latiori contraria alia latior, &c.

Breuis expositio textus.

PRæsupposuit Aristoteles capite præcedenti, motum circula-
rem non habere contrarium, & hoc intendit probare capite
præfenti, vnica ratione proluxa satis, quam hoc modo placuit ad
breuitatem simul, ac methodum contrahere. Si motui circulari
foret contrarius alter motus, aut esset rectus, aut circularis (nam
ad hos reducuntur omnes motus locales) sed neuter horum est
ei contrarius, ergo nullum contrarium habebit. Minorem pro-
bat primò de motu recto hoc modo: vnus motus rectus est con-
trarius alteri, vt motus sursum motui deorsum; si ergo idem mo-
tus rectus contrarius est circulari, habebit idem rectus duos
motus contrarios, videlicet alium rectum, atque circula-rem, ideò
vni essent duo contraria, quod supposuit impossibile in præce-
dentibus. Probat deinde, quòd circularis non habeat pro contra-
rio alium circula-rem, quia quocunque ex quatuor modis hi mo-
tus considerentur, nunquam propriè contrariantur, cum nun-
quam tendant in terminos ad quos propriè contrarios, quod fa-
cilè constat, & fusiùs prosequitur Aristoteles, & quæstione se-
quenti nos altius expendemus.

QVÆSTIO VNICA.

*An probauerit Aristoteles efficaciter, quòd motui circulari
nihil sit contrarium.*

D. Thomas 1. lib. de cælo, lectione 8. inter exponendam lite-
ram huius capitis, tria, vel quatuor argumenta profert ad
probandum infirmum, aque inefficacem esse hunc discursum
Aristotelis, & ideò non bene probare, quòd motus circularis cæli
tæreat contrario: & primum est aduersus illud, quod tanquam
principium videtur præsupponere, videlicet vni vnum tantum
contrarium esse: quod tamen videtur falsum, quia eadem virtus
liberalitatis habet duo vitia sibi contraria, nempe auaritiam, &
prodigalitatē; hanc quidem per excessum, quia prodigus exce-
dit in dando, nam vel plus tribuit, quàm secundum rectam ra-
tionem tribuendum est, vel sine modo, quia ei tribuit, cui non
est tribuendum, vel tali loco, aut tempore, quibus dandum non
est. Auaritiā verò per defectum, quia auarus non tribuit vllò
modo. Secundò, contra secundum dictum, quòd scilicet, si diuersi
motus

motus facti per diuersos semicirculos constitutos super extrema eiusdem rectæ lineæ, modo opposito, hoc est, ab hoc puncto extremo ad aliud, & rursus ab hoc extremo ad primum, forent contrarij, sequeretur, eundem motum habere posse infinitos motus contrarios, quia ab vno puncto extremo rectæ lineæ ad aliud, infiniti possunt duci semicirculi. Contra hoc igitur sic argui potest. Sicut inter duo extrema rectæ lineæ possunt duci infiniti semicirculi, sic etiam possunt duci infinitæ lineæ rectæ: ergo possunt fieri super eas infiniti motus recti. Sed ex his motibus, quidam possent fieri sursum, & alij deorsum, vt si fierent quidam à puncto centri terræ ad punctum designatum in concauo Lunæ: alij verò deorsum ab hoc puncto ad centrum: essent igitur contrarij, & ideo quilibet motus sursum eorum haberet infinitos motus deorsum sibi contrarios, & quilibet motus deorsum infinitos alios motus sursum. Vel ergo hoc reputatur inconueniens, & ita probaretur eadem ratione, motum rectum non habere contrarium, sicut probatur de circulari: quod tamen constat esse falsum: vel non reputatur inconueniens, & ita non probabitur hoc argumēto, quòd circularis contrario careat, vt intendit Arist.

Aduersus tertium, quod Aristoteles præsupponit, motus scilicet contrarios fieri debere inter terminos à quo, & ad quem maximè distantes, quia contraria sunt, quæ maximè distant, obiicitur tertio, quia motus à medio, & motus ad medium, hoc est, motus à centro terræ ad concauum Lunæ, & motus à concauo Lunæ ad centrum terræ, sunt contrarij ex omnium sententia: & tamen non versantur inter terminos maximè distantes: nam maior distantia est inter polos mundi, cum distent per integrum diametrum eiusdem mundi, quàm inter centrum terræ & concauum Lunæ, quæ solum distant per semidiametrum: ergo motus inter hæc extrema nō sunt contrarij, cum non versentur inter maximè distantia, quòd cum sit falsum, falsum quoque erit principium ab Aristotele præsuppositum, & ideo corrui argumentum super illud fundatum.

Vltimo intulit Aristoteles, quòd si motus circulares facti per oppositam partem integri circuli, forent contrarij, mutuò se impedirent mobilia, & ideo vnum vel alterum, aut etiam, vtrumque esset frustra, quia motum non posset conficere.

Contra hoc tamen potest opponi, quòd idem sequatur incommodum in motibus rectis contrariis sursum & deorsum per eandem lineam factis, & ideo mutuò se impredientibus: & tamen hoc non tollit, quin motus contrarij sint: ergo non probabitur tali argumento, quòd motus circulares non sint contrarij, præsertim, cum ipsemet Aristoteles 8. lib. *Physicorum*, cap. 8. textu 64. id. docuerit, probaueritque tales motus circulares esse contrarios,

contrarios, quia mutuò se impediunt, & cap. 9. textu 72. motum factum per semicirculum ab vno puncto extremo rectæ lineæ ad aliud, non posse continuari cum motu facto ab extremo ad primum, quia sunt contrarij, & contraria non possunt continuari. Constat verò, duo hæc opposita esse his quæ docet capite præfenti, nempe motum circularem nullum habere contrarium.

His tamen non obstantibus, ipsemet Diuus Thomas, & cæteri omnes interpretes huius capituli sequuntur sententiam Aristotelis, quòd motus circularis non habet contrarium, & rationes, quibus id probauit, recipiunt; quare non oportet multiplicare aliquas, sed sufficit, argumenta aduersus eas soluere, ex quorum solutionibus constabit, non parum efficacitatis habere. Pro solutione igitur primi (omittis aliis solutionibus, quas ex aliorum, ac propria sententia afferunt patres Conimbricenses, tanquam insufficientibus) adiutare oportet, contrarietatem duplicem esse, adæquatam, & inadæquatam; illa censetur adæquata, quæ est oppositio, quasi completa, & integra, ita vt vnum oppositorum contrarietur completæ, atque integræ rationi alterius, & non partiali, & quasi incompletæ. Inadæquata verò vocatur ea, quæ est quasi dimidiata oppositio; quia non ex toto, sed ex parte inter duo aliqua intercedit. Adæquata censetur contrarietas inter ignem, & aquam ratione qualitaturn, quia per vtranque opponuntur, videlicet, per calorem, & siccitatem ex parte ignis, per frigiditatem, & humiditatem ex parte aquæ; inadæquata verò inter ignem, & aërem, qui per vnam tantum qualitatem contrariantur, videlicet per siccitatem ex parte ignis, & humiditatem ex parte aëris, non per calorem. Principium igitur ab Aristotele præsuppositum, quòd vni vnum tantum contrarium esse possit, de contrarietate tantum adæquata accipiendum est, quæ cum sit completa, vna tantum esse potest in quolibet contrario, & ideo respectu vnius tantum extremi; inadæquata verò, cum sit incompleta, est quasi partialis multiplex, quia completa ratio eiusdem extremi, pluribus partibus, aut rationibus partialibus constare potest, & iuxta singulas singulis opponi, pluræque habere contraria inadæquata, & ita se res habet in liberalitate, cuius integra, & quasi completa ratio obiectiua, est dare, cui, quomodo, quando, & vbi dare oportet: prior igitur ratio ei opposita est, non dare vllò modo, & hæc est ratio auaritiæ. Posterior verò consistit in tribuendo sine ordine, hoc est, non cui tribuendum est, neque eo tempore, vel loco, aut modo, quibus tribui debet: in quo consistit ratio prodigalitatis, longè diuersa à ratione auaritiæ. Et ecce tibi duo vicia eidem virtuti liberalitatis contraria, sed inadæquata ratione, quia quodlibet non opponitur ei secundum totam eius rationem, sed secundum rationem partialem, & incompletam, ita quidem

quidem vt sicut ex vtraque completur integra ratio talis virtutis, sic ex vtroque vitio opposito constet quasi vnum integrum, atque complerum, quo pacto sumi debent quæcunque alia contraria vni, & eidem rei: nam multa opponi eidem secundum adæquatam eius rationem repugnat: & ex hac doctrina soluitur primum argumentum, & declaratur principium, quod præsupponit Aristoteles.

Ad secundum, concedendum est antecedens, quod inter duo puncta extrema rectæ lineæ possunt duci aliæ in infinitum, sicut posuit infiniti semicirculis: sed diuerso modo se habet isti, & ille: nam lineæ rectæ habent eandem distantiam, & ideo sunt eiusdem rationis, & pariter motus super eas facti: quare licet sint contrarij, solum sequitur, quod vni possint infinita opponi, solo numero, & non specie distincta, quod nullum incommodum habet, supposito quod talia infinita sint possibilis: lineæ verò curuæ, quæ in modum semicirculorum ducerentur ab extremis eiusdem lineæ rectæ, non haberent eandem distantiam, sed maiorem, nec proinde forent eiusdem rationis, sed diuersæ, & ideo si admittatur, esse contrarias, statim infertur, vni infinita contraria diuersæ speciei dari posse, quod est maximum inconueniens.

Ad tertium respondetur, motus contrarios versari quidem inter terminos maximè distantes non qualicumque distantia, sed ea, in qua potest fieri naturaliter motus, & talis est distantia inter centrum terræ, & concauum Lunæ: qua quidem maior est distantia inter polos mundi: sed per hanc non potest naturalis motus fieri, quia nullum est naturale corpus, nec naturaliter possibile, quod motu naturali ab vno polo in alterum moueri possit: quare in ordine ad motum naturalem illa est maxima, cui non est comparabilis distantia inter polos, maximè quia maxima distantia requisita ad constituendos motus contrarios, debet sumi formaliter, hoc est, ex opposito modo formali attingendi terminum.

Ad vltimum respondeo, diuersam esse rationem de motibus rectis, & circularibus: nam motus recti, sursum, & deorsum, etiam si non fiant per eandem lineam, sed per diuersas, contrarij sunt, dummodo vnus à centro terræ ad concauum Lunæ fiat, & ex opposito alter, cum versentur inter contrarios terminos: ergo necessarium non est, vt mobilia se impendant, nec vt alterum eorum sit frustra. Motus verò circularis est ab eodem in idem punctum: quare vt duo motus circulares contrarij sint, ab eodem in idem punctum eiusdem circuli inuerso ordine fieri debent, quod non est possibile, nisi fiat super eandem lineam, & vtrunque corpus per eum motum idem prorsus percurrat spatium: ex quo euidenter colligitur, se impedire, & vnum eorum, vel vtrunque fru-

stra esse, vt intulit Aristoteles, cuius argumentum efficax est.

Ad testimonia Arist. adducta in eodem argumento dicendum est, diuerso modo sumere contrarietatem motuum in eis locis, ac sumpsit capite præsentis, ibi enim improprie pro quacunque repugnantia, hic vero pro contrarietate propria, iuxta leges contrarietatis motus à se latas §. lib. Physicorum, quo pacto verum est, & à se efficaciter probatum, quod motus circularis nullum contrarium habeat, sed iuxta primam acceptionem impropriam contrarium habere potest. Bene tandem adnotauit D. Thom. circa eandem ultimam rationem, ex ea colligi, quod senserit planè Arist. corpora cælestia facta esse à Deo, quod ex tota eius doctrina vix fortè colligi posset. Quod verò colligatur, ostendit, quia si motus circulares duorum corporum cælestium forent contrarij, mutuo se impedirent, & ideo vnum eorum, vel vtrumque frustra foret, quod ait Aristot. esse falsum, quia Deus, & natura nihil frustra faciunt, eiusmodi autem consequutio in corporibus cælestibus frustra esset, nisi supponeret, corpora cælestia facta esse à Deo, vt consideranti faciliè patebit.

C A P V T V.

Textus Aristotelis.

Sed quoniam manifestum est de his, & de reliquis considerandum est, & primum, vtrum sit quoddam corpus infinitum.

Breuis expositio textus.

Incipit iam Aristoteles agere de perfectione vniuersi, & ad eam cognoscendam inquit, an aliquod ex quinque corporibus infinitum sit, vt ex hac parte constet, an infinitus sit mundus; & in hoc capite aliquibus prælibatis, docet, non dari corpus infinitum magnitudine, quod circulariter moueatur, quia si corpus tale esset infinitum, lineæ ductæ à centro eius ad circumferentias, in infinitum distarent, quia quò magis protrahuntur, magis distant, ergo non posset vna ad situm alterius prouenire, hoc autem est necessarium, vt corpus circulariter moueatur, nequit igitur dari infinitum corpus: & idem conuincitur, si ponamus lineam deductam à centro in infinitum, & aliam secantem corpus infinitum per centrum vsque ad circumferentias: illa enim necessario per motum attinget partes alterius, quæ secat totum corpus, & tamen ponimus claudere infinitum spatium. Præterea si cælum esset infinitæ magnitudinis, non posset moueri spatio viginti quatuor horarum, contra experientiam, quia si linea ducatur à centro cæli, & alia infinita ponatur iuxta cælum quiescens, linea illa recta spatio finito transiret successiue aliam, & spatium infinitum,

finitum, quod est absurdum: & eandem vim habent argumenta, à quocunque puncto corporis infiniti ducantur lineæ, si ibi non est assignabile centrum. Vterius, cælum infinitum non posset tempore finito circulariter transire corpora finita sub se contenta: nec potest non corpus claudi extremis, quia figura importat extrema, & inseparabilis est à quantitate: ergo nequit esse infinitum. Denique cælum infinitum infinito moueretur tempore, cum infinitum deberet spatium transire, quod experimento pugnat: nequit ergo cælum, aut aliud corpus circulariter motum esse infinitum.

CAPVT VI.

Textus Aristotelis.

Sed adhuc neque quod ad medium, neque quod à medio fertur, infinitum erit, &c.

Breuis expositio.

Intendit Aristoteles, non posse dari elementum actu infinitum, & probat duplici ratione, quia corpora, quorum loca finita sunt, finita etiam erunt, ut patet; sed loca elementorum sunt finita, quod de terra, & igne probatur; quia ut pote contraria maxime distant sub eodem genere: sed maxima distantia est determinata, nempe, ultra quam non est maior, & quando vnum contrarium est finitum, similiter & aliud: At locus terræ finitus est, cum illum possit corpus per motum attingere, nec potest ultra procedere, nisi eum deferendo, ut patet: de aëre vero, & aqua facilius, nam quidquid extremis clauditur, finitum est; sed media elementa, & eorum loca clauduntur extremis; ergo sunt finita; nam si infinita forent, nullum corpus moueri posset ab vno extremo elemento ad aliud, quia oporteret eadem media pertransire, & hoc patet esse impossibile, quia infinitum non est pertransibile.

Secundò, si aliquod elementum foret infinitum secundum magnitudinem, sequeretur, fore etiam infinitum secundum virtutem motiuam, & ideò habere grauitatem, aut leuitatem actu infinitam, cum eadem sit proportio magnitudinis, & grauitatis, vel leuitatis, siquidem addita parte magnitudinis, additur pars grauitatis, aut leuitatis, & ex opposito aliqua inferuntur absurda. Sed impossibilis est grauitas, aut leuitas actu infinita: ergo impossibile quoque erit, dari elementum magnitudine infinitum. Minor probatur, quia quò maior est grauitas, vel leuitas, velocior est motus; hac ergo crescente in infinitum, similiter crescet velocitas, ac proinde fiet motus in non tempore, seu instanti; quod implicat.

CAPVT VII.

Textus Aristotelis.

Necesse itaque, corpus omne aut infinitum esse aut finitum.

Breuis expositio textus.

TRibus diuisionibus præsuppositis, corporis, in finitum, & infinitum, partium, in homogeneas, & heterogeneas, & harum, in finitas & infinitas, quasi continuato sermone prosequitur Aristoteles idemmet intantum præcedentis capitis, nempe probare, quod non detur in mundo corpus aliquod magnitudine infinitum. Diuiditur verò caput in duas partes: in prima probat non dari corpus actu infinitum dissimilariū, nec similariū partium ex motu locali: in secunda probat ex actione, & passione, & aliis argumentis dialecticis, & in fine refutat opinionem quandam antiquorum. Primò probat, quia si partes illius corporis heterogeneæ essent infinitæ, cum debeat cuilibet proprius motus distinctus, essent infiniti specie motus: si verò essent finitæ aliquæ earum, vel omnes deberent esse infinitæ magnitudinis, ac proinde infinitæ grauitatis, quod suprà probatum est absurdum: præterea occuparent infinitum locum, immò nullum reliquis spatium relinquerent: si verò partes essent eiusdem rationis, corpus infinitum esset infinitæ grauitatis, vel leuitatis, vt suprà intulit, & non posset moueri.

Secundò probat, quia corpus infinitum non potest mouere aliud corpus finitum, vel infinitum finito, aut infinito tempore, neque ab eorum aliquo moueri: vtrinque enim manifesta inferuntur absurda ex dictis, siue moueatur motu recto, siue circulari, & cum quidquid mouetur, ab alio moueatur, deberet poni aliud corpus infinitæ virtutis ad mouendum illud, quod fusiis refellit Aristoteles, & ex eisdem, & aliis absurdis refutat opinionem Democriti, & Leucippi, ponentium corpus infinitum conflatum ex infinitis atomis indiuisibilibus, medio vacuo.

CAPVT VIII.

Textus Aristotelis.

Cum autem, neque plures esse cælos, possibile est, dicamus, &c.

Breuis expositio textus.

INtendit Aristoteles hoc capite probare, non esse plures mundos, quia si plures darenrur, quilibet haberet suum cælum, suam terram, cæteraque elementa distincta à cælo, terra, & elementis alterius: ergo terra alterius mundi moueretur ad centrum terræ huius, vel ergo moueretur naturaliter, aut violenter, non naturaliter,

naturaliter, alioqui in proprio loco quiesceret violenter, quod patet esse falsum: sed neque moueretur violenter, alioqui motus à centro huius terræ ad proprium foret ei naturalis, quod patet etiam falsum, quia impossibile est, corpori graui naturalem esse motum à centro: sed terra illa foret grauis: ergo non posset naturaliter moueri à centro. Confirmatur, quia motus huius, & alterius mundi eiusdem essent speciei, ergo motus sursum ab eodem centro & deorsum ad idem centrum fierent; quod in eo euentu stare non posset. Præterea corpora vtriusque mundi eandem haberent inclinationem, & virtutem motiuam. Ergo ad eundem locum naturaliter mouerentur, & extra illum essent violenta.

In fine capituli refutat Aristoteles opinionem aliquorum asserentium, corpora naturalia non habere vllum motum naturalem, sed ab extrinseco: quia quæ ab extrinseco per violentiam mouentur, quò maioris sunt magnitudinis, eò tardiùs mouentur: sed oppositum constat in grauib: ergo. Præterea nullum corpus mouetur violenter ad locum, à quo violenter extrahitur, sed grauia, & leuia extrahuntur violenter à loco infimo, & supero: ergo ad ea non violenter, sed naturaliter mouentur. Confirmatur, quia hoc motu velociùs mouentur in fine, quàm in principio, cuius oppositum violentis accidit. Quæ maior velocitas provenit, inquit Arist. ex augmento grauitatis, & leuitatis, quod non de grauitate naturali, sed de acquisita, nempe impulsu, intelligendum est. Tandem probat Aristot. vnitatem mundi ex vnitatem primi motoris, & primi motus circularis, & ex locis determinatis, in quibus sunt corpora hunc modum constitutia.

C A P V T IX.

Textus Aristotelis.

Quòd autem non solum unus est, sed & impossibile esse plures, &c.

Breuis expositio textus.

Intentum Aristotelis in hoc capite est, probare, non esse plures mundos possibiles, quod præmissa ratione dubitandi pro opposita parte hoc argumento confirmat, quo simul rationem in contrarium adductam soluit. Quia non potest alius mundus fieri sine noua materia: sed hic mundus continet omnem materiam possibilem, vltra quam non est possibilis alia, cum comprehendat omnia corpora cælestia, elementaria, & mixta: ergo non datur alia ratio materiæ, per quam ratio mundi contrahi possit. Quòd verò extra cælum non sit vllum corpus, probat, quia supremum cælum continet omnes alios, & elementa, ac proinde omnia mixta, quæ ex elementis generantur, & eorum locis con-

tinentur. Vnde infert Aristoteles, extra cælum, & mundum non dari locum, quia cùm ex se sit receptaculum corporis, frustra esset, vbi non potest esse corpus, vnde nec dari potest vacuum, cùm hoc sit locus non repletus corpore, sed aptus repleri. Tandem, ibi nequit dari tempus: quia est numerus motus: ergo non potest esse, vbi esse non potest mobile & motus. Addit tamen Arist. extra mundum esse entia quædam perfectissima incorporea, & vitam indefectibilem, & perfectissimam habentia, quorum nomine intelligit Aristot. supremam intelligentiam, nempe, Deum, & alios inferiores à prima factas, & dependentes.

Tractatus de mundo, seu vniuerso, & his, quæ ad ipsum pertinent.

QVÆSTIO I.

An sit unus mundus, vel plures.

AD priorem sententiam reduci possunt omnes illi Philosophi, qui plures mundos posuere, quamuis alij affirmauerint, infinitos dari, vt Metrodorus, Xenophanes, Anaximander, Anaximenes, Archelaüs, Aristarchus, Diogenes, Leucippus, Epicurus, & Anaxarchus, quem (vt Plutarchus retulit, in libro de tranquillitate animi) cùm Alexander Macedo de mundorum infinitate differentem audiisset, illacrymasse fertur: rogantibusque amicis, num aliquid ei dignum lacrymis accidisset? An indignum est, inquit, nos flere, si cùm infiniti mundi esse probentur, nondum vnius domini sumus? Alij verò finitos quidem, sed penè innumerabiles, vt Democritus ponens in eis magnam diuersitatem, ita vt in quibusdam, neque Sol esset, neque Luna, in aliis verò splendidiora longè sydera, quàm quæ in hoc nostro sunt; quidam etiam animalibus carerent, & plantis, & alij eisdem rebus abundarent. Et hæc & alia veterum Philosophorum placita referunt Diuus Ambrosius libro 1. Hexameron, capite 1. Diuus Augustinus libro 18. de Ciuitate Dei, capite 14. Theodoretus in libro de materia, & mundo. Plutarchus primo libro de placitis Philosophorum, cap. 5. Albertus Magnus in summa de homine, quæst. de hominis habitaculo, artic. 1.

Posterior verò sententia omninò opposita vnicum profitetur mundum, quam tenuerunt Thales, Pythagoras, Hipassus, Anaxagoras, Parmenides, & Melissus, Heraclitus, Zeno, Plato, atque Aristoteles cum tota Peripatetica schola, quam posteri omnes sequuti sunt. Sed duo argumentorum genera attulerunt antiqui ad probandam hanc vnitatem mundi. Plato quidem in Timæo (vt testatur Alcinoüs in libro de doctrina eius, capite 12.) ex duobus eam probat, nempe ex vnitatem sui principij,

principij, atque exemplaris intelligibilis: Deus enim, à quo tanquam à suo principio, & fonte prodiit, vnus est; vnus item intellectus diuinus, à quo ordinatæ sunt res omnes, ex quibus conflatus est mundus: ergo eandem quoque vnitatem participare debet. Secundò ex propria ratione, ac perfectione mundi, quem propterea vniuersum vocamus, quia in se complectitur vniuersa à Deo condita: ergo vel non est, vel vnicus est: quia eo ipso, quòd ponantur multi, nullus poterit vniuersum vocari, cum non omnia comprehendat.

Aristoteles verò ex natura, & inclinatione corporum (præsertim sublunarium) atque ex motibus eorum naturalibus processit.

Ex quibus hoc vnum incommodum inferre voluit ex multitudine mundorum, quòd elementa cuiusque naturaliter mouerentur ad loca aliorum, quod videtur impossibile, cum non possint ad ea moueri, nisi deferendo propria, à quibus repugnat motu naturali discedere, & hoc argumentum est quasi aliorum summa, quare non est necessarium, ea in particulari repetere.

Circa hanc quæstionem dicendum est primò, nec ratione Philosophica, nec Metaphysica, vel alia quacunque euidenti, immò nec efficaci probari posse, quòd non sint plures mundi, sed coniecturis tantum probabilibus. Quod sic ostendo: creatio vnus mundi, vel plurium est opus liberum Dei: ergo quòd vnus, vel multiplex sit conditus, ex sola eius voluntate libera dependet, & non ex aliquo principio vel causa naturali: sed seclusa experientia, & clara reuelatione Dei non potest constare nobis euidenter de effectibus liberis voluntatis liberæ suæ, an in natura rerum sint, vel non: ergo nec possumus euidenti ratione cognoscere, quòd vnus mundus tantum, aut plures sint ab eo facti, immò nec ratione efficaci, quia nullum inueniret argumentum ex principiis euidentibus efficaciter deductum, quo id ostendi possit, vt statim patebit. Sola igitur coniectura probabilis deduci potest ex duobus, nempe, ex vnitatem ordinis, quo disposita sunt ab eo superiora, & inferiora corpora eundem modum dependentiæ horum ab illis, quod certè congruum satis fuit, vt ex hoc mirabili effectū, ex tot, ac tantis diuersis rebus compositis, vno, eodemque modo ordinatis ostenderetur, ab vno artifice per vnā, eandemque sapientiam eius conditum fuisse, quam rationem attigerunt Diuus Athanasius in oratione contra idola, & Diuus Thomas 1. parte, quæst. 47. artic. 1. Quod ex alio etiam deduci potest, quia nullum prorsus indicium inuenietur, ex quo diuinare quispiam possit plures mundos esse à Deo factos. Tunc ergo excogitatum est, & absque vllō rationis fundamento, ab antiquioribus Philosophis, immò præter communem omnium

hominum existimationem, dari plures mundos. Vnde sequitur, argumenta Platonis pro coniecturis duntaxat esse recipienda: primum enim solum probat, ex quadam congruentia desumpta ex vnitatem principij effectiui, à quo tamen plures mundos non processisse, non conuincit: sicut nec secundum argumentum; quamuis enim ad rationem vniuersi essentialem requirantur omnes gradus essendi in aliquibus generibus, speciebus, & indiuiduis consistentes, non tamen necessario exiguntur omnia genera, species, & omnia indiuidua, vnde posset quis excogitare eisdem gradus essendi sub aliis speciebus, & indiuiduis constituentes alium mundum sub alia ordinatione, & collocatione. Argumentum Aristotelis futile prorsus est. Nam si ponantur alia corpora cælestia, & alia elementa, & mixta, distincta specie, vel numero, à constituentibus hunc mundum, & inter sese ordinata, sicut sunt modò corpora huius mundi, manifestum foret, corpora illius mundi nullum ordinem habitura dependentiæ, subordinationis loci, aut situs cum corporibus huius mundi, sed solum inter se, sicut si hic mundus non staret: ergo non mouerentur naturaliter ad idem centrum, vel locum, sed vnumquodque ad proprium proprii mundi, quo adepto quiesceret naturaliter, & à quo violenter extraheretur.

Secundo dicendum est, consonum valde esse nostræ fidei, quod vnicus sit mundus, nec plures dentur, quare temerarium vt minimum fore existimo, plures admittere. Ita Diuus Thom. 1. parte, quæst. 47. artic. 3. Probat, quia sacra pagina semper de mundo in singulari loquitur, præsertim Ioannis primo: & mundus per ipsum factus est: Matthæi ultimo, & Marci etiam ultimo, dum Apostoli ad propagandam fidem mittuntur, dictum est eis: Euntes in mundum vniuersum prædicate Euangelium omni creaturæ. Quod ex ordine etiam creationis colligitur: post cuius enarrationem dicitur Gen. 1. vidit Deus cuncta, quæ fecerat, & erant valde bona: & postquam omnia fecit, cessasse dicitur ab vniuerso opere: quasi dicatur, præter continuam propagationem rerum omnium conditarum, nihil nouum amplius condidisse. Et cum constet illa omnia, quæ ex sex dierum spatio creauit, ad vnicum hunc mundum pertinere, colligitur non esse alterum à Deo conditum. Præterea Actuum 17. & ad Rom. 5. docuit Paulus, fecisse Deum ex vno homine genus humanum, & per vnum etiam hominem peccatum in hunc mundum introisse: constat verò ex fide omnes homines infectos fuisse peccato eiusdem hominis, ita vt absque erroris nota admitti non possit, quod homines alij præter eos, quos mundus iste continet, dentur ab originali peccato immunes; ergo nec potest admitti alter mundus præter istum, nisi aliquis dicere velit, ab hoc mundo in alterum fuisse aliquos

aliquos homines translatos, quod ridiculum est. Quare D. Aug. in libro de hæresibus, hæresi 77. & D. Isidorus 8. libro etymolog. cap. 5. inter errores contra fidem enumerant positionem de multitudine mundorum, & quod amplius est, 24. quest. 3. capite Quidam autem hæretici. circa finem, numerant pro hæresi inter alias, ponere mundos innumerabiles.

QVÆSTIO II.

An per potentiam Dei absolutam possibiles sint plures mundi, specie, aut numero distincti.

PRIUS QUAM diuersas Auctorum sententias referamus, excludi debet impius error Viclephi, & Abaylardi, quem refert, & reiicit Vvaldenſis capit. 10. doctrinalis antiquæ fidei, asserentium, Deum non posse quidquam aliud facere, præter ea, quæ facit, quia non libere, sed ex necessitate naturæ operatur, sicut calefacit ignis: naturales autem causæ quidquid possunt, operantur, & nihil aliud possunt, præter ea, quæ faciunt: sed constat, Deum vnum tantum fecisse mundum; ergo impossibile est plures facere, nam si plures posset facere, iam omnes produxisset.

Quem errorem impium voco, quia omnia fermè nostræ fidei mysteria euertit; & licet eum velint aliqui Aristoteli tribuere, putantes eum propterea negasse, quod plures mundi dari possent, ex eius tamen doctrina planè colligitur, modum libere agendi Deo non denegasse, nec propterea quod senserit agere ex necessitate naturæ, docuisse, quod non posset plures mundos facere, sed quia re ipsa illi visum est, repugnare, ex eo quod existimauerit possibilem non esse aliam materiam specie distinctam, ac proinde omnia corpora ex materia hac conflata eandem habitura inclinationem ad locum eundem, & eandem virtutem motiuam ad ipsum; vnde corpora vtriusque mundi ad eundem locum naturaliter mouerentur, quod est impossibile: non tamen negauit Aristoteles, vt aliqui putant, esse possibilem aliam materiam numero distinctam. Cognouit enim materiam fuisse factam immediatè à Deo, proinde Deum posse aliam producere: sed esse possibilem materiam ad corpora distinctæ naturæ constituentia alium mundum, vt constat ex fundamentis ipsius: & in hoc sensu sequuntur sententiam Aristotelis, Alexander, Simplicius, & Auerroës, immò D. Thomas hic ad finem lectionis 19. & expressius 1. part. quest. 87. artic. 3. ad 3. sic: *Mundus constat ex sua tota materia: non est enim possibile, esse aliam terram, quàm istam, quia omnis terra fertur naturaliter ad hoc medium, ubicunque est; & eadem est ratio de aliis corporibus, quæ sunt partes mundi.* Fundamenta huius sententiæ iacta sunt in præcedentibus.

Secunda opinio communis, & vera tenet, posse Deum sua absoluta potentia plures mundos efficere. Ita Albertus Magnus 1. libro de cælo, tractatu 3. capite 6. Saxonia ibidem, quæst. 11. Pater Clavius ad caput primū sphaeræ, pag. 28. Patres Conimbricenses 1. libro de cælo, 9. cap. quæst. 1. artic. 2. & ex scholasticis, D. Thomas in 1. distin. 44. quæst. 1. artic. 2. D. Bonau. quæst. 1. Durandus quæst. 3. Gabriel & Okam quæst. 1. artic. 2. Maior quæst. 1. Capreolus in 1. distinct. 43. quæst. vnica, art. 2. quam tanquam veram præsupponit Caietanus 1. parte, quæst. 47. artic. 3. & tandem sancti Patres eam profitentur; præsertim Athanasius in oratione contra Idola, Ambrosius 2. libro Hexameron, cap. 2. Basiliius homilia secunda Hexamer. Iustinus Martyr in lib. de quorundam decretorum Aristotelis reprehensione, iuxta quam respondemus quæstioni duabus assertionibus, quarum prima est.

Possibiles sunt plures mundi specie, ac numero distincti: probatur utrumque hoc argumento: non repugnat ex parte diuinæ omnipotentiae, neque ex parte rei faciendæ: ergo possibile est, utroque modo fieri plures. Antecedens, quantum ad diuinam omnipotentiam, per se est euidens, cum se extendat ad omne illud, quod non inuoluit contradictionem: ergo solum restat probandum, quod ex parte effectus non inuoluat contradictionem, ut eo ipso probatum sit posse fieri. Probatur autem primò, non repugnare, quod plures mundi fiant specie distincti, quia mundus dicit ordinationem multorum corporum simplicium inferiorum, ac superiorum, hoc est, elementorum, ac cælorum sub vno primo mobili, & vno primo mouente, nempe Deo, à quo dirigente, & gubernante inferiora per superiora mouetur omnia, diriguntur omnia, multiplicantur, & conseruantur omnes species mixtorum ex simplicibus factis: sed potest Deus aliam congregationem corporum specie distinctorum efficere, & ordine specie distincto ea ordinare; ergo potest efficere alium mundum specie distinctum ab isto. Minorem probo, quia ordo huius mundi consistit in situ corporum grauium, & leuium sub cælo: sed poterit Deus producere alios cælos habentes alias virtutes, & influentias, ita ut sine motu, vel medio alio motu diuerso valde operentur, atque etiam alium numerum elementorum, seu corporum simplicium, quæ sub cælo illo contenta haberent naturas, & conditiones, potentiasque motiuas diuersas à grauitate, & leuitate, & alio modo longè diuerso ordinarentur inter sese, & cum cælo, in quo nulla potest excogitari repugnantia: alius momenti: ergo possibiles censendi sunt plures mundi specie diuersi. Quod cum hac sola limitatione intelligendum censeo, ut ex parte speciei humanæ (eo modo, quo ad mundum pertinet) non sit possibile, quod fiant plures mundi specie distincti, quia
non

non videtur mihi possibile fieri alium hominem specie distinctum. Quod vero non repugnet fieri plures mundos eiusdem speciei probatur, quia nulla potest ostendi repugnantia in eo, quod fiat aliud elementum terræ eiusdem speciei cum isto; nam sicut hoc fecit Deus ex nihilo, & ideo absque vlla prorsus difficultate, ita ut sola sua libera, & efficaci volūtate, qua voluit fieri, factum sit, & pariter cætera elementa, ita potest terram aliam, aliâque elementa eiusdem naturæ cum his ex nihilo condere, & alios etiam cælos, & modo etiâ simili talia corpora inter se ordinare, ita ut sub alio primo mobili inter se ordinentur alia corpora cælestia, & sub eis elementa alia, modo etiam simili inter se ordinata; & ecce tibi aliam congregationem corporum simplicium ordinatorum sub vno primo principio, & ad vnum, eundemque finem, & ideo alterum mundum numero distinctum sub eadem specie. Et argumenta Aristotelis in contrarium præfata, nullam prorsus repugnantiam in hac multiplicatione dari probant, ut vidimus, & mox copiosius ostendemus.

Assertio posterior: sententia Aristotelis, quod non sint possibles plures mundi in eo sensu, quem ipse tenuit, accepta, nec est error contra fidem, nec etiam contra principia Philosophiæ, sed opinio minus probabilis, quàm opposita. Quamuis enim hanc impossibilitatem reducere in defectum potentiæ Dei, ab initio producentis necessario quidquid potest producere, ut somniarent Vviclephus, & Abaylardus, aut etiam efficientis liberè ab initio quantum potuit, sit error contra fidem, ut ostendit D. August. 12. de Civitate, cap. 17. & D. Thomas 1. parte, quæst. 15. art. 5. cum etiam de homine liberè operante stultissimum sit hoc dicere. Tamen asserere, non posse fieri alium mundum, quia etiâ si aliæ creaturæ denuò fiant, repugnat, eas ordinari alia ordinatione distincta, ac proinde constitui alium novum mundum, tametsi minus verum, nihil tamen erroris habet; & hoc solum docuit Aristoteles, ut rationes eius allatæ suprâ demonstrant, & tenet D. Thomas suprâ. Probatur non esse errorem, quia nullam imperfectionem deo tribuit, neque inde aliquid in fidei præiudicium infertur, sed totum reducit in defectum possibilitatis alterius ordinationis, & rationis distinguendi; in quo locus potest dari opinionibus: & qui opinionem Aristotelis damnant, in alio sensu ex duobus prioribus eum intellexerunt, secus D. Thomas, & alij, quorum plures docent, Aristotelem loqui de potentia ordinata; & sic vera esset eius sententia, & hoc modo traditur à D. Thoma.

Fundamenta autem Aristotelis non conuincunt pluralitatem mundi esse impossibilem. Hæc enim est ratio (inquit S. Thomas 1. parte, quæst. 47. art. 3. ad 1.) quare mundus est vnus, quia debent

omnia esse ordinata vno ordine ad vnum, hoc est, vnitas mundi desumi debet ex ordinatione corporum inter se ab vno principio, & ad vnum finem; sed possunt esse ordinationes specie distincte, & solo numero, nihil enim obstat, quominus diuersa numero, aut specie corpora producantur, & inter se, & ad finem diuerso modo ordinentur, vt patet: corpora autem, vt ordinata in vno mundo ad proprium locum in illo occupandum, naturaliter mouerentur, & licet secundum se sublato hoc ordine in hoc mundo possent moueri ad centrum alterius mundi, quatenus ordinata ad hoc non inclinantur, sed ad proprium locum mundi, cuius partes sunt: falso ergo Aristoteles putauit, quodcunque elementum, & corpus aliud idem centrum appetere sub quauis ordinatione, ac si in eodem mundo esset: & alias non satiari, neque quiescere: qui etiam ex nullo capite hoc implicare probat, vt consideranti argumenta illius allata patebit.

QVÆSTIO III.

An Deus possit efficere alias atque alios mundos in infinitum perfectiores.

Sensus quæstionis est, an sit possibilis alius, atque alius mundus essentialiter, vel indiuidualiter perfectior in infinitum syncategorematicè, vt aiunt, hoc est, ita vt datis quibuscunque possint semper alij perfectiores fieri: non enim agimus de infinito actu, de quo diximus ad 3. Physicorum.

Prior sententia affirmat, hoc esse possibile de multiplicatione perfectionis indiuidualis, non tamen essentialis, quam tenet Durandus in 1. distinct. 44. quæstione 2. quod etiam tenere debent necessariò omnes qui opinantur, non esse producibiles species in infinitum, sed ad aliquam necessariò perueniendum, vltra quam non sit alia producibilis, vt tenet Aureolus apud Capreolum in 1. distinct. 44. quæst. 1. & ita sensisse Scotum in 3. distinct. 13. quæstione 1. testatur meritò Caietanus 1. parte, quæst. 25. articulo 6.

Ex hoc enim sequitur, non posse mundos essentialiter perfectiores multiplicari in infinitum, & quod dicitur de perfectione indiuiduali, infra probabitur: aliud verò de perfectione essentiali, probatur efficaciter hoc argumento: si possibiles forent plures mundi essentialiter perfectiores in infinitum, ita vt nunquam perueniri possit ad mundum ita perfectum, quin alter possit produci essentialiter perfectior, sequitur omnes mundos factibiles essentialiter perfectiores non habere vltimum, & ex consequenti esse infinitos, & cum omne factibile, omneque possibile reduci possit ad actum, dari poterunt in rerum natura infiniti mundi

mūdi perfectiores essentialiter actu producti, actuque existētes. Ex quo duo sequuntur: primum, quod detur infinitum in actu secundum multitudinem; postremum, quod detur species aliqua infinita secundum perfectionem essentialē, & quod sequatur primum, euidens est, ut cuique patet; quod verò sequatur postremum, sic probatur. Si dantur mundi actu infiniti, & specie distincti; ergo dantur species actu infinitæ. Tota igitur latitudo essentialis perfectionis specificæ earum erit actu infinita: sed latitudo hæc infinitæ perfectionis est in eisdem speciebus: ergo necesse est dare aliquam speciem determinatam, aut vagè sumptam, actu infinitam; & quouis modo detur, absurdum est: quia infinita perfectio essentialis actualis in solo Deo reperiri potest; creaturæ verò essentialiter repugnat, quia ex intrinseca ratione creaturæ habet perfectionem essentialē participatam, & ideo limitatam, & actu finitam. Sed probatur consequentia, quia species (ut sæpè inculcat Aristoteles, & repetit D. Thomas) sunt sicut numeri, & ideo inæqualis perfectionis, quia sicut non dantur duo numeri æquales, sed unus necessariò addit unitatem supra alium, ratione cuius variatur species; ita species qualibet addit generi essentialē differentiam distinctam ab ea, quam addit altera, ratione cuius variatur alia species, & necesse est non dari duas æquales in perfectione, aut gradu essentiali, sed inæquales esse omnes: ergo si sint actu infinite, necesse est aliquam tandem eua- dere actu infinitam in perfectione essentiali, quemadmodum si in infinitum multiplicentur numeri, & numerus actu infinitus detur, necesse erit esse unum numerum actu infinitum, cum infinita sit ei additio unitatum facta. Ex quo non sequitur potentiam Dei esse finitam; semper enim ipsa poterit facere, quidquid non implicat contradictionem; ex parte enim solius effectus est repugnantia; ex modo etiam operandi sine vlla independentia & immeditatione suppositi; satis colligitur infinitas potentie Dei.

Nihilominus, etsi probabilis sit prior sententia, valde probabile cenſeo, posse Deum sua potentia absoluta producere alios, & alios mundos perfectiores, secundum numerum, & speciem in infinitum, ita ut quibuscunque productis possit novos alios, ac distinctos utroque modo producere. Quod in primis elicio ex doctrina D. Thomæ, 1. parte, quæst. 1. §. artic. 6. ad 1. sine limitatione asserentis, posse Deum quacunque data creatura, aliam producere meliorem, idque confirmat Caietanus ibidem. Ex hoc enim sequitur possibles esse alios mundos in infinitum perfectiores: nam sicut possunt aliæ creaturæ perfectiores in infinitum produci à Deo, ita possunt diuersis modis sub eo, ac inter sese ordinari, ita ut qualibet data ordinatione; possit dari alia perfectior in infinitum, & proinde alius, atque alius mundus per-

fectior sine termino, quia mundus non est aliud, quàm ordinatio diuersarum creaturarum sub vno principio ac inter sese. Probatur deinde ratione: quia possibile est à Deo fieri, quidquid non inuoluit contradictionem: sed nullam contradictionem inuoluit, quòd datis quibuscunque creaturis, aut etiam mundis, perfectiores aliæ fiant à Deo secundum numerum, & speciem: ergo possibile iudicandum est: maiorem sic ostendo, ex parte diuinæ omnipotentiae, cum infinita sit, nulla potest dari repugnantia in quibuscunque rebus producendis; sed nec ex parte ipsarum rerum repugnat, nouas semper posse produci, sicut nulla potuit assignari repugnantia ex parte productarum, ut producerentur, quia sicut materia harum ex nihilo creata est, & ex potentia eius eductæ sunt omnes formæ, non potest ostendi repugnantia in creanda noua materia ac educendis aliis formis diuersæ speciei ex ea, sed neque terminus aliquis in utroque præstando, quia nulla apparebit maior, aut noua repugnantia ex parte ipsarum in producendis nouis, aut sequentibus, neque potest cum fundamento excogitari: ergo sine pondere aliquo rationis ponitur diuinæ omnipotentiae terminus in nouis creaturis, aut nouis mundis numero, aut specie diuersis, ac perfectioribus semper in infinitum producendis: quod ex solutione oppositi fundamenti clariùs constabit.

Ad quod concessio antecedente, distinguendum est consequens prioris consequentiae, videlicet, quòd mundi factibiles sint infiniti; nam de infinito in potentia verum est, de infinito in actu falsum: quod patet in diuisionibus continui possibilibus, & non habentibus ultimam, quia datis quibuscunque aliæ sunt possibles in infinitum: pari ergo ratione mundi factibiles infiniti sunt, non actu, sed potentia, quia factibile, ut sic non actum, sed potentiam significat. Posterior verò pars argumenti procedit ab infinito in potentia, ad infinitum actu, quia omnis potentia est reducibilis ad actum: ergo si infiniti mundi sunt creabiles in infinitum perfectiores, cum hæc potentia possit reduci ad actum, poterunt dari infiniti mundi actu creati, & actu infiniti perfectiores secundum speciem. Respondent illi, qui tenent, infinitum actu esse possibile, vtrumque dari posse, & mundos actu infinitos, & quemlibet perfectiorem alio secundum speciem. Nos verò, qui nullum infinitum actu admitti posse probauimus 3. lib. Physicorum, non putamus argumentum hoc probare, quòd sit possibile, immò nullius roboris esse, ex hoc ipso, quòd procedit ab infinito in potentia ad infinitum in actu.

Quare ad formam eius distinguendum est, quòd omne producibile, vel possibile potest reduci ad actum: nam potentia duplex

duplex est, una imperfecta, & quasi inferior, quia partem actus includit, & partem potentiae, & ideo incompleta etiam vocari potest, qualis est immobile respectu motus successiui; hæc enim partem actus dicit, & partem potentiae, hoc est, aliquem gradum termini productum, & alium, vel alios producendos, & hoc genus potentiae non potest totaliter reduci ad actum, & talis est etiam potentia in continuo, & partibus eius ad actum diuisionis, & per eam diffiniuit Aristoteles infinitum in potentia 3. libro Physicorum, textu 63. dicens esse id, cuius secundum quantitatem accipientibus, semper aliquid accipere extra est. Talis est etiam potentia, quasi passiuæ producibilitatis in tota latitudine creaturarum, respectu diuinæ potentiae actiue ad producendum, quia si repugnat potentiam passiuam respectu diuisionis reduci ad actum, aut reductam esse, ita repugnat, omnes creaturas possibles actu produci, aut esse productas: sed quibuscunque productis supersunt aliae, quæ produci possint, etiam si per possibile, vel impossibile producantur actu infinitæ, vel infinities infinitæ, cum non sit maior ratio vnius, quam alterius. Quod hac ratione satis efficaci ostendo: productis quibuscunque creaturis non diminuitur potentia actiua infinita dei ad producendum, nec exhausta dici potest, sed sic integra, atque infinita manebit, ac prius potens producere de nouo quidquid non implicat contradictionem, nec diminuitur potentia passiuæ in tota latitudine creaturarum, ut produci possint, quia creaturæ iam productæ, etiam si essent infinitæ, non addunt, aliis nondum productis, implicationem contradictionis, ut producantur, vel ut sint in rerum natura, sed sic permanent possibles produci nostro modo intelligendi, ac erant prius, immò ac erant illæ, quæ iam fuerunt productæ, antequam producerentur: ergo non est intelligibile villo modo, omnes producibiles esse productas: ex quo efficaciter sequitur, nec esse potentiam hanc passiuam producibilitatis totaliter reductam ad actum, sed semper & necessario superesse ei aliquid reducendum. Quare non sequitur ex eo quod possibile sit alios, & alios mundos perfectiores in infinitum fieri à deo, posse fieri actu infinitos: ex quo constat ad primum incommodum argumenti.

Postremum verò incommodum erat, quod si forent possibles mundi perfectiores in infinitum, daretur aliquis mundus infinitæ perfectionis, quod repugnat: sed negandum est id sequi, quia licet vnus sit altero perfectior, non datur ultimus, & ideo non datur aliquis infinite perfectus, immò etiam si darentur actu infiniti, nullus talis daretur, quia nec daretur ultimus. Et si dicatur, saltem dari infinitam perfectionem extra deum,

Deum, respondeo, non sequi in nostra sententia, in qua totum, quod datur extra productum, semper est finitum; qui verò admittunt infinitum dari posse, respondent non dari vnam aliquam perfectionem actu infinitam, neque vnum aliquod infinitè perfectum, sed quamlibet perfectionem, & quodlibet perfectum finitum esse: quòd verò infinita sit perfectio per infinitos mundos sparsa, nullum est incommodum, quia solum ex hoc habetur dari infinitum numerum perfectionum, aut rerum finitarum, ex quo nulla implicatio contradictionis sequi aiunt.

QVÆSTIO IV.

An sit Deo possibile hunc mundum perfectiorem reddere.

Conueniunt Doctores, hunc mundum non posse perfici essentialiter, quia ut arguit D. Thomas, 1. parte, questione 25. artic. 6. eo ipso, quòd mundus, vel partes illius quoad essentialia perficiantur, non erit idem mundus, sicut non erit eadem species numeri, v. g. variata differentia essentiali. Præterea certum est, non posse mundum perfici accidentaliter, ex parte modi, quòd à Deo sit, ut tradit sanctus Thomas supra, quia repugnat, Deum ex meliori sapientia & bonitate mundum, & partes eius facere. Difficultas verò est, an possit mundus accidentaliter perfici ex parte ipsarum rerum, siue materialiter, ex eo, quòd aliquæ partes accidentaliter perficiantur, siue formaliter, ex eo, quòd ordo, & proportio partium inter se, & ad totum perfectior reddatur.

His præmissis asserit prima opinio non esse vllò modo possibile, hunc mundum perfici à Deo, quam tenuerunt illi, qui vniuersaliter docebant, non esse possibile Deo, quidquam producere melius his, quæ producit, quos (suppressis nominibus) citant Patres Conimbricenses ex Hugonè Victorino, potèstque probari primò ex illis verbis Genesis 1. Vidit Deus cuncta, quæ fecerat, & erant valdè bona, quasi dicere voluerit, perfectissima esse, quibus proinde nihil perfectionis addi possit. Probatum deinde ratione, quia si corpora hæc, & mundus iste perfectior fieri potuit, iniuria quodammodò videretur ei irrogata à Deo, qui talem perfectionem ei potuit conferre, & non contulit, quemadmodum fieret ei iniuria, si aliqua ei deesset essentialis perfectio, quam non tribuens ei Deus, cum potuerit, inuidia argui posset.

Secunda sententia asserit, vniuersum non posse perfici formaliter; hoc est, ex parte ordinationis formalis rerum, licèt possit ex parte aliquarum rerum, ac proinde materialiter reddi perfectius. Ita videtur sentire D. Thomas prima parte, questione 25. articulo 6. atque etiam in prima, distinctione 44. questione prima, articulo secundo, & cum eo Capreolus ibidem, atque etiam Alexander secunda parte, quæst. 18. membro 3. Altrifiodo-

rensis

rensis libro primo Summæ, capite 12. quæst. 7. & ratio Diui Thomæ est, quia ordo est perfectio formalis vniuersi: sed ordo quem Deus hisce rebus contulit, ex quibus fecit vniuersum, non potest esse melior: ergo neque res ipsæ possunt esse melius ordinatæ, & idcirco ex hac parte non potest vniuersum, hisce rebus permanentibus melius fieri: vnde sequitur, quod neque possit ex parte rerum melius fieri, nisi res omnes perficiantur, quia si vna tantum, aut altera melior fiat, cæteris eodem modo permanentibus, destrueretur ordo consistens in proportionem omnium, & consequenter destrueretur vniuersum formaliter in ordine rerum, & quasi harmonia ex eo resultante consistens. Quemadmodum, inquit D. Thomas, si ex chordis citharæ vna vel altera plus debito intenderetur, corrumpereetur melodia consurgens ex proportionem sonorum omnium attemperatorum. Huic rationi adiungi potest testimonium D. August. lib. 3. de libero arbitrio cap. 5. vbi sic ait. Quidquid tibi vera ratione melius occurrerit, scias fecisse tanquam bonorum omnium conditorem. & in Enchiridio, cap. 10. Bona sunt singula, quæ Deus fecit, sed simul vniuersa valde bona, quia ex omnibus consistit vniuersitatis admirabilis pulchritudo: ergo sentit, nihil melius hisce rebus, & huic mundo addi posse, quod eis non contulerit Deus.

Vltima sententia admittit, partes aliquot huius vniuersi meliores effici posse, secundum aliqua accidentia, & mundum ipsum accidentaliter perfici, non solum quantum ad easdem partes, sed etiam quantum ad ordinationem earum; sic sentiunt Durandus in 1. distinct. 44. quæst. 3. Argentina quæst. vnica, artic. 3. Aurcolus apud Capreolum in 1. distinct. 43. quæst. 1. artic. 1. Patres Conimbricenses 1. lib. de cælo, cap. 9. quæst. secunda, art. 1. atque etiam Pater Vasquez tomo 1. in 1. partem, disputatione 107. cap. 3. Probant primò, quia præstantissima creatura est homo, qui deterior effectus est per peccatum, & meliorem statum haberet, si in statu innocentie perseverasset, ex quo etiam quandam accidentalem perfectionem inferiores creaturæ suscepissent, quia meliori creaturæ subessent, atque obedirent, & consequenter non solum non dissolueretur ordo vniuersi, sed perficeretur potius, & vniuersum ipsum accidentaliter perfectius foret. Secundò, quia aliquæ species, in paucis indiuiduis, quæ habent, suscipiunt mutationes accidentales, vel iniuria temporum, vel alia ex causa, & nihilominus non ob id dissoluitur ordo vniuersi, quamuis ex parte illarum aliqua ratione deterius fiat idem vniuersum: ergo non est censendum impossibile, quod secundum rationes accidentales varietur, & idemmet suscepta tali variatione permaneat.

Nostra sententia hac distinctione explicanda est: Dupliciter excogitari

excogitari potest, quòd partes huius vniuersi perficiantur secundum rationes accidentales: priori quidem, ita vt ex eo, quòd vna vel altera perfectior fiat, non varietur naturalis collocatio aliarum, vel centrè eius cum illis, vel aliqua earum, quamuis modo aliquo accidentali perficeretur idem ordo, eademque collocatio, sed eodem modo permaneant iuxta propriam naturam, ac modò collocata sunt, videlicet in infimo loco terra, supra eam aqua, supra hanc aër, supra aërem ignis, & iste sub concauo Lunæ, cælestiaque corpora, vt modò sunt collocata. Et similem variationem videtur accepisse mundus post peccatum: nam licet inferiores creaturæ non ita obediant homini, ac in statu innocentie obediabant, & obedient, perseuerante eodè statu, nihilominus ei (licet minus benè) subiiciuntur, vt perfecta natura eius, & inferiores naturæ earum postulant; & pari ratione ordo, atque collocatio elementorum perfectior accidentali modo consisteret, maiori puritate elementorum conseruata, & perfectiore subordinatione corporum inter se, & ad alia, excellentiorique virtutis communicatione; & hac ratione perfici potest mundus accidentaliter, non variato, & destructo ordine principali, & quasi essentiali, quem habent, & semper habuerunt corpora inter se, & ad primum motorem, & primum mobile, quod non negat sanctus Thomas, & hoc solum probat tertia sententia: modo verò posteriori posset vna, vel altera pars mundi ita perfici intra rationem accidentalem, vt ex tali perfectione variaretur naturalis collocatio aliarum, vel eius cum eis, aut aliqua earum, quo pacto variaretur, si hoc idem elementum aquæ rarius, aut subtilius aëre efficeret neus, vel aërem subtiliorem igne, quod constat posse fieri inuariatis eisdem elementis secundum substantiam, vel substantiales formas: si verò id fieret, absque dubio variaretur collocatio, quam nunc habent, & quam à principio suæ conditionis habuerunt eadem corpora, quia natura eorum postuleret, leuiores esse supra minus leuia, & hæc sub illis. Postuleret igitur eadem natura, supposita tali mutatione, vt aqua leuior aëre facta super eum collocaretur, & in locum eo superiorem per motum sursum tenderet, & aër leuior igne factus supra illum, & per motum tenderet in concauum Lunæ. Ex quo constat, naturalem collocationem, quam nunc habent, & habuerunt à principio, variari, & hac variata, variari consequenter ordinem, & proportionem eorundem corporum, immò destrui, sicut destrueretur cytharæ harmonia hebetiori, aut grossiori eius chorda acutiori, aut subtiliori omnibus facta, vt acutè satis loco superius relato asserit D. Thomas: ac proinde mundus hic consistens formaliter in hoc ordine, & subordinatione hæc corporum non posset subsistere cum tali variatione; & per consequens huiusmodi perfectione accidentali

dentali partium perfici : & hoc sensu amplectitur hanc sententiam D. Thomas. & citati cum ipso, quæ nobis probabilior apparet, neque quidquam in contrarium probat tertia sententia, neque fortè intendit plus quàm nostra prior conclusio.

Ad primum argumentum secundæ opinionis dicimus, verba illa sacræ paginæ nostram potiùs sententiàm ita expositam continere : nam D. Augustin. ea exponit de partibus huius vniuersi, non tam secundum substantiam, quàm secundum ordinem resultantem ex situ & collocatiõe naturali earum, quo nec potest meliùs fieri, nec excogitari. Præterea secundum ordinem ad finem, qui est deus, non enim possunt in meliorem finem ordinari, quare meritò dicitur deo ea inspicienti, quasi reflexa cognitione, valdè bona apparuisse, hoc est, in summo gradu bonitatis constituta. Quem ordinem modo quodam valdè accidentali perfici duntaxat posse dicimus.

Ad secundum verò dicendum, inuidiam solùm habere locum in his, quæ ex debito aliquo, aut ex necessitate naturæ tribui debent: deus verò nemini quidquam debet, sed quasi ex gratia, hoc est, ex mera liberalitate, & non ex debito tribuit esse quibuscunque creaturis, & præterea perfectio illa accidentalis, secundum quam crescere possunt, non est eis debita, vt satis est per se manifestum.

CAPV T X.

IN his tribus cap. 10. 11. & 12. quæ hoc libro supersunt, quæst. hanc proponit ac dissoluit Arist.

An mundus sit generabilis, & corruptibilis.

Capite hoc 10. varias Philosophorum antiquorum sententias proponit: cap. verò 11. quædam pro eiusdem quæst. dissolutione adnotat, & tandem capite 12. ex propria sententia eam diluit, & hoc est intentum horum capitum.

Diuiditur verò caput 10. in duas partes, in quarum prima quæst. proposita assert opinionem Platonis & aliorum, eamque duplici ratione confutat: in postrema verò refert, & reiecit duas alias. Assertit ergo Arist. omnes fermè Philosophos se antiquiores conuenire circa productionem mundi, in eo, quòd genitum, seu productũ fuisse asseriebant: differre verò, quia Plato sequutus Orphæum, & Hesiodum, cum ponebat incorruptibilem: alij verò corruptendum esse aliquando censuerunt, quamuis non eodem, sed diuersis modis. Sententiam igitur Platonis & aliorum, quòd mundus fuerit genitus, & incorruptibilis duplici argumento refutat, quorum primum ita habet: Illud censetur in Philosophia certum, quod vt plurimũ euenit: sed ferè semper videmus, genita tãdem corrũpi, immò in se habere principium suæ corruptionis: ergo

ergo si mundus fuit genitus (vt asserit hæc sententia) necesse est, aliquando fore corruptèdum: falsum ergo est, eum ponere genitum, & non corruptibilem. Secundò, si mundus fuit genitus: ergo ex aliquibus principiis: nam ex nihilo nihil potest fieri. Vel ergo principia illa, priùs quàm ex eis gigneretur mundus, potuerunt aliter se habere, vel non: si hoc secundum dicatur, planè sequitur, quod si ex eis non fuit priùs constitutus mundus, ita nec postea potuit constitui: quia idem, in quantum idem, & eodem modo se habens, semper facit idem. Si verò dicatur, priùs quàm ex eis gigneretur mundus, potuisse aliter se habere, non minùs bene infertur, posse etiam aliter se habere, postquam mundum constituerunt, & idèò posse mundum ex eis constitutum aliter se habere, quod est posse non esse, & corrupti. Vtrumque hoc argumentum procedit de generatione physica. Deinde reiicit expositionem mentis Platonis adductam à Xenocrate, & aliis auditoribus Platonis, & teste D. Tho. hic, bene Aristoteles impugnatur, quod verba Platonis sonant, siue id Plato conceperit, siue non.

Secunda sententia fuit Democriti, asserentis ex casuali atomorum concursu genitum fuisse mundum aliquando, esse verò corruptibilem, & aliquando corruptendum, nec iterum reproduendum, sicut contingit cæteris corporibus ex elementis genitis. Hanc sententiam impugnatur Aristoteles hoc argumento, si mundus genitus est: ergo ex aliquo præexistente, quia ex nihilo non potest aliquid fieri (scilicet, generatione physica) vel ergo illud ex quo factus est, priùs quàm ex eo fieret, potuit generationi subiici, ita vt ex eo gigneretur mundus, vel non potuit: si dicatur hoc secundum, euidenter sequitur, non potuisse mundus ex eo fieri: si verò potuit generationi subiici: ergo destructo mundo ex eo genito permanebit, vt possit iterum generationi subiici, sicut potuit, priùs quàm ex eo fieret mundus, cum à mundo non dependeat, sicut nec priùs.

Tertia tandem sententia fuit Empedoclis, & Heracliti, qui mundum non solum genitum posuere, atque etiam corruptibilem, sed ita generari, & corrupti dixerunt, vt post corruptionem iterum generetur, iterumque corrumpatur, & quasi perpetuus quidam circulus ex vicissitudine generationis, & corruptionis eius constituatur: nam amicitia congregante elementa, generatur mundus, & lite eadem separante corrumpitur, & ita lite succedente amicitia, & hac illi in perpetuum, perpetua quædam vicissitudo generationis, & corruptionis mundi efficitur. Quam sententiam hoc argum. refutat Aristoteles: Eiusmodi vicissitudo perpetua generationis, & corruptionis mundi constare non potest, nisi salua semper eadem substantia mundi, hoc est, eisdem elementis per amicitiam coniunctis, & per litem separatis,

separatis, & in propria loca redeuntibus, quod si ita est, sequitur, nec propriè mundum generari, nec propriè corrumpi, sed quasi insensescere & iterum repuerascere, vel ex puero senem fieri, & iterum ex sene in puerum reuerti, quod patet esse absurdum.

CAPVT XI.

Textus Aristotelis.

Primum autem diuidendum est, quomodo generabilia, & ingenerabilia dicimus, &c.

Breuis expositio textus.

Quædam prænotat Aristoteles capite præsentī, ut commodius possit in sequenti explicare propriam sententiam: & primò explicat, quorū modis accipiuntur generabile & corruptibile, & consequenter ingenerabile, & incorruptibile. Deinde explicat significationes vocum, possibilis, & impossibilis: consequenter docet, quonam modo definiendæ sint potentia actiua.

Tribus igitur modis (ait) accipi solet ingenerabile. Primo, pro eo quod incipit esse, cum prius non fuerit, non tamen per veram generationem, sed alio modo, quo pacto incipit esse motus, atque etiam tactus, non enim generatur, aut fit motus, quia ad motum nec generatio, nec motus terminantur, ut docuit idemmet Aristoteles 5. libro Physicorum, cap. 1. nec etiam ad sensationem tactus, & propterea vterque ingenerabilis dicitur in hac prima acceptione. Secundo modo dicitur ingenerabile illud, quod quidem incipere potest per generationem, sed nondum est genitum: ut ignis, vel aqua crastino die generanda, dicitur hodie ingenerabilis, quia licet gigni possit, nondum tamen est genita. Tertio modo dicitur ingenerabile illud, quod non potest incipere esse, cum prius non fuerit, nec per generationem, nec alio modo, quo pacto cælestia corpora, & prima materia apud Aristotelem dicuntur ingenerabilia, quia sine vlla inceptiōe ea posuit, immò talis esse naturæ videtur censuisse, ut æterna sint, & nullo modo possint incipere esse. Apud nos verò solus Deus hoc modo ingenerabilis dicitur, quia non per generationem, vel alio modo, sed ex propria natura habet esse æternum, & totidem modis accipitur incorruptibile, ut cuique patebit facili applicatis eisdem acceptionibus significationi eius. Totidem etiam modis dicuntur generabile & corruptibile, ut ex accommodatione earundem acceptionum fit manifestum. Sed ut clariùs pateat significatio possibilis & impossibilis, docet id quod alicui possibile est, seu id, quod potest, intelligendum esse atque explicandum seu definiendum per maximum, hoc est, non per quancun-

que partem eius, sed per ultimam, aut summam : ultra quam non se extendit potentia eius: hoc enim explicat integram rationem potentia, & non quod est minus, quæ namque tantum potest, minus etiam poterit, non contrà. Impossibile verò, hoc est, id, quod aliquis non potest, ex opposito ait explicandum, seu definiendum esse per minimum quod non, ut si quispiam potest portare decem libras duntaxat, minimum quod non potest, erit undecima, per quam explicari debet illud, quod sibi reputatur impossibile, vel, quod idem est; potentia eius, quātum ad id, quod non potest, per minimum quod non est explicanda, seu definienda. Adnotat tamen Aristoteles, in aliquibus potentiis maximum sumi secundum excessum magnitudinis, ut constat in potentia portandi pondus: in aliis verò per excessum paruitatis, sed in quibuslibet eodem modo veram esse doctrinam, quod per maximum sit potentia actiua explicanda, ac definienda: nam sicut maximum desumptum per excessum magnitudinis continet quidquid inferius se est, ita maximum desumptum per excessum paruitatis, ut intuenti patet.

CAPUT XII.

Textus Aristotelis.

Determinatis autem his, dicere oportet, quod deinceps est, &c.

Brevis expositio textus.

Relatis suprà variis Philosophorum sententiis circa propositam quæstionem, & explicatis terminis eiusdem, intendit Aristoteles capite hoc proferre sententiam propriam. Diuiditur autem caput in duo membra: nam in primo duobus præmissis, propriam sententiam statuit, atque confirmat, ac deinde ex eius confirmatione reiicit sententiam Platonis ei oppositam. Igitur præmittendum est, duo esse genera rerum; primum est eorum quæ circa proprium esse immutabilia sunt, hoc est, ita habent esse, ut ipsum amittere non possint, vel ita sunt, ut non possint non esse, & hæc dicuntur sempiterna; alia verò mutari posse à proprio esse, quod est, sic esse, ut possint non esse, ut de equo, vel homine singularibus notum est, & hæc certum, ac definitum tempus habere existendi in natura rerum. Deinde præmitti oportet, possibile, & impossibile, verum, & falsum, posse accipi simpliciter, & ex suppositione, quod latè explicat Aristoteles, & per se patet, & non est idem simpliciter falsum, & simpliciter impossibile, ut exemplis constat, secus è contrario.

His prænotatis propriam sententiam tria continere asserit: primum est, omne sempiternum corrumpi non posse; quare verum esse non potest, quod mundus sit corruptibilis, & duraturus

in

in perpetuum, quod hac ratione probat. Si res durans per infinitum tempus, ponatur corruptibilis, sequitur possibile esse, quod corrumpatur: sed possibili posito in esse, nullum incommodum sequitur: ergo potest poni in esse, quod corrumpatur: quod verò corrumpitur, definit esse: ergo verum erit de eo, quod aliquando non sit, cum verò semper futurum sit, utpote sempiternum, verum pro aliquo tempore erit, quod sit & simul non sit, quæ sunt contradictoria: quod latius prosequitur.

Secundum est, sempiternum necessario esse ingenum, quod sic probat: si sempiternum non necessario est ingenum, ergo poterit esse genitum; sed repugnat esse genitum, quia quod generatur, procedit de non esse ad esse, & ita quidem, ut prius tempore non sit, & eodem tempore transactò incipiat esse, ergo eo ipso, quod ponatur sempiternum simul, & genitum, necessario debet concedi, quod pro aliquo tempore sit, & non sit, quod est absurdum: ex quibus colligit Aristoteles, ingenum, & incorruptibile, genitum, & corruptibile reciprocari, cum idem sit principium generationis, & corruptionis; deinde sempiternum cum ingenerabili, seu ingenito, & incorruptibili, reciprocatur, quia ingenerabile, & incorruptibile, nunquam potest incipere esse, aut desinere: ergo, quæ procedunt de generatione naturali, & sic vim habent, non tamen aduersus nos dicentes iuxta fidem, mundum factum fuisse in tempore per productionem ex nihilo.

Tertiò refutat sententiam Platonis relata[m] c. 10. quia necesse est, rem quamlibet genitam, definito, seu limitato tempore agere, & pati, esse, & non esse: nam si tempus agendi, vel essendi eius sit infinitum, & tempus patiendi, aut non essendi finitum, sequitur planè semper esse, & non esse aliquando: quia infinitum tempus essendi comprehendit omne tempus, & ideo comprehendere debet finitum tempus, in quo non fuit. Necesse est ergo tempore illo finito non essendi, simul esse, & non esse, quod præsuppositum fuit repugnare. Secundo, quia non minùs repugnat aliquid ingenum corrumpi, quàm aliquid genitum esse incorruptibile, ut ex superioribus constat; sed impossibile rem ingentam corrumpi; ergo etiam repugnante, rem genitam nunquam corrumpi, ut de mundo docuit Plato.

Denique, quia genitum esse corruptibile non potest esse fortuna, aut casu, sed ex principiis propriæ naturæ, nempe materia, quæ principium est totius corruptionis: sed materia semper est eadem, & semper se habet eodem modo, cum sit naturale principium, determinatumque proinde ad vnum: ergo genitum semper habet potentiam ad corruptionem, & ad non essendum.

QVÆSTIO VNICA.

An mundus solo generali concursu Dei perpetuò durare possit, an maiori indigeat ad perpetuitatem.

DVplex concursus Dei distingui solet, generalis, & specialis: generalis vocatur ille, quem postulat conseruatio cuiusque rei iuxta exigentiam suæ naturæ: specialis verò dicitur quicumque alius huic supperadditus, & naturis rerum non debitus, quamuis ordinis naturalis: de quo quærimus an necessarius sit ad perpetuitatem mundi, vel generalis sufficiat.

Et quòd mundus non possit cum solo auxilio generali Dei perpetuò conseruari, hisce argumentis probare possumus. Primo, quia ideò sublunaria corpora corruptibilia sunt, & ad non esse ex propria natura tendunt, quia non solum materia constant priuationi obnoxia (quæ totius corruptionis naturale principium est) sed ex contrariis componuntur, quæ per mutuam actionem & reactionem se destruunt: sed mundus in sua naturali compositione vtrumque claudit: nam ex sublunari materia, priuationi subdita, atque etiam ex contrariis elementis perpetuò inter sese repugnantibus constat: ergo ex propria conditione tendit in corruptionem, & ex consequenti in non esse; quare perpetuò durare repugnabit, nisi maiori, atque speciali Dei auxilio conseruetur. Secundò, quia mundus secundum omnes partes eius, præsertim quantum ad corpora vitæ prædita quantitatē, ac materiam petit intrinseco termino definitam: ita vt sub minori nec esse nec conseruari possit: etenim ad tam paruum quantitatem peruenire poterunt elementa, vt pro continuis generationibus mixtorum non sufficiant, sed tandem consumantur, & eis consumptis mundus pereat, & viuētia adeò diminui possunt, vt non possint sub tam parua quantitate conseruari, nec proprias operationes exercere: sed elementa, vtpote contraria, atque contigua, vicissim se corrumpunt, & statutam hominum constat indies minorem fieri, rarosque homines proceriores parentibus euadere, minori etiam temporis periodo durare. Ex quibus efficaciter sequitur, deuenturum tandem mundum ad eum statum, vt vltius conseruari nequeat, sine maiori, ac superaddito concursu diuino. Quod corroborari potest, ex proportionē finis eius cum principio: nam generationes non poterunt esse æternæ ex parte principij (vt octauo libro Physicorum ostendimus) ergo nec possunt esse æternæ ex parte finis: sed cessare debent, spectata earum natura, & concursu naturali, atque ordinario Dei, & ideò maiori ac speciali indiget mundus concursu, vt perpetuò durare possit.

Nostra

Nostra sententia duplici assertione continetur: prior est, mundus in eo statu imperfecto, quem habuit à principio, & habiturus est usque ad diem iudicii, conservari potest cū solo auxilio generali Dei, pro qua nullum auctorem refero, quia quæstionem hanc nullus attigit: sed eam probo primò, quia neque ex aliquo effectu, nec ratione alicuius momenti probabiliter ostendi potest, quòd à prima conditione contulerit Deus speciale aliquod auxilium mundo, aut alicui eius parti pro sua conservatione, neque id necessarium fuisse aliquando, vel tali auxilio indiguisse; sed eodem concursu, quo creavit materiam primam, & rationales animas, illam quidem formis unitam, has verò materiæ, eodem, inquam, eas conservat, neque maiori indigent, cum conservatio sit continuata ipsa productio. Unionem verò materiæ cum formis per continuas corruptiones dissolutam mediis secundis causis novas generationes cum solo concursu generali edentibus reparat, & modo simili, quidquid elementa sibi detrahunt per continuas, ac reciprocas actiones, & reactiones, ex eadem ipsorum materia eductis novis partibus formarum restauratur, semper enim corruptionem unius generatio alterius consequitur, quia materia non potest naturaliter denudari omni forma: quod in futurum effici posse, usque ad diem iudicii, facile constat, cum eadem res, eademque causæ naturales, eodem modo se habentes, atque eodem modo ex determinatione ad unum operantes permaneant: nam idem, in quantum idem, & eodem modo se habens, eodemque modo operans, semper atque eodem modo idem efficit. Secundò, quia ad divinam providentiam naturalem, & ordinariam spectat sic mundi exordium & continuationem attemperare per dispositionem, atque conservationem, & propagationem partium eius, ut nulli tantam permittat facultatem circa aliam, qua possit eam extinguere, immò nec notabiliter consumere; sed in tali ordine continet omnes, ut eisdem modis, cum eodemque, ac solo concursu, quo eas condidit, sese restaurare possint, & in eodem statu, ac dispositione, quam habuerunt à principio, conservare: ita ergo censendum est fieri, usque ad diem iudicii, cum eundem statum, eandemque dispositionem habeat, & habiturus sit mundus.

Assertio posterior est: mundus in eo statu, quem habiturus est post diem iudicii, per totam æternitatem, non potest cum solo concursu generali Dei, cum quo conservatur modò, conservari, sed maiori, atque specialiori indigebit, ut in eo conservetur. Hæc efficaci ratione probatur, quia status ille mundi longè diversus, & perfectior erit eo, quem habuit à principio: nam corpora ipsa, ex quibus componitur, novam perfectionem accidentalem recipient, & non naturaliter eis debitam, sed naturam eorum supe-

stantem, in eo enim statu cælestia corpora à propriis motibus quiescunt, vt colligitur ex illo Apocalypsis 10. vbi dicitur iurasse Angelum per virtutem in sæcula sæculorum, quòd tempus non erit amplius, nimirum postquam alter Angelus tuba cecinerit, qua insonante mortui ad vitam reuocabuntur, vt asseruit Paulus 1. ad Corinthi. 15. Quòd si tempus amplius non erit, neque motus cælorum esse poterit, cum quo realiter, vel idem est, vel siue quo nullo modo esse potest. Et probatur satis congrua ratione, quia cessante fine, cessant ea, quæ eius gratia sunt constituta: sed præcipuus finis, cuius gratia mouentur cæli, sunt generatio, atque conseruatio viuientium corporum, & aliorum, ex quibus fiunt, & aluntur: hæc verò omnia expleto hominum numero igne consumuntur, vt pluribus locis docent sacræ literæ, præsertim 1. Petr. 2. vltimo: ergo motus ipse cælorum cessabit. Præterea corpora ipsa cælestia ampliori luce vestientur, iuxta illud Isaie 30. *Lux Luna, sicut lux Solis, & lux Solis eris septemplex*: quod explicans Isaias, c. 60. ait. *Ecce ego creo calos novos, & terram nouam*, & Ioannes Apoc. 21. *Vidi calum nouum, & terram nouam*. Elementa etiam non solum à corruptione, & vicissitudine alterationum, vaporumque atque exhalationum permixtione liberabuntur, sed noua, atque eximia luce perfundentur, ita vt quasi cælestia corpora reddantur, & in hoc nouo ac fœlicissimo statu mūdum in perpetuum permanens esse censendum est, vt colligitur ex illo Ecclesiastis 3. *Didici quòd omnia opera, quæ fecit Deus, perseuerent in perpetuum*. Sicut ergo maior erit necessarius concursus, nouusque, & superadditus generali, per quem conditus fuit mundus: immo, & superans naturalem ordinem, vt tale nouum esse eis conferatur, quantum ad noua, & perfectissima accidentia; ita nouus, ac superadditus specialis concursus generali superadditus omnino necessarius erit, vt in eodem nouo esse conseruetur.

Ad primum in oppositum factum, concessio antecedenti, neganda est consecutio, quòd non possit mundus, cum solo concursu Dei generali conseruari, quia neque ex parte materiæ, neque qualitatum contrariarum nouum postulat concursus: sed sicut per solum generalem condita fuit materia prima, ita per solum generalem conseruatur, cum conseruatio non sit aliud, quam continuatio eiusdem esse recepti. Neque obstat tali conseruationi priuatio ei annexa, quia propter illam necessarium non est, quòd decursu temporis omni forma denudetur, sed per solum concursus generalem omnibus causis à principio cōcessum disponitur, ac præparatur pro noua forma suscipienda, priori expulsa: & cum ea non secus atque cum præcedenti conseruatur.

Contrarietas verò elementorum, atque qualitatum sic est naturaliter attemperata, vt sibi continua conseruentur, & superius sit

fit locus naturalis, atque conseruatium inferioris, & si vnum aliqua ex parte alterum destruit, ab alio etiam vicissim destruitur; sed vtriusque iactura reparatur partim ex materia alterius, partim verò ex materia aliorum, & ita conseruatur naturalis integritas omnium, per solum generale auxilium eis, & superioribus causis concessum, ad suas actiones, & reactiones exercendas. Quare non est eadem ratio de corpore mixto, ac de toto mundo: nam victrix qualitas, per quam dissoluitur temperamentum ad conseruationem substantialis formæ, totiusque compositi requisitum, non potest semper ab eodem corpore per alteram qualitatem valde remissam superari, aut iactura temperamenti reparari per solum concursum generalem, & ideo necessitate naturæ perit tale compositum, per dissolutionem temperamenti modique vnionis materiæ cum forma. Mundus verò potest iacturam vnus corporis reparare per virtutem alterius, mediis continuis generationibus, solo concursu generali factis, & semper efficiendis, vt expositum est.

Ad secundum de viuientibus corporibus, concedimus, aliquando filios parentum staturam non adæquare, sed etiam aliquando proceriores euadunt, non tamen possibile esse, iuxta ordinem naturalem à diuina prouidentia in rebus constitutum, semperque continuatum, ad tam paruam quantitatem reduci viuientia corpora alicuius speciei, in qua non possint naturaliter conseruari, quia nec potest naturalis-virtus vitalis eorum tantum deficere, nec alimenta, ex quibus nutriantur, cum pertineat ad eandem diuinam prouidentiam naturalem vim illorum & corpora, ex quibus alenda sunt, conseruare, & id quidem, sicut hucusque fecit cum solo concursu generali, efficiet etiam in futurum toto tempore, quo mundus in hoc imperfecto statu generationum, & corruptionum duraturus est.

Tractatus de terminis potentiarum, & qualitatum.

EAdem, aut similis est consideratio de potentiis, & qualitatibus, & ideo de vtriusque differendum est, reuocatis in memoriam notionibus terminorum, paruitatis, & magnitudinis traditis ex instituto 1. Physic.

QVÆSTIO .I.

An potentia actiua terminis magnitudinis, & paruitatis definiantur quoad intensiõnem suorum effectuum.

Quæstio procedit naturaliter, & negatiua pars, quod non postulent actiuæ potentiæ terminos intrinsecos, nec extrinsecos magnitudinis, ac paruitatis, his argumentis probatur. Primo, quia virtus, seu potentia actiua proportionari debet passiuæ,

nempe, subiecto, circa quod operatur, & in quo effectus recipitur; sed potentia receptiva, seu passiva subiecti nullum terminum magnitudinis, aut paruitatis postulat; ergo neque potentia actiua agentis eum postulat: minorem probo, quia potentiam passivam recipere effectum ab agente, est ab eo perfici; sed quò plus perficitur, est capacior maioris perfectionis secundum intensiorem suorum effectuum: ergo data qualibet intensiōe effectus, potest intensiorem in infinitum recipere, quod repugnat, quin possit ab agente per potentiam actiuam eodem modo produci: quare neque habebit vllum terminum magnitudinis actiua potentia: & eadem est ratio de termino paruitatis, cum non sit excogitabilis effectus à Deo remissus, quin remissiori possit recipere subiectum ab agente, & ab hoc produci per actiuam potentiam.

Secundò probatur, quia corpora naturalia eò velocius moventur, quo magis appropinquant ad centrum proprium, quod non est intelligibile, nisi intelligatur, grauitatem, aut leuitatem eorum eò magis crescere, vel intendi: nam sicut motus naturalis sursum, vel deorsum procedit à grauitate, vel leuitate; sic motus velocior à maiori, seu intensiori. Si ergo centrum distaret in infinitum (vt constat fieri posse) cresceret in infinitum celeritas motus, & ex consequenti grauitas, ac leuitas, quæ est potentia actiua, ac productiua motus: quare non postulat minimum versus maximum, quod videtur expresse docere Arist. 4. c. huius libri, textu 88. hisce verbis: *Si autem infinitum esset, infinita utique esset, & velocitas: si verò velocitas, & grauitas, & leuitas, &c.* Neque etiam versus minimum habens terminum, cum constet, magis, ac magis in infinitum decretere posse celeritatem motus, & ex consequenti grauitatem, & leuitatem. Probatur tandem, quia si terminum aliquem intensiōis postularent, vel esset diuisibilis, vel indiuisibilis: sed vterque est impossibilis; indiuisibilis quidem, quia indiuisibile, nec facit rem maiorem, nec minorem; ergo nec postulat maiorem virtutem, nec arguit minorem in agente, à quo per illam producatur: quare non est excogitabilis virtus, potens producere intensiōem infra indiuisibile, quò terminatur, quin possit producere indiuisibile ipsum terminans eandem intensiōem; sed intensiō infra indiuisibile quodque est indeterminata, cum sit in infinitum diuisibilis: ergo cum ad illam exigatur productiua potentia, & non ad producendum indiuisibile, non poterit esse determinata intrinsecè, per maximum quod sit: sed neque extrinsecè, per minimum quod non: quia impossibile est, potentiam posse producere intensiōem, infra indiuisibile, quin possit producere ipsummet indiuisibile; quare non poterit esse verum, quòd non possit producere effectum tantæ intensiōis.

nis, & bene quemlibet minorem, hoc est enim minimum quod non: quare neque extrinsecus iste terminus dari potest.

Vera tamen sententia est, actiue potentie, secundum virtutem naturalem consideratæ, terminum magnitudinis intrinsecum postulant, (qui dicitur maximum quod sic) quoad intensiorem suorum effectuum: paruitatis verò neque intrinsecum, neque extrinsecum. Vtramque partem tenent Patres Coninbricenses 1. lib. de celo, cap. 11. quæst. 1. artic. 2. cum cæteris interpretibus eiusdem capituli. Qui omnes ex eo deduxerunt, Aristotelem concessisse actiuis potentiis intrinsecum terminum magnitudinis quoad proprios effectus producendos, quod præcipue verum est de intensiōe eorum. Probatur autem prima pars duplici argumento, quia potentie oriuntur ex ipsiusmet rei entitate, aut essentia, vel certè eam naturaliter sequuntur: sed essentia, vel entitas finita est, ac determinata, ita vt tantæ perfectionis sit & non maioris, vt euidenti inductione constat in quibuscunque rebus creatis: ergo naturales potentie eam consequentes habent perfectionem eodem modo determinatam, hoc est, tantam, vt non maiorem, quod est habere determinatam maximo quod sic. Probatur consequentia, quia non potest effectus perfectior esse eius causa; nec vllam habere perfectionem, quam ab eadem non accipiat; perfectio autem potentie præcipue consistit in eo, quod effectum tantæ intensiōis producere possit: ergo necesse est, definiri termino intrinseco magnitudinis, quantum ad intensiōem effectus, ita vt vsque ad tantam perfectionem perducere cum possit, & non maiorem ei conferre.

Secundò, quia potentie naturales non impeditæ operantur ex determinatione ad vnum, hoc est, sine deliberatione, & ideo quantum possunt, aut secundum vltimum suæ virtutis: vt potentia ignis ad calefaciendum: ergo produciunt semper effectum maximæ intensiōis, ita vt maioris intensiōis producere non valeant, alioquin non operarentur quantum possunt: quod patet esse impossibile: quare necesse est eis concedere terminum intrinsecum magnitudinis, quod vocatur maximum quod sic: Quod communis consensus scholæ semper tenuit, tribuens igni calorem vt octo, vltra quem non possit crescere, & pariter cæteris virtutibus elementorum, ac potentiis aliorum corporum.

Probatur deinde secunda pars, negans eis terminum paruitatis tam intrinsecum, quam extrinsecum triplici ratione: & prima procedit ex primo modo operandi harum potentiaturum, videlicet, per applicationem, seu approximationem ad passum, quia quò magis ei est approximatus ignis, v.g. intensius illud calefacit; remissiùs verò, quò minus approximatur, aut magis ab eo remouetur, vt euidenti experientia notum est: sed constat, possi-

magis, ac magis ab eo remoueri, ita ut nunquam possit tam remotum ab eo esse, quin possit plus remoueri, quousque extra sphaeram eius idem passum positum esse censeatur, & ab eo non possit ullo modo calefieri; ergo nullus datur tam remissus effectus, quin remissior dari possit in infinitum, quod est, nullum dari terminum, nec intrinsecum, nec extrinsecum paruitatis secundum intensiorem effectus in potentiis naturalibus.

Secundò probatur ex conatu potentiae, quo modo operatur, de quo etiam est euidens, & experientia notum, quòd non potest ita remissus esse, quin remissior adhuc in infinitum adhiberi possit à potentia: sed constat, quòd minorem praestat conatum potentia ad operandum, eò remissiore edere effectum; ergo data quacunque remissione eiusdem effectus, remissior in infinitum poterit produci à potentia: quare nullum habet terminum paruitatis intensio eius. Probatur tandem ex natura eiusdem effectus quia non datur tam remissus calor, quin remissior in infinitum dari possit, sicut non datur tam parua quantitas, quin minor possit dari semper. Et eius ratio à priori est, quia imperfectio effectus in infinitum procedere potest. Ex quibus planè sequitur, non dari effectum adeò imperfectum ab agente productum, quin imperfectior dari possit, & ex consequenti, nullum dari terminum paruitatis, in processione eius ad potentiam, nec ideò potentiam ipsam ullum habere terminum paruitatis intrinsecum, nec extrinsecum, quoad intensiorem effectus.

Ad primum argumentum concessa maiori, neganda est minor: nam cum potentia passiva sit eius essentia, sicut habet essentiam limitatam tantae perfectionis, ita habet potentiam passivam limitatam, & consequenter terminatam termino magnitudinis intrinseco, quae non crescit receptione effectus, quia verum est, tantae perfectionis esse, & non maioris: ex ea igitur non probatur, quòd actiua potentia, seu qualitas termino intrinseco magnitudinis careat, quantum ad intensiorem effectus.

Ad secundum argumentum dicemus dubio sequenti. Ad tertium respondeo, terminum intrinsecum, quem postulat actiua potentia, diuisibilem quidem esse, sed completum quoddam indiuisibile, ultra quod nihil amplius potest producere. Quare nec solum latitudinem incompletam, aut interminatam importat, nec solum indiuisibilem tam terminans, sed utrumque, vel, ut vno verbo explicetur, dicit latitudinem intensiōis completam ultimo indiuisibili, ultra quod non potest potentia procedere; hoc autem non habet terminum extrinsecum, ut constat, quia nec importat latitudinem intensiōis completam, aut terminatam, sed interminatam, & quasi indefinitam, quam ideo nō intelligimus, nec explicamus per tantum calorem, & non plus, sed per non tantum;

tantum, & bene quodcunque minus. Quod verò dicitur, potentiam eo ipso, quod potest producere latitudinem infra indiuisibile, quo terminatur, aut completur, posse etiam producere idem indiuisibile complens, quia non requiritur maior virtus ad producendum indiuisibile, verum est: sed ex hoc non bene inferitur, idem esse, potentiam terminari extrinsecè, mininio quod non, & intrinsecè, maximo quod sic: nam maximum quod sic non dicit latitudinem intensiōis terminatam proprio indiuisibili, quomodo cunque; sed ita vt ultra illam nihil ampliùs producere possit, quo pacto sumptam repugnat produci à potentia non postulante intrinsecum terminum magnitudinis, sed solum extrinsecum: nam de ratione potētiae talem terminū postulantis (si daretur) foret, vt data quacūque latitudine intensiōis completæ ac terminatæ à se productæ, maiorem posset producere, quod patet repugnare potētiae terminatæ termino magnitudinis intrinsecō. Itaque discrimen inter vtrumque terminum, ac potentiam, non consistit in solo indiuisibili, sed in latitudine intensiōis per eum completa cum tali modo, vt sic eam producere possit potentia, vt non plus possit, quod constat conuenire potētiae postulanti intrinsecum terminum magnitudinis, & omnino repugnare ei, quæ extrinsecum tantum postulat. Dari verò potentiam vtrumque postulantem, contradictionem implicat, sicut contradictio reperitur in ipsius terminis, quia tantum posse, & non plus, quod est terminari maximo quod sic, & tantum non posse, sed quodcunque minus, quod est terminari minimo quod non, manifestam continet repugnantiam, vt consideranti facillè patebit.

D V B I V M.

An necesse sit corpus naturale ad suum centrum naturaliter motum velocius semper moueri, quò magis ad ipsum appropinquat.

AD secundum argumentum suprà propositum respondent Patres Conimbricenses 1. lib. de cælo, cap. 11. quæst. 1. artic. 3. concedendo corpus naturale motum ad suum centrum velocius moueri, quò magis ad ipsum accedit ob augmentum grauitatis, vel leuitatis, non tamen ideò (aiunt) crescet velocitas in infinitum infinitè protracta distantia centri, sicut nec grauitas ista, vel leuitas, qua perueniente ad certum gradum intensiōis sibi intrinsecum cessabit intensio, & de cætero motus eadem prorsus vniformi celeritate procedet, quod augmentum grauitatis vocant, grauitatem accidentalem. 1. libro, capite 6. quæst. 1. artic. 1. id est, impulsus emanantem à corpore graui, ratione naturalis grauitatis, dum ad proprium centrum mouetur.

Alij

Alij verò dicunt, corpus media propria gravitate, & motu, hanc gravitatem accidentalem sibi imprimere, & alij media hac gravitate accidentali docent, ingenitam, & propriam gravitatem confortari, verum relati solum inter se differunt in modo loquendi.

Sed utrumque assertum nobis displicet: primum quidem, quia sine aliquo fundamento rationis dicitur à gravitate naturali emanare accidentalem, seu adventitiam, cum à nulla alia qualitate, seu potentia naturali emanet alia similis, accidentalis, seu adventitia, non à calore, nec frigore, nec ab alia secunda qualitate (ut evidenti inductione cuicunque potest constare) ergo nec à gravitate, & levitate emanare potest, cum nulla assignetur specialis ratio ex parte earum talis emanationis, & solum videatur conficta ad reddendam rationem, ob quam motus naturalis sit velocior in fine, quam in principio & medio. Et potest virgeri hoc argumentum, quia gravitas hæc accidentalis non est pondus, sicut naturalis, cum constet lapidem non habere plus ponderis, dum eam habet, quam dum est sine illa, si ad trutinam examine- tur: solum igitur potest esse impulsus, quem sibi imprimit per motum; sed omnes impulsus à quocunque, & quomodocunque impressi sunt eiusdem speciei, quia omnes possunt movere corpus versus quamlibet differentiam loci, iuxta directionem imprimientis: ergo sequitur impulsus esse eiusdem speciei cum cæteris. Ut cum eo, quem aliquis imprimeret lapidi, dum movetur deorsum, unde sequitur non posse emanare ab ipso lapide, sed extrinsecè impressus esse debet à se, vel alio: ab alio verò constat non imprimi, sed nec à se, ut mox probabitur, ergo falsa est prædicta sententia.

Præterea, impossibilis probatur talis emanatio gravitatis accidentalis, eo præsupposito, quod ab auctoribus huius sententiæ dicitur, nempe gravitatem accidentalem non emanare à naturali secundum se, nec dum corpus quiescit, sed solum dum movetur, ex quo evidenter sequitur, medio motu, ut minimum, tanquam causa sine qua non, vel conditione emanare, quare necesse est, motum se tenere ex parte agentis, nempe gravitatis naturalis, esseque ut minimum natura priorem impulsu, vel gravitate accidentali, eo medio emanante, & aliquo modo causam, aut causationem eius. Quemadmodum approximatio agentis ad passum prior natura est effectus producendo, quare repugnat eundem motum esse effectum eiusdem impulsus, aut gravitatis accidentalis, & natura posteriorem ea in eodem ordine efficientis causæ: sed id sequitur necessariò ex tali doctrina, ergo planè falsa censeri debet. Probatur verò, quia evidens est, motum procedere à gravitate naturali, tanquam à causa effectiva: ergo evidens est, velociorem

velociorem motum procedere à tali gravitate accidentali (si datur) se tenente ex parte eiusdem gravitatis naturalis, & ideo cum ea concurrente suo modo effectivè ad eundem motum celerior, & ex consequenti esse natura priorem eo, & tandem non est minùs evidens, eundem motum se tenere ex parte gravitatis naturalis ad causandam gravitatem accidentalem, quæ non nisi per motum, vel medio motu emanat ab ea iuxta hanc sententiam. Ergo evidens est eundem motum esse causam, seu causationem eiusdem gravitatis accidentalis, & proinde natura priorem ea: habet ergo ratione causæ; & effectus respectu eius, & est prior natura, atque etiam posterior ea in eodem genere efficientis causæ, quod manifestam continet repugnantiam. Argumentum hoc efficacissimum solum hac via eludi posset, si diceretur, non eandem partem motus esse causam, & effectus gravitatis accidentalis, quia hoc planè repugnat, sed diversam, ita ut media priori parte motus velocioris emanet pars eiusdem gravitatis, non quidem concurrentis effectivè ad eandem partem motus, nec prior natura ea, sed posterior tanquam effectus eius, concurrentis verò effectivè ad partem motus sequentem, quæ ab ea procedit tanquam effectus, & natura posterior. Cæterum evasio hæc non minus evidenter falsa ostenditur. Primò quidem, quia accidentalis gravitas producit medio motu, tanquam causa sine qua non, vel causatione aut conditione: ergo eodem modo quo incipit motus, incipit productio gravitatis, videlicet per ultimum non esse. Quæmadmodum ergo verum est dicere, nunc non est motus, & immediatè post erit, ita verum esset dicere, nunc non est productio gravitatis, & ex consequenti gravitas ipsa, & immediatè post erit: Præterea, sicut verum est, in toto tempore immediato esse motum, ita debet necessariò esse verum, in toto tempore immediato esse gravitatem, ita ut nulla possit dari motus pars immediatè post, cui non respondeat aliqua pars gravitatis ea media emanans: sed ita naturaliter, & necessariò procedit velocior motus à gravitate accidentali, & singulæ partes eius correspondent singulis partibus gravitatis accidentalis: ergo omninò necessarium est, totum motum futurum immediatè post, & omnes eius partes procedere à tota gravitate, & omnibus eius partibus, & eodem modo totam gravitatem, & omnes eius partes procedere à toto motu, & omnibus eius partibus, & id quidem in eodem genere efficientis causæ, ex quo necessariò etiam sequitur, totum motum futurum, & omnes eius partes esse causam totius gravitatis, & omnium partium eius, atque etiam effectum esse priorem natura, ac posteriorem in eodem ordine efficientis.

Secundò verò falsa ostenditur evasio, quia si gravitas accidentalis

dentalis emanat à naturali medio motu, & ideò emanatio est successiuæ: ergo necesse est, partem grauitaris accidentalis in eadem duratione existere cum eadem parte motus præcedente, quæ media emanat. Probatur consequentia, quia quilibet effectus debet coexistere in eadem duratione suæ causæ, vel causatione, aut conditione actû eam causante, in eadem quidem duratione instantanea, si in instanti operetur causæ, vel successiuæ, si operetur successiuæ. Verum igitur est, ac necessarium, lapidem eodem tempore partis motus præcedentis habere maiore grauitatem, quam petit eadem pars motus: ergo necesse est, tunc velocius moueri, quia ex maiori grauitate sequitur naturaliter motus velocior; sed eo tempore habet lapis maiorem grauitatem: ergo eodem tempore necessariò debet habere motum velociorem. Et vigeri potest idem argumentum, ac declarari simul hoc modo: si motus fieret in instanti, & eo medio emanaret velocitas, in eodem instanti, in quo esset motus, emanaret: ita vt verum foret in primo instanti, in quo esset motus, dari etiam primam grauitatem accidentalem, sed in eodem instanti, in quo esset causa naturalis, producit suum effectum in instanti producibilem, ergo in eodem instanti sequeretur accidentalis grauitas causata medio motu, quem necessariò ipsa producit, & ita motus, eademque grauitas erit prior natura, atque posterior, atque etiam causa, & effectus in eodem ordine efficientis.

Postremum verò, quod asserit eadem sententia, nempe dilatato spatio in infinitum, inter terminos motus grauis, aut levis corporis per virtutem diuinam, non moueri semper velocius, quo magis appropinquaret ad centrum, sed solum vsque ad certam distantiam: reliquum verò viæ vsque ad centrum eadem velocitate conficere, falsum nobis etiam videtur, & omninò necessarium, quòd celerius semper moueretur, quod sic probo: causa naturalis grauitaris accidentalis est grauitas naturalis, à qua emanat medio motu, & medio motu velociori emanat intensior grauitas accidentalis, quod constat ex toto motu lapidis à concauo lunæ vsque ad centrum terræ: sed dum lapis suo motu tendit in centrum, adest eadem naturalis causa intensioris grauitaris, nempe eadem grauitas naturalis, & intensior grauitas accidentalis cum velociori motu: ergo naturaliter procedet ab ea intensior effectus, qui est intensior grauitas accidentalis, & eadem est ratio de cæteris partibus motus vsque ad centrum, quare semper erit necessarium, celerius moueri lapidem, quò magis ad centrum appropinquat. Et si respondeant, eandem esse causam naturalem intensioris grauitaris accidentalis, à qua intensior procederet, nisi haberet ex propria natura intrinsecum terminum suæ intensiõis, qui vocatur

vocatur maximum quod sic, & quem excedere non potest naturaliter: in primis solutio hæc manifestam continet petitionem principij, tum quia pro ratione reddit illud, de quo est controversia, nempe, an potentia, & qualitates habeant terminum intrinsecum suæ intensiōis versus maximum; tum etiam, quia præsupponit id, quod probandum est: nam licet de potentiis, & qualitatibus naturalibus, quæ sequuntur naturas rerum, secundum se consideratas, probatum sit terminum magnitudinis intrinsecum suæ intensiōis habere; de cæteris verò, quæ eas sequuntur, media aliqua causa extrinseca, neque probatum est, neque probari potest, ut statim ostendemus, & tandem neque in his, neque in illis possibile est naturaliter, quod ex vna parte postulent talem terminum, & ex altera detur naturalis causa, à qua ultra illum intendi possint, quia si effectus est naturaliter impossibilis, impossibilis quoque censenda est naturaliter causa, ut patet in viventibus, quod eo ipso, quod postulant terminum intrinsecum magnitudinis, postquam illum pertingunt, nulla potest dari naturalis causa maioris augmenti, sed potentia nutritiva, & augmentatiua, quarum virtute peruenerunt ad terminum; non possunt iam plus substantiæ conuertere, quam deperdetur: immò limitatio harum potentiarum, vel cuiuscunque alterius causæ potentissima ratio est eis concedendi intrinsecum terminum. Vnde sequitur, quod si qualitatibus concederetur talis terminus intensiōis intrinsecus, concedi non possit, quod postquam eum pertingunt, possit dari causa naturalis maioris intensiōis earum, & eo ipso, quod dari possit, nequit eis talis terminus concedi.

Vera igitur solutio illius argumenti hac distinctione explicanda est: Potentiæ, & qualitates actiue duplices sunt, quædam, namque ex propria natura rebus conueniunt, ut igni calor, & frigus aquæ, vera grauitas, & leuitas elementis, ac mixtis. Aliæ non quidem ex propria natura eis conueniunt, sed ab extrinseco eis imprimuntur, ut impulsu proiectis, & intensio conuenit illis ex propria natura, à qua procedunt, & propterea limitata esse debet, atque definita per terminum magnitudinis intrinsecum, sicut ipsa natura: cæteræ verò qualitates (utpote propriam naturam rerum non consequentes, sed ab extrinseco impressæ) non postulant talem terminum intrinsecum, sed extrinsecum tantum, ita ut licet actu infinitam intensiōem habere non possint, bene tamen quamlibet finitam, quantumcunque magnam, quia in rebus, quibus ab extrinseco imprimuntur, solum postulant potentiam obedientialem passiuam, seu receptiuam, non petentem intrinsecos terminos, & cum impulsus corporibus impressus ad motum huius sit conditionis, caret

caret termino intensiōis intrinseco. Vnde sequitur, quòd si imprimatur lapidi deorsum moto, poterit semper de nouo imprimi intensior, per quem celerius semper mouearur, quo magis appropinquat ad centrum, quod verum erit, ac necessarium, quantumcunque centrum diuina virtute separaretur à loco, à quo moueri cœpit, ita vt nunquam contingat, immò neque possit contingere, motum eius centro propinquiorem æqua celeritate fieri, ac magis ab eo distantem, ex quo nullum incommodum sequi facile poterit cuique constare.

QVÆSTIO II.

An potentius actiuus concedendus sit terminus intrinsecus quoad extensionem suorum effectuum.

Sensus quæstionis est, an potentia actiua ad quamlibet distantiam spatij effundere possint proprios effectus, vt ignis producere calorem in aquam, quantumlibet à se distantem, vel ad tam magnam, vt non ad maiorem. Et de termino paruitatis, res est certa apud omnes nullum postulare, quia euidens est, agens non solum posse effectum proprium effundere in passum, vel circa spatium sibi propinquius, sed perfectius eum effundere, vt ignis fortius calefacit aquam, aut lignum, quò sibi propinquius est: ergo impossibile est ad tantam distantiam extendere effectum, quin possit ad minorem, ac minorem in infinitum, immò quin possit quò minor est, perfectius illum extendere, quod est nullum terminum paruitatis admittere.

Sed aduersus hanc veritatem opponi possunt potentia sensitiva, de quibus euidens est, obiectum ita proximum organo sensus posse percipere, vt si proximius accedat, non percipiatur, & multò minus, si supra organum ipsum, vel potentiam ponatur, quod de sensibus saltem medium externum postulantibus, vt de visu, & auditu, atque odoratu docet experientia. Istæ ergo potentia postulant necessario terminum paruitatis intrinsecum, quoad extensionem suorum effectuum, vel operationum. Probatur consequentia ex definitione intrinseci termini paruitatis, qui est tanta distantia ad quam potest produci effectus, ita vt ad minorem non possit: quod expressè videtur asseruisse Aristoteles libro de sensu, & sensibili, capite vltimo, ad finem hisce verbis: *Est itaque aliquid vltimum distantia, vnde non videtur, & primum vnde videtur, hoc itaque necesse in diuisibili esse, vltra quodque non contingit sentire existens, circa autem necesse sentire.*

Pro solutione adnotare oportet in sensationibus duo reperiri. Primum est immutatio potentia sensitiva ab obiecto, quæ est impressio speciei, & receptio eius in eadem potentia. Secundum, operatio

operatio ipsa vitalis, quam elicit potentia informata specie, nempe, visio, vel auditio, & impressio quidem speciei non est actio, aut operatio potentia, sed obiecti in ipsam: ex parte verò eiusdem potentia sola receptio aut passio: operatio verò est ab ipsa potentia simul, & obiecto media specie concurrente cum illa, tanquam ab vno principio, per quam operationem non agit potentia in obiectum, neque in aliquid aliud, quia non est actio transiens, sed intra se producit per illam speciem expressam, in qua consistit sensatio, seu perceptio obiecti sensibilis. Et ex his soluitur argumentum oppositum concessio antecedente, quòd detur determinata distantia, à qua, & non à minori possit potentia sentire obiectum: negando tamen ex hoc sequi, quòd potentia actiua ad tantam distantiam extendat suum effectum, & non ad minorem, quia sensatio non est effusio, seu extensio effectus per spatium, cum constet sensationem, vel speciem expressam non produci, vel extendi circa spatium, vel vsque ad obiectum, sed intra potentiam ipsam remanere: postulat verò ad hanc operationem intra se eliciendam certam distantiam obiecti à se tanquam conditionem necessariam, quod constat non esse terminari quoad extensionem sui effectus, sed neque sequitur actionem obiecti in potentiam (quæ verè est effusio, seu extensio sui effectus ad medium, & potentiam) terminari versus paruitatem: nam licet potentia non percipiat obiectum nisi ad aliquam distantiam, æterum, à quocunque, & quantumcunque minima imprimit ei obiectum propriam speciem, quia distantia obiecti conditio potentia est ad percipiendum obiectum, non conditio obiecti, ad agendum circa potentiam, & extendendum proprium effectum per medium circa illam. Vnde constat, potentiam actiuam obiecti, ad extendendum proprium effectum, nullum paruitatis terminum postulare: neque id probare testimonium Aristotelis, etiam vt verba eius sonant intellectum. Quia ex eo, quòd detur certa distantia, à qua primùm videri color, & audiri sonus possit, non tamen datur ex hoc terminus extensionis alicuius effectus actiua potentia, aut virtutis obiecti, versus minimum, vt ostensum est.

Solum igitur potest quæstio procedere de termino intrinseco magnitudinis, an videlicet ad tantam distantiam possit extendere proprium effectum potentia, seu qualitas actiua, vt non ad maiorem. Cui hac distinctione respondendum censent Patres Conimbricenses 1. libro de celo, c. 11. quæst. 3. artic. 1. distantia spatij, ad quam potentia actiua proprium effectum potest extendere, dupliciter consideranda est, aut includendo vltimum indiuisibile, quo clauditur, aut terminatur, vel illud excludendo, & priori modo potentia actiua non habent terminum intrinse-

eum, quo ad distantiam, seu extensionem spatij, sed tantum extrinsecum, è contrario autem posteriori modo.

Probant primò hoc argumento, constituto, quòd luminosum possit ad tria stadia spatij, nempe, aëris, effundere lumen, & ulterius non possit, & tunc ita arguunt. Lumen effusum per totum illum aërem non potest attingere ultimam superficiem claudentem eandem extensionem aëris, sed solum se extendere ad totam latitudinem diuisibilem eius eadem superficie clausam, ita ut in ea recipiatur: ergo verum erit ad totam latitudinem aëris se extendere lumen, & ulterius non se extendere: sed hoc est intrinsecè terminari per illam versùs magnitudinem, ut ex definitione intrinseci termini magnitudinis constat: ergo hunc postulat actiua potentia, quoad extensionem sui effectus. Minorem ita probat: vel lumen in ea superficie receptum est alicuius intensiōis diuisibilis, vel indiuisibilis: sed indiuisibilem intensiōem dari repugnat: ergo necesse est tale lumē habere intensiōē diuisibilem, præsertim cum minorem habeat quàm cætera indiuisibilia præcedentia spatij agenti proximiora. Eam igitur intensiōnem necesse erit ad partem sibi proximiorē effundere, eam illuminando. Probatur consequentia, quia nullum accidens productiuum sibi similis, ad tam remissum gradum peruenire potest, quā remissiorem possit producere in passo sibi approximato, se se porrigendo vsque ad non gradum. Quare falsum erit, quod supponitur, illam superficiem pertinere ad terminum intrinsecum extensionis luminis, aliquid eius in se recipiendo, & totam extensionem eius intrinsecè claudendo, ita ut ulterius non se extendat. Et consequenter erit etiam falsum, dari terminum intrinsecum luminis, vel alterius actiue qualitatis versùs magnitudinem, quoad extensionem. Postremo verò facile ostendunt, quia si effectus non extenditur ad superficiem claudentem, seu terminantem totum spatium, illa erit terminus, ad quem non se extendit effectus agentis, bene tamen extenditur ad totam latitudinem per eam terminatam: ergo est terminus extrinsecus.

Hæc tamen sententia videtur mihi planè falsa, quantum ad vtrumque, quod probo, primò argumento ad hominem hoc modo. Ideo asserit lumen, vel quamlibet aliam qualitatem actiuam proprium effectum extendere per totum spatium trium stadiorum, vsque ad superficiem ipsum terminantem, non quidem inclusiue, ita ut in ipsamet superficie recipiatur, sed exclusiue tantum, ita ut in tota, ac sola latitudine spatij, ipsa verò superficies non illuminetur; hoc itaque sic necessario fieri aiunt; quia si superficies aliquid luminis reciperet, necessarium foret, ut in parte sequenti illud produceret, quia agens approximatum passo, naturaliter & necessario in ipsum agit, quare non posset superficies esse terminus

terminus intrinsecus extensionis effectus, cum ultra illā se extenderet. Sed hoc quidē sequitur de tota latitudine spatij, superficie clausa: ergo non poterit hæc (vt aiunt) esse terminus intrinsecus, nec superficies extrinsecus. Antecedens sic ostendo. Lumen recipitur in tota latitudine: ergo necessariò debet produci in superficie eam terminante, & in ea recipi. Probatur consequentia eodem argumento eorum: quia si lumen receptum est in superficie, necesse est, quodd in parte sequenti producat, quia agens naturale necessariò extendit suum effectum ad passum sibi approximatum: ergo lumen receptum in tota latitudine spatij, superficie terminata, necessariò producit, atque extendit suum effectum ad eandem superficiem. Probatur euidenter consequentia, quia non est ipsa minùs approximata parti spatij illuminati, quam terminat, quàm pars sequens sit approximata sibi: ergo nec minùs recipit lumen ab illa, quàm producat in hanc: quare nec potest esse terminus intrinsecus tota latitudo spatij excludens superficiem; nec potest eadem superficies excludi à receptione effectus, vt sit terminus extrinsecus extensionis eius. Eodem igitur argumento eorum aduersùs propriam sententiam retorto, probatur falsa.

Sed rursus eam impugno duplici argumento. Primo, quia si ab effectu producto per totam latitudinem spatij excludatur superficies ipsum includens, sequitur non dari vllum terminum magnitudinis intrinsecum earundem potentiarum, aut qualitatum, quoad extensionem effectus, quem tamen opposita sententia eis concedit. Probatur consequentia, quia talis terminus vel est superficies, vel latitudo ab ea clausa: non primum (vt concedunt ipsi) & probat euidenter ratio: cum ad eam non perueniat effectus, nec in eadem recipiatur, quod ad rationem intrinseci termini à primo necessarium est. Sed nec tota ipsa latitudo, in qua lumen recipitur, intrinsecus terminus esse potest. Probatur minor: nam terminus extensionis intrinsecus magnitudinis debet esse quid certum, ac determinatum, ad quod effectus perueniat, & vterius non se extendat: sed latitudo totius spatij, exclusa superficie eam claudente, non est quid determinatum, cum non habeat vltimam partem, sed qualibet assignata habeat vltiorem aliam in infinitum: ergo repugnat esse terminum intrinsecum extensionis effectus.

Et si dicas, esse determinatam, quia clauditur superficie: probo apertè id non sufficere, vt sit intrinsecus terminus, quia terminus intrinsecus talis esse debet, vt ad illum perueniat effectus: sed constat non peruenire ad superficiem; ergo impossibile est, superficiem terminare latitudinem, vt recipientem effectum: sed quātum ad receptionem effectus, ita se habet latitudo spatij, ac si

Per illam non terminaretur, nec vllum prorsus haberet terminum. Quare eius ratione non potest vlllo modo latitudo spatij recipiens lumen esse terminus intrinsecus extensionis eius, sed extrinsecus tantum. Itaque latitudo spatij materialiter tantum accepta, vt est extensio spatij, intrinsecè terminatur tali superficie; cæterum, vt est passum, ad quod, & per quod extenditur lumen, repugnat eam terminari, nisi ratione prorsus extrinseca: quia quod lumen non recipit, nec potest intrinsecè pertinere ad spatium, per quod aliquid extenditur, vt constat euidenter in motu locali facto per spatium, ad quem motum non potest pertinere vltimum indiuisibile, claudens idemmet spatium, nisi ad illud perueniat mobile, habens in eo præsentiam indiuisibilem terminantem intrinsecè motum. Pari ergo ratione vltimum indiuisibile spatij, per quod se extendit lumen, nequit pertinere ad terminum intrinsecum talis extensionis, nisi ad ipsum perueniat lumen, in eoque recipiatur.

Secundò probatur, quia si latitudo spatij, in qua lumen producit, posset esse terminus intrinsecus extensionis eius, non recepto lumine in superficie eam terminante, euidenter sequitur, terminum magnitudinis extrinsecum, qui vocatur minimum quod non, esse intrinsecum, qui vocatur maximum quod sic, & idè res omnes cuiusque generis, & ordinis habere intrinsecum terminum magnitudinis. Probatur consequentia; quia in minimo quod non, verum est, ac necessarium effectum non peruenire ad certum aliquod, quod constat habere modum, vel rationem indiuisibilis, cum sit vltimum quid, quo clauditur tota latitudo, ad quam peruenit idem effectus; bene tamen peruenire ad totam ipsam latitudinem tali indiuisibili clausam: sed hoc sufficit in extensione luminis, vel alterius effectus (iuxta hanc sententiam) vt latitudo ipsa sit terminus intrinsecus magnitudinis potentie quoad extensionem, qui est maximum quod sic: ergo quilibet terminus magnitudinis extrinsecus cuiuslibet rei, qui est minimum quod non, erit intrinsecus, qui est maximum quod sic, quod patet esse falsum.

Nostra ergo sententia est, potentias actiuas, actiuasque qualitates, quoad extensionem postulare intrinsecum terminum magnitudinis proprio indiuisibili clausum, ita vt vsque ad illud inclusuè possint extendere proprium effectum eum in toto spatio, atque etiam in eodem indiuisibili effundendo; & non alterius. Quam in primis colligo euidenter ex Diui Thomæ doctrina 1. 2. quæst. 5. artic. 6. ad 1. vbi sic loquitur. *Nec etiam omnia, quæ sunt illuminata, aut calefacta, possunt alia calefacere, aut illuminare; sic enim illuminatio, aut calefactio essent vsque ad infinitum.* Sentit igitur sphaeram actiuitatis cuiuslibet agentis extendi vsque ad aliquid

aliquid determinatum, quod quidem calefieri, aut illuminari possit ab eo, sed non posse aliud iuxta se positum calefacere, vel illuminare: ergo hoc est ultimum, ad quod potest agens extendere actionem, & ultra illud non potest, quod est extensionem sui effectus procedere usque ad ultimum inclusivè, hoc est, circa quod producat, & ultra illud non transeat.

Probatur deinde ratione; primò, quia impossibile est, potentiam, seu actiuam virtutem, posse extendere proprium effectum per aliquam latitudinem spatij, & non posse eam communicare ultimo indiuisibili, seu superfici ei terminanti, atque claudenti eam, ut asserit opposita sententia: ergo necessarium est, terminum propriæ extensionis idem indiuisibile claudere, & ex consequenti talem potentiam postulare intrinsecum terminum proprio indiuisibili clausum, ad quod idem effectus se extendat. Antecedens probo, quia agens potest producere suum effectum circa totam latitudinem spatij, tali superficie clausam: ergo potest eum producere circa eandem superficiem claudentem, & ex consequenti actu producer, cum operetur naturaliter, & secundum ultimum potentie. Probatur consequentia: quia indiuisibile terminans latitudinem spatij, non efficit eam maiorem, & ex alia parte capax est eiusdem effectus, & non impedimentum ad illud recipiendum: ergo non postulat maiorem virtutem in agente, ut ad se extendat effectum, quam ut eum extendat circa totam latitudinem à se terminatam: ideo necesse est, indiuisibile effectus in tali superficie produci eo ipso, quod circa latitudinem spatij produciatur, ut sit terminus extrinsecus talis effectus proprio indiuisibili completus, sicut latitudo ipsa spatij, in qua produciatur, proprio indiuisibili terminata est.

Secundò probatur, quia terminus intrinsecus magnitudinis eiusdem rationis est in qualitate, quoad intensionem effectus, & quoad extensionem, cum eodem modo definiatur in omnibus, sed in quantitate importat tantam, ad quam potest peruenire corpus, & non ad maiorem, & pariter in intensione, & eiusmodi tanta, ad quam potest peruenire, claudit necessario indiuisibile terminans: pari ergo ratione terminus intrinsecus extensionis effectus importare debet. Probatur minor, quia quantitas non est tanta, nisi ratione indiuisibilis eam terminantis: nec qualitas secundum intensionem est tanta, nisi indiuisibili eiusdem intensionis compleatur, ut calor non est tantus, hoc est, ut unum, aut dimidium, nisi compleatur indiuisibili eiusdem intensionis: ergo nec potest esse, aut dici tantus quoad extensionem, nisi indiuisibile extensionis includat. Unde sequitur, totam latitudinem spatij non esse tantam, nisi includat superficiem eam terminantem, nec tantum esse calorem, aut lumen, nisi includat indiuisibile

luminis, aut caloris producti in eadem superficie indiuisibili terminante extensionem eiusdem effectus.

Ad argumentum respondetur negando, quòd lumen intensum receptum in superficie spatij possit ulterius illuminare, & idem contra Doctores primæ sententiæ inferri potest de lumine intenso producto in latitudine spatij comparatione superficiæ terminantis spatium. Quare miror hanc sententiam negantem ex vna parte lumen in latitudine ipsa spatij receptum illuminare superficiem se terminantem, & colligentem ex altera, quòd si recipiatur in superficie, debeat illuminare, seu lumen producere in parte sequenti. Deinde verò ostendo non esse bonam consequentiam, quia, vt bene adnotauit D. Thomas verbis illius testimonij superius relatis, neque omne calidum potest calefacere passum sibi proximum, neque omne illuminatum illud illuminare, quia cum euidens sit, longè maioris perfectionis esse, se communicare alteri, per aliquam formam agendo in illud, quàm habere esse, vtcunque per talem formam, euidens quoque erit, maiorem virtutem requiri ad primum, quàm ad secundum, vt copiosè ostendimus i. lib. de generatione, cap. 9. quæst. 4. ad sensum, probantes, adeò minimam posse esse virtutem, vt non possit agere in aliud. Quod non minùs probauit euidenter eisdem verbis D. Thomas. Si omne calidum posset calefacere aliud, in infinitum procederet calefactio, quoad extensionem effectus, & non haberet limitatam sphaeram agendi, sed infinitam, cum tamen necesse sit habere determinatam, & termino quidem intrinseco magnitudinis, quem attingere possit, & ulterius non procedere: quemadmodum virtus ipsa agendi intrinsecè limitata est. Et hæc doctrina non minùs vera est in formis accidentalibus, quàm in substantialibus, nam rationes æquæ de vtrisque probât, vt per se patet, & de accidentalibus loquitur D. Thomas, vt verba eius ostendunt.

QVÆSTIO III.

*An potentia actiua quoad resistantiam terminetur,
& quibusnam modis.*

Contraria duplicia sunt; alia actiua, vt primæ qualitates, & plures ex secundis; alia non actiua (actione quidem naturali) vt albedo, nigredo, & cæteri colores, & plures aliæ qualitates: nam actione intensionali, effundendo proprias species intensionales circa medium, & potentiam, omnes fermè qualitates actiua vocari possent. Sed actiua actione naturali adhuc diuiduntur in eas, quæ circa idem subiectum sibi contrarias expellunt, quales sunt primæ qualitates, & in alias, quæ non agunt expellendo

pellédo opposita, sed aut mouédo subiectum ad locum, vt granitas, leuitas, & impulsus omnes, aut modo alio producédo effectû. Quare illis duntaxat conuenit propriissima contrarietas comuni illa diffinitione explicata; contraria sunt, quæ sub eodem genere posita maximè distant, & ab eodem subiecto mutuo se expellunt; quamuis minùs propria contrarietas (vera tamen) multis aliis conueniat, vt albedini, & nigredini, grauitati, & leuitati, & omnibus aliis similibus, & eodem modo propria resistentia eisdem duntaxat propriissimis contrariis conceditur, vt primis qualitatibus, cæteris verò minùs propria, aut nulla. Propria tandem resistentia diuiditur in actiuam, & formalem, & actiua non est aliud, quàm actio ipsa prout impedimentum præstat contrario, ne in eodem subiecto introducatur, vt ignis per eandem calefactionem, per quam calefacit aquam, præstat ei impedimentum, ne eidem igni frigus imprimat, & propriè dicitur ab ea se defendere. Resistentia verò passiuæ, est inhæsió formæ in proprio subiecto, per quam impedit receptionem formæ contrariæ, & vocatur etiam formalis (vt libro primo de generatione docuimus) quia fit per inhæsióem formæ in subiecto, & non per actionem, vel aliud extrinsecum. De vtraque igitur petit quæstionis titulus, An potentia seu qualitates actiuæ terminos magnitudinis, & paruitatis postulent, & quonam modo.

Et prima opinio asserit, non postulare terminum magnitudinis intrinsecum, sed extrinsecum tantum, qui vocatur minimum quod non, & nullum terminum paruitatis esse illis concedendum. Ita sentiunt Patres Conimbricenses primo libro de cælo, capite 11. quæstione secunda, articulo primo. Probant primùm, quia actio non est nisi à vincente, atque adeò à proportionem maioris inæqualitatis ex parte agentis. Nequit igitur potentia actiua agere in resistentiam æqualem suæ virtuti actiuæ, poterit verò agere in quancunque minorem: æqualis igitur resistentia erit terminus extrinsecus, & minimum quod non, cum sit tanta, in quam agere non potest virtus actiua, bene tamen in quancunque minorem. Secundò, si daretur maxima resistentia, in quam potentia actiua posset agere, eiusmodi resistentia excederetur à potentia actiua, quia vbi nullus est excessus, sed tanta est resistentia passi, quanta actiuitas agentis, non sequitur actio: ergo excederetur excessu diuisibili, quia indiuisibile non reddit maius. Quare si resistentia decresceret ad dimidium talis excessus, adhuc nihilominùs sequeretur actio, maneret enim adhuc proportio maioris inæqualitatis ex parte potentia actiuæ. Vnde sequeretur, resistentiam priorem non fuisse maximam, quàm potentia posset vincere: cum adhuc maiorem vincat. Secunda pars infra probabitur.

Tribus assertionibus explicamus propriam sententiam. Prima talis est, tam resistentia actiua, quàm passiuæ, seu formalis, secundum propriam rationem considerata, postulat terminum magnitudinis intrinsecum, qui dicitur maximum quod sic: probatur hoc discursu. Quælibet potentia, aut qualitas actiua per eandem virtutem, per quam potest agere in passum, potest resistere agenti contrario, tam resistentia actiua, quàm passiuæ, aut formali. Eadem est igitur secundum entitatem virtus actiua, & resistentia, quamvis diuerso modo considerata, hoc est, respectu diuersorum, seu diuersi effectus; nam actiua vocatur in quantum potest per actionem agere in contrarium, & ei se communicare: resistentia verò in quantum per eandem actionem potest præstare impedimentum contrario, ne circa ipsum operetur, eam expellendo per impressionem propriæ, vel certè per inhesionem in proprio subiecto formaliter impedire inhesionem formæ contrariæ: hæc enim vocatur passiuæ, seu formalis resistentia: sed eadem ipsa virtus, vt actiua, postulat intrinsecum terminum magnitudinis, vt superius probatum est, & admissum à sententia opposita: ergo eundem terminum postulat, in quantum est resistentia, actiua quidem resistentia, aut formali, quæ non est aliud, quàm natura ipsius formæ, aut actiue qualitatis, vt in hærentis in subiecto. Probatur consequentia, quia cum sit eadem virtus, & per respectum, vel comparisonem ad propriam actionem, vel impedimentum præstandum oppositæ, non varietur, eundem terminum postulare necesse est: & vrgeo argumentum hoc modo. Eadem qualitas in quantum est virtus actiua, ideò postulat terminum magnitudinis intrinsecum, quia naturaliter agit, & quantum potest, & quia tantæ perfectionis est, ita vt non maioris, ideò tantæ actiuitatis est, tantumque potest agere, & non plus, quod est, terminum intrinsecum postulare: sed eodem modo, vt est virtus resistentia, actiua quidem, aut formalis, naturaliter, & quantum potest resistit agenti, seque ab eo defendit, ne à propria sede expellatur, per actionem quidem impedimentum præstando agenti contrario, aut per inhesionem in subiecto impediendo inhesionem, aut receptionem formæ oppositæ (quo pacto vocatur resistentia formalis) ergo postulat eundem terminum intrinsecum magnitudinis.

Secundò probatur, quia virtus actiua ignis, & cuiuslibet alterius agentis, secundum se considerata, tantum potest agere, & non plus; & propterea, vt actiua postulat terminum magnitudinis intrinsecum, quoad effectum, tam secundum intensionem, quàm secundum extensionem: sed hoc idem habet, vt virtus resistentia, secundum se considerata, siue vt actiua, siue vt passiuæ, aut formalis, vt tantum possit resistere agenti contrario, quòd non possit

possit ei plus resistere, quia per propriam virtutem, vel inhesionem formalem in subiecto naturaliter, & in quantum potest, resistit utroque modo. Ergo sicut datur maxima virtus actiua, quæ non possit esse maior, ita dabitur virtus resistiua maxima, hoc est, quæ maior esse non possit, quod est, terminum magnitudinis intrinsecum postulare. Quod docuit expressè Aristoteles, primo libro de cælo, capite vndecimo, sequentibus his verbis: *Si igitur quippiam per decem millia passuum moveri potest, aut pondus leuare, id quod maximum potest, dicere semper solemus, veluti centum leuare libras, aut per decem millia passuum ambulare, quanquã & partes, quæ citra sunt, potest, si & excessum potest. Quo patet, ad finem, atque excessum definiri potentiã oportere. Id igitur, quod potest 100 per excessum, & ea, quæ sunt citra, necesse est.* Quibus egregiam, atque efficacem satis rationem non obscurè insinuauit, videlicet dari maximum, siue summum, vel vltimum, quod potest actiua virtus, seu potentia, ita vt vltcriùs nihil possit, & propterea talem terminum vocari intrinsecum magnitudinis, & maximum quod sic, per quem idcò definiendam esse affirmat, quia continet, quidquid minus est, & propterea totum id, quod potest potentia, & est veluti adæquatum eius obiectum, à quo speciem sumit, & quod adæquatam eius rationem continet, adæquatè, atque completè explicat essentiam per ordinem ad idemmet obiectum adæquatum desumptam, cui si adiungamus illud, nempe resistiuam potentiam re ipsa eandem esse cum actiua, vel cum entitate eius, & sola ratione diuersam, per comparisonem ad agens, vel effectum, videbimus non minori efficacitate probari, ex mente Aristotelis esse, quòd potentia actiua, quoad resistentiam secundùm se considerata, postulet intrinsecum terminum magnitudinis, quàm eandem potentiam, vt actiuam.

Neque satisfacit solutio Patrum Conimbricensium, asserentium Aristotelem locutum vulgari modo, non stricto, & mathematico, quia nec talis modus prodesset illi, ad explicandas naturas potentiarum, quod ipse intendebat, nec decebat Philosophum tantum iuxta vulgarem modum loqui, nec huius est fundamentum in Aristotele, & iuxta proprietatem, & strictam acceptionem termini intellexerunt illum omnes expositores, inde colligentes terminum intrinsecum potentiarum, qui sit maximum quod sic, & aliàs posset dici terminari per illum, & per extrinsecum minimum quod non, quod est absurdum: de resistentia verò in ordine ad victoriam agentis, aliter locutus est Aristoteles, & iam iam dicemus.

Secunda conclusio: considerata resistentia, tam actiua, quàm formalis, vel passiua in ordine ad victoriam agentis, hoc est, vt in eam agens agere potest, non habet terminum intrinsecum

sed extrinsecum tantum, qui est minimum quod non. Hanc admisit opposita sententia, & hoc probant argumenta illius, & nihil aliud, & ideo non indigent solutione: quod ex prima nostra assertionem efficaciter colligitur hoc modo. Evidens est, dari maximam resistantiam æqualem virtuti actiue agentis, in quam proinde non potest agens agere, & evidens etiam est, per se agere in quamlibet minorem, quia cum minori quacunque efficitur proportio maioris inæqualitatis ex parte agentis, à qua potest actio procedere: ergo æqualis resistantia erit prima, ac minima, quam non potest vincere agens, & ideo, inquam, non potest agere, sed bene in quacunque minorem: habet ergo resistantia in ordine ad victoriam agentis considerata, extrinsecum terminum magnitudinis, qui est minimum quod non, & non intrinsecum qui est maximum quod sic.

Tertia conclusio: Resistentia siue actiua, siue formalis, nullum terminum intrinsecum, vel extrinsecum paruitatis postulat. Hæc est per se manifesta, quia quò minor est resistantia utraque, eò facilius vincitur ab agente: ergo cum possit in infinitum decrescere, impossibile est, dari minimam, in quam agens possit agere, ita ut non possit facilius agere in minorem: quare impossibile est, naturaliter resistantiam habere terminum intrinsecum paruitatis, qui sit minimum quod sic: nec est minus impossibile, dari tam exiguam resistantiam, quam non possit vincere agens: possit autem vincere quacunque maiorem: ergo nec admittere potest terminum paruitatis extrinsecum, qui est maximum quod non. Contra hoc tamen videtur esse evidens experientia fulminis, quod cum minorem resistantiam inueniat in vagina, quam in ense, illam tamen parum, vel nihil lædit, ensen verò liquat, fortius absque dubio agens in maiorem resistantiam, quam in minorem, quantumlibet minus à se distantem: cuius non videtur posse rationem aliam designari, nisi terminum paruitatis, quem resistantia postulet, ita ut tam exigua detur, in quam non valeat agens agere. Nihilominus mirabilis iste effectus absque dubio provenit ex alia causa, & non ex minori resistantia, quam in vagina reperiri fatemur. Causa verò est, quia vagina rarior est, & longè minus dura, quam ensis, plures etiam poros habet, quorum omnium ratione facilem præbet exitum fulmini; ideo citissime ipsum peruens, breuissimeque transiens, nihil ferè eam lædit, & eadem est ratio de veste; ensis verò ob nimiam densitatem, ac duritiem difficilè cedit, plus detinet ac retardat fulmen à celerissimo suo motu. Cum ergo virtus ad agendum sit intensissima, & in densa materia, intensissimum, celerissimumque effectum longiori tempore producit. Rationem hanc desumpsimus

mus ex Aristot. 3. libro Meteororum, capite 1. non longè à fine, cuius verba hæc sunt: *Clypei iam aramentum quidem liquefactum fuit, lignum verò nihil passum fuit: propter enim raritatem præhens spiritus penetrare, & pertransire, & per vestimenta similiter non commisit, sed velut attritionem fecit.*

QVÆSTIO IV.

An potentia passiva postulent terminos magnitudinis, & paruitatis, quantum ad intensiorem suorum effectuum.

Prior quæstionis pars de potentia passiva naturali.

IN primis passiva potentia, qualis est materia, dupliciter considerari potest. Primò, in ordine ad formam substantialem recipiendam mediis qualitibus, vel dispositionibus, sub qua consideratione infrà agemus de illa. Secundò, consideratur ista potentia, abstrahendo illam ab ordine ad formam substantialem, & ita de ea nunc differimus. Sed adhuc hoc modo sumpta duplicem aliam considerationem habere potest, priorem quidem, eam abstrahendo ab ordine ad agens: posteriorem verò in ordine ad agens, vel ad actiuam potentiam, à qua reducitur ad actum recipiendi formam substantialem, vel accidentalem, sed tandem considerata in ordine ad agens, duobus aliis modis concipi potest, vel in ordine ad agens naturale, hoc est, proportionatum naturæ eiusdem materiæ, quæ potentia passiva naturalis vocatur, vel in ordine ad agens non sibi commensuratum, sed cui aliquo modo subiici potest in ordine ad aliquem actum ab eo recipiendum ordinis naturalis, seu supernaturalis ordinis, saltem quoad modum recipiendi, & idem est de subiecto quocunque recipiente formas accidentales, quare indifferenter de potentia passiva præsens quæstio procedit, ut subiecto cuicunque conuenire potest, & hæc vocatur potentia obedientialis, quæ quasi per obedientiam agenti subiicitur, & non per naturam propriam, talis est potentia ligni in ordine ad artificiatam formam: talis potentia passiva subiecti in ordine ad Deum supernaturali modo ei imprimentem formam, ut cæco visum: talis denique potentia ignis ad motum circulaem recipiendum à prima sphaera, & cuiusque corporis grauis, aut leuis ad recipiendum impetum seu impulsus ab agente extrinseco in ordine ad motum, versùs quamcunque differentiam loci. Quare sub potentia obedientiali comprehenditur omnis alia à naturali. Et ex hoc infero minùs bene ab Scoto, & aliis recentioribus, qui eum sequuntur, præter potentiam passivam naturalem & obedientialem addi tertiam, quam vocant neutram, vel quia non est vna nec altera, hoc est, nec naturalis, nec obedientialis, vel quia nec dicitur determinatum

determinatum ordinem ad aliquem actum, nec eum excludit. Minus autem bene hanc potentiam addi affirmo, quia absque dubio sub obedientiali comprehenditur: nam passiva potentia non potest recipere actum, vel formam ab agente ordinis naturalis, non tamen sibi naturaliter commensurato, nisi quia ei potest subiici ad eam recipiendam: ei autem posse subiici idem est, ac ei posse obedire; ergo potentia passiva eius in ordine ad tale agens, & ad talem formam, obedientialis vocari debet. Et qui huic rationi non acquiescit, sed adhuc vult potentiam neutram non solum esse veram, sed ab obedientiali separare, controuersiam prorsus de nomine sibi assumit, & cum eo non oportet disputare.

His necessariò prælibatis, primò nobis loquendum est de potentia passiva naturali, quæ scilicet respicit agens naturale, & ab eo nata est reduci in actum, de qua tenet prior sententia, nullum terminum magnitudinis, nec paruitatis intrinsecum, vel extrinsecum admittere, quoad intensiorem effectus. Pro hac sententia referunt Patres Conimbricenses Gabrielem in 3. distinct. 13. quæst. vnica, artic. 2. & Almainum ibidem, quæst. etiam vnica. Et probari potest, primò, quia pati in eo solum consistit, quod est subiici agenti, ad recipiendum actum, vel formam: sed nec subiici alteri, nec ab eo recipere actum, dicit ex se vllam limitationem, quin potius totum, & tantum potest subiectum recipere, quantum potest ei imprimi ab agente, ita vt si ab hoc possit plus in infinitum imprimi, plus in infinitum possit à subiecto recipi. Vnde manifestè sequitur, potentiam passiuam, vt talem, ex propria sua ratione, nullum prorsus terminum postulare, nec intrinsecum, nec extrinsecum. Secundò, quia potentia actiua idcirco postulat terminum magnitudinis intrinsecum, quoad intensiorem effectus, quia agere dicit perfectionem, & cum limitata sit perfectio potentie, sicut limitata est perfectio rei, à qua emanat, ita debet esse limitatus effectus, quem potest producere quoad perfectionem intensiuam; sed pati, vel recipere in se accidentia nihil perfectionis importat, sed maximam, vel summam imperfectionem: ergo nec vllum postulabit terminum intrinsecum, vel extrinsecum.

Posterior sententia tribuit potentie passivæ secundum se consideratæ terminum intrinsecum magnitudinis, quoad intensiorem effectus, ita vt possit recipere formam accidentalem tantæ intensiōis, & non maioris; paruitatis verò nec intrinsecum, nec extrinsecum, quam sequuntur Patres Conimbricenses 1. libro de celo, cap. 11. asserentes esse communem Scholasticorum. Vnde plures ex antiquioribus pro ea referunt, vt Bonauenturam, Richardum, Henricum, Maiorem, & Egidium, Maiorem, Durandum,

Durandum, Argentinam, Basileam, Marfilium, partim in 1. partim in 3. lib. sententiarum, atque etiam D. Thomam quæst. 29. de veritate, artic. 3. ad 3. & 3. part. quæst. 7. articul. 1. & Henric. quodlib. 5. quæst. 12. sed neque id asserunt (vt eos consulenti facile constabit) quia non loquuntur de potentia passiva naturali, qualis est materia, vel subiectum, in quo recipiuntur accidentia ordinis naturalis, sed expressè de potentia passiva seu capacitate animæ ad recipiendam gratiam, de qua constat, non esse naturalem, sed obedientialem. Et adhuc de ista solum vniuersè affirmant esse finitam, nullum alium terminum magnitudinis intrinsecum, nec extrinsecum in particulari ei præscribentes. Quate nec pro hac sententia asserri possunt, quæ solum de potentia passiva naturali loquuntur (sicut neque Gabriel, nec Almainus pro opposita) quia eodem modo loquuntur de sola potentia obedientiali; sed nec ex recentioribus quisquam pro ea parte potest citari, quia nemo de terminis specialibus eius differit: nihilominus vt probabiliorē eam amplectimur. Et quantum ad priorem partem de termino magnitudinis intrinseco potentie passivæ naturalis, secundum se consideratæ, probamus primò. Quia potentia passiva materiæ, vel subiecti, per quam accidentales formas recipit, realis est, & positiva, vt genus causæ materialis, quod recipiendo exercet, etiam est reale, eadem quoque potentia pertinet ad eius essentiam realem, & positivam, est eadem eius entitas realis: sed quæcunque realis entitas creaturæ, quæcunque essentia creata determinatam habet perfectionem, hoc est, tantam, & non maiorem, quod est, termino magnitudinis intrinseco esse diffinitam; ergo potentia passiva in eadem essentia clausa erit etiam determinatæ perfectionis, ita vt tantæ intensiōis formam possit recipere, & non maioris, quod est intrinsecum terminum magnitudinis postulare. Secundo, quia materia, vel subiectum per propriam causalitatem materialem, quam exercet circa formas accidentales in se receptas, tribuit eis suo modo esse, ita vt ex ea educantur ab agente, & ex consequenti in eadem contineri dicantur prius quam fiant: sed constat, vim causandi cuiuscunque causæ non excedere perfectionem propriæ naturæ, sed per eam mensurari: ergo vis causandi materiæ, mensuratur ex perfectione eius, quæ cum termino intrinseco magnitudinis gaudeat, eodem quoque potentiam eius gaudere necesse est.

Ad primum argumentum maiori concessa, neganda est minor, quod nec subiecti alteri, neque ab eo recipere actum, vel formam, postulet ex se ullam limitationem, quia cum hoc proveniat ex intrinseca perfectione subiecti, termino magnitudinis intrinseco limitata, eodem modo limitatū esse debet: & quod additur, totum, & tantum posse subiectum recipere, quantum potest ei ab agente

agente imprimi, distinguendum est: nam si de agente sibi naturaliter commensurato, ac proportionato intelligatur, verum est, sed quod ab hoc potest imprimi, limitatum est termino intrinseco, ut constat ex dictis, ac proinde & potentia passiva naturalis: si verò de agente in tota sui latitudine, planè falsum est, quia virtuti eius valdè vniuersali non potest commensurari potentia passiva naturalis ex propria conditione magis limitata.

Ad secundum neganda est etiam minor: nam conferre suo modo esse accidentibus, ea sustentare, immò in suo genere materialis causæ conferuare, aliquid perfectionis importat, quamuis multis imperfectionibus permixtum, & hoc sufficit, ut terminum magnitudinis intrinsecum postulet. Posterior verò pars negans eidem potentie passivæ naturali vtrumque terminum paruitatis intrinsecum, & extrinsecum, adeò manifesta est, ut nemo ab ea dissentire possit, quia euident est, effectum minoris intensiōis in infinitum posse subiectum recipere ab agente, quia minor intensio in infinitum nullum potest præstare impedimentum ei, quin facilius recipiatur, sicut nullum potest præstare impedimentum agenti, ut ab eo imprimatur eidem subiecto: & quod diximus de potentia passiva naturali secundum se, intelligendum est etiam de illa, ut respicit actiuam agentis sibi commensuratam: eadem enim quoad hoc est vtriusque considerationis ratio, etsi aliquo modo distinguatur formaliter.

*Posterior pars de terminis potentia passiva
obedientialis.*

SVperest, agamus de potentia passiva obedientiali, quæ scilicet recipit actiuam agentis sibi non commensuratam, à qua etiam si non sit ex se nata perfici, potest tamen virtute extrinseca naturalis, aut supernaturalis ordinis, illi subiici, & effectum recipere. Et quantum ad terminos paruitatis, omnes videntur tanquam certum statuere, quòd nullum habeat, & ita absque dubio tenendum est, quia manifesta ratio id conuincit: nam sicut formæ omnes accidentales, quibus actuari potest, nullum terminum paruitatis admittunt, sed quò remissiores in infinitum, eò facilius imprimi possunt subiecto ab agente; ita subiectum ipsum, vel materia semper potest remissiozem gradum in infinitum recipere, quod est, nullum terminum paruitatis postulare obedientialem potentiam, quoad intensiōem effectus.

De solo igitur termino magnitudinis intrinseco, vel extrinseco controuersia potest procedere, circa quam videtur esse prima opinio, tribuens ei terminum intrinsecum (qui est maximus

ximum quod sic.) Ita videntur sentire omnes illi scholastici, quos q. præcedenti citasse diximus Conimbricenses pro sententia de termino magnitudinis intrinseco potentia passiva naturalis: non enim loquuntur de potentia passiva naturali subiecti, sed de obedientiali; nempe de potentia animæ ad recipiendam gratiam, & cætera dona supernaturalia. De hac verò loquentes affirmant finitam esse, & proinde aliquem terminum magnitudinis habere; sed specialius loqui videntur, Scotus in 3. disputatione 3. quæst. 4. §. ad primam quæstionem dico: Durandus ibidem quæstione 1. & Caietanus 3. par. quæstione 7. articulo 11. & 12. asserentes, gratiam animæ Christi esse summam secundum intensiorem, ita ut repugnare dari aliam etiam per potentiam Dei absolutam; ex quo planè sequitur, non dari in subiecto, nempe in anima, potentiam passivam obedientialem ad recipiendam intensiorem, cum non detur potentia respectu effectus impossibilis. Per tantam igitur intensiorem, quam habet gratia anima Christi, terminabitur potentia obedientialis animæ, tanquam per terminum magnitudinis intrinsecum, & consequenter potentia cuiuscunque alterius subiecti, cum eadem sit ratio de omnibus: quod efficaciter videtur probari hoc argumento. Potentia passiva obedientialis est eadem entitas materiæ, vel subiecti, ac potentia naturalis, cum constet per eandem suam entitatem recipere omnes formas, & quamvis poneretur, potentiam passivam naturalem esse qualitatem naturalem superadditam essentia materiæ, vel subiecti, necessario fatendum esset, per eandem illam potentiam recipere omnes formas accidentales, à quolibet agente impressas ei, quia non est intelligibile, addi novam aliam potentiam realem subiecto, ex eo quod superiori agenti subiiciatur pro forma, vel actu ab eo recipiendo: sed potentia naturalis postulat terminum magnitudinis intrinsecum (ut superius probauimus) ergo eundem postulabit necessario potentia obedientialis.

Secunda opinio non cedit potentia obedientiali terminum intrinsecum magnitudinis quoad intensiorem effectus, sed extrinsecum tantum. Ita sentiunt Pates Conimbricenses 1. libro de cælo, cap. 11. quæst. 4. art. 2. & videtur mihi non solum probabilior, sed vera. Quam efficaciter probo, quantum ad terminum intrinsecum magnitudinis hac ratione. Omnis potentia passiva correspondet alicui potentia actiua, ita ut effectum tantæ intensiōis possit recipere, quantæ intensiōis potest produci à potentia sibi correspondente, & ideo de potentia naturali diximus terminari intrinsecè quoad magnitudinem effectus, quia actiua naturalis terminatur hoc termino: sed potentia actiua, cui

corre

correspondet obediēcialis, non admittit intrinsecum terminum magnitudinis, quoad intensionem effectus: sed dato quocunque effectu cuiuscunque intensionis, potest intensiorem in infinitum producere: ergo nec potentia obediēcialis subiecti cum admittente poterit, sed recepto quocunque effectu cuiuscunque intensionis, poterit intensiorem recipere ab eodem agente, cui subicitur: gratia exempli; quamvis in aqua non detur potentia naturalis nisi ad recipiendum calorem ut octo, quem potest naturaliter ei imprimere ignis, nihilominus à potentia insigira, & absoluta Dei, respectu cuius non dicitur naturalis, sed obediēcialis, intensiorem potest in infinitum recipere, sicut Deus ipse potest dato quocunque calore intensiorem in infinitum producere.

Quantum ad secundum de termino extrinseco magnitudinis obediēcialis potentia, satis est per se manifestum dari, quia licet nullum gradum determinatum, seu finitum possimus assignare, quem non possit attingere potentia obediēcialis, non tamen potest esse actu infinita, neque effectum actu infinitum, quoad intensionem recipere, supposito, quod nec per potentiam Dei absolutam produci potest ullum infinitum, ut 3. lib. Physicorum ostendimus. Habebit ergo, ut minimum pro extrinseco termino infinitum actu, ita ut verum sit dicere, subiectum in ratione subiecti, & per potentiam obediēcialem, nec esse actu infinitum, nec posse recipere formam, vel qualitatem actu infinitam, quoad intensionem, bene tamen quamlibet finitam.

APPENDIX. DUBIUM.

An potentia passiva obediēcialis aliquid addat supra naturalem.

Argumentum pro priori sententia oppositum excitat propositum dubium: An potentia passiva obediēcialis subiecti aliquid addat supra naturalem, & quid illud sit. Cui respondent Patres Conimb. ibidem, nullam quidem rem addere, sed modum quendam accidentalem, respectu formatum accidentalium recipiendarum. Hunc autem modum non esse aliud, quam id, per quod propriam causalitatem materiale exercet, dum tales formas recipit. Itaque obediēcialis potentia est naturalis ipsa (hoc est, entitas subiecti) prout stat sub tali modo, per quem exercet causalitatem propriam, circa formas, quas recipit ab agente superiori. Ex quo inferunt (ut clarius rem explicant) quod cum Deus efficit, ut subiectum ultra naturalem suam potentiam aliquid accidens recipiat, ampliet capacitatem, seu potentiam eius per talem modum.

Modus tamen iste videtur mihi non necessarius, sed impossibilis. Ostendo primo, quia in potentia passiva naturali subiecti, vel
in materie

materiæ nihil inuenimus præter naturalem capacitatem eius, & respectum ad potentiam actiuam agentis naturalis, quibus solis præsuppositis, sufficienter potest idem agens naturale educere formam ex eadem potentia, atque etiam subiectum recipere actionem eiuseductiuam, & per eam præstare proprium concursum materiale ad eandem educationem, atque impressionem formæ, nec ullus vnquam (præter hæc) aliquem nouum modum ab agente productum circa idem subiectum exco- gitauit : ergo sufficiet ad potentiam obedientialem subiecti, vel materiæ, capacitas naturalis eius cum respectu ad superius agens, cui per eandem capacitatem subditur. Quibus solis præsuppositis sufficienter potest recipere actionem eiusdem agentis, & per eam sic receptam præstare proprium concursum materiale, ad educationem & receptionem formæ per eandem actionem ab eodem agente producendam. Quare sufficiunt hæc ad potentiam obedientialem, & superuacaneus erit quicunque alius modus superadditus eidem subiecto, quod constat in infusione gratiæ habitualis paruulorum per baptismum, & quam Deus infundere potest adultis dormientibus, ad quam nullus cum fundamen- to requisitum modum aliquem superadditum præter actionem Dei producentis, & capacitatem naturalem animæ respicientem actionem supernaturalem Dei.

Probatum secundum, quod talis modus sit impossibilis: primo; quia concursus agentis, atque eius actio, per quam producit formam in subiecto, vel eam educit de potentia eius, præsupponit potentiam actiuam eius omnino completam, ita ut nullo alio indigeat, ut sit principium eiusdem actionis, ac effectus producendi circa subiectum : ergo præsupponit etiam potentiam passiuam subiecti naturalem, vel obedientialem, iuxta exigen- tiam eiusdem actionis ac formæ producendæ ab agente medio concursu passiuo eiusdem subiecti. Ergo impossibile est, modum aliquem produci in subiecto necessarium ex parte eius ad poten- tiam obedientialem, & ideo frustra superadditur. Confirmatur, quia omnes causæ concurrentes ad actionem, & effectum, suffi- cienter constitutæ in actu primo, sunt priores natura, actione, atque effectui : ergo impossibile est, per eandem actionem pro- duci aliquid necessarium ad constituendum sufficienter in actu primo aliquam ex prædictis causis, inter quas constat enumera- ri materiale : sed nec talis modus potest produci per aliam actionem præuiam, natura, aut tempore priorem; nam talis modus, cum non creetur, sit dependenter à subiecto : ergo præ- stante subiecto proprium concursum materiale, & exercen- te propriam causalitatem materiale cum cæteris causis : ergo præsupponuntur omnes prius natura sufficienter constitutæ

in actu primorespectu eiusdem actionis, ac modi per eas producti; & consequenter, subiectum ipsum sufficienter in potentia obedientiali, per quam constituitur causa materialis in actu primo, respectu talis actionis, atque effectus: nam ad productionem talis modi, cum non foret naturalis, sed superioris ordinis, non potest concurrere idem subiectum per solam potentiam passivam naturalem. Quare repugnat, talem modum constituere potentiam obedientialem, vel necessarium esse ad illam constituendam: alias ad hunc modum recipiendam, praequereretur alias in materia, vel subiecto, & ad illū alter in infinitum, unde fit ampliacionem illam potentiae per modum superadditum, & fictitium, & impossibilem esse, cum sufficienter constituitur potentia obedientialis per capacitatem naturalem subiecti, eum ordine ad agens superioris ordinis, quae nec contrahi, nec ampliari potest.

Nostra igitur sententia, est potentiam obedientialem, nec modum aliquem, nec quidquam aliud addere, praeter entitatem subiecti, vel materiae, aut praeter potentiam passivam naturalem eius, nisi solum respectu ad superiorem potentiam activam agentis superioris, cui subiicitur. Quam probo ex impugnatione prioris sententiae, quia nihil aliud excogitari posset, quod potentia obedientialis adderet, praeter illum modum, quem efficaciter probauimus superfluum atque impossibilem: ergo faciendum est, nihil omnino addere, in eodem subiecto productum. Probatur antecedens, quia euidens est, non addere entitatem aliam, cum in eadem, & per eandem entitatem subiecti recipiantur omnes formae: solum ergo superesse potest respectus ad superius agens, a quo constituitur in ratione potentiae obedientialis. Probatur secundò, quia potentiae omnes distinguuntur per proprios actus, ut Aristoteles docet 2. libro de anima, cap. 1. ergo potentia passiva sumit speciem ab actu, quem potest recipere ab agente, qui si sit ei naturaliter commensuratus, aut proportionatus, erit ei naturalis, & comparatione eius dicitur naturalis potentia: si verò non sit ei proportionatus, sed ordinis superioris, quem ideo non naturaliter respicit, sed in quantum subiici potest eidem agenti superiori, dicitur potentia obedientialis, & ita praeter entitatem propriam, & naturalem solum addit potentia obedientialis respectum ad talem actum, talemque virtutem agentem, cui subiici potest. Et ecce tibi eandem entitatem subiecti, vel materiae in duplicem potentiam specie distinctam, per diuersum respectum ad agens sibi commensuratum seu proportionatum, vel superius, cui subiici potest, a quibus reduci potest in actum, & sub priori respectu naturalis vocatur, sub posteriori verò obedientialis: neque aliquid aliud superaddi

QVÆSTIO V.

*An qualitates secundum propriam rationem postulent terminos
intensionis, & extensionis.*

DE qualitatibus terminis, ut sunt actiue potentie hucusque
differuimus: superest verò de eisdem agere secundum pro-
priam rationem qualitatibus, quæ quidem vniuersalior est ra-
tione potètiarum: nam plures dantur qualitates nō actiue actio-
ne naturali, & physica, ut sūt albedo, & nigredo, &c. ex qualitati-
bus verò aliæ sunt corporeæ, aliæ spirituales, naturales aliquæ, &
aliquæ supernaturales, penes ordinem ad agens naturale, vel su-
pernaturale.

De his igitur omnibus qualitatibus, & secundum omnes con-
siderationes, atque etiam in ordine ad omnes potentias suo or-
dine differemus.

*De terminis qualitatibus corporearum secundum intensionem in ordine
ad potentiam naturalium agentium.*

DVplicem terminum harum qualitatibus considerare possu-
mus, videlicet magnitudinis & paruitatis. Et circa termi-
num paruitatis, tenet prima opinio, intrinsecum concedendum
esse qualitatibus naturalibus corporeis, via generationis, ita ut
detur primus gradus intensionis, aut prima pars gradualis per
alterationem producta, sub minori verò intensione produci non
possit in subiecto naturaliter: sic sentiunt Commentator octo
librorum Physicorum, commentario 23. Scotus in 2. dist. 2. quæst.
9. in solutione argumentorum, Greg. in 1. dist. 17. quæst. 1. art. 3.
Capreolus 16. quæst. 2. artic. 2. & in 2. distinct. 12. quæst. unica, art.
1. Soncin. 8. libro Metaphysicæ, quæstione 23. vbi pro eadem sen-
tentia refert D. Thomam, Egidium 1. libro de ortu & interitu,
quæstione 25. Iandunum, 6. libro Physicorum, quæst. 15. Hanc
tandem sequitur Pater Toletus, 1. lib. de generatione, quæst. 6. sic
eam explicans, ut successiuam alterationem, per quam quali-
tates intenduntur, præcedat semper & necessario quædam alia
instantanea, primum gradum producens, à quo successiua (quæ
proprie motus est) incipiens continuam eiusdem qualitatis in-
tensionem prosequitur. Soncinas verò alia via eam defendens
concedit, motum alterationis habere primum esse, & qualita-
tem per eum acquisitam primum gradum remissum, primò
productum, à quo eius intensio successiua post primum acqui-

situm esse incipiat, probatque ex Aristotele 8. Physicorum, textu 69. ubi vniuersè docet, cuiuslibet rei permanentis dari primum esse in instanti productum; sed qualitates sunt res permanentes; ergo habent primum esse suæ productionis in subiecto, atque adeò primam partem, seu primum gradum, qui sit minimum quod sit intentionis, quia sub minori intensiōe nequit produci naturaliter qualitas. Probat etiam ratione: primò, quia dum corpus mouetur à calore summo ad frigiditatem, vt si ignis frigeat ab aqua, illud caloris, quod incipit expelli ab eodem igne, desinit per primum non esse, cum notum sit, nihil diuisibile posse desinere per vltimum esse: sed primum non esse expulsio- nis caloris, est primum esse introductionis frigoris, quia gene- ratio vnius contrarij & corruptio alterius, simul omninò fiunt. Verum igitur erit, nunc primò non esse calorem, & ex conse- quenti nunc primò esse frigus, à quo expellitur, & immediatè non fuisse: quare necesse erit, quod frigus habeat primum esse in subiecto, quod est, habere primum gradum productum. Secundo, quia si non datur primus gradus caloris in subiecto pro- ductus, qui sit calor remississimus, ita vt non sit dabilis remissior, sequitur quemlibet designatum quantumlibet remissum, posse in infinitum remitti. Probatur consequentia, quia remissio succes- sua est, & continua: vel ergo remittitur calor per partes æquales, aut per proportionales: nò per æquales, quia daretur vltima; nam æquales sicut habent primam, ita habent vltimam. Talis ergo vl- tima esset remississima, cum vltra alià remissio nò procedat, qua- re sicut datur ex parte finis in alteratione vltima pars remississi- ma, sic daretur necessariò prima ex parte principij, quod est in- tentum eiusdem sententiæ. Fit igitur remissio per partes pro- portionales, & istæ sunt actu infinitæ, non habentes vltimam: ergo remissio procedit in infinitum, nullum habens terminum, quod patet esse absurdum.

Secunda opinio communis inter recentiores Philosophos (nam antiqui nec verbum fermè de hac re protulerunt) oppo- sita est, negans omninò his qualitatibus terminum paruitatis intrinsecum, qui sit primus gradus productus, ita vt sub mino- ri intensiōe produci nequeant, & solum eis concedens omni- nò extrinsecum, qui est opposita qualitas in summo gradu in- tensiōis in subiecto, cum qua in nullo gradu simul esse pos- sunt, bene tamen, cum qualibet minori intensiōe eius. Et hæc videtur mihi non solum in doctrina Aristotelis necessaria, sed omninò vera, & in primis aduersus oppositam tam modo priori à Toletò explicatam, quàm modo posteriori à Soncinatè pro- bauimus, 6. libro Physicorum, principiis Aristotelis, & verè Philosophiæ aduersari, quòd detur primum indiuisibile motus, quod

quod sit mutatio instantanea, per quam producat^{ur} primum indiuisibile termini, nempe prima præsentia adæquata, vel primum indiuisibile qualitatis; constat verò longè impossibilius esse, dari primam partem productam eiusdem termini, siue permutationem instantaneam (vt ponit Toletus) siue per primum partem motus (vt ponit Soncinas) ergo efficaciter satis probatum erit, ex illo non dari primam partem intensiōnis qualitatis productam aduersus vtramque sententiam. Quia euident^{er} est in principiis Aristotelis eodem libro expressis, non posse dari in motu primum moueri, hoc est, primam partem proportionalem, cū sit motus omni ex parte diuisibilis in infinitum, sicut cætera continua; sed nec primam partem aliquotam, in instanti factam, propter intrinsecam successiōnem motus, & ex consequenti, nec primam partem aliquotam termini in instanti productam, vt Soncinas posuit. Et si poneretur producta in tempore, non foret minùs impossibile, quia cū motus commensuratur tempori, & terminus (dum sit) commensuratur vtrique, repugnaret planè dari partem aliquotam motus, & termini in tempore, ac successiue productam, quin in medietate temporis priori daretur medietas partis motus, & medietas partis termini per eam producta: ex quo euident^{er} deduceretur, primum illum gradum remissum, quem Soncinas ponit pro minimo, non esse minimum quod sic, nec partem illam motus primam, cū detur pars alia aliquota vtriusque minor, ac prius producta.

Sed probatur ratione nostra sententia aduersus vtramque, quia euident^{er} est, quemlibet gradum caloris esse diuisibilem, secundum partes intensiōnis; euident^{er} est etiam, habere contrarium eodem modo diuisibile, & tandem euident^{er} est, contrarium diuisibile non posse naturaliter simul expelli secundum suas partes, sed successiue, & in tempore, propter resistantiam contrarij, quam naturaliter repugnat, simul vincere contrarium limitatæ virtutis. Sed etiam est euident^{er}, omnes partes motus, & omnes gradus caloris esse eiusdem rationis, & idcō esse diuisibiles, & habere contrarium in eodem subiecto; ergo sicut est euident^{er} de cæteris, præter primum, non posse simul produci naturaliter; sed necessariò successiue, hoc est, partem post partem, non minus erit euident^{er} de parte prima, seu primo gradu termini (quem ponit Pater Toletus, simul produci per mutationem instantaneam) atque etiam de prima parte, aut gradu termini, (quem ponit Soncinas primò productum, tanquam minimum intensiōnis per primam partem motus) repugnare, quòd simul producat^{ur}, quàm de cæteris gradibus, vel partibus eiusdem caloris. Quare ita erit falsum, ponere aliquem gradum primò productum simul, vel in in-

stanti, ac esset falsum eundem ponere in medio, vel sine motu: non ergo potest, his qualitatibus concedi terminus intrinsecus intensiōis, versus paruitatem, qui sit minimum quod sit.

Secundò idem probatur contra Soncinatem. Prima pars, seu primus gradus caloris est eiusdem rationis cum cæteris: ergo est entitas diuisibilis in partes integrantes, sicut illi. Quod conuincitur etiam ex eo, quòd recipitur in subiecto diuisibili; habentēque partes. Ex quo in primis euidenter colligo, non posse produci sine extensione, & ex consequenti non habere generationem, quæ non sit simul extensio. Secundò, non minùs euidenter elicio, eandem primam partem, vel gradum non posse produci sine intensiōe, quia sicut entitas eius, partes subiecti distinctas informans, est diuisibilis, ita entitas eiusdem informans eandem partem subiecti diuisibilis est, quemadmodum entitas cuiuscunque alterius gradus informans eandem partem subiecti. Præterea eadem pars subiecti perfectiùs actuatur per entitatem totius gradus, qui simul produceretur, quàm per solam medietatem eius: ergo posterior medietas magis perficit eandem in qua utraq; recipitur, quàm sola prior: sed maior perfectio caloris, circa eandem partem subiecti, est intensio eiusdem caloris: ergo impossibile est produci primum gradum sine intensiōe, sicut impossibile probatum est produci sine extensione.

Circa terminum verò magnitudinis, quoad intensiōem, ex dictis de termino intrinseco actiuarum potentiarum apertè colligitur, has qualitates eundem terminum postulare, nempe tantam intensiōem, ut naturaliter non possint habere maiorem, ut calor, frigus, humor, & siccitas, octo gradus, & pariter de cæteris, secundum proportionem, & exigentiam suæ naturæ: nam omnes ferè qualitates, præter primas, oriuntur ex variis earum permixtionibus: meritò ergo sequuntur naturam earum, in modo, quo terminari postulant. Sed probatur hac ratione. Non possunt qualitates istæ naturaliter aliquam habere intensiōem, præter eam, quam accipiunt, vel accipere possunt ab agentibus naturalibus, in quorum virtutibus continentur, & à quibus natæ sunt produci in subiectis: sed virtutes actiue, seu potentie eorundem agentium, postulant terminum magnitudinis intrinsecum, quoad intensiōem suorum effectuum, ut diximus: ergo modo simili terminari postulant qualitates, qui sunt effectus.

De terminis tandem extensionis harum qualitatum, tam magnitudinis, quàm paruitatis, constat ex dictis de terminis extensionis potentiarum actiuarum, scilicet, intrinsecum terminum magnitudinis postulare, paruitatis verò nullum. Hinc enim

enim planè colligitur, qualitates omnes corporeas (nam omnes producuntur per actiuas potentias) eundem terminum magnitudinis postulare, nullumque postulare paruitatis; quia euidens est, non plus se extendere, immò nec maiorem habere posse extensionem naturaliter ea, quam ab agentibus naturalibus, eorumque virtutibus possunt suscipere. Quod verò attinet ad potentiam Dei absolutam, mox attingemus.

Quosnam terminos postulent qualitates, quoad intensiorem, & extensionem, ut sint dispositiones formæ substantialis.

Dispositiones formarum duplices sunt, quædam præcedentes, aliæ comitantes, vel consequentes formam iam introductam. De utrisque verò nullum reperire potui disputantem, ideò diuersas opiniones non refero, sed propriam tribus assertionibus profero, quantum ad intensiorem: quarum prior sit de termino magnitudinis priorum dispositionum. Qualitas, ut est dispositio præcedens introductionem formæ, præparans in materiam pro expulsionem formæ præcedentis, & introductionem sequentis, non habet intrinsecum terminum, versùs maximum, sed extrinsecum duntaxat. Probatur prior pars de termino intrinseco hoc argumento: Vt generetur ignis ex ligno, vel ex qualibet alia materia, euidens est, non requiri ad expulsionem formæ præcedentis calorem in summo gradu intensiõis, nempe ut octo, sed in minori gradu sufficere: quia præcedens forma nequit esse in materia cum tali dispositione, ut per se est manifestum. Vnde sequitur, nec talem dispositionem summæ intensiõis esse necessariam ad introductionem formæ sequentis, cum introductio naturaliter fiat simul cum expulsionem, alioqui permaneret materia sine vlla forma, vel subiectum sine utroque accidenti contrariis; sed dispositio sufficiens ad expulsionem non habet terminum intrinsecum, sed extrinsecum tantum: ergo nec dispositio sufficiens ad introductionem intrinsecum terminum habebit. Probatur minor, quia sufficiens dispositio pro expulsionem, vel recipitur in ligno, tanquam in proprio subiecto, vel in materia eius habente adhuc formam ligni: non enim potest præparare materiam nudam omni forma, cum hæc non possit naturaliter dari; nec potest actum disponere ad expulsionem formæ iam non existentis, sed iam expulsæ. Vnde sequitur cum calorem, qui est cum forma ignis in materia, in instanti, vel tempore suæ introductionis, non esse dispositionem expellentem, neque introducentem, sed eam quæ reperitur in ligno tempore immediatè præcedenti: hæc enim expellit formam ligni, hæc præparat materiam pro introductionem formæ ignis, quæ non

potest esse determinata, termino intrinseco, sed sicut tempus immediatum indeterminatum est, ita calor in eo productus indeterminatus est, quia non habet determinatum gradum, sed solum potest determinari termino extrinseco, ita ut verum sit, non pertingere illum gradum intensiōis, quem habet, iam existens cum forma ignis in prima sui introductione, sed bene quemlibet minorem. Talis igitur gradus erit extrinsecus terminus sufficientis dispositionis ad expulsionem formæ præcedentis, & introductionem sequentis, & intrinseco carebit. Et argumentum hoc efficacius procedit præsupposita opinione de subiecto adæquato accidentium (quam sequimur) nempe quod sit compositum, & non materia, nam compositum præsertim in viuētibz definit per primum non esse, & consequenter vltima dispositio pro expulsionem formæ, ita ut sicut est verum dicere, nunc non est compositum, & immediatè prius fuit, ita sit verum dicere, nunc non est vltima dispositio expellens, & immediatè prius fuit, sed tempus immediatè præcedens est indeterminatum: ergo dispositio in eodem tempore existens indeterminata esse debet, cum in eo producat. Quare verum erit nō habuisse gradum determinatum, sed illum non attigisse, bene tamen quamlibet intensiōem eo minorem.

Ex hac assertione infertur secunda pars, nempe vltimam dispositionem pro introductione formæ habere terminum extrinsecum, nempe illum gradum, quem forma præcedens non compatitur secum, sed iam est in eadem materia habente formam sequentem.

Assertio secunda de termino magnitudinis dispositionum comitantium, aut subsequentiū formam, affirmat, intrinsecum esse eis concedendum necessariò, quam sic probo. Dispositiones istæ consequuntur naturam formarum substantialium, tanquam eis debita, ut calor summæ intensiōis naturalis, nempe ut octo, respectu ignis: ergo sicut natura formarum substantialium est tantæ perfectionis, & non maioris, sic postulat dispositionem tantæ perfectionis, vel intensiōis, & non maioris, quod est eam postulare intrinsecè terminatam termino magnitudinis.

De termino verò paruitatis earundem qualitatum est tertia assertio, nullo termino paruitatis definiri præcedentes dispositiones, sed quolibet gradu intensiōis designato, prius sub minori in infinitum produci potuisse talem qualitatem. Probat hoc argumento: Qualitates istæ secundum propriam naturam consideratæ nullum terminum paruitatis postulant, ut superius probatum est; sed quolibet intensiōe designata sub minori etiam quacunque disponere possunt: ergo non petunt intrinsecum terminum paruitatis. Probat minor, quia data quacunque

forma postulante dispositionem tantæ intensionis, potest dari alia, & alia in infinitum, postulante dispositiones minoris, ac minoris intensionis: ergo non potest habere terminum intrinsecum paruitatis.

De terminis earundem qualitatium, quoad extensionem.

Superest terminos extensionis præscribere eisdem qualitatibus, ut dispositionibus, quoad extensionem.

Et quantum ad terminum paruitatis pertinet, tenet prima opinio, intrinsecum postulare, qui est minimum quod sic, ita ut dispositiones, quas quæque forma ad sui introductionem petit, non possint suscipi in quantumcunque parua quantitate subiecti, sed determinata ac certa. Pro qua opinione referunt Patres Conimbricenses Capreolum, & Soncinatem, cum cæteris nuper citatis. Sed talem sententiam apud eos (quamvis diligenter consultos) reperire non potui, loquuntur enim de solis terminis intensionis: cæterum à quocunque teneatur, hoc argumento probari potest. Ex ordine ad finem accipitur modus intensionis atque extensionis formarum; sed qualitatium finis est substantia, ad cuius generationem disponunt materiam; ergo, quantum substantialis forma postulauerit magnitudinem in materia pro sui introductione, tantam postulabunt qualitates disponentes pro extensione: ubi enim forma introduci non potest, nec dispositiones recipi poterunt: sed substantia petit minimam magnitudinem ad primam generationem, ita ut sub minori nequeat generari: ergo eodem termino definietur extensio qualitatium, qui sit minimum quod sic.

Vera tamen sententia est, qualitates, ut sunt dispositiones formarum substantialium, non petere intrinsecum terminum magnitudinis, nec paruitatis, quoad extensionem. Probatursimul utraque pars hoc argumento: Signata qualibet magnitudine, ad quam informandam potest se extendere quæcunque forma substantialis, vel quam postulet pro minimo quod sic suæ introductionis, potest designari maior in infinitum, ad quam possit se extendere alia forma substantialis: atque etiam signata minori, cum qua possit introduci in materia, potest designari alia minor in infinitum, cum qua possit introduci alia forma substantialis; sed potest utrumque mediis dispositionibus, quia sine illis non valet informare materiam, nec in ea introduci naturaliter (ut per se est manifestum) ergo dispositiones non petunt intrinsecum terminum magnitudinis, nec paruitatis suæ extensionis. Probatursimiliter minor exemplo ignis, cuius forma potest informare quantumcunque materiam, quantumlibet magnam in infinitum (ut ex Arist. attulimus 1. lib. Physicorum, agentes de terminis

magnitudinis, & paruitatis) potest etiam introduci sub qualibet minori in infinitum (vt ibidem ostendimus) ergo calor, siccitas, raritas eius, cæteræque qualitates, quas pro dispositionibus postulat in materia, nec petunt terminum magnitudinis, nec paruitatis suæ extensionis intrinsecum.

Argumentum verò oppositum nobis fauet: dispositiones enim ad formas ordinantur, ex quibus constat terminari aliquas termino intrinsecos alias verò nullum terminum intrinsecum petere, sed extrinsecum duntaxat, videlicet infinitum pro maximo, & indiuisibile pro minimo, & ideo censendum est, nullum terminum intrinsecum extensionis petere dispositiones, quia pro vtrisque indifferenter disponere possunt, ita vt eadem, quæ disponunt pro forma postulante intrinsecum, possint etiam disponere pro non postulante, nisi extrinsecum.

*De terminis qualitatum naturalium, secundum potentiam
Dei absolutam.*

SCOTUS in 1. distinctione 4. §. ad primam quæstionem dico. Sentire videtur qualitates naturales ita postulare intrinsecum terminum magnitudinis, vt nec per potentiam Dei absolutam eum superare valeant. Quod hac ratione probari potest. Summum vocatur illud in quolibet rerum genere, cui nihil in eo addi potest: sed calor vt octo, quem habet ignis, summum esse sentiunt omnes, & pariter summam intensiorem aliarum qualitatum, sentiunt esse octo gradus: ergo nec per potentiam Dei absolutam dari potest maior. Probatur consequentia, quia eo ipso, quod maior dabilis foret, hæc non esset summa.

Veritas nihilominus huius rei est; respectu potentie Dei absolutæ, non esse præscribendum terminum intrinsecum magnitudinis, nec paruitatis secundum intensiorem, vel extensionem qualitatum naturalibus. Quam in primis de termino magnitudinis elicio ex D. Thom. 2. 1. q. 24. artic. 7. vbi de charitate, cæterisque qualitatum supernaturalibus decernit, nullo intensiorem termino definiti; sed in infinitum crescere posse: ergo longè melius id sentiet de qualitatum naturalibus: nam cum supernaturales sint participationes immediatæ diuini esse supernaturalis, difficilius existimaret Doctor sanctus, quod in infinitum abire posset earum perfectio intensiua, vt mox videbimus. Sed probatur ratione: primò, quia intensio non pertinet ad essentiam qualitatis, neque ab ea emanat tanquam passio, vel proprietas, sed ab extrinseco agente ei prouenit: ergo licet essentia eiusdem qualitatis limitatam perfectionem habeat, & ex consequenti terminatam, non proinde necessarium est, determinatam postulare

Lata intensio, ultra quam procedere non possit; sed tantam potest suscipere, quanta potest ei communicari ab agente: sed agens infinitum, qualis est Deus, potest data quacunque maiorem ei communicare: ergo quacunque suscepta, poterit ipsa maiorem in infinitum suscipere, ac proinde non postulabit terminum aliquem magnitudinis respectu potentiae Dei absolutae. Secundò, ita placet se habere intensio respectu qualitatis, sicut extensio respectu quantitatis: sed nemo vaquam præscripsit quantitatem respectu potentiae Dei absolutae extensionem determinatam: ergo modo simili, qualitas nullam ex se postulabit determinatam intensioem, respectu eiusdem potentiae absolutae, sed in infinitum crescere poterit.

Quod verò ad terminum extrinsecum pertinet, qui putant, dari posse actu infinitum, per potentiam Dei absolutam, illum concedunt qualitatibus, quoad intensioem, & quoad extensionem, sicut & quantitatem. Nos verò, qui 3. lib. Physicorum tenuimus, atque efficaciter probauimus, in nullo genere rerum posse dari actu infinitum, consequenter asseruimus, qualitatem non posse esse actu infinitam, quoad intensioem, vel extensionem: ex quo necessariò inferitur, habere aliquo modo terminum extrinsecum, quem non potest attingere, bene tamen quodcumque minus, & talem terminum (si sic loqui licet) esse intensioem, & extensionem actu infinitam.

Ad argumentum verò in fauorem Scoti propositum respondeo hac distin. octo gradus intensiois, qui attribui solent qualitatibus primis elementorum, & suo modo cæteris ex commixtione ortis, non esse summam intensioem simpliciter, & absolute, sed summam, quam secundum ordinem naturalem causarum suscipere possunt, neque à propria natura, neque à naturali aliqua causa, seu virtute possunt plus intendi: sed naturæ earum absolute loquendo, non repugnat habere maiorem in infinitum, & propterea quamcunque aliam (præter infinitam actu) possunt suscipere à Deo per potentiam obedientialem superiùs explicatam.

Quonam modo præscribendi sint termini qualitatibus supernaturalibus.

Supernaturales qualitates sunt, quas Deus ipse, non ut naturale agens, vel mediis causis naturalibus, sed sua virtute totam naturam superante, infundit: tales sunt habitus gratiæ, & charitatis, &c. De quibus dubitamus, an, & quomodo terminentur: & quidem cum sint qualitates spirituales, sicut subiectum, cui inhærent, extensione quantitativa carent, & consequenter carent terminis quoad extensionem; sed habent veram intensioem gradualement in suo genere spirituali, & propterea controuersia de terminis,

terminis, quoad intensiorem gradualem, locum in eis habet. Duplex est autem consideratio harum qualitarum: prior quidem, in ordine ad finem gloriæ, cuius gratia, vel in ordine ad quem infunduntur à Deo, ut videlicet per eas fiant homines Deo grati, & ad ipsum per operationem tendant: posterior est qualitarum secundum se. Et iuxta priorem considerationem conveniunt omnes cum D. Thom. 3. par. quæst. 7. articul. 12. præscribendum eis esse terminum magnitudinis intrinsecum, ita ut detur maxima gratia, qua maior dari non possit ullo modo, vel per ullam potentiam, & talem esse gratiam sanctissimæ animæ Christi Domini, cuius egregiam assignavit rationem D. Thomas ibidem: quia finis gratiæ est unio creaturæ rationalis ad Deum: sed neque esse, neque intelligi potest maior unio creaturæ rationalis ad Deum, ea quam habet humanitas Christi, & consequenter eius anima, cum sit unio personalis cum diuino Verbo, ad quam ordinatur habitualis gratia eius; quare in ordine ad finem repugnat dari maiorem gratiam, & ex consequenti erit maximum quod sic, sub hac consideratione. Controversia igitur ad posteriorem considerationem reuocatur, & sensus eius est: an considerata gratia secundum se, hoc est, abstrahendo à fine, habeat terminum, quoad intensiorem; & quidem secundum legem à Deo constitutam, & ordinatam in rebus supernaturalibus, convenit etiam inter omnes, dari gratiam tam intensam, qua non possit intensior dari secundum communem legem: ita D. Thomas ibid. articul. 3. & cum eo omnes interpretes, immo omnes scholastici.

Quæstio igitur solum potest procedere de gratia secundum se, & secundum potentiam Dei absolutam, in quo sensu ei ac cæteris qualitatibus supernaturalibus, intrinsecum præscribunt terminum magnitudinis, quoad intensiorem.

Scotus in 3. dist. 13. quæst. 4. §. ad primam quæst. dico. Durandus ibid. qu. 1. Caietanus 3. part. quæst. 7. art. 11. & 12. asserunt, gratiam animæ Christi, & consequenter cætera eius dona, esse summam, quoad intensiorem, ita ut repugnet amplius intendi, aut fieri aliam intensiorem, etiam per potentiam Dei absolutam. Probat Scotus duplici argumento: primo, si designetur infima gratia secundum intensiorem, & hæc intendatur, quantum possibile est, tunc queritur, an aliquem statum habitura sit eius intensio, vel nullum, sed in infinitum processura: si statum admiseris, erit iam summa eius intensio, iuxta eundem statum, cum non possit ultra procedere, & per illum gradum, quem attigerit, terminabitur, tanquam per maximum quod sic: si verò statum habituram esse negaueris, sequitur peruenturam esse ad perfectionem actu infinitam creaturæ repugnantem. Probaturs consecutio: quia quò plus intenditur, plus perficitur: si ergo ad intensiorem actu infini

infinitam peruenire potest, ergo ad perfectionē actu infinitam.

Secundò, quia in rebus permanentibus, quantum est de virtute, seu potentia, tantum est de actu, ut docet planè Aristot. 3. lib. text. 69. si ergo per potentiam actiuam Dei, & passiuam subiecti, qualitates istæ in infinitum perfici possunt per viam intensiōis, poterant talem perfectionem ab agente suscipere, & in subiecto habere. Probatur consequentia, quia si Deus potest animam in infinitum perficere per successiuam intensiōem, poterit gratiā infinitè perfectam vnico actu creare, eidemque animæ infundere: sed gratiam esse actu infinitam inuoluit cōtradictionem: ergo falsum est, quòd eius intensio possit producere in infinitum, per potentiam Dei absolutam. Et vrgeri potest argumētum hoc modo: forma, quæ imprimitur subiecto, vel ei infunditur, non potest perfici, vel intendi, nisi secundum capacitatem subiecti, quæ si limitata probetur, conclusum erit, quòd terminum intensiōis intrinsecum habeat ipsamet forma: sed capacitas, seu potentia animæ, in qua recipiuntur supernaturales qualitates, non est infinita, sed ad certum gradum perfectionis limitata, sicut essentia eiusdem animæ, à qua oritur, vel cui identificatur: ergo intensio earundem qualitatum terminum habebit intrinsecum, quem excedere non valebit.

Tertiò arguit Durandus, & Caietanus; si gratia non haberet terminum magnitudinis, seu intensiōis intrinsecum, sed qualibet designata gratia, quantumcunque intensa intensior alia effici posset, sequeretur, gratiam animæ Christi non esse summam, sed alteram intensiorem esse possibilem, & ex consequenti possibile etiam foret, quòd aliquid maius, aut melius fieret, quam sit talis gratia. Et cum formalis effectus eiusdem gratiæ sit efficere animam gratam Deo, sequitur tandem aliquid fore Deo gratius anima Christi, quod planè impossibile est.

Posteriorem sententiā huic oppositam tenet expressè D. Thom. 3. part. quæst. 7. art. 1. atque etiam 2. 2. quæst. 14. art. 4.

Quam sententiā amplectitur Sotus 1. lib. Physicorum, quæst. 4. & cæteri omnes recentiores (nam antiquiores scholastici, nec verbum de hac re scripsere) & videtur mihi non solum probabilis, sed vera, quam D. Thomas probauit in posteriori loco citato hac ratione satis efficaci. Intensio alicuius formæ ex triplici capite potest determinari, nempe ex parte eiusdem formæ determinatam mēsuram habentis, ad quam cum peruenit, non poterit vterius progredi, quin in alteram speciem conuertatur: aut ex parte agentis, cuius virtus limitata est ad intendendam formam in subiecto; vel demum ex parte eiusdem subiecti, quod maioris perfectionis, aut intensiōis capax non est. Sed nullum ex his capitibus terminum ponit intensiōis supernaturalium qualita-

tum;

nam: ergo data qualibet intensione earum, plus in infinitum intendi possunt, quod est non habere terminum intrinsecum suæ intentionis versus maximum. Probat^{ur} minor, quia gratia, & charitas ex propria natura, & ratione sunt participationes quædam infiniti amoris diuini supernaturalis, qui est Spiritus sanctus. Sed participatio hæc nullum terminum admittit, quia data quacunque potest plus participari à creatura rationali, vt per se constat: ergo ex hoc capite, termino magnitudinis intrinseci caret earum intentio, vel perfectio. Virtus etiam diuina supernaturalis eas infundens in anima infinita est, & ideo dato quocunque gradu gratiæ, quem animæ tribuit, potest tribuere alterum perfectiorem in infinitum. Capacitas denique animæ, respiciens eandem virtutem diuinam supernaturalem (quo pacto potentia passiuæ obediæntialis vocatur) nō potest habere terminum ultra quem non possit procedere, nisi quem habet eadem potentia actiuæ infundens gratiam; sed tantam gratiam potest ab ea recipere, quantum potest ipsa producere (cū non recipiat per naturam, sed per obediæntiam, nec per potentiam naturalem, sed obediæntialem) quæ potest cū termino intrinseci magnitudinis careat & data quacunque possit intensiorem in infinitum producere, sequitur, nullum terminum designari posse, quem non possit intentio gratiæ excedere. Et potest hoc argumentum vgeri hoc modo: potentia passiuæ naturalis subiecti mensuratur per actiuam naturalis agentis, ita vt tam perfectam, aut intensam possit subiectum recipere naturaliter, quā perfectam aut intensam potest producere agens naturale: ergo potentia obediæntialis subiecti, respiciens actiuam superioris agentis, tam perfectam vel intensam formam potest ab eo recipere, quā perfectam, vel intensam potest ipsummet agens producere. Quare eundem terminum postulant tria hæc, nempe potentia actiuæ superioris agentis, potentia obediæntialis subiecti, & latitudo intensiōis formæ. Sed de potentia actiuæ constat, non habere terminum intrinsecum; per locum igitur ab intrinseci sequitur, neque obediæntialem potentiam subiecti, neque latitudinem formæ ab illo producendam, & à subiecto recipiendam, intrinsecum terminum habere.

Neque argumenta pro parte Scoti magnum negotium exhibentiam ad primum negandum est, intensiōem qualitatis respectu potentiæ absolutæ Dei, vllum habere statum, ultra quem non possit procedere. Negandum insuper est, quod Scotus intulit, nempe infinitam actu futuram esse intensiōem: neque sequitur, quod si aliquid magis, ac magis in infinitum perficiatur, ad perfectionem actu in infinitam aliquando perueniturum sit, immodò nec peruenire posse, sed hoc solum inferri ex eo potest, quod

quod perfectio quam assequi valet, non definiatur termino in-
tinfeco, vt constat diuisionibus continui.

Neque secundum argumentum probat intentum, quia licet
admitramus, tantum posse subiectum recipere ab agente, quan-
tum potest agens producere, non sequitur, recepturum aliquan-
do effectum actu infinitum, quia neque produci potest agente;
totum enim, quod potest producere, ad extra agens infinitæ vir-
tutis, non potest simul vlllo modo procedere, ita vt nihil super-
sit ab eo producendum, quia totum, quod potest, non est determi-
natum, sed indeterminatum, vt in diuisionibus continui vide-
mus: ex eo enim, quod non sunt determinatæ omnes diuisiones
continui, quas Deus efficere potest, euidenter sequitur, quod
nec simul, nec successiue, possit efficere omnes possibles; sed qui-
buscunque factis, semper supererunt infinitæ efficiendæ, quia
quod efficiendum est, determinatum esse debet: falsum igitur
est, quod Scotus intulit, videlicet posse Deum simul infundere
omnem gratiam à se producibilem animæ, quia intensio possibi-
lis indeterminata est, & propterea impossibile est, totam simul
produci, vel aliquando fore productam. Producibile ergo à Deo
sub esse permanente solum est infinitum in potentia.

Argumentum denique Durandi, & Caietani, hac distinct. à D.
Thoma insinuat, 3. part. quæst. 7. art. 11. soluitur. Gratia habi-
tualis Christi dupliciter consideranda est: primò, in ordine ad ef-
fectus, & officia gratiæ, quæ habet in illa persona, & sic vocatur
à D. Thoma infinita, & meritò, quia habet virtutem ad omnes
effectus gratiæ possibles præstandos: secundò, in quantum est
qualitas quædam, & habitus supernaturalis eiusdem rationis
cum quolibet alio habitu gratiæ cuiusque hominis, habensque
latitudinem gradualement intensiōis, sicut habent cæteri habitus
gratiæ, & effectum formalem similem, nempe efficere animam
illam sanctissimam Deo gratam, sicut quæcunque alia gratia cu-
iuscunque hominis, & hoc modo considerata gratia Christi fi-
nita est, sicut cæteræ, & finito modo efficit animam eius Deo
gratam, & augeri potest, vel intendi in infinitum, sicut illæ; im-
mò possibile est per potentiam Dei absolutam fieri aliam gra-
tiam, atque alias intensiores, & in hoc genere perfectiores, & si
fierent, daretur absque dubio aliquid maius, & melius (sub ea-
dem consideratione particulari quàm sit gratia habitualis Chri-
sti, quod (absque dubio) non est reformidandum concedere, quia
illud expressè concedit D. Thomas loco proximè citato ad se-
cundum, hisce verbis: *Dicendum, quod virtus diuina, licet possit facere
aliquid maius, & melius, quàm sit habitualis gratia Christi, non ta-
men posset facere, quòd ordinaretur ad aliquid maius & melius, quàm
sit vnio personalis ad Filium vnigenitum à Patre*: Est ergo gratia
summa

summa in priori consideratione, non in posteriori comparatione absolutæ potentia Dei.

APPENDIX. DVBIVM.

An potentia obedientialis animæ ad recipiendam gratiam, & dona supernaturalia sit infinita.

QUAMVIS de potentia obedientiali animæ in particulari sciscitetur dubium, de potentia etiam obedientiali cuiuscunque subiecti intelligi debet, quia eadē est ratio de omnibus; cum possit quodlibet subiectum formā magis ac magis intensam in infinitum ab agente superiori recipere: nec solum quaerit, an sit infinita in potentia, quia hoc videtur apertum ex dictis, sed an sit actu infinita.

Et partem affirmantem, esse actu infinitam sic ostendo: posse recipere formam, vel actum, est perfectio aliqua in subiecto, cum sit concurrere ad esse eius, atque etiam ad conservationem: ergo posse recipere formam perfectiorem, aut intensiorem in infinitum, erit perfectio infinita & actualis quidem, quia eā habet in se subiectam à principio, cum receptione formæ non augeatur capacitas subiecti, ut supra ostēdimus: ergo est perfectio actu infinita. Et vrgeo argumentum hoc modo: Recipere formam aliquius intensioris est aliqua perfectio in subiecto: ergo recipere formam magis intensam, est maior perfectio: sed intensio, quam potest actu recipere, caret termino intrinseco: ergo actualis perfectio eius eodem termino caret, eritque proinde actu infinita. Secundò, quia posse producere effectum, maioris ac maioris perfectionis in infinitum, arguit in agente perfectionem actu infinitam: nam ex hoc solo deducimus, Deum esse infinitæ perfectionis, quòd dato quocunque effectui cuiuscunque perfectionis, potest perfectiorem in infinitum producere, quamvis putemus infinitum actu efficere non posse: hoc verò idem reperitur in subiecto, quod recepto quocunque effectui ab agente superiori, potest intensiorem, ac perfectiorem recipere in infinitum: ergo par est ratio.

Et vrgeo præterea, quia potentia actiua, & passiva reciprocam habent correspondentiam: ergo tanta & non minor debet esse passiva obedientialis, quanta est actiua superioris agentis, cui correspondet. Probatur consequentia, quia quantum potest superius agens producere per potentiam actiuam, tantum potest recipere subiectum per passivam obedientialem; si igitur potentia actiua Dei actu infinita est, erit etiam actu infinita potentia passiva obedientialis subiecti, potens recipere omnem formam cuiuscunque intensioris, quam Deus potest extra producere.

HII

His tamen non obstantibus, tenendum est, potentiam obedientialem animæ ad recipiendam gratiam, & cuiuscunque alterius subiecti, vel materiæ, ad recipiendam formam superioris ordinis, siue secundum substantiam, siue secundum modum, finitam esse simpliciter, & solum per quandam denominationem extrinsecam, vocari posse infinitam secundum quid. Quod sic probatur: subiecto per receptionem formæ superioris non additur nova potentia passiva, sed solum informatio, seu influxio eius, nec per receptionem perfectioris, aut intensioris formæ intenditur eadem potentia, nec additur ei nisi perfectior, seu intensior actuatione eiusdem potentie: ergo ex eo, quod possit recipere intensiorem formam in infinitum, non sequitur, quod potentia sit infinita actu, sed solum, quod perfectius in infinitum actuare possit. Constat verò actuationem semper esse finitam, & actu infinitam esse non posse: ergo nec potentia obedientialis, ex parte actuationis actus, quem recipit, infinita est simpliciter, sed solum dici potest infinita secundum quid, & syncategorematicè, in quantum recepta quacunque intensione formæ, potest maiorem in infinitum recipere; eodem ferè modo, quo diuisio continui infinita vocatur in potentia. Secundò probatur: quia per receptionem perfectioris, aut intensioris actus, non additur subiecto vel materiæ vlla alia potentia obedientialis, neque vllus gradus eius, per quem augeatur: ergo in ratione potentie non fit maior, vel intensior, quare neque in ratione potentie potest esse vllò modo infinita. Antecedens probatur: quia potentia obedientialis est eadem entitas realis cum naturali, & sola ratione formali ab ea distincta per ordinem ad diuersas potentias actiuas, vel diuersa agentia; sed potentia naturalis est eadem entitas materiæ, vel subiecti, eademque eius substantia, quæ per receptionem formæ accidentalis, aut alicuius modi crescere non potest, aut maior fieri: ergo repugnat esse vllò modo infinita in ratione potentie, sed solum ex parte actuationis potest habere aliquam rationem infinitam in potentia, & secundum quid, vt est expositum in prima ratione.

Et ex his patet ad argumenta: nam ad primum distinguendum est antecedens, quod possit recipere formam superioris ordinis, sit aliqua perfectio; est enim eadem ipsa perfectio, quam importat materia vel subiectum in sua entitate cum respectu ad potentiam actiuam superioris agentis, non est tamen perfectio alia superaddita; & cum additur, esse maiorem perfectionem, possit recipere perfectiorem, aut intensiorem formam ab eodem agente, iterum distinguendum est; nam si per maiorem perfectionem intelligatur maior potentia, vel aliquid potentie ei superadditum, negandum est, quia per receptionem actus, vel perfectiores actus, non fit potentia ca-

pacior, nec maior (vt probauimus) sed perfectiùs actuatur, & ideò ex parte actus, vel actionis additur ei nouum aliud magis perfectum : sed hoc semper est finitum, & infinitum esse repugnat. Et propterea neque ex hac parte potentia obedientialis infinita est, nisi in quantum eadem prorsus, ac sine augmento permanens finita potest recipere à superiori agente perfectiorem formam ordinis superioris in infinitum, quod est esse infinitum secundum quid, & quasi in potentia ex parte actus, vel actuationis, sicut diuisio continui.

Ad secundum, concessa maiori de infinito agente, neganda est minor, quòd eadem sit ratio de materia: quia valdè diuersa ratio est vtriusque causæ; nam virtus actiua continet in proprio esse, tanquam actus perfectissimus, formam cum tota eius intensiōe, ac perfectione, & propterea si data quacunque forma intensiore, potest eam plus in infinitum intendere, vel intensiorem aliam in infinitum producere, necesse est totam hanc perfectiōnem infinitam possibilem in proprio esse tanquam actum primum perfectissimum ac modo perfectissimo continere formaliter vel eminenter, & ideò actu. Quod non valet in potentia passiuā, quæ non influit aliter quàm recipiendo. Quare non est opus hanc formam aut perfectionem eius aliter, quàm vt explicatum est, in potentia passiuā contineri: quod solum est materiam posse concurrere passiue ad eductionem earum, sua causalitate passiuā, à qua quodammodo pendet in eodem genere materialis causæ, in esse & fieri. Patet ergo ex hoc modo continendi, & concurrendi, non sequi potentiam obedientialem esse infinitam, nisi secundum quid, modo explicato.

Ad aliud verò, quod tandem additur de correspondentia passiuæ potentie obedientialis cum actiua superioris agentis, concedendum est antecedens, quòd sit reciproca. Sed neganda est consequentia, quòd sicut actiua est infinita simpliciter, ita & passiuā: cuius discriminis ratio ex perfectione potentie actiuæ, & maxima imperfectione passiuæ desumenda est, vt explicuimus.

Potentia ergo actiua actu & simpliciter secundum proprium esse infinita est, passiuā verò nihil actu infinitum habere potest, sed solum in potentia: quia plus potest in infinitum recipere, & semper finitum est, quod actu recipit.

IN SECVNDVM LIBRVM ARISTOTELIS DE CÆLO,

ET MVNDO.

BREVE PROOEMIUM.

Natura, & ratione totius mundi exposita, cuius expositio confusam quandam notitiam partium eius continet, doctrinæ ordo postulabat distinctam singularum partium explicationem, ex qua distincta etiam huius mundi cognitio refultat. At inter omnes mundi partes principem locum obtinere cælestia corpora, in aperto est; quare necesse fuit ea prius, quàm cæteras partes explicare: quorum notitia ex tribus dependet, nimirum ex cognitione totius, quam magna ex parte ex motu eius, atque ex his, quæ motum concernunt, inuestigare voluit Aristoteles: nam res natura constantes per motum cognoscit Philosophus. Deinde ex notitia partium: partes verò cæli præcipuæ stellæ sunt, de quibus propterea disputationem instituit Arist. tria de eis docens: nempe, quæ sit earum natura, quis motus, quæ figura: & tandem cum motus circularis per centrum, circa quod versatur, cognoscendus sit, de terra, quasi de centro, circa quod voluuntur cælestia corpora, differendum fuit: & ecce tibi tripartitam huius secundi libri divisionem.



ARISTOTELIS
STAGIRITÆ, DE CÆLO,
ET MVNDO,

LIBER SECVNDVS.

CAPVT I.

Textus Aristotelis.

Quod igitur neque factum sit vniuersum cælum, &c.

Breuis expositio textus.



IN TENDIT Aristoteles in hoc capite, docere quo modo moueatur cælum, sine vlla scilicet vi in oppositum renitente; & ideo sine vlllo labore sit perpetuus. Diuiditur in tres partes: in prima colligit ex dictis in præcedenti libro vniuersalem conclusionem; in secunda probat motum cæli esse quasi finem omnium motuum sublunarium corporum, & sine vlllo labore, aut difficultate perpetuum; & in tertia parte refert, & reiiicit tres sententias priscorum Philosophorum, circa modum, quo idem motus cælorum fiat:

Principio igitur hanc conclusionem colligit ex præcedenti lib. cælum esse ingenitum, incorruptibile; immortale, ac sempiternum, principij ac finis expers: per quam non tam intendere videtur, quod absque initio durationis sit (vt bene adnotat D. Thom. in Commentariis) sed quod neque per generationem potuerit incipere, neque per corruptionem desinere, vt plures ex antiquioribus opinati sunt, & de sublunaribus corporibus communiter conceditur.

Asserit in secunda parte capitis, motum cæli esse quasi finem cæterorum omnium motuum sublunarium corporum, probatque hoc argumento: Quidquid continet aliud, habet rationem
finis

finis respectu eius : nam contentum ex propria ratione terminatur ad continens , quod est , ordinari ad illud , tanquam ad finem : sed motus circularis cæli continet omnes motus rectos elementorum, ac cæterorum corporum: ergo est finis eorum. Minorem probat , quia perfectum cuiuslibet generis continet imperfecta omnia eiusdem generis: sed omnes motus recti in genere motuum, imperfecti sunt, cum habeant principium, & finem, & propterea perpetuos esse repugnet; solus verò motus circularis (utpote principio, & fine carens) ex propria ratione possit esse perpetuus: ergo verè eos continet, & quasi finis eorum est. Talis autem motus debebatur naturaliter corpori ex propria natura ingenito, atque incorruptibili, contrariòque carenti, & ideò naturaliter perpetuo, quale est cælum, quod ex eadem radice habet, ut idem motus eius contrario careat, & ex consequenti, quod sine ulla violentia fiat : nam violentia ex resistentia contrarij prouenit; ex quo etiam fit , ut moueatur cæleste corpus sine ullo labore, vel fatigatione sui motus.

Ex dictis reiiicit Aristoteles in posteriori parte capitis tres sententias priscorum Philosophorum, quarum prima fuit poetica quædam fictio excogitantium, Atlantem cælum humeris sustentare, ne suo pondere ruat , quam Poëtarum princeps 6. *Æn.* illo carmine tetigit, de Atlante sic loquens;

Axem humero torquet, stellis fulgentibus aptum.

Quamuis alios in alium sensum accepisse eandem Atlantis fictionem, referat Dionysius Siculus, lib. 4, ut existimauerint, Atlantem fuisse Astrologiæ peritissimum, & hac de causa visus sit cælum suis humeris sustinere; sed de hoc , utpote per metaphoram dicto, non est habenda ratio. Illud verò falsum esse ex dictis in 1. lib. constat, ubi probatum est ab Arist. & à nobis confirmatum, quod cælestia corpora gravitate & leuitate, atque etiam omni pondere careant; quare nec fulcimente, nec sustentante indigent. Et eadem fermè ratione probatur falsa sententia Empedoclis, qui cælum naturalem habere gravitatem sentiens, aiebat , tanta celeritate circumuolui, ut ab eadem susteteretur, ne deorsum ruat. Eodem modo , quo hydria aqua plena, dum nimia velocitate in circulo voluitur, aquam, licet grauem, non effundit. Sed præterquam quod falsum ostensum est, cælo tribuere gravitatem, gratis, ac sine pondere rationis, præsupponit positio hæc, solam motus velocitatem potuisse tot seculorum ætatibus tam ingens pondus gravitatis deorsum ruentis vincere. Quod non probat possibile exemplo hydriæ, ut consideranti facile patebit.

Tertia sententia fuit Platonis, qui in *Timæo* docuit, cælestes orbes animatos esse, & propria animarum vi contra inclinationem gravitatis detineri, ne deorsum ruant. Quam ex eo confu-

rat Aristoteles, quia motus cælorum, resistente propria grauitate, maximo cum labore ac defatigatione animarum fieret, quæ ideo non possent esse beatæ, vt cælestes mentes decet, sed miserabiliores cunctis animantibus, in quibus nullum est, quod non interdum somno, aut laborum intermissione quiescat, forètque talis anima cæli Ixioni similis, quem fingunt Poëtæ apud inferos ea pœna cruciari, vt rotam perpetuo cum labore euoluat. Quæ omnia cum absurda fiat, colligit Aristoteles, magis esse rationi naturali consentaneam propriam sententiam, æternitatem cælo, ac motui eius sine violentia tribuentem.

QVÆSTIO I.

An cælestia corpora sint animata.

PRO parte affirmante placet in primis referre id, quod de toto mundo senserunt Philosophi omnes, tam Græci, quàm Egyptij, Platone antiquiores, videlicet, anima præditum esse, & ideo velut magnum quoddam animal esse, & appellari debere. Eius positionis meminit, immò expressè sequurus fuit Plaro in Cratylò Epimeneide: sed quantum ad partes diuerso modo sensisse inueniuntur, ita vt quidam eorum, eadem anima totum & partes constare crediderint. Alij verò singulis corporibus cælestibus animas singulas applicatas esse censebant. Alij vnicuique stellæ propriam atque distinctam. Alij demum ex eis intelligentem diuntaxat animam cælestibus corporibus attribuebant. Alij vegetatricem simul cum ea, dicentes, sydera humoribus ali. Ita Cleanthes teste Ciceron. 1. lib. de Natura Deorum, & Plin. 2. lib. Historiæ, capite 8. tandem Seneca 2. libro naturalium quæstionum, capite 5. cæterique Stoici. Communis autem hæc sententia de anima mundi firmiter adeo horum Philosophorum animis adhæsit, vt Anaxagoram impietatis damnauerint, quod Solem ignitum lapidem, non verò animal, neque Deum esse protulerit, vt Laërtius affirmat in vita eius, & Diuus Aug. 1. 8. de Ciuit. Dei, c. 14. Orbes deinde animatos fecerunt, ex Hebræis Philo Iudæus & Rabbi Moyses: Arabes etiâ multi vt Auicēna, Algacellus, Alpharabius, & Albumasar: ex Astrologis verò Ptolomæus, & complures alij. Quam etiam sententiam approbauit Orig. 7. lib. Periarch. & tom. 1. comment. in Ioann. D. autem Aug. 2. lib. super Genesim ad litteram, hanc eandem quæstionem disputans inter vtramque eius partem hæsisse videtur, in posteriori loco asserens incertum sibi esse, an stellæ ad societatem beatorum pertineant, sed nec illud certum apud se habere, an ad eorundem societatem pertineât Sol, & Luna, cunctaque sydera, quamuis nonnullis (inquit) lucida tantum corpora sine sensu & intelligentia videantur.

Pro confirmatione autem eius non parum videntur facere complura, atque expressa testimonia Aristotelis, præsertim duo illa, quæ habentur 2. libro de Cælo, cap. 13. ubi asserit, cælum esse animatum, & habere in se principium motus, ac positionum differentias viuentium proprias, ut seorsum, deorsum, dextrum, sinistrum, antè, & retrò: lib. etiam Met. 12. c. 7. affirmat, primum mouens orbes cælestes, hoc est, Deum mouere, ut id quod cognoscitur, & appetitur ab eisdem videlicet orbibus motis; censet igitur, eos habere intellectum, & appetitum, quibus eum cognoscant, ac diligant, & ex consequenti intelligentem animam, cuius sunt potentia: & hanc fuisse eius mentem, magno est argumento, quod D. Thom. 2. lib. contra Gentes, cap. 7. id testatur. Deinde sacrarum literarum verba, illa præsertim ex Psal. 135. *Qui fecit calos in intellectu*, id est, intellectu præditos, atque etiam illa ex Ecclesiaste 1. *In circuitu pergit spiritus, & in circulos suos reuertitur*. Quæ non possunt de spiritu solum assistente, ac mouente intelligi, cum non pergat cum cælo ipso moto, atque cum eo circumuoluatur, sed in parte determinata cæli, quam mouet, fixus perscueret: ergo necesse est de spiritu informante loqui, qui est anima. Quem sensum eis tribuit D. Hieronymus in eorum Commentariis, hæc verba scribens: *Sine ipsum Solem spiritum nominauit, quod animet, spirat, & vigeat, & annuos orbis cursus expleat, suo quod Luna lucentem globum, Titaniamque astra spiritus intus alit, totamque infusa per artus mens agitat molem, &c.* Quibus toti mundo, & singulis non solum cælestibus corporibus, sed astris videtur animam concedere. Atque etiam Boëtius 3. lib. de consolatione philosophica, metro 9. inquiens, Deum per animam mundi motus cælestium corporum administrare.

Sed probari etiam potest ratione: primò, quia herbarum plures, atque virgulta generantur, sine semine aliquo, immò & complura animalia (licet imperfecta) ex sola putri materia: sed vtriusque vitæ horum, nempe vegetariæ herbarum, & sensitiuæ animalium, nulla potest assignari efficiens causa, à qua procedat, præter cælestia corpora, à quibus procedere nequit vita (si ea carent) ut per se est manifestum: ergo necesse est eis, vel mundo ipsi vitam concedere, & ex consequenti animam. Secundò, repugnat, totum esse deteriotis conditionis, quàm partes eius: sed constat, plures partes mundi viuere, & diuersis animarum generibus præditas esse; nempe vegetatrice, sensitiua, & rationali: viuunt nanque plântæ, viuunt animalia, viuunt homines: ergo necesse est toti mundo vitæ, animamque concedere, vel deteriore propriis partibus esse.

Vera autem sententia tenet, nec mundum, nec cælestia corpora, habere animam, à qua informantur: quam sequuntur in primis ex sanctis Patribus multi, D. Cyrill. 2. lib. contra Iulianum,

Ambr. 2. lib. Hexameron, cap. 4. Basil. homil. 3. Hexameron, & super Psalmum 48. Lactantius, Hieron. explicans verba illa Deuteronomij 32. *Audite celi, quæ loquor*, & super cap. 1. & 45. Isaïæ, & in Epist. ad Pammachium, & Auitum. August. in lib. de duobus animabus cap. 4. vbi ait, muscam propterea quòd viuit, esse nobiliorem Sole, & lib. 1. Retractationum cap. 7. vbi quæ de mundi animatione in lib. de immortalitate scripserat, temerè scripta fuisse affirmat: lib. etiam 2. Retractationum cap. 7. quæ de cælestium corporum vita asseruerat, per tropum & figuram posse accipi docet, ducta videlicet translatione, à re animata ad inanimatam. Damasc. 2. lib. fidei cap. 6. deinde Scholastici ferè omnes, D. Th. tribus præsertim locis, in quibus hanc eandem quæstionem ex professo discutit, nempe, in quæst. de spiritualibus creaturis, art. 6. & 1. contra Gentes, cap. 73. 1. part. quæst. 70. art. 3. Alensis 2. part. quæst. 87. membr. 3. art. 4. Albert. Magn. tract. de 4. coruis, quæst. 4. art. 25. Bonavent. in 2. dist. 14. quæst. 2. in priori part. dist. Durand. ibid. quæst. 2. dist. 9. quæst. vltima, art. 1. Gabr. dist. 14. quæst. vltima, Okam quæst. 12. Ægid. quæst. 3. Argent. quæst. 1. art. 1. Henric. art. 2. Abulensis in cap. 3. Exod. quæst. 47. Nicolaüs de Lira in cap. 10. Ieremiæ, Eugubinus in Psal. 18, aliique complures, quibus addi potest ex antiquioribus Philosophis Anaxagoras suprà relatus, & omnes interpretes Aristotelis, præsertim recentiores: quare communis est in vtraque Schola Philosophica, ac Theologica.

Et eam tenuisse Aristotelem colligitur planè ex tribus principiis ab eo expressis: primum habetur 12. lib. Metaph. text. 16. vbi hoc discrimen inter causam efficientem, & formalem designat, quòd efficiens præexistit rei factæ, formalis verò præexistere nequit, sed naturaliter simul est cum re facta, vel constituta, sicut sanitas simul esse debet cum sano, & cum corpore animato anima. Cuius euident ratio est, quia illud constituit tanquam forma dans ei esse: & ex alia parte in eodem lib. text. 43. docet intelligentiam mouentem cælum esse eo priorem; ex quibus sequitur non posse apud Aristotelem vniri cælo tanquam formam seu formalem causam, & ex consequenti cælum non esse animatum, ex mente eius. Secundum principium sumitur ex 8. lib. Physicorū, text. 41. quòd motor orbis cælestis vnitur toto orbi per contactum virtutis: sed vnio formæ cum materia, vel animæ cum corpore non est per contactum virtutis, sed per veram informationem, per quam anima tribuit esse corpori: ergo sentit Aristoteles intelligentiam motricem non esse veram formam cæli. Et vrgeri potest ex alio quod docet text. 84. eiusdem libri, videlicet motorem cæli in ea circumferentiæ parte existere, quæ rapidissimo motu circumuoluitur: sed forma vel anima

anima debet esse in toto corpore, & singulis eius partibus; ergo putat Aristoteles non esse intelligentiam veram formam cæli. Et certè si intelligentia simul moueret cælum, & illud informaret, euidenter sequeretur moueri cum illo, vt patet de anima mota cum corpore humano, quod informat. Ex hoc verò sequeretur, in motibus cælorum non esse deueniendum ad motorem immobilem, vt 8. lib. Physic. concludit Aristot. Tertium principium posuit 2. lib. Physicorum, text. 22. asserens eiusdem scientiæ esse, per se considerare materiam, & formam, ex quibus constat compositum: sed constat materiam cælorum per se considerari à Philosophia naturali, quæ tamen non considerat per se intelligentias, quia formæ separabiles à materia, & quæ mouent, & non mouentur, non sunt Physicæ, sed Metaphysicæ considerationis, vt idemmet, atque eodem lib. text. 26. 71. & 73. expressè docet: ergo sentit, eandem intelligentias, quæ immotæ mouent orbis cælestes, non esse formas informantes eorum.

Sed probatur primò ex definitione animæ. Anima est actus corporis physici organici potentia vitam habētis, vt docet Aristoteles 2. lib. de anima cap. 1. text. 7. Ergo omne corpus animatum est organicum: sed in corpore cælesti nulla sunt organa, neque vlla talis varietas partium in eo cernitur, per quas diuersitas vitalium operationum exerceatur, vt actus videndi, audiendi, cum cæteris sensationibus, nisi quis velit Solem, & Lunam pro oculis deferuire cælo, ita vt per hæc astra videre dicatur, quod constat ridiculum esse: ergo euident est, corpus cæleste non esse organicum, nec proinde animatum: quod ex infimis operationibus vitalibus vrgeri potest, nempe augmentatione, & nutritione: neque enim cæleste corpus alimentum sumit aut conuertit in propriam substantiam, cum ex qualitatibus cont rariis constare debeat, & per illas alimentum alterati, atque corrumpi, in eiusque substantiam conuertri. Quibus qualitatibus, & alterationibus incapax est cælum, & longè clarius est, nullum suscipere augmentum, neque decrementum: ergo euident est etiam, non viuere, neque animatum esse.

Secundò, anima non est propter corpus, seu materiam, cuius gratia facta est, sed ex opposito materia vel corpus propter animam, vt docuit expressè Aristot. 2. lib. de anima, text. 16. & 17. cum hæc sit longè nobilior, & proinde gratia sui facta. Vnitur ergo corpori, vt bonum aliquod sibi ex tali vnione consequatur, videlicet exercitium suarum operationum, in quo perfectio eius posita est: sed nullam operationem vitalem exercere potest anima per corpus cæleste: ergo neque aptum est, vt ei vnatur. Minor probata est de operationibus vegetatiuis, quia nec cælum simile sibi generare potest, nec nutrir, vel augeri, vt docuit Arist. 1. lib.

de cælo, capit. 3. Probata est etiam de sensitiuis, & rursus convincitur ex eo, quod operationes sensitiuæ ex propria conditione præsupponunt vegetatiuas, per quas nutriuntur, & conseruantur organa sensuum, & omnes sensus fundantur in tactu, vt docuit, & probauit Arist. 3. l. de anima cap. 12. Tactus verò necessariò petit temperamentum primarum qualitatum in proprio organo, quarum non est capax corpus cæleste: nec vnitur anima corpori cælesti propter operationem intellectuam, quia hanc naturaliter non potest exercere in corpore, nisi ministerio sensuum species à rebus sibi desumat, vt patet de anima nostra rationali. Cum ergo non sit cælum sensuum capax, nec erit capax animæ rationalis. Quod vrgeri potest ex his, quæ à nobis constituta, & ostensa sunt 2. lib. de anima: videlicet implicare contradictionem, quod anima rationalis posset esse forma corporis, nisi simul foret sensitiua, gradumque sentiendi tribueret eidem corpori: ergo repugnat per locum ab intrinseco, cælum informari anima rationali, quin talis anima simul sit sensitiua. Cum ergo cælum sit incapax sensitiuæ, vt probatum est, sequitur incapax quoque esse animæ rationalis. Neque tandem vnitur cælo anima propter motum localem, quo mouetur, quia talis motus nec indiget anima; sed ab extrinseco motore procedere potest, per solum contactum virtutis, vel impressionem impulsus, vt de quocunque alio motu circulari constat: nec vitalis est, sicut progressius animalium, quem constat fieri mediis sensibus, & appetitu, quibus caret cæleste corpus. Ex quibus efficaciter probatum constat, non dari animam mundi, à qua totus ipse mundus informetur, quia Deus non potest esse talis anima eum informans, vt Philosophi quidam delirantes dicebant: nā intrinseca ratio formæ dicit imperfectionem partitis, & informationis, seu inhaesionis in corpore, à qua Deus ob suam infinitam perfectionem alienus est: sed nec intelligentia, vel intellectualis forma, ob suam limitatam virtutem, potest corpus tantæ molis ac est cæleste corpus, informare, quanto minus tam vastum. & tot, ac tam ingentibus, ac discontinuis partibus constantem mundum? quare ingens etiam delirium est, mundo, vel cælestibus corporibus animam rationalem concedere: nam inde virtutes, merita, peccata, & peccatorum pœnas eisdem corporibus deberent adscribere, quod planè falsum est: intelligentia igitur mouens cælum non potest esse vera forma illius, tribuens cælo proprium esse per informationem: nec est pars substantialis ipsum componens cum materia, sed completa, & totalis substantia omnino distincta ab eo: dicitur tamen laxè forma cæli assistens, quia ei vnitur, in ordine ad motum, & constituit cum eo vnum principium eiusdem motus, aut medio impulsu, vt voluit plures, vel sine illo, vt placet aliis.

Et

Et prior sententia concedens cælo, vel mundo animam, & animatum esse docens, vt vera sit, nec de vera anima, nec per veram informationem loquitur, nec ideo verè, & propriè animatum esse censet, sed per quandam similitudinem, & ideo in propria, & quasi æquiuoca locutione, quo pacto loquuti sunt absque dubio omnes ferè sancti Patres pro ea citati. Posterior verò sententia, animatum esse negans, de vera, ac propria anima veràque animatione per informationem intelligit: quare dissidium inter vtramque in solo modo loquendi diuerso magna ex parte consistere videtur, vt D. Thom. 1. part. quæst. 70. art. 3. in fine corporis his verbis docet: *Vnde interponentes ea esse animata, & ponentes ea inanimata, parua vel nulla differentia inuenitur in re, sed in uoce tantum.* Sed magna ex parte conciliari posse præfatas sententias dicimus, & non omninò, quia licèt, quod ad sanctos Patres attinet, de anima solùm assistente intelligantur eorum verba: nonnulli tamen antiquiores Philosophi, veram animam informantem vegetatiuam & sensitiuam eis concesserunt, quorum sententiam falsam esse probauimus.

Sed superest explicandum, an notam aliquam vel censuram mereatur sententia affirmans, cælum, vel mundum esse animatum anima informante. Et D. Thom. 2. lib. contra gentes cap. 70. in fine expressè negat, aliquid fidei contrarium continere, hisce verbis: *Hoc autem, quod dictum est de animatione calì, non diximus quasi asserendo secundum fidei doctrinam, ad quam nihil pertinet, siue sic, siue aliter dicatur.* Quod confirmat ex Diuo Augustinò lib. 3. Enchiridion, cap. 5. vbi fatetur, non esse certum, an sit, vel non sit animatum cælum. Caietanus etiam 1. part. quæst. 3. art. 1. asserit corpus cæleste fortè secundum veritatem esse animatum; & Petrus Martinez cap. præsentis, non solùm vtramque partem quæstionis problematicè defendit, sed in affirmantem, quòd cælum sit animatum, magis propendet.

Sed ex alia parte à multis iudicatur erronea, vel saltem parum fidei consona. Et in primis D. Hieron. in Epistola ad Pammachium, & Auitum inter propositiones alias Origenis, quas sancta Synodus generalis sub anathemate explosit, hanc enumerauit, quòd cælos, Lunam, Solem, astra animata dicat, D. etiam Epiphanius lib. 1. Panarij, & D. Irenæus lib. 1. contra hæreses eandem referunt inter Marciorum dogmata: & in Concilio Constantino-politano, quod est quintum generale, sub anathemate damnatur hisce verbis, relatis à Iouerio in summa Conciliorum, tom. 2. *Si quis dixerit, calum, solem, & lunam, stellas, & aquas, quæ supra cælos sunt, animantes quasdam esse, & materiales virtutes, anathema sit.* Ac eadè damnata dicitur in quodam art. Parisiensis Facultatis. Propterea non bene de illa sentiunt, ex Scholasticis nonnulli in
2. dist.

2. dist. 14. vt Bonauentura, & Gabr. quaest. vnica, & Capreolus dist. 9. quaest. vnica, art. 1.

Nostra tamen sententia hac distinctione explicanda est: ponere cælos animatos anima vegetatiua, vel sensitiua tantum, solum est error philosophicus; illos autem ponere animatos anima rationali, non solum est error philosophicus, sed etiam error contrarius diuinæ fidei. Priorem partem sic probō: quia ex hoc, quod tribuatur eis anima sensitiua, aut vegetatiua, solum deduci potest quod sint animalia quædam rationis expertia, vel vitam quandam vegetatricē participant; ex quo utroque nihil potest contra fidem deduci, quia neque in Scriptura, neque in aliis principiis fidei denegatur eis talis vita; sed neque aliquid asseritur, ex quo eis esse denegandum colligi possit. Cuius ratio à priori assignari potest, quia hæc non pertinent ullo modo ad materiam fidei, sed prorsus philosophica sunt: ergo circa ea non potest error contra fidem proferri, sed ad summum contra principia Philosophiæ. Quod verò error sit eis contrarius, efficaciter probari potest à posteriori ex operationibus, ac vnitionibus vtriusque vitæ propriis, quas si haberent, repugnaret à nobis non percipi, quemadmodum percipiuntur vitales operationes animalium, atque plantarum. Quamuis enim magis distent à nobis, eorum tamen ingens magnitudine distantia compensaretur, & ita posset à nobis eorum augmentum percipi, & euidenti ratione constaret, nullum extare alimentum, ex quo ali, aut nutriri possint, nec ullis veris organis prædita esse, per quæ possint operationes aliquot sensitiuæ animæ exercere: & plura possent alia in confirmationem huius asserti afferri, quæ breuitatis gratia prætermittenda censemus.

Assertum verò posterius efficaciter posset probari ex verbis S. Synodi generalis suprâ relatis, si certò constaret, talem definitionem fuisse ab eo Concilio editam, nihilominus hoc discursu potest ostendi: quia cælestia corpora essent substantialiter composita ex corpore, & anima rationali, eo ipso, quod dicerentur verè animata anima rationali, & vita rationali prædita: sed non est excogitabile compositum substantiale ex anima rationali, & corpore tanquam ex vera forma, & materia, quod non sit homo, cum hæc sit essentialis compositio hominis. Et tamen certum est ex sacra pagina, nullum dari hominem, qui non sit propagatus ex primo, nempe, ex Adamo in principio temporis cum toto mundo condito, & cum cæteris omnibus à Christo redempto. Constat etiam ex principio Genesis, cælestia corpora tanquam quid diuersum ab homine, esse creata, nec ab eodem homine processisse; ergo euidenter deducitur ex fide, non habere animam rationalem pro vera forma, nec proinde animata esse tali anima, aut vita rationali prædita: solum posset responderi, constare quidem animam

anima rationali diuersæ speciei ab ea, quæ constituit hominem, & ideo licet sint animata anima rationali, non esse homines, sed rationalia quædam composita diuersæ speciei. Cæterum solutio hæc facile confutari potest: primò, quia non est intelligibilis anima rationalis, quæ non sit forma, & pars, cum sit ei intrinsicum, esse incompletam substantiam; nec est intelligibile, quòd sit pars, & vera forma, verusque actus, quin sit vnibilis alteri parti, aut potentia, vel materia, aut corpori: nec est excogitabile, quòd sit vnibilis corpori, nisi vt secundum esse proprium propriamque operationem ab eo emanantem perficiatur (nam propter bonum corporis longè inferius, ac imperfectius vniri repugnat) sed propria eius operatio est, intelligere: ergo vt hanc assequatur, tanquam pars informando corpus vnitur ei: sed intelligere mediò corpore non est aliud, quàm intelligere per sensus: ergo necesse est, quamlibet aliam excogitabilem animam habere eundem modum operandi cum nostra, & per locum ab intrinseco eundem modum essendi, esseque eiusdem speciei. Et si dicatur intra ambitum modi operandi, sine dependentia à sensibus, ac sine discursu dari intellectiões diuersæ speciei in Angelis, & proinde substantias specie diuersas, quæ sint principia earum, ac proinde non esse impossibile, dari intellectiões specie diuersas, intra ambitum modi operandi cum dependentia à sensibus, aut cum discursu, & ex consequenti animas rationales diuersæ speciei. Respondeo, quòd licet hoc foret possibile (quod non credo) quia impossibile reputo, dari intellectiões diuersi modi specifici, sub modo operandi cum discursu vel cum dependentia à sensu, cum sit imperfectissimus, atque infimus: quare non est excogitabile sub eo vnde, vel à quo sumi possit talis differentia specifica, sicut intra modum longè perfectiorem operandi sine discursu, propter maiorem extensionem ex maiori perfectione desumptam, & maiorem limitationem infimi gradus operandi cum discursu, adhuc foret euidenter omnes esse homines propter convenientiam genericam in natura rationali, sicut est euidenter, hominem, & leonem, etiamsi specie distinguantur, esse animalia propter convenientiam genericam in natura sensitua: quare apertè falsum esset ponere ex vna parte corpora cælestia esse animata anima rationali, & ex alia non esse homines. Et cum manifestè deducatur ex fide, homines non esse, error est fidei contrarius, ponere ea animata anima rationali, non est tamen hæresis, quia non est per se immediatè contra fidem. Quòd verò error sit etiam philosophicus, manifestum est, quia repugnat esse substantias cum discursu, ac dependentia à corpore sine sensibus: non est enim excogitabilis alius modus intelligendi cum dependentia à corpore, nisi accipiendo species à rebus corporeis; nec est intelligibilis alius modus

modus accipiendi species à rebus corporeis, nisi eas sentiendò, vt ita mediis sensationibus imprimantur intellectui ab eis species propriæ, per quas ab eo cognoscantur. Et iuxta nostrâ duplicem cõclusionẽ intelligitur, & in concordiam reuocatur quæ relata sententiæ, ita vt prior in sensu prioris nostræ assertionis, posterior in sensu posterioris accipiatur, & sic vtraque vera sit.

Superfunt argumenta prioris sententiæ in principio facta diluenda; & in primis testimonia Aristotelis iuxta legitimum sensum eius explicanda sunt distinctione illa allata à Diuo Thom. 1. parte, quæst. 70. art. 3. ad 5. corpus enim cæleste secundum se, hoc est, non considerata intelligentia ei vnita, vt principio motus, non dicitur se mouere, sicut mouentur viuentia, nec habere in se principium actiuum sui motus, sed passiuum tantum; si tamen accipiatur cælum simul cum intelligentia per contactum virtutis ei vnita, vt principio actiuo motus eius, ita vt ex vtroque constituatur vnum aliquod à se ipso motum, tanquam à principio actiuo efficiente, viuens appellari potest, quasi per analogiam, & similitudinem ad viuentia, & eadem ratione habere differentias positionum, quo pacto viuens ipsum vocauit, easque illi concessit Arist. cap. sequenti, non tamen verum, & proprium viuens per veram, ac informantem animam. Et in eodem sensu docuit 12. lib. Metaphysicæ, c. 7. moueri cælestia corpora à primo motore, tanquam ab eo, quod cognoscunt, & appetunt: nam licet intelligentia mouens cælum non moueatur à Deo eodem motu, cum immota in hoc sensu moueat ipsum. Dicitur tamen Deus totum ex cælo, atque intelligentia constitutum mouere, in quantum præstat suum concursum, vt moueri valeat cælum ab intelligentia, atque etiam intelligentia mouere ipsum, ratione cuius (hoc est) vt eam includentis moueri dicitur à se per quandam analogiam, & similitudinem ad viuentia corpora, in quo sensu intelligi debent Scripturæ, & Patrum loca.

Ad primam rationem Diuus Thom. in eodem art. ad 3. respondet, viuentia illa produci à corpore cælesti non virtute propria, sed virtute intelligentiæ à qua mouetur, ita vt tanquam instrumentum eius tales effectus se superiores possit attingere; sed difficile est, hos effectus Angelo mouenti, tanquam præcipuæ causæ per se tribuere etiam in doctrina Diui Thomæ qui (vt inferius ostendetur) sentit planè, Angelos non posse vllam formam adhuc accidentalem per propriam virtutem per se influentem imprimere materiæ, aut corporibus; sed solum hæc posse, tanquam applicando actiua passiuis; quod solum est, esse conditiones, vel ad summum, causas per accidens: ergo longè minùs poterunt substantiam viuentem, vt causam per se producere. Propterea dicendum est, corpus cæleste nõ nudũ, sed cū suo motũ ab intelligentia effectiuè

effectiue ducto, & proinde simul cum eadem intelligentia acceptum esse instrumentum Dei ab eo eleuatum, ad producendam substantiam viuentem, & hoc sensu loquitur Dñus Thom. Itaque ex corpore cælesti moto ab intelligentia, atque ex intelligentia ipsa mouente, resultat vnicum, atque completum instrumentum, quod à Deo eleuatur, vt possit attingere productionem harum substantiarum, quia non potest excogitari vlla alia causa principalis, & proxima per se influens, per seque eas producens præter Deum tali instrumento videntem.

Ad secundum, concessa maiori, ac minori, neganda est consequutio: satis enim vniuersum vitam, & animam suarum partium includere, vt nulla eius pars, quantumlibet perfecta, sit eo perfectior, cum omnem eius perfectionem, simul cum perfectione aliarum partium includat, vt pote totum quoddam quasi artificiale ex omnibus gradibus effendi ordine quodam conflatum.

QVÆSTIO II.

*An cælestia corpora dignitate præstent cunctis rebus
sublunaribus.*

Quæstio procedit de cælo, non vt claudit intelligentiam, sed secundum se, anima etiam assistente destituto: & sic certum est, aliis corporibus sublunaribus vitæ experibus perfectione præstare, vt pote simplicius, & incorruptibile: & minùs perfectum esse simpliciter hominibus: cuius ratio est, quia species humana constituitur per animam rationalem, spiritualem quidem, independentem à corpore in suo esse, intelligentem, ac volentem, & ideò gratiæ, virtutum, ac beatitudinis capacem; quibus omnibus perfectionibus caret forma cælestis, & cælum per eam constitutum; ergo longè est eo perfectior homo: solùm ergo controuersia procedit de animalibus, & plantis, an perfectione superentur à corporibus cælestibus, vel digniora eis sint.

Et prior sententia affirmat, digniora esse cælestia corpora cunctis animantibus homine inferioribus, quam sequitur Marsil. 1. quæst. 1. art. 2. quæst. 6. & 7. & eandem tenere videntur Zumel. 1. part. quæst. 3. art. 1. & Pater Pererius lib. 2. suæ Philosophiæ cap. 6. probabiliorémque esse docet Bannez 1. part. quæst. 3. art. 1. & eam tenuisse Victoriæ & Canum aliósque discipulos Diui Thomæ doctissimos, quam hac tempestate sequuntur recentiores quidam cum limitatione ad sola animalia imperfecta, quæ non ex semine, sed ex putri materia generantur, atque etiam ad plantas. Alij verò ad solas plantas limitanda censent. Probatum testimonio Aristotelis, qui 6. lib. Ethicorum cap. 7. non solùm animalibus

rat Aristoteles, quia motus cælorum, resistente propria grauitate, maximo cum labore ac defatigatione animarum fieret, quæ ideo non possent esse beatæ, vt cælestes mentes decet, sed miserabiliores cunctis animantibus, in quibus nullum est, quod non interdum somno, aut laborum intermissione quiescat, foretque talis anima cæli Ixioni similis, quem fingunt Poëtæ apud inferos ea pœna cruciari, vt rotam perpetuo cum labore euoluat. Quæ omnia cum absurda fiat, colligit Aristoteles, magis esse rationi naturali consentaneam propriam sententiam, æternitatem cælo, ac motui eius sine violentia tribuentem.

QVÆSTIO I.

An cælestia corpora sint animata.

PRO parte affirmante placet in primis referre id, quod de toto mundo senserunt Philosophi omnes, tam Græci, quam Ægyptij, Platone antiquiores, videlicet, anima præditum esse, & ideo velut magnum quoddam animal esse, & appellari debere. Eius positionis meminit, immò expressè sequutus fuit Plato in Cratylō Epimēuide: sed quantum ad partes diuerso modo sensisse inueniuntur, ita vt quidam eorum, eadem anima totum & partes constare crediderint. Alij verò singulis corporibus cælestibus animas singulas applicatas esse censebant. Alij vnicuique stellæ propriam atque distinctam. Alij demum ex eis intelligentem suntaxat animam cælestibus corporibus attribuebant. Alij vegetatricem simul cum ea, dicentes, sydera humoribus ali. Ita Cleanthes teste Ciceron. 2. lib. de Natura Deorum, & Plin. 2. lib. Historiæ, capite 8. tandem Seneca 2. libro naturalium quæstionum, capite 5. cæterisque Stoici. Communis autem hæc sententia de anima mundi firmiter adeo horum Philosophorum animis adhæsit, vt Anaxagoram impietatis damnauerint, quod Solem ignitum lapidem, non verò animal, neque Deum esse protulerit, vt Laërtius affirmat in vita eius, & Diuus Aug. 1. & 8. de Ciuit. Dei, c. 14. Orbes deinde animatos fecerunt, ex Hebræis Philo Iudæus & Rabbi Moyse: Arabes etiam multi vt Auicēna, Algacellus, Alpharabius, & Albumasar: ex Astrologis verò Ptolomæus, & complures alij. Quam etiam sententiam approbavit Orig. 7. lib. Periarch. & tom. 1. comment. in Ioann. D. autem Aug. 2. lib. super Genesim ad litteram, hanc eandem quæstionem disputans inter vtramque eius partem hæsisse videtur, in posteriori loco asserens incertum sibi esse, an stellæ ad societatem beatorum pertineant, sed nec illud certum apud se habere, an ad eorundem societatem pertineant Sol, & Luna, cunctaque sydera, quamuis nonnullis (inquit) lucida tantum corpora sine sensu & intelligentia videantur.

Pro

Pro confirmatione autem eius non parum videntur facere complura, atque expressa testimonia Aristotelis, præsertim duo illa, quæ habentur 2. libro de Cælo, cap. 13. ubi asserit, cælum esse animatum, & habere in se principium motus, ac positionum differentias viuentium proprias, ut seorsum, deorsum, dextrum, sinistrum, antè, & retrò: lib. etiam Met. 12. c. 7. affirmat, primum mouens orbis cælestes, hoc est, Deum mouere, ut id quod cognoscitur, & appetitur ab eisdem videlicet orbibus motis; censet igitur, eos habere intellectum, & appetitum, quibus eum cognoscant, ac diligant, & ex consequenti intelligentem animam, cuius sunt potentia: & hanc fuisse eius mentem, magno est argumento, quod D. Thom. 2. lib. contra Gentes, cap. 7. id testatur. Deinde sacrarum literarum verba, illa præsertim ex Psal. 135. *Qui fecit calos in intellectu*, id est, intellectu præditos, atque etiam illa ex Ecclesiaste 1. *In circuitu pergit spiritus, & in circulos suos reuertitur*. Quæ non possunt de spiritu solum assistente, ac mouente intelligi, cum non pergat cum cælo ipso moto, atque cum eo circumuoluatur, sed in parte determinata cæli, quam mouet, fixus perseueret: ergo necesse est de spiritu informante loqui, qui est anima. Quem sensum eis tribuit D. Hieronymus in eorum Commentariis, hæc verba scribens: *sive ipsum Solem spiritum nominauit, quod animet, spiritus, & vigeat, & annuos orbis cursus expleat, sive quod Luna lucem globum, Titaniamque astra spiritus intus alit, totamque infusa per artus mens agitat molem, &c.* Quibus toti mundo, & singulis non solum cælestibus corporibus, sed astris videtur animam concedere. Atque etiam Boëtius 3. lib. de consolatione philosophica, metro 9. inquit, Deum per animam mundi motus cælestium corporum administrare.

Sed probari etiam potest ratione: primò, quia herbarum plures, atque virgulta generantur, sine semine aliquo, immò & complura animalia (licet imperfecta) ex sola putri materia: sed vtriusque vitæ horum, nempe vegetatiuæ herbarum, & sensitiuæ animalium, nulla potest assignari efficiens causa, à qua procedat, præter cælestia corpora, à quibus procedere nequit vita (si ea carent) ut per se est manifestum: ergo necesse est eis, vel mundo ipsi vitam concedere, & ex consequenti animam. Secundò, repugnat, totum esse deterioris conditionis, quàm partes eius: sed constat, plures partes mundi viuere, & diuersis animarum generibus præditas esse; nempe vegetatrice, sensitiua, & rationali: viuunt nanque plântæ, viuunt animalia, viuunt homines: ergo necesse est toti mundo vitæ, animamque concedere, vel deteriore propriis partibus esse.

Vera autem sententia tenet, nec mundum, nec cælestia corpora, habere animam, à qua informantur: quam sequuntur in primis ex sanctis Patribus multi, D. Cyrill. 2. lib. contra Iulianum,

Ambr. 2. lib. Hexameron, cap. 4. Basil. homil. 3. Hexameron, & super Psalmum 48. Lactantius, Hieron. explicans verba illa Deuteronomij 32. *Audite cali, quæ loquor*, & super cap. 1. & 45. Isaia, & in Epist. ad Pammachium, & Auitum. August. in lib. de duobus animabus cap. 4. vbi ait, muscam propterea quod viuit, esse nobiliorem Sole, & lib. 1. Retractationum cap. 7. vbi quæ de mundi animatione in lib. de immortalitate scripserat, temerè scripta fuisse affirmat: lib. etiam 2. Retractationum cap. 7. quæ de cælestium corporum vita asseruerat, per tropum & figuram posse accipi docet, ducta videlicet translatione, à re animata ad inanimatam. Damasc. 2. lib. fidei cap. 6. deinde Scholastici ferè omnes, D. Th. tribus præsertim locis, in quibus hanc eandem quæstionem ex professio discutit, nempe, in quæst. de spiritualibus creaturis, art. 6. & 1. contra Gentes, cap. 73. 1. part. quæst. 70. art. 3. Alensis 2. part. quæst. 87. membr. 3. art. 4. Albert. Magn. tract. de 4. coëuis, quæst. 4. art. 25. Bonauent. in 2. dist. 14. quæst. 2. in priori part. dist. Durand. ibid. quæst. 2. dist. 9. quæst. vltima, art. 1. Gabr. dist. 14. quæst. vltima, Okam quæst. 1. 2. Ægid. quæst. 3. Argent. quæst. 1. art. 1. Henric. art. 2. Abulensis in cap. 3. Exod. quæst. 47. Nicolaüs de Lira in cap. 10. Ieremias, Eugubinus in Psal. 18, alique complures, quibus addi potest ex antiquioribus Philosophis Anaxagoras suprà relatus, & omnes interpretes Aristotelis, præsertim recentiores: quare communis est in vtraque Schola Philosophica, ac Theologica.

Et eam tenuisse Aristotelem colligitur planè ex tribus principiis ab eo expressis: primum habetur 12. lib. Metaph. text. 16. vbi hoc discrimen inter causam efficientem, & formalem designat, quod efficiens præexistit rei factæ, formalis verò præexistere nequit, sed naturaliter simul est cum re facta, vel constituta, sicut sanitas simul esse debet cum sano, & cum corpore animato anima. Cuius euidens ratio est, quia illud constituit tanquam forma dans ei esse: & ex alia parte in eodem lib. text. 43. docet intelligentiam mouentem cælum esse eo priorem; ex quibus sequitur non posse apud Aristotelem vniri cælo tanquam formam seu formalem causam, & ex consequenti cælum non esse animatum, ex mente eius. Secundum principium sumitur ex 8. lib. Physicorū, text. 41. quod motor orbis cælestis vnitur toto orbi per contactum virtutis: sed vnio formæ cum materia, vel animæ cum corpore non est per contactum virtutis, sed per veram informationem, per quam anima tribuit esse corpori: ergo sentit Aristoteles intelligentiam motricem non esse veram formam cæli. Et vrgeri potest ex alio quod docet text. 84. eiusdem libri, videlicet motorem cæli in ea circumferentiæ parte existere, quæ rapidissimo motu circumuoluitur: sed forma vel anima

anima debet esse in toto corpore, & singulis eius partibus; ergo putat Aristoteles non esse intelligentiam veram formam cæli. Et certè si intelligentia simul moueret cælum, & illud informaret, euidenter sequeretur moueri cum illo, vt patet de anima mota cum corpore humano, quod informat. Ex hoc verò sequeretur, in motibus cælorum non esse deueniendum ad motorem immobilem, vt 8. lib. Physicæ. concludit Aristot. Tertium principium posuit 2. lib. Physicorum, text. 22. asserens eiusdem scientiæ esse, per se considerare materiam, & formam, ex quibus constat compositum: sed constat materiam cælorum per se considerari à Philosophia naturali, quæ tamen non considerat per se intelligentias, quia formæ separabiles à materia, & quæ mouent, & non mouentur, non sunt Physicæ, sed Metaphysicæ considerationis, vt idemmet, atque eodem lib. text. 26. 71. & 73. expressè docet: ergo sentit, easdem intelligentias, quæ immotæ mouent orbcs cælestes, non esse formas informantes eorum.

Sed probatur primò ex definitione animæ. Anima est actus corporis physici organici potentia vitam habētis, vt docet Aristoteles 2. lib. de anima cap. 1. text. 7. Ergo omne corpus animatum est organicum: sed in corpore cælesti nulla sunt organa, neque vlla talis varietas partium in eo cernitur, per quas diuersitas vitalium operationum exerceatur, vt actus videndi, audiendi, cum cæteris sensationibus, nisi quis velit Solem, & Lunam pro oculis deferuire cælo, ita vt per hæc astra videre dicatur, quod constat ridiculum esse: ergo euident est, corpus cæleste non esse organicum, nec proinde animatum: quod ex infimis operationibus vitalibus vrgeri potest, nempe augmentatione, & nutritione: neque enim cæleste corpus alimentum sumit aut conuertit in propriam substantiam, cum ex qualitatibus contrariis constare debeat, & per illas alimentum alterari, atque corrumpi, in eiusque substantiam conuertri. Quibus qualitatibus, & alterationibus incapax est cælum, & longè clarius est, nullum suscipere augmentum, neque decrementum: ergo euident est etiam, non viuere, neque animatum esse.

Secundò, anima non est propter corpus, seu materiam, cuius gratia facta est, sed ex opposito materia vel corpus propter animam, vt docuit expressè Aristot. 2. lib. de anima, text. 16. & 17. cum hæc sit longè nobilior, & proinde gratia sui facta. Vnitur ergo corpori, vt bonum aliquod sibi ex tali vnione consequatur, videlicet exercitium suarum operationum, in quo perfectio eius posita est: sed nullam operationem vitalem exercere potest anima per corpus cæleste: ergo neque aptum est, vt ei vniantur. Minor probata est de operationibus vegetatiuis, quia nec cælum simile sibi generare potest, nec nutrire, vel augere, vt docuit Arist. 1. lib.

de cælo, capit. 3. Probata est etiam de sensitiuis, & rursus convincitur ex eo, quod operationes sensitiuæ ex propria conditione præsupponunt vegetatiuas, per quas nutriuntur, & conseruantur organa sensuum, & omnes sensus fundantur in tactu, vt docuit, & probauit Arist. 3. l. de anima cap. 12. Tactus verò necessàriò petit temperamentum primarum qualitatum in proprio organo, quarum non est capax corpus cæleste: nec vnitur anima corpori cælesti propter operationem intellectuam, quia hanc naturaliter non potest exercere in corpore, nisi ministerio sensuum species à rebus sibi desumat, vt patet de anima nostra rationali. Cum ergo non sit cælum sensuum capax, nec erit capax animæ rationalis. Quod vgeri potest ex his, quæ à nobis constituta, & ostensa sunt 2. lib. de anima: videlicet implicare contradictionem, quod anima rationalis posset esse forma corporis, nisi simul foret sensitiua, gradumque sentiendi tribueret eidem corpori: ergo repugnat per locum ab intrinseco, cælum informari anima rationali, quin talis anima simul sit sensitiua. Cùm ergo cælum sit incapax sensitiuæ, vt probatum est, sequitur incapax quoque esse animæ rationalis. Neque tandem vnitur cælo anima propter motum localem, quo mouetur, quia talis motus nec indiget anima; sed ab extrinseco motore procedere potest, per solum contactum virtutis, vel impressionem impulsus, vt de quocunque alio motu circulari constat: nec vitalis est, sicut progressiuus animalium, quem constat fieri mediis sensibus, & appetitu, quibus caret cæleste corpus. Ex quibus efficaciter probatum constat, non dari animam mundi, à qua totus ipse mundus informetur, quia Deus non potest esse talis anima eum informans, vt Philosophi quidam delirantes dicebant: nā intrinseca ratio formæ dicit imperfectionem partis, & informationis, seu inhaesionis in corpore, à qua Deus ob suam infinitam perfectionem alienus est: sed nec intelligentia, vel intellectualis forma, ob suam limitatam virtutem, potest corpus tante molis ac est cæleste corpus, informare, quanto minus tam vastum, & tot, ac tam ingentibus, ac discontinuis partibus constantem mundum? quare ingens etiam delirium est, mundo, vel cælestibus corporibus animam rationalem concedere: nam inde virtutes, merita, peccata, & peccatorum pœnas eisdem corporibus deberent adscribere, quod planè falsum est: intelligentia igitur mouens cælum non potest esse vera forma illius, tribuens cælo proprium esse per informationem; nec est pars substantialis ipsum componens cum materia, sed completa, & totalis substantia omnino distincta ab eo: dicitur tamen laxè forma cæli assistens, quia ei vnitur, in ordine ad motum, & constituit cum eo vnum principium eiusdem motus, aut medio impulsu, vt volunt plures, vel sine illo, vt placet aliis.

Et

Et prior sententia concedens cælo, vel mundo animam, & animatum esse docens, vt vera sit, nec de vera anima, nec per veram informationem loquitur, nec ideo verè, & propriè animatum esse censet, sed per quandam similitudinem, & ideo in propria, & quasi æquiuoca locutione, quo pacto loquuti sunt absque dubio omnes ferè sancti Patres pro ea citati. Posterior verò sententia, animatum esse negans, de vera, ac propria anima veràque animatione per informationem intelligit: quare dissidium inter vtramque in solo modo loquendi diuerso magna ex parte consistere videtur, vt D. Thom. 1. part. quæst. 70. art. 3. in fine corporis his verbis docet: *Vnde interponentes ea esse animata, & ponentes ea inanimata, parua vel nulla differentia inuenitur in re, sed in uoce tantum.* Sed magna ex parte conciliari posse præfatas sententias dicimus, & non omninò, quia licèt, quod ad sanctos Patres attinet, de anima solùm assistente intelligantur eorum verba: nonnulli tamen antiquiores Philosophi, veram animam informantem vegetatiuam & sensitiuam eis concesserunt, quorum sententiam falsam esse probauimus.

Sed supcrest explicandum, an notam aliquam vel censuram increatur sententia affirmans, cælum, vel mundum esse animatum anima informante. Et D. Thom. 2. lib. contra gentes cap. 70. in fine expressè negat, aliquid fidei contrarium continere, hisce verbis: *Hoc autem, quod dictum est de animatione cali, non diximus quasi asserendo secundum fidei doctrinam, ad quam nihil pertinet, siue sic, siue aliter dicatur.* Quod confirmat ex Diuo Augustinò lib. 3. Enchiridion, cap. 5. vbi fatetur, non esse certum, an sit, vel non sit animatum cælum. Caietanus etiam 1. part. quæst. 3. art. 1. asserit corpus cæleste fortè secundum veritatem esse animatum; & Petrus Martinez cap. præsentis, non solùm vtramque partem quæstionis problematicè defendit, sed in affirmantem, quòd cælum sit animatum, magis propendit.

Sed ex alia parte à multis iudicatur erronea, vel saltem parum fidei consona. Et in primis D. Hieron. in Epistola ad Pammachium, & Auitum inter propositiones alias Origenis, quas sancta Synodus generalis sub anathemate explosit, hanc enumerauit, quòd cælos, Lunam, Solem, astra animata dicat, D. etiam Epiphanius lib. 1. Panarij, & D. Irenæus lib. 1. contra hæreses eandem referunt inter Marciorum dogmata: & in Concilio Constantinopolitano, quod est quintum generale, sub anathemate damnatur hisce verbis, relatis à Iouerio in summa Conciliorum, tom. 2. *Si quis dixeris, calum, solem, & lunam, stellas, & aquas, que supra caelos sunt, animantes quasdam esse, & materiales virtutes, anathema sis.* Ac eadè damnata dicitur in quodam art. Parisiensis Facultatis. Propterea non bene de illa sentiunt, ex Scholasticis nonnulli in
2. dist.

2. dist. 14. vt Bonauentura, & Gabr. quaest. vnica, & Capreolus dist. 9. quaest. vnica, art. 1.

Nostra tamen sententia hac distinctione explicanda est: ponere caelos animatos anima vegetatiua, vel sensitiua tantum, solum est error philosophicus; illos autem ponere animatos anima rationali, non solum est error philosophicus, sed etiam error contrarius diuinæ fidei. Priorem partem sic probō: quia ex hoc, quod tribuatur eis anima sensitiua, aut vegetatiua, solum deduci potest quod sint animalia quædam rationis expertia, vel vitam quandam vegetatricē participant; ex quo utroque nihil potest contra fidem deduci, quia neque in Scriptura, neque in aliis principiis fidei denegatur eis talis vita; sed neque aliquid asseritur, ex quo eis esse denegandam colligi possit. Cuius ratio à priori assignari potest, quia hæc non pertinent illo modo ad materiam fidei, sed prorsus philosophica sunt: ergo circa ea non potest error contra fidem proferri, sed ad summum contra principia Philosophiæ. Quod verò error sit eis contrarius, efficaciter probari potest à posteriori ex operationibus, ac vnitionibus vtriusque vitæ propriis, quas si haberent, repugnaret à nobis non percipi, quemadmodum percipiuntur vitales operationes animalium, atque plantarum. Quamuis enim magis distent à nobis, eorum tamen ingens magnitudine distantia compensaretur, & ita posset à nobis eorum augmentum percipi, & euidenti ratione constaret, nullum extare alimentum, ex quo ali, aut nutrirī possint, nec ullis veris organis prædita esse, per quæ possint operationes aliquot sensitiuæ animæ exercere: & plura possent alia in confirmationem huius asserti afferri, quæ breuitatis gratia prætermittenda censemus.

Assertum verò posterius efficaciter posset probari ex verbis S. Synodi generalis suprâ relatis, si certò constaret, talem definitionem fuisse ab eo Concilio editam, nihilominus hoc discursu potest ostendi: quia cælestia corpora essent substantialiter composita ex corpore, & anima rationali, eo ipso, quod dicerentur verè animata anima rationali, & vita rationali prædita: sed non est excogitabile compositum substantiale ex anima rationali, & corpore tanquam ex vera forma, & materia, quod non sit homo, cum hæc sit essentialis compositio hominis. Et tamen certum est ex sacra pagina, nullum dari hominem, qui non sit propagatus ex primo, nempe, ex Adamo in principio temporis cum toto mundo condito, & cum cæteris omnibus à Christo redempto. Constat etiam ex principio Genesis, cælestia corpora tanquam quid diuersum ab homine, esse creata, nec ab eodem homine processisse; ergo euidenter deducitur ex fide, non habere animam rationalem pro vera forma, nec proinde animata esse tali anima, aut vitæ rationali prædita: solum posset responderi, constare quidem anima

anima rationali diuersæ speciei ab ea, quæ constituit hominem, & ideo licet sint animata anima rationali, non esse homines, sed rationalia quædam composita diuersæ speciei. Cæterum solutio hæc facile confutari potest: primò, quia non est intelligibilis anima rationalis, quæ non sit forma, & pars, cum sit ei intrinsicum, esse incompletam substantiam; nec est intelligibile, quòd sit pars, & vera forma, verusque actus, quin sit vnibilis alteri parti, aut potentia, vel materia, aut corpori: nec est excogitabile, quòd sit vnibilis corpori, nisi vt secundum esse proprium propriamque operationem ab eo emanantem perficiatur (nam propter bonum corporis longè inferius, ac imperfectius vniri repugnat) sed propria eius operatio est intelligere: ergo vt hanc assequatur, tanquam pars informando corpus vnitur ei: sed intelligere medio corpore non est aliud, quàm intelligere per sensus: ergo necesse est, quamlibet aliam excogitabilem animam habere eundem modum operandi cum nostra, & per locum ab intrinseco eundem modum essendi, esseque eiusdem speciei. Et si dicatur intra ambitum modi operandi, sine dependentia à sensibus, ac sine discursu dari intellectiones diuersæ speciei in Angelis, & proinde substantias specie diuersas, quæ sint principia earum, ac proinde non esse impossibile, dari intellectiones specie diuersas, intra ambitum modi operandi cum dependentia à sensibus, aut cum discursu, & ex consequenti animas rationales diuersæ speciei. Respondeo, quòd licet hoc foret possibile (quod non credo) quia impossibile reputo, dari intellectiones diuersi modi specifici, sub modo operandi cum discursu vel cum dependentia à sensu, cum sit imperfectissimus, atque infimus: quare non est excogitabile sub eo vnde, vel à quo sumi possit talis differentia specifica, sicut intra modum longè perfectiorem operandi sine discursu, propter maiorem extensionem ex maiori perfectione desumptam, & maiorem limitationem infimi gradus operandi cum discursu, adhuc foret euidens omnes esse homines propter convenientiam genericam in natura rationali, sicut est euidens, hominem, & leonem, etiamsi specie distinguantur, esse animalia propter convenientiam genericam in natura sensitua: quare apertè falsum esset ponere ex vna parte corpora cælestia esse animata anima rationali, & ex alia non esse homines. Et cum manifestè deducatur ex fide, homines non esse, error est fidei contrarius, ponere ea animata anima rationali, non est tamen hæresis, quia non est per se immediatè contra fidem. Quòd verò error sit etiam philosophicus, manifestum est, quia repugnat esse substantias cum discursu, ac dependentia à corpore sine sensibus: non est enim excogitabilis alius modus intelligendi cum dependentia à corpore, nisi accipiendo species à rebus corporeis; nec est intelligibilis alius modus

modus accipiendi species à rebus corporeis, nisi eas sentiendo, & ita mediis sensationibus imprimantur intellectui ab eis species propriæ, per quas ab eo cognoscantur. Et iuxta nostrâ duplicem cõclusionem intelligitur, & in concordiam reuocatur quæ relataz sententiæ, ita vt prior in sensu prioris nostræ assertionis, posterior in sensu posterioris accipiatur, & sic vtraque vera sit.

Super sunt argumenta prioris sententiæ in principio facta diluenda; & in primis testimonia Aristotelis iuxta legitimum sensum eius explicanda sunt distinctione illa allata à Diuo Thom. 1. parte, quæst. 70. art. 1. ad 5. corpus enim cæleste secundum se, hoc est, non considerata intelligentia ei vnita, vt principio motus, non dicitur se mouere, sicut mouentur viuentia, nec habere in se principium actiuum sui motus, sed passiuum tantum; si tamen accipiatur cælum simul cum intelligentia per contactum virtutis ei vnita, vt principio actiuo motus eius, ita vt ex vtroque constitutur vnum aliquod à se ipso motum, tanquam à principio actiuo efficiente, viuens appellari potest, quasi per analogiam, & similitudinem ad viuentia, & eadem ratione habere differentias positionum, quo pacto viuens ipsum vocauit, easque illi concessit Arist. cap. sequenti, non tamen verum, & proprium viuens per veram, ac informantem animam. Et in eodem sensu docuit 12. lib. Metaphysicæ, c. 7. moueri cælestia corpora à primo motore, tanquam ab eo, quod cognoscunt, & appetunt: nam licet intelligentia mouens cælum non moueatur à Deo eodem motu, cum immota in hoc sensu moueat ipsum. Dicitur tamen Deus totum ex cælo, atque intelligentia constitutum mouere, in quantum præstat suum concursum, vt moueri valeat cælum ab intelligentia, atque etiam intelligentia mouere ipsum, ratione cuius (hoc est) vt eam includentis moueri dicitur à se per quandam analogiam, & similitudinem ad viuentia corpora, in quo sensu intelligi debent Scripturæ, & Patrum loca.

Ad primam rationem Diuus Thom. in eodem art. ad 3. respondet, viuentia illa produci à corpore cælesti non virtute propria, sed virtute intelligentiæ à qua mouetur, ita vt tanquam instrumentum eius tales effectus se superiores possit attingere; sed difficile est, hos effectus Angelo mouenti, tanquam præcipuæ causæ per se tribuere etiam in doctrina Diui Thomæ qui (vt inferius ostendetur) sentit planè, Angelos non posse vllam formam adhuc accidentalem per propriam virtutem per se influentem imprimere materiæ, aut corporibus; sed solum hæc posse, tanquam applicando actiua passiuis; quod solum est, esse conditiones, vel ad summum, causas per accidens: ergo longè minùs poterunt substantiam viuentem, vt causam per se producere. Propterea dicendum est, corpus cæleste nõ nudū, sed cū suo motū ab intelligentia effectiue

effectiue ducto, & proinde simul cum eadem intelligentia acceptum esse instrumentum Dei ab eo eleuarum, ad producendam substantiam viuentem, & hoc sensu loquitur Dñus Thom. Itaque ex corpore cælesti moto ab intelligentia, atque ex intelligentia ipsa mouente, resultat vnicum, atque completum instrumentum, quod à Deo eleuatur, vt possit attingere productionem harum substantiarum, quia non potest excogitari vlla alia causa principalis, & proxima per se influens, per seque eas producens præter Deum tali instrumento vtentem.

Ad secundum, concessa maiori, ac minori, neganda est consequutio: satis est enim vniuersum vitam, & animam suarum partium includere, vt nulla eius pars, quantumlibet perfecta, sit eo perfectior, cum omnem eius perfectionem, simul cum perfectione aliarum partium includat, vt pote totum quoddam quasi artificiale ex omnibus gradibus essendi ordine quodam constatum.

QVÆSTIO II.

*An cælestia corpora dignitate præstent cunctis rebus
sublunaribus.*

Quæstio procedit de cælo, non vt claudit intelligentiam, sed secundum se, anima etiam assistente destituto: & sic certum est, aliis corporibus sublunaribus vitæ expertibus perfectione præstare, vt pote simplicius, & incorruptibile: & minùs perfectum esse simpliciter hominibus: cuius ratio est, quia species humana constituitur per animam rationalem, spiritualement quidem, independentem à corpore in suo esse, intelligentem, ac volentem, & ideo gratiæ, virtutum, ac beatitudinis capacem; quibus omnibus perfectionibus caret forma cælestis, & cælum per eam constitutum; ergo longè est eo perfectior homo: solum ergo controuersia procedit de animalibus, & plantis, an perfectione superentur à corporibus cælestibus, vel digniora eis sint.

Et prior sententia affirmat, digniora esse cælestia corpora cunctis animantibus homine inferioribus, quam sequitur Marsil. 1. quæst. 1. art. 2. quæst. 6. & 7. & eandem tenere videntur Zumel. 1. part. quæst. 3. art. 1. & Pater Pererius lib. 2. suæ Philosophiæ cap. 6. probabiliorémque esse docet Bannez 1. part. quæst. 3. art. 1. & eam tenuisse Victoriam & Canum aliósque discipulos Diui Thomæ doctissimos, quam hac tempestate sequuntur recentiores quidam cum limitatione ad sola animalia imperfecta, quæ non ex semine, sed ex putri materia generantur, atque etiam ad plantas. Alij verò ad solas plantas limitanda censent. Probaturs testimonius Aristotelis, qui 6. lib. Ethicorum cap. 7. non solum animalibus

bus cæteris, sed homine ipso præstantiora esse corpora cælestia, hæc verbis docet: *Neque verò quidquam ad rem attinet, quòd homo reliquorum animalium quiddam sit quàm optimum: sunt enim & a'ia homine multò diuiniore, ut ea, quæ omnibus sunt maxime in conspectu, ex quibus hic mundus coagmentatus est.* Per quæ constat, cælestia corpora intelligere, & lib. 1. de cælo textu 13. docet præter inferiora corpora dari aliud longè nobilissimum: *Manifestum est, esse aliam substantiam præter eas, quæ hic sunt, priorem, ac diuinorem his omnibus, & text. 16. Quapropter ex omnibus his aliquis ratiocinando crediderit, quòd est aliquod, præter corpora, quæ hic & circa nos sunt, alteri separatim tanto nobiliorem habens naturam, quanto plus distat ab his quæ hic sunt.* Ac tãdem §. lib. de partibus animalium, cap. 5. non longè à principio, res naturales æternas, asserit, tantum præstare cæteris rebus inferioribus, ut cognitio illarum, etiam minima ac tenuissima, multò præstantior, ac nobilior sit, quàm harum rerum absolutissima scientia.

Probatum deinde ratione, quia partes ex quibus cælestia corpora constant, nempe, materia, & forma, perfectiores materia, & forma rerum inferiorum sunt: ergo corpora ipsa cælestia digniora erunt. Antecedens probò ex parte formæ, cuius perfectio sumitur ex modo informandi: sed modus informandi cælestis formæ nobilior est, cum inamissibili modo infonnet materiam, & indissolubili modo vnionis eis copuletur, ex quo habet, ut corpus incorruptibile cum ea constituat; quælibet autem forma sublunaris (etiamsi sit anima) amissibili modo informat materiam, & modo vnionis dissolubili ei vnitur, ex quo habet, ut corruptibile corpus constituat. Probatum deinde ex parte materiæ, quia materia cælorum dignior est sublunari, ut superiori libro ostendimus; unde etiam sequitur, nobiliorem quoque debere esse formam. Probatum consecutio, quia species materiæ, & dignitas eius ex ordine ad formam accipitur: ergo maior dignitas materiæ ex digniori forma.

Secundò, corpora cælestia simpliciora sunt sublunariibus, incorruptibilia, figuram, ac motum circularem perfectissimum habent; locum item digniorem, & (quod caput est) virtute eorum generantur alia, atque conseruantur animalia omnia: ergo longè sunt eis perfectiora. Probatum consequentia, quia superiores istæ dignitates substantiam quoque superioris ordinis planè indicant. Quam rationem recentiores vrgent pro animalibus imperfectis ex putri materia genitis, quorum non potest alia causa præcipua designari, præter cælestia corpora, in cuius proinde virtute eminenter contineri debent, cum non contineantur formaliter, eminenter autem contineri repugnat, nisi perfectiora sint eis. Vrgent etiam pro plantis, tum, quia forma plantæ idèò tantum

tantum

tantum vita est, quia principium est nutritionis, & augmentationis, per quam attracto alimento viuens acquirit, & conseruat debitam quantitatem, ut conseruet proprium indiuiduum: sed hæc perfectio longè minor est incorruptibilitate cæli, per quam cælum perpetuum est, sine indigentia talis operationis. Tum etiam, quia nutritio, & augmentatio plantæ secundum substantiam non est operatio vitalis, cum constet, ignem quoque nutriti, & augeri, sed solum quoad modum, quia per intus sumptionem, & distributo alimento per omnes partes in earumque substantiam conuerso, ignis verò per solam iuxta positionem lignorum in vna, vel alia parte: habere autem operationem ex solo modo vitalem, minor est perfectio, quam esse incorruptibile: ergo cælum simpliciter perfectius est plantis.

Nihilominus sententia posterior negat, cælestia corpora dignitate præstare vlli corpori viuenti, siue ex semine, siue ex putri materia producto, sed formicam, aut muscam esse essentialiter perfectiorem cælo quocunque Ita pronunciat Diuus Augustin. in libro de vera religione capite 29. cuius hæc sunt verba: *Non enim qualiscunque moles, quanquam ista visibili luce præfulgeat, si vita carcat, magni aestimanda est: qualibet namque viuæ substantia cui libet non viuæ substantia, natura lege præponitur.* Quam naturæ legem confirmat 11. libro de Ciuitate Dei, capite 16. & ex ea colligit in libro de duabus animabus, capite 4. muscam Soli præferendam esse. Eandem sententiam sequuntur D. Thomas 1. parte, quæst. 3. articul. 1. ad 2. quæst. 70. articul. 3. ad 2. atque in primo loco Caietanus, & Bannes 1. etiam libro contra Gentes capit. 2. & ibidem Ferrarius, Capreolus in 2. distinct. 10. quæst. 2. Soncinas 12. Metaphysicæ, quæst. 12. ad secundum, Richardus in 2. disputat. 14. quæst. 4. circa principale, ibidem. Argentina, quæstione vnica, artic. 1. Bassolis quæstione. 2. §. ad dicta, & Okam quæstione 23. Gabriel super Canon. lectione 41. & omnes ferè, qui cælum inanimatum faciunt. Vnde Auerroës 2. libro de cælo, commentario 61. asseruit, defendi non posse, cælum esse perfectius aliquo viuente, nisi anima præditum esse asseratur. Ita demum omnes recentiores, & nobis videtur omnino vera sententia. Cuius ratio sit, essentialis perfectio rerum corporearum ex perfectione formæ substantialis accipitur: sed anima quæcunque est forma perfectior cælesti: ergo viuens quodcunque est perfectius cælo. Minorem sic probò. Anima quæcunque est actus corporis physici organici, potentia vitam habentis: ergo anima quæcunque est principium vitæ postulans organicum corpus, hoc est, diuersis organis, ac membris præditum, pro diuersitate operationum exercendarum, & habens differentias positionum sibi intrinsecas, nempe, sursum

deorsum, dextrum, sinistrum, antè, & retrò, vel aliquot earum: sed forma cælestis, nec est principium vitæ, nec postulat corpus organicum diuersorum membrorum, ad exercendas varias operationes (quod constat perfectissimum esse in ratione corporis) sed solum postulat corpus quoddam homogeneum, habes partes eiusdem rationis, sicut corpus aqueum, vel aëreum (quod patet esse imperfectissimum, varietate membrorum carens) ergo anima quæcunque perfectior est forma cælesti.

Quod verò aliqui dicunt, formam cæli constituere ipsum incorruptibile, atque perpetuum, & incorruptibilitatem esse maiorem perfectionem, quàm vitam saltem imperfectam animalium, vel plantarum, fallum est. Quia incorruptibilitas non excedit perfectionem formæ non viuentis, sed ei conuenit, intra gradum talis naturæ infimum, propter modum informandi perfectiorem, quia explet, ac satiat appetitum materiæ, vt egregie docuit Diuus Thomas 1. parte, quæst. 2. articul. 3. ad 1. quod constat non habere formam perfectissimam, qualis est anima rationalis: ergo incorruptibilitas non potest adæquare perfectionem gradus superioris vitæ, nec propter illam potest forma cælestis attingere perfectionem vllius animæ, nec cælum perfectionem vllius viuentis.

Secundò, quia potentia cuiuslibet rei, ex quibus actus, & propriæ operationes procedunt, emanant ab eius substantia, vel essentia: ergo ea substantia perfectior est, quæ habet potentias, & operationes maiores, & perfectiores: sed viuens quodcunque habet potentias, & operationes perfectiores operationibus cælorum: ergo dignior, atque perfectior substantia. Minorem probo, quia potentia, & operationes prodeuntes à substantia viuente, sunt vitales, quæ à termino, & principio duplicem perfectionem habent: à principio quidem, quod necesse est esse intrinsecum, & ab extrinseco principio (modo saltem naturali) procedere nequeunt: à termino verò, qui ferè semper vitalis est, vt patet in cognitione, & amore, non solum partis rationalis, sed etiam sensitiuæ, atque etiam in nutritione viuentis propria, cuius proprius terminus per eam productus est partialis substantia viuens. Cælum verò nullam habet vitalem potentiam, nec operationem, sed quascunque habet, infimæ sortis sunt, eiusdem videlicet conditionis, ac operationes ignis, & cuiuslibet alterius rei non viuentis, quas constat, procedere posse ab extrinseco principio, vt illuminationem, & circularem motum: nec per eas potest produci proprius, ac proximus terminus vitalis: ergo constat operationes vitales cuiuslibet viuenti proprias digniores esse operationibus cæli non vitalibus: ergo planè sequitur, quamlibet substantiam viuentem dignitate præstare omnibus cælestibus corporibus.

Confirmatur, quia animalia omnia, quantumlibet imperfecta, attingunt

attingunt cognitionem, & amorem, de quibus dubitari nullo modo potest, digniores esse operationes quibuscunque cælestibus ergo nec dubitari potest, quin eadem animalia à quibus procedunt, digniora sint corporibus cælestibus, cognitionis, & amoris prorsus incapacibus.

Et vrgeri potest ex modo operandi omnium viuentium, non enim operantur mota ab alio mouente extrinseco, sed virtutem habent intrinsecam, per quam se mouent, nempe animam; corpora verò cælestia carent virtute se mouendi, quia carent anima, quare sic à mouente extrinseco mouentur, vt eo cessante, cesset omnino eorum motus: ergo digniora sunt corporibus cælestibus, non solum omnia animalia, sed etiam plantæ, vt docet communis sententia: quam sic explicuit Diuus Thomas 1. parte, quæst. 70. art. 1. ad 2. vt quælibet anima, & viuens quodcunque simpliciter, & absolute dignius sit corporibus cælestibus: sed forma cælestis formaliter dignior sit secundum quid quacunque anima (etiam rationali) propter digniorem modum informandi materiam, explendo capacitatem eius, qui modus informandi radix est incorruptibilitatis cælorum: nam ex eo prouenit, vt materia cælorum aliam formam nec appetat, nec habere possit, sed modo unionis naturaliter indissolubili vniatur formæ, & ideo compositum naturaliter indissolubile, atque perpetuum cum ea constituat, quod nulla forma (etiam rationalis) habet, quamuis maiorem dignitatem, & perfectius esse simpliciter conferat.

Testimonia verò Aristotelis, vt ex verbis eorum, atque ex antecedentibus, & consequentibus colligitur, de corporibus cælestibus intelliguntur, non nudè consideratis, sed simul cum motricibus intelligentiis, vt adnotauit Diuus Thomas 6. lib. Ethicorum, lectione sexta, quo pacto verum est, in hæc inferiora agere, ea multiplicare, ac conseruare: hoc autem modo sumpta, longè perfectiora sunt cunctis viuentibus: si verò nudè considerentur, superantur simpliciter ab eis.

Ad primum argumentum distinguendum est antecedens: nam licet perfectior sit materia, quia minùs habet de potentia passiva, & perfectiorem modum informandi respicit seu formam meliori modo informantem, modo scilicet inamissibili, non ideo postulat perfectiorem formam, secundum speciem, cum constet non postulare, immò nec habere posse animam rationalem omnium perfectissimam. Quare solum probat argumentum, quod forma cælestis sit perfectior non simpliciter, hoc est, non ex propria specie, sed solum ex modo informandi, & ideo non nisi secundum quid, & aliàs probaret argumentum, cælum esse perfectius homine, quod nec contendunt, nec admittunt

aduersarij. Sic responder Diuus Thomas 1. par. quæst. 70. attic. 34. Corpora ergo cælestia, perfectiori materia prædita sunt quibuscunque speciebus viuientium, atque etiam perfectiori forma, sub communi ratione informandi materiam cum specialibus dispositionibus non habentibus contrarium: quare perfectior species corporis ex eis constituitur, utpote incorruptibilis, cum tamen viuientia corpora sint species corporis corruptibilis longè imperfectioris. At genus corruptibilis corporis, licet sub gradu corporis imperfectius sit, atque etiam omnes eius species, ut talem gradum participant; ulterius tamen contrahitur per differentias vitam attingentes, & per eas descendit ad species vitæ usque ad perfectissimam; & cum gradus vitæ longè perfectior sit gradu vitæ experte, sequitur planè omnes species huius generis, utpote gradum vitæ participant, perfectiores, esse omnibus speciebus incorruptibilis corporis, quarum nulla attingit gradum vitæ, sed intra gradum substantiæ vitæ expertis manent.

Neque illud quod additur ad corroborandum idem argumentum, de causalitate cælorum respectu imperfectiorum animalium, quidquam efficit, quia corpus cæleste, secundum se non producit ea, sed motum ab intelligentia, & adhuc ita sumptum, non tanquam præcipua causa, sed tanquam instrumentum Dei, ut superius ostendimus: non est ergo necessarium, quod secundum se sumptum dignitate præstet eisdem animalibus.

Eodem modo soluitur secundum argumentum: nam etsi vera sint illa omnia, quæ assumit, solum ex eis probatur, cælum præstantius esse corpus his sublunaribus intra latitudinem corporis, quo pacto ei conueniunt: excedit tamen à viuente, ac sentiente quocunque in gradu vitæ, & naturæ sensitiuæ, cui dignitas cognitionis conuenit, qua caret cælum.

CAPUT II.

Textus Aristotelis.

Quoniam autem quidam sunt, qui dicunt, esse quidpiam cali dextrum, & sinistrum, &c.

Breuis expositio textus.

Explicata natura totius cælestis corporis, prosequitur Aristoteles explicare diuersitatem partium eius, secundum situm & positionem, quam habent in ipso, quo pacto differentiæ positionum vocari solent, nempe, sursum & deorsum, antè & retrò, dextrum & sinistrum. Diuiditur verò caput in duas partes, in quarum prima, expositis his differentiis, per principia, ex quibus accipiuntur,

tur, refert & reiicit sententiam Pythagoreorum; in postrema statuit propriam, quibusdam aduersus eam obiectis, ac solutis.

Pythagorei igitur quidā (ait Aristoteles) duas positionum differentias in cælo posuere; quorum sententiam, ut ostendat falsam, exponit, quidnam per has differentias intelligi debeat, & unde sumantur. Sunt namque differentię istę quasi diuersorum motuum principia, vel unde incipere solent. A dextro enim pede, vel manu incipit motus localis animali conueniens: motus verò augmentationis initium habet ab ea parte, per quam sumitur alimentum, ut à capite, vel ore in animalibus: à radice verò in plantis: unde caput in illis pars, quę fursū est, vocatur: pedes verò dicuntur, pars deorsum: ex opposito verò in plantis: motus denique alterationis sensibilis, aut sensitiuę animalibus proprię à cerebro incipit, & in facie ostenditur: nam in his partibus vigent sensus, & eorum operationes exercentur: & propterea anteriores vocantur: partes verò eisdem oppositę dicuntur posteriores.

Quibus expositis docet, quòd animalia perfecta sex omnes differentias habeant: imperfectis verò, quibus denegauit natura progressionem, quatuor duntaxat conueniunt, videlicet, sursum, deorsum, antè & retrò: plantis verò, quibus solum augmentatio conuenit, duę tantum conceduntur, nempe sursum & deorsum. Docet præterea, quòd sola viuientia differentias positionis proprię habeant, quia his duntaxat conuenit, habere diuersitatem partium, ac membrorum pro eisdem motibus vitalibus, ac sensitiuis exercendis accommodatam, reliqua verò eadem partium diuersitate carent, & ex consequenti eisdem motibus per eas exercendis, idèò has differentias positionum non habent. Vnde quoties easdem positionum differentias corporibus vitę expertibus attribuimus per solum extrinsecum ordinem ad viuientia eis conuenire censemus, ut sursum ei, quod versus caput nostrum est; deorsum, quod circa pedes; dextrum, quod versus pedem, aut manum dextram: & pariter sinistrum, quod versus sinistram: & tandem antè esse dicimus, lapidem, qui versùs anteriorem partem nostram residet; retrò verò, qui versùs partem oppositam.

Iam verò Pythagoreorū positionem falsam esse ostēdit primò, quia varietas partium ostendit perfectionem corporis: sed maiorem varietatem continent alię differentię ab eis omissę: ergo corpori cælesti (utpote perfectissimo) omnes tribuere debuerunt. Minorem ostendit: quia dextrum, & sinistrum sola virtute differunt, non figura: nam eiusdem sunt figurę dextra, atque sinistra manus, & pars sursum, atque deorsum: anterior, atque posterior non sola virtute, sed figura diuersę sunt: eas igitur debuerunt cælo tribuere.

Secunda ratio: impossibile est alicui corpori conuenire motum progressiuum, & alterationem, quin ei conueniat motus augmenti, & ex consequenti erit impossibile, conuenire cælo differentias positionum, desumptas à motu progressiuo, nempe dextrum, & sinistrum, quin ei conueniant sursum, & deorsum desumpta ex augmento: quod præsertim necessarium esse probat Aristoteles, quia cùm differentiarum omnes conueniant perfectis animantibus, & cælum animatum sit perfectissimum, necesse est, ei tribuere omnes: licet enim cælum non habeat partes diuersæ figuræ, satis ad hoc est habere partes diuersæ virtutis: dicitur pars orientis dextera, quia ab ea inciperet motus, si initium haberet: sursum autem & deorsum sumuntur secundum maximam distantiam inter polos repertam, ita ut arcticus sit deorsum, & sursum antarcticus, qui nobis non apparet, & ideo concludit hemisphærium nostrum esse inferiorem, oppositum verò superiorem, contra quod dicebāt Pythagorici: quod probat Aristoteles, ex dextro cæli, quod est oriens, à quo si motus inciperet, & ad sinistrum circumferretur (ut par est) necessarium foret, polum, qui non videtur, superum esse, nostrum verò deorsum: ut in motu conuersionis humani corporis à dextra manu ad sinistram necessariò ostenditur.

QVÆSTIO VNICA.

*An sex positionum differentia conueniant calo ab intrinseco,
an solum per ordinem ad animalia.*

Aristoteles libro de animalium incessu, cap. 4. à principio, ex professo agit de his differentiis positionum singulas explicans ex tribus viuientium, atque animalium motibus, hisce verbis: *Quoniam autem dimensiones numero quidem sunt sex, ex quibus determinari datum est animal, summum videlicet, & imum; ante, & retrò, præterea dextrum, & sinistrum: summum certe, & imum, omnia habent viuientia, quoniam non solum in animalibus est summum, & imum, sed etiam in stirpibus. Determinantur autem opere, & non solum positura, qua ad terram sit, aut ad calidum. Vnde enim alimenti singulis est distributio, & incrementi accessus, summum id sanè est: quo autem isthuc vltimò pergit, id est imum. Et paucis interpositis: Quacunque autem non solum viuunt, sed animalia etiam sunt, huiusmodi omnibus ante, & retrò insunt: sensum enim isthac omnia habent, per ante autem, & retrò determinantur, in quo animatum est esse sensibus, & unde est singulis, anteriora huiusmodi existunt, his autem opposita posteriora. Quacunque verò animalia non solum sensu sunt prædita, sed moueri etiam possunt sese ea, qua*

per locum est, mutatione, in his ad ea quæ dicta sunt, *sinistrum*. & *dextrum* determinantur, simili modo ut illa, quæ dicta sunt prius. Unde enim mutationis per locum, corporis naturaliter est initium, id unicuique *dextrum* est, oppositum verò, & quod hoc consequi naturam est, *sinistrum*. Quibus tria de eis docet: primum, quòd quælibet sit determinata pars quantitativa viuentis, vel animalis, in qua virtus vitalis, quæ principium alicuius motus vitalis ex tribus illis sit, præcipue residet, ut virtus, quæ est principium motus localis, præcipue residet in brachio, vel manu altera, quod propterea appellamus *dextrum*, & ab eo incipere motum progressiuium videmus.

Secundò docet, quòd differentie istæ positionis sint extrema trium dimensionum, quas habere dicitur corpus extensum, videlicet, longitudinem, latitudinem, & profunditatem: ita ut sursum, & deorsum sint extrema longitudinis corporis; *dextrum*, & *sinistrum* extrema latitudinis; antè, & retrò, extrema profunditatis.

Tertiò, omnes has differentias reperiri in omnibus, & solis animalibus perfectis, quæ non solum sentiunt, sed mouentur motu locali progressiuo; in imperfectis, quibus talis motus non conceditur, reperiuntur quatuor: dextrò verò, & sinistro carent; & tandem plantis solum conueniunt sursum, & deorsum. Ex quibus colligitur integra ratio cuiuslibet harum differentiarum, in his tribus posita, videlicet, quòd sit determinata pars viuentis, vel animalis, non quæcunque, sed quæ sit extremum alicuius dimensionis, habeatque in se virtutem vitalem, à qua tanquam à principio, quasi effectiuo, & non tanquam à termino, à quo motus incipiat.

Sed illud est obseruandum circa omnes, quod D. Thomas in expositione textus tetigit, nempe dupliciter distingui posse, videlicet, per ordinem ad diuersos motus locales, quorum sunt principia: nam sursum est principium, à quo incipit augmentatio, extremumque longitudinis corporis, cum videamus, alimentum primò recipi in ore, ubi disponi incipit pro conuersione efficienda in substantiam aliti, & pars huic opposita deorsum est. Illa verò pars, à qua incipit motus localis animalis, & est extremum latitudinis, dextrum vocatur, opposita verò pars sinistra dicitur. Et ea tandem, à qua sensitiua alteratio initium sumit, vel certè in qua viget, dicitur antè, seu anterior pars; opposita verò retrò. Deinde possunt distingui penes eundem motum localem, ita ut pars sursum ea appelletur, à qua apprehensio, seu cognitio, ad motum localem primò requisita fieri incipit: nam in capite vigent sensus; pars verò, à qua incipit, quoad exercitium, vel executionem, idem motus, dicitur dextera; huic verò opposita sini-

stra, & tandem ante dicitur illud, versus quod mouetur animal, vt facies, vel pectus, & opposita pars dicitur retrò.

His expositis, prima sententia circa propositam questionem negat in cælo reperiri vllam differentiam positionis ab intrinseco, vel ex natura rei, & solum ei tribuit eas per quandam denominationem extrinsecam ad animalia seu viuentia, quo pacto dexter vocatur lapis, dū ad dextrum animalis positus est, & sinister, dum ad sinistrum eiusdem: sic pars cæli dextra vocari potest, dum versus dextrum animalis est, & sinistra, dum versus sinistrum eiusdem consistit. Ita sentiunt Picus Mirandulan. lib. 6. de examine vanitatis cap. 9. Scaliger exercitatione 67. contra Cardanum, & cum his recentiores non pauci. Et probatur ex verbis Aristotelis in principio relatis, quibus docuisse vidimus, tria habere has differentias positionum, videlicet vt sint partes corporis determinatæ, atque extrema dimensionum eiusdem corporis, & insuper vt sint principia alicuius motus vitalis, sed tales partes non reperiuntur in cælo: ergo nec tales differentie positionum. Probat minor: quia in cælo non reperiuntur veræ dimensiones longitudinis, latitudinis, nec profunditatis potius quàm in alio corpore rotundo vitæ experte, vt in globo lapideo, vel ligneo, quibus propterea veræ differentie positionum non conceduntur, nisi per extrinsecam denominationem à viuentibus; sed nec dantur virtutes, quæ sint principia augmentationis, alterationis, vel motus localis progressiui, cum motus isti cælo non conueniant; nec tandem habet cælum virtutem aliquam effectiuam intrinsecam sui motus circularis, sed à motore extrinseco, nempe intelligentia, mouetur: alienum est ergo ex propria natura ab his differentiis positionum.

Secundò, differentie positionum solum conueniunt ex natura rei viuentibus, ac sentientibus corporibus, quorum sunt proprietates, vt idemmet Aristoteles eisdem verbis relatis docet. Sed cælum non est corpus viuens, sed totius vitæ expers, vt suprà diximus, ergo ex natura rei eas non habet. Nec sufficiunt ad hoc virtutes, per quas cæli influunt in hæc inferiora, quia tales virtutes nec sunt principia alicuius motus, nec partes, in quibus reperiuntur, sunt heterogeneæ, sed eiusdem rationis atque eiusdem figuræ, immò nec sunt partes determinatæ, sed quæ modo est in oriente, postmodum est in meridie, & tandem in occidente, cui succedit alia, & alia diuersa: quare nec virtus aliqua determinat: potest esse in eis, ratione cuius dicantur sursum, vel deorsum, dextrum, atque sinistrum: vel si determinata foret, transiret planè de subiecto in subiectum, hoc est, de vna parte in alteram, quod patet esse impossibile.

Secundam

Secundam opinionem tenet Villalpandus, 2. lib. de cælo cap. 2. quæst. 3. quam dicit esse Auerrois propriam: eam verò sic explicat Intelligentia mouens cælum, vt est intellectualis substantia, non vnitur cælo, nec vitam ei tribuit, sed solum habet per se esse ac per se intelligere: sed vt forma eius tribuit ei vitam, & ita necessariò ei vnitur, vt non possit naturaliter separari, cælumque ipsum ad vnionem cum ea naturalem habet propensionem, & ex tali vnione vitam, motum ac differentias positionum ex natura rei suscipit, quod exponit exemplo animæ rationalis secundum se, & vt est forma corporis. Pro hac sententia solum assert auctor iste Aristotelem, qui diuersis suæ doctrinæ locis superius à nobis allatis testatur, cælum esse animatum, & capite præcedenti aduersus Pythagoricos docet, non solum dextrum, & sinistrum habere, sed sex omnes differentias positionum, tanquam corpus animatum, atque perfectum positum hisce verbis: *Cum autem à nobis sit antea definitum tales potentias his inesse, quæ principium motus habent, & cælum sit animatum atque principium habeat motus, patet ipsi superum, inferumque, & dextrum, atque laeuum inesse.*

Tertiã opinio duo asserit: primum, cælo non conuenire vllam differentiam positionis veram, & propriam ex natura rei aduersus secundam opinionem: secundum, quòd non solum ei conueniat, per extrinsecam denominationem ad corpora viuentia, sicut rebus omninò inanimatis, sed per analogiam, quam habet ad illa ab intrinseco. Et hæc nostra sententia valde consona est sensui, ac modo loquendi Aristotelis, quam sequuntur Patres Conimbricenses 2. lib. de cælo, cap. 2. quæst. 1. artic. 2. Et quidem quantum ad primum assertum, efficaciter satis probatur argumentis primæ opinionis. Quibus tamen duo libet addere, aduersus Villalpandum: sit autem primum aduersus id, quod asserit, differentias positionis conuenire quidem cælo ex natura rei. Verè atque propriè differentię positionum sunt proprietates rei viuētis, & non possunt ex natura rei vitę expertibus conuenire, vt concedit iste auctor: sed repugnat, cælum habere vitam etiam incorrumpibilem, cum non sit intelligibilis vita, quæ non proueniat à forma informante: assistens enim sicut non potest conferre esse corpori, sic nec vitam, siquidem viuere viuētibz est esse, teste Aristoteles: aliam verò animam informantem, nec Villalpandus concedit. Quod autem asserit, intelligentiam mouentem cælum, licet non possit ei concedere veras differentias positionum, vt est intellectualis substantia, tribuere tamen vt formam eius conferentem ei vitam, sic reuincitur. Si intelligentia vt forma vnitur cælo; vel vnitur per modum vnionis substantialis, quem constat esse veram informationem substantialem, vel solum vnitur ei vnione virtuali, per quam imprimit ei impulsus, vel alio modo applicat eis-

suam virtutem ad motum: prior modus vnionis repugnat substantiæ completæ, per modum verò posteriorem repugnat tribuere cælo esse substantiale, & ex consequenti tribuere ei vitam: nam vita esse substantiale importat: non ergo potest ei tribuere veras, ac proprias differentias positionum, vitam corruptibilem, aut incorruptibilem consequentes.

Probaturs deinde secundum assertum, quòd non conueniant cælo differentiarum positionum per solam denominationem extrinsecam, sed per analogiam, quam habet ab intrinseco cum corporibus viuentibus. Primò, expressis testimoniis Aristotelis, quibus affirmat cælum esse animatum, quod, vt minimum, de anima ei assistente ad motum necessario debet intelligi, à qua moueri ex propria inclinatione natum est, & propterea motum eius naturalem esse docuit in huius libri principio, quod constat, nulli corpori vitæ experti conuenire posse. Vnde infero alio modo longè diuerso se habere cælum in ordine ad motum, quo se habent illa, & ex consequenti alio modo nobiliori conuenire ei differentias positionum ex mente Aristotelis, ac conueniunt cæteris rebus vita carentibus. Quod capite præsentis expressius docuit: nam cum dixisset ad medium fermè eiusdem, rebus vitæ expertibus non conuenire differentias positionis, vel solum per extrinsecam denominationem à viuentibus, quia vel non mouentur, vel si mouentur, omni ex parte simili modo, veluti ignis semper sursum, & terra semper deorsum. Cælo verò tribuendas fore tanquam corpori animato, atque perfecto docuit: euidens est ergo, cum sentire, quòd non per solam denominationem extrinsecam, sicut rebus vitæ expertibus, ei conueniant, sed alio modo perfectiori.

Probaturs deinde ratione, quia constat cælestia corpora habere virtutes influendi in inferiora; constat etiam, non posse eas ordinatè exercere (hoc est, vt generationibus, & corruptionibus, vicissitudiniquè earum congruit) nisi ab Oriente in Occidentem moueantur: ergo ex propria natura postulant ita moueri, vt ab ea parte motus incipiat: quod constat corporibus vitæ expertibus non conuenire: nam talibus virtutibus carent, nec postulant ab vna parte potius, quàm ab alijs motum inciperè, & hoc intellexit planè Aristoteles, dum asseruit modo omnino simili moueri: nihil ergo habent quod dextrum vocari possit, aut sinistrum, potius quàm aliud ex propria natura, sed per solam denominationem extrinsecam à viuentibus: quod cum habeat cælum, sequitur alio modo longè digniori conuenire ei positionum differentias.

Quòd verò conueniant cælo per similitudinem, aut metaphoram ad viuentia corpora, probatur, atque explicatur simul: quia sicut pars animalis dicitur dextra, in qua viget virtus motiua tor-

tius corporis, hoc est, efficacior in ea, quàm in cæteris partibus reperitur, ob meliorem illius partis temperiem, naturamque firmiorem, ad exercitium talis potentia: eadem similitudine pars illa cæli, in cuius situ imaginario intelligentia residet, & cui primò applicat suam virtutem, imprimendo ei impulsus, quo totum corpus moueatur, dicitur dextra, quia virtutem habet inchoandi motum, & ei opposita dicitur sinistra, & illa, quæ recipit virtutem, ut super eam fiat motus, vocatur sursum, & huius opposita deorsum; anterior tandem ea, quæ recipit virtutem impulsivam, continuandi motum, eique opposita posterior.

Quod ut intelligatur, scire oportet, intelligentiam mouentem cælum non esse in toto cælo præsentem, immò nec posse, quia limitata est secundum substantiam, & virtutem operandi, cum sit certum, non posse simul esse præsentem, & in cælo, & in terra. Deinde non sic mouet cælum, ut ad motum eius moueatur cum eo, quia nec id necessarium est ad mouendum cælum, neque consonum perfectioni eius: nam ideò anima mouens corpus mouetur per accidens cum eo, quia utpote forma informans, & pars eius ipsi affixa est. Sic igitur mouet totum cælum, ut vni tantum parti impulsus imprimat, & media hac parte impulsus, totum ipsum corpus impellat, ac moueat.

Denique statuendum est, hanc partem, cui primò impulsus imprimitur intelligentia, non esse vnâ aliquam determinatam, ac permanentem semper, sicut est in animalibus, immò semper variari, & vnâ alteri succedere, ita ut, quæ nunc est in Oriente, postea sit in Occidente, sed semper potest dici vnâ, ac permanens per æquiualentiam, & in hoc consistit similitudo inter dextrum cæli, & animalium. Atque ex hoc habetur, quòd illud dicatur per metaphoram. Ad hoc, solum ergo est verum, quòd intelligentia sit in parte determinata spatij imaginarij, cui correspondent successiuæ partes, primum recipientes impulsus ab ea, quibus mediis mouetur totum cælum, & hanc partem intelligimus Orientis nomine: quam, satis probabile est, includere partem aliquam etiam spatij imaginarij, cui correspondeat linea cæli æquinoctialis diuidens cælum medium, cum æquali distantia ab utroque polo: quia hæc linea distantissima est ab utroque polo: quo fit, ut partes cæli ei proximiores velocius moueantur cæteris omnibus, quia in eodem, aut æquali tempore maius longè spatium percurrunt. Est autem verosimile, ibi assidere per se præsentem intelligentiam, ubi perfectiorem causat effectum, similitudine agentis naturalis fortius agentis in partes sibi proximiores quàm in remotiores. Et ex dictis satis intelligitur modus, quæ mouetur ab intelligentia cælum, atque etiam
vbi

vbi sit dextera pars eius eo modo, quo ei conceditur habere dextrum, & consequenter cæteras differentias positionis, iam exposito.

Argumenta autem primæ opinionis solum probant, quod cælo non conueniunt differentię positionum ex natura rei, eo modo, quo conueniunt animalibus, hoc est, verè, & propriè, non tamen, quod per solam extrinsecam denominationem à viuentibus: nam præter extrema hæc datur medium nostræ sententiæ, nempe similitudo, vel metaphora à differentiis viuentium desumpta, cuius fundamētum ex natura rei cælo conuenit, & ex consequenti habere differentias positionum secundum eandem metaphoram conuenit ei ex natura rei, non tamen corporibus vitæ expertibus, in quorum natura nullum est tale fundamentum; & propterea per solam & puram denominationem extrinsecam eis conceduntur.

Doctrinam verò secundæ sententiæ efficaciter ostendimus falsam: testimonium autem allatum intelligitur planè ab Aristotele, non de animatione vera per veram informationem, quam repugnare probauimus intelligentiæ, & cælo, quia vtrunque est completa substantia.

Hæc omnia, quæ de differentiis positionum attulit Aristoteles in hoc capite præsentī, & à nobis superius iam allata sunt, respectu primi mobilis sunt accipienda: nam in inferioribus sphaëris, si proprio motu ab Occidente in Orientem mouentur, opposito modo se habebunt, secus si etiam ferantur in occasum proprio motu, de quo inferius.

CAPVT III.

Textus Aristotelis.

Quoniam autem non est contrarius circularis motus, circulari, &c.

Breuis expositio textus.

INtendit Aristoteles capite præsentī ostendere, quod cælestia corpora non vnum duntaxat motum habeant, sed plures. Diuiditur autem in duas partes, in quarum prima duo præsupponit: in secunda quatuor ex eis colligit. Principio igitur asserit, quod si motus cælestis haberet contrarium, necessarium foret, ostendere multiplicem esse, cum euidens sit, duo vt minimum esse: nam idem non est sibi contrarium. Sed cum contrario careat cælestis motus, non potest ex contrarietate ostendi, multiplicem esse; sed aliam esse rationem querendam, eamque difficilè inueniri, ob maximam distantiam cælorum, atque ob paucissima eorum accidentia

dentia nobis nota. Vt igitur aliam rationem inueniat, præsupponit primò, cælo deberi motum circularem, quod probat, quia ex moribus corpori debitis perfectissimus est circularis, quia initio caret, & sine, & solus potest esse perpetuus, vt octauo libro Physicorum probauit, sed perfectissimo corpori, quale est cælum, perfectissima quoque operatio debetur, cum esse sit propter operari: ergo motus cælo debitus circularis esse debet, & non alter.

Secundò præsupponit, motum circularem conuenire non posse toti mundo, sed necessariam fore, vt aliquod corpus ex inferioribus quiescat, & circa illud motus circularis fiat, quia sicut motus rectus est de vno in alterum locum, pariter circularis debet circa aliquem locum versari, & consequenter circa corpus, quod quidem sit quasi centrum, circa quod versetur idemmet circularis motus: hoc autem corpus quietum non potest esse eiusdem naturæ cum cælesti; nam si de natura cæli foret, violenter quiesceret in loco inferiori, quia ex propria perfectione postulat sedem supra cætera corpora: deinde si in loco inferiori quiesceret naturaliter, ad eundem naturaliter moueretur, siquidem corpus quodcunque naturale eam petit sedem per motum, in qua quiescere congruit propriæ naturæ: sed non potest ad inferiorem locum naturaliter moueri, cum naturale ei sit, moueri circulariter, & vni corpori vnus duntaxat motus naturalis conuenire potest: ergo necessariò fatendum est, non naturaliter ibi, sed violenter quiescere. Vnde sequeretur, talem eius quietem non esse sempiternam, ac proinde nec motum circularem cæli, cum non possit nisi circa tale corpus quiescens in medio mundi fieri: efficaciter ergo probatur, corpus in medio mundi quiescens, circa quod cælum moueri debet, alterius naturæ esse à cælesti, ab eoque distinctum, & corpus hoc immobile permanens, & medium mundi vocatum est terra, circa quam mouetur cælum, & ecce tibi probatum, ex vi motus circularis cælestis præter cælum, dari in mundo terram.

Ex quo tria colligit Aristoteles, primò quòd si datur terra, necesse sit dari ignem, quia contrarius illi est: dato autem vno contrariorum in natura rerum, necesse est dari alterum, quod certè non puto necessarium, nisi spectata perfectione vniuersi, quæ eiusmodi contraria postulat, non solum tanquam partes proprias, sed in ordine ad finem, cuius gratia conditum est. Secundo, colligit ex positione terræ, & ignis dari necessariò, aquam, & aërem, quia extremis elementis positis, eadem perfectio vniuersi exigit dari elementa media, quæ vtrique extremo contraria sunt: nam aqua contraria est igni, & aër terræ. Corollarium tertium est, quòd

quod si dantur quatuor elementa inter sese contraria, necesse sit dari generationes, & corruptiones, & quidem perpetuas. Probat, quia contraria pugnant inter sese: ergo necesse est inuicem se destruere: ex mutuo verò eorum congressu, ac destructione consequitur mixtorum generatio, ut primo libro de ortu, & interitu vidimus; ergo necesse est, generationes, & corruptiones dari. Quod verò sint perpetuæ, ex mundi perpetuitate à se asserta octauo libro Physicorum sequitur, quia generationes, & corruptiones necessarias esse constar ad conseruationem mundi.

Vltimò, colligit intentum totius capituli, nempe corporibus caelestibus plures motus conuenire; quod sic probat. In agentibus naturalibus idem, in quantum idem, & eodem modo se habens, non potest varios effectus edere: si igitur vnus tantum daretur calorum motus, eodem modo se haberet semper, quantum ad productionem effectuum, eisdemque produceret semper: sed experimur maximam varietatem in effectibus singulis annis: nam vno tempore generationes vigent, neque vlla ferè res corrumpitur, alio verò paucissimæ generantur, & corrumpuntur quamplures: quam vicissitudinem non possent asserre caelestia corpora, nisi per accessum, & recessum planetarum, præsertim Solis: ergo necesse est præter motum diurnum proprios concedi planetis, ut huius vicissitudinis congrua ratio reddatur.

TRACTATVS PRIMVS.

De cal sium corporum influxu in inferiorem mundum.

EX vicissitudine generationum, & corruptionum sublunarium corporum, probauit Aristoteles capite præsentī, non vnum tantum habere motum caelestia corpora, sed multiplicem: quod (absque dubio) nullius momenti foret, si caelestia corpora nullum in inferiorem mundum influxum haberent: nullam enim vicissitudinem in effectus inducere possent, si effectrices eorum causæ medio motu nõ essent. Occasionē igitur præbuit sententia huius capituli, differendi de influxu eorum in inferiora corpora, & propterea tractatum de eo primum instituimus, in quo quatuor præcipuè examinanda proponimus, videlicet, an verum influxum, seu efficientiam habeant corpora caelestia circa inferiores effectus: quænam sit eis ratio, seu virtus, per quam talem influxum habent, & an motus talem eis virtutem agendi præbeat, vel solum sit conditio agendi per virtutem aliam ab eo distinctam, & quasi ei præsuppositam: & tandem si conditio sit motus, an omnino necessaria, ita ut sine eo nihil in inferiorem mundum agere valeant.

QVÆSTIO I.

An cœlestia corpora verum, & realem influxum habeant circa effectus in inferiori mundo editos.

Vetus fuit error Astrologorum, cuius meminit Diuus Thomas in 2. distinct. 15. quæst. 1. artic. 2. existimantium, nullam dari penitus substantiam spiritualement, sed solam corpoream, & cum ex alia parte sibi persuasum haberent, in primis Deum esse perfectissimam substantiam, deinde omnium substantiarum corporearum nobilissimas esse cœlestes, pro Diis eas habuerunt, ad quem errorem alluisse videtur Aristoteles, initio præsentis capituli, cælum Deum vocans, & cœlestia corpora diuina, atque etiam Plato eadem Deos appellare solitus est, vt adnotauit Diuus Thomas in huius capituli expositione. Posuit enim in Epiménide quosdam minores Deos, in quibus sphæras cœlestes enumerauit. Propterea consequenter loquuti, primum influxum eis tribuebant, independentem à quocunque alio, vnde non solum putabant inferiora corpora ab eis dependere in suis actionibus effectibusque producendis, sed in suo esse ab eisdem condito. Sed error iste euidentibus rationibus confutatur aliis locis, in quibus probatur, præter corpora dari spirituales substantias, quarum prima, à qua omnes accipiunt esse, virtutem operandi, & primum influxum omnium operationum, vocatur Deus.

Pro alio extremo refert Diuus Thomas quosdam alios omnem influxum, & effectum à corporibus cœlestibus circa inferiora auferentes. Quod videtur sentire Diuus Damascenus primo libro orthodoxæ fidei, cap. 6. vbi de corporibus cœlestibus sic loquitur: Nos autem dicimus, quod ipsa corpora non sunt causa generationum eorum, quæ generantur, neque corruptionis eorum, quæ corrumpuntur: sed generatio, & corruptio ad corporalia pertinent. Et ratione probari potest, quia nullum agens operatur, nisi in passum sibi approximatum, & vt illud sibi simile reddat, & iuxta propriam naturam, & conditionem: sed nihil horum reperitur in corporibus cœlestibus respectu horum inferiorum: ergo in ea non agunt. Minor probatur, quia non sunt approximata per se, cum maximè distent, nec per suam virtutem: hæc enim nequit ad inferiora peruenire, nisi per media corpora cœlestia, cum tamen ista non sint capacia caloris, frigiditatis, &c. Deinde nequeunt cœlestia corpora assimilare sibi inferiora in substantia, aut accidentibus, cum illa incorruptibilis sit, hæc contrariis careant, quorum oppositum inferioribus congruit. Denique natura, & motus cælorum constantes, & æquabiles omnino

omnino sunt: ergo ab eis nullus effectus contingens nullo casu eueniet, id verò inferioribus læpe accidit: ergo corpora cælestia non influunt in ea.

Veritas nihilominus certissima huius rei est, quòd cælestia corpora verum & realem influxum habeant circa inferiora, pluresque veros ac reales effectus eis imprimant, quod euidentibus experientis, omnibusque manifestis conuincitur: nam omnes imprimis experimur, Solem sua luce inferiora corpora calefacere, dealbare ceram, exsiccare lutum, pluresque alios effectus producere, quos non potest nisi stolidus negare, nec aliis causis tribuere. Videmus etiam Solis motum quadripartitam anni distinctionem asserre, quæ duo æquinoctia vere, & autumnò, ac totidem Solstitia, æstate, & hyeme complectitur, ac per vicissitudinem calorù, ac frigorù, rerum generationes, ac corruptiones efficere. Astra item suo congressu, ortuque, atque occasu sub certo quodam aspectu, sterilitatem, vel ybertatem terræ, tranquillitatemque maris, aut tempestatem cauare, & ad morbos inducendos, vel sanandos multum conferre, & idco plurimum à Medicis in eorù curatione obseruari, vt aperte docet Galenus 3. lib. de diebus criticis. Et tandem experientia docet, polum suo aspectu in magnetem influere, cum attrahendo specialèmq; influxum circa acum nauticam habere, quæ absque dubio sufficiunt, certissimum efficere influxum cælestium corporum in inferiora. Quem vt certissimum tenuerunt semper sancti Patres, præsertim Diuus Dionys. cap. 4. de diuinis nominibus, Diuus Augustinus 13. de Trinitate cap. 4. Diuus Basilus Homilia 6. Hexameron, & Diuus Thomas in 2. distinct. 15. quæst. 1. artic. 2. & cum eo cæteri Doctores Scholastici eadem distinct. vniuersique Theologiæ professores, nemine excepto, & tandem tota fermè Philosophorù antiquitas, præsertim Mercur. Trimegist. in Asclepio, Plato in Theocrito, Philo Judæus in libro de mundi opificio, & passim Aristoteles in libro de ortu & interitu, cap. 10. textu 15. & 16. lib. 4. de generatione animalium, cap. vltimo, 2. lib. physicorù, cap. 2. textu 26. & 1. 2. Metaphysicæ, cap. 6. textu 33. & 34.

Testimonium Diui Damasceni pro opposita sententia adductum, exposuit bene D. Thom. art. illo citato ad 2. dicens solùm voluisse auferre à corporibus cælestibus primū influxū indepēdentem ab alio, quem ille error eis tribuebat: quòd verò tanquam creaturæ quibus cum esse concessit Deus virtutem influendi & agendi in inferiorem mundum à se dependentem, verè influant, & plures circa corpora inferiora effectus producant, non intendebat negare.

Ad

Ad argumentum respondetur, licet corpora cælestia per se distantia sint à corporibus inferioribus, nihilominus per suam virtutem, quam per totum inferiorem mundum extendunt, dicuntur præsentia; vt tamen virtus eorum ad inferiora corpora deferatur, non est necessarium in intermediis produci qualitates, quæ producuntur in inferioribus, sed sufficit produci aliam, cuius capacia sunt, qua transeunte ad inferiora producat per eam illa alia, cuius eadem intermedia capacia non sunt, bene tamen inferiora.

Ad illud de assimilatione agentis concedendum est, finem agentis esse assimilare sibi passum, sed aut secundum formam substantialem, si sit agens vniuocum, aut secundum virtutem, aut aliquem effectum in virtute eius eminenter contentum; & licet priorem modum assimilationis non intendat, nec consequatur agens æquiuocum, intendit, & consequitur posteriorem, quem absque dubio consequuntur cælestia corpora per influxum, & actionem in inferiorem mundum. Denique licet nihil contingens vel casuale reperiatur in corporibus cælestibus, nec in modo agendi eorum per se considerato, sequuntur nihilominus casuales effectus circa hæc inferiora ratione causarum particularium, à quibus modificantur, & sæpè impediuntur influxus per se cælorum.

QVÆSTIO. II.

An cælestia corpora influant in inferiorem mundum per solam lucem, vel etiam per aliam virtutem.

NVllus, quem viderim, negat, quòd per lucem, tanquam per agendi rationem influant corpora cælestia circa hæc inferiora, quam sententiam, vt communem omnium statuit D. Thomas 1. part. q. 67. art. 3. ostendens, lucem non minùs esse actiuam qualitatem, quàm calorem, & ideò per eam agere cælestia corpora in inferiora, quod euidentis experientia conuincit: nam videmus lucem à Sole per medium effusam, non solum illuminare illud ac reliqua corpora, sed calefacere, & sæpè intensum calorem circa ea producere. Et propterea titulus quæst. hoc præsupposito, quærit, an solum per lucem, vel etiam per aliam virtutem operentur, in quo non est leuis difficultas: nam plures Philosophi per solam lucem agere sentiunt, cuius virtute effectus omnes eis attributos operantur, vt Picus Miran. lib. 3. contra Astrologos capite 5. & 6. Médina 1. libro suæ Parænesis, cap. 1. Georgius Agricola libro 4. & 5. de causis subterraneorum, & quidam alij, inter quos enumerandus videtur Pater Pereira, qui tom. 1. in Genes. libro 2. disp. aduersus Astrologos, capite 3. ratio. 4. quasi irridens alias qualitates occultas, quas in calo

ponunt, asserit nouitium inuentum, & ignorantie asylum esse. Sed diuerso modo hanc sententiam explicant prædicti Doctores, vt infra referam.

Probari potest testimonio Aristotelis, qui nullam aliam qualitatem, vel rationem agendi præter lucem concessit corporibus cælestibus in tota sua Philosophia: ergo præter mentem eius est, aliam ponere. Probaturs consequentia, quia si eam dari sentiret, aliquo verbo eam insinuaret. Probaturs etiam ratione, quia nemo agnouit talem qualitatem, nec ex effectu aliquo necessario colligitur, sed pro omnibus effectibus lux sufficit, non est ergo multiplicanda alia qualitas sine vrgenti necessitate. Antecedens probatur, quia cum lux, & calor cælestis sint qualitates superioris ordinis, cæteras omnes qualitates inferioris mundi sua virtute, & eminentia continebunt, & ex consequenti eas producere poterunt: quare non est alia pro eis producendis multiplicanda.

Secunda sententia præter lucem ponit in corporibus cælestibus alias qualitates, tanquam rationes agendi, per quas effectus alios, siue qualitates à calore distinctas producurt, quas influentias vocare solent. Hæc est communis iam in schola, & fuit Platoni propria, vt D. Damascenus testatur in libro de consolatione medicinæ, quam tenuerunt antiquiores, & grauiores scholastici, Diuus Thomas secundo lib. de cælo, lectione 10. & in 2. distinct. 1. 5. quæst. 1. artic. 2. ad 5. Albertus Magnus, quæst. 1. Bonau. dist. 14. quæst. penultima, Richardus ibidem, circa tertium principale, quæstione 5. ad 5. ibidem, etiam Maior quæstione 5. Ferrariensis 3. contra gentes ad caput 24. Abulensis in 3. lib. Regum, cap. 17. quæst. 9. Pater Toletus 1. lib. de generatione, quæst. 2. conclusionem 4. & Patres Conimbricenses, 2. lib. de cælo, cap. 3. quæst. 3. cum cæteris omnibus recentioribus, & hæc nobis tanquam vera placet. Probaturs primò, quia corpora cælestia generant in vltimis terræ visceribus (quæ non potest lux permeare, nec cælestis motus omninò attingere) aurum & argentum, & cætera metalla: ergo necesse est eis aliam virtutem, aut influentiam concedere, per quam talem effectum producere valeant. Antecedens probo, quia in visceribus terræ nulla potest dari, nec excogitari qualitas, vel virtus sufficiens ad hos effectus producidos longè perfectiores ipsamet terra, & aliis qualitatibus constantes, quibus eadem terra prorsus caret: ergo neque ab ea produci possunt, sed neque alia causa inferior excogitabilis est, à qua producantur (vt per se est manifestum) ergo à solis corporibus cælestibus generari possunt. Quòd verò non possit eos attingere lux, nec motus, probatur, quia impossibile est, tam ingentem terræ crassitatem peruadere, aut penetrare lucis radios. Quòd verò à quibusdam dicitur lucem quidem non penetrare densitatem illam

magnam,

magnam, bene tamen calorem ab eadem cum Sole multiplicatum, per terræ meatus, friuolum est, quia lux producta in superficie terræ, vel extensa ad aliquam eius profunditatem, valde limitatam habet sphaeram actiuitatis, ad quam possit extendere effectum caloris, & calor, quem intra hanc sphaeram producit, non habet tantam intensiorem, ut possit tam vastam molem penetrare, præsertim cum maximo sit ei impedimento intensa frigiditas terræ in densissimo corpore residens, & hæc omnia manifesta sunt experientia explorata: ergo insufficiens causa horum effectuum redditur, nisi ad cælestem influentiam à lumine, & motu distinctam confugiamus.

Secundo probatur duplici experientia, priori quidem, quia notum est, acum attritu magnetis confricatam trahi à cæli partibus polo vicinis, quam attractionem à luce non fieri manifestum est, quia nemo concessit luci vim attrahendi. Præterea talis attractio sit planè densa caligine, & acui ipsa in tenebroso loco posita, ut evidens nauigantium experientia docet. Ex quo planè colligitur, non solùm à luce non fieri, sed nec fieri necessario ex interueniente, aut deferente talem virtutem, & proinde necessario ponendam esse aliam à luce distinctam in astris. Experientia posterior est fluxus, & refluxus Oceani ex communi consensu Philosophorum à Luna procedentes, qui effectus, ut docet experientia, duobus temporibus sit, quibus à luce eius procedere repugnat, videlicet in interlunio, quando eiusdem Lunæ facies, quæ mare respicit, lumine destituta est, & Luna etiam in altero hemisphaerio existente, nec propterea talis motus aquæ his temporibus remittitur; signum igitur est, non à luce, sed ab alia eius virtute, aut influentia à luce distincta fieri.

Probatum tandem, quia receptum est etiam ab autoribus oppositæ sententiæ, corpora cælestia, atque influxus astrorum producere in inferioribus corporibus, non solùm calorem, sed frigiditatem, & cæteras qualitates primas, cum mixta, quæ eis constant, per se ab eis generentur: sed per solam lucem non possunt eas producere: ergo alia est necessario excogitanda qualitas, quæ sit eis ratio eas producendi. Huic efficaci argumento tribus modis respondent aduersarij: nam Picus Mirandulanus per lucem solùm calorem produci asserit; hunc verò calorem, quia cælestem, cæteras omnes qualitates primas eminenter continere, & ideo eas producere. Itaque lumen remotam causam earum esse censet. Hæc tamen solutio falsa probatur primò, quia evidens est, lucem à qua procedit calor, maioris esse virtutis, quàm calorem, cum eum producat tanquam causa æquivoca, à qua alij etiam effectus à calore diuersi procedunt: sed lux non potest producere omnes qualitates primas, sed solam,

calorem, neque eas proinde eminenter continet: ergo line fundamento dicitur, calorem eas continere, ac producere posse. Secundò, calor elementaris est eiusdem speciei cum calore producto à luce: sed nec ille continet, nec producere potest ceteras qualitates primas: ergo neque iste. Euidens est consequentia, & antecedens probatur, quia calor elementaris intenditur à calore Solis (vt probat experientia) in aëre calefacto à Sole: ergo sunt eiusdem speciei; nam quod specie differt ab alio, non potest ab eo intendi, cum sit diuersæ naturæ, & conditionis. Et vrgeri potest argumentum, quia qualitates istæ sunt limitatæ perfectionis: ergo nulla earum potest producere effectus contrarios: soli enim Deo, tanquam vniuersalissimæ causæ, in quâ omnia continentur, id concedi potest.

Propterea alio modo respondet Agricola, videlicet, solam lucem, in quantum est virtus vnius Planetæ, vt Solis, causare calorem, & in quantum virtus alterius, frigiditatem; & pariter ceteras, vt est virtus aliorum. Sed non est minùs falsa hæc solutio. Primò, quia de auro, & argento probauimus non posse à luce produci vilo modo in terræ visceribus, quia naturaliter est impossibile, lucem peruadere profunditatem terræ densissimam; quibus argumentis eodem modo conuincitur, id non posse efficere, siue accipiatur prout est virtus vnius, vel alterius astri, cum eadem sit repugnantia, vt per se est manifestum. Secundò, quia nullum est fundamentum, ad distinguendum specie lumen diuersorum astrorum, etiamsi nec totum, nec partem eius à Sole emendicent, vt ex aliis effectibus eiusdem rationis à lumine omnium causatis constat. Ergo falsum erit eidem lumini tribuere effectus specie diuersos, prout virtus diuersorum astrorum. Accedit testimonium Aristotelis 4. libro de partibus animalium, capite 5. in medio, asserentis, plenilunij noctes calidiores esse propter pleniorum lucem. Quod verum esse non potest, nisi talis excessus caloris à luce Lunæ, aliorumve astrorum productur; quare falsum est, quòd lux tantum sit productiua caloris, vt est virtus Solis aliarumve qualitarum, vt est virtus aliorum astrorum.

Nec tandem minùs est falsa solutio Commentatoris 2. libro de cælo, commento 42. & aliorum, qui eum sequuntur: nempe, cælestia corpora per se tantum producere calorem; frigiditatem verò, & ceteras tantum per absentiam lucis, quod est per accidens, eas producere. Probatur verò falsa. Primò, quia non minùs per se pertinet ad vniuersalem causam rerum corporarum, ceteras, qualitates primas producere, quàm calorem, cum omnes sint dispositiones per se ordinatæ à natura ad introductionem formarum materialium, & compositorum generationem: ergo absurdum

absurdum est, dicere, hunc tantum per influxum, illas vero per absentiam producere, aut per accidens. Secundò, quia communis est omnium Philosophorum sententia, cælestia corpora sua virtute, atque eminentia elementa continere: ergo continent primas omnes qualitates eorum: quare per se possunt omnes producere, & cum non possint per solam lucem (ut probauimus) necesse est, aliam virtutem à luce eis concedere, per quam operentur.

Ad testimonium Aristotelis respondeo, quòd licet expressè non fecerit mentionem alterius qualitatis à luce; ex his tamen, quæ de influxu cælestium corporum docuit, colligitur, eam tanquam necessariam posuisse, ut ex testimonio supra à nobis allato constat. Ad argumentum concedimus luci excellentiam super cæteras qualitates: sed non tantam, ut sua virtute contineat omnes qualitates primas, hoc enim repugnat accidenti alicui determinato, quare repugnat etiam eas producere: immò cui-cunque alteri qualitati necessario ponendæ in astris repugnat continere omnes, sed plures ponendæ sunt in diuersis astris, pro his, cæterisque effectibus diuersis producendis in mundo inferiori, quas concedimus nobis esse occultas, & solum per effectus cognosci à posteriori, sicut virtutem magnetis, & alias horum inferiorum corporum cognoscimus per effectus, & modus iste cognoscendi sufficientissimus est ad eas ponendas, eoque conuicti posuerunt eas omnes ferè Philosophi. Quæ omnia sic intelligenda sunt, ut pro effectibus accidentalibus producendis lux, aliæque influentiæ occultæ ponantur, à quibus, tanquam à præcipuis causis, atque proximis, procedant; nam substantiales effectus, quos cælestia corpora in mundo inferiori producunt, solum ab his qualitatibus, tanquam ab instrumentis eorum producuntur; à substantiis verò eorum, tanquam à causis præcipuis, mediis formis substantialibus, tanquam rationibus, aut virtutibus agendi.

QVÆSTIO III.

An motus circularis cali sit ei ratio agendi in inferiorem mundum, vel solum conditio.

Ostendimus lucem, & alias occultas qualitates (quas influentias vocant) esse cælo rationes agendi, sed an sint rationes agendi sufficientes per se, & ideo completæ, vel compleantur, & sufficientes fiant per motum, & ita motus sit quasi partialis virtus, seu ratio agendi, aut solum sit conditio applicans easdem rationes agendi per se sufficientes ad corpora, circa quæ operaturæ sunt, non est certum, & propterea vertitur in quæstionem.

Prior igitur sententia tenet, esse quidem motum rationem, seu virtutem agendi cælo, saltem partialem, ita vt ex ea, & luce, siue alia occulta virtute, vel influentia, fiat vna ratio, aut virtus agendi totalis, & non esse solam conditionem: sic Bañes 2. lib. de generatione, cap. 10. quæst. 1. conclusione 4. & videtur idem sentire D. Thom. & complures alij ex eius discipulis, quæstione sequenti referendi. Probatur testimonio Aristotelis multis locis, præsertim 8. lib. Physicorum text. 53. docentis, omnes motus inferiores reducendos esse ad motum cæli, tanquam ad primum, qui est cæterorum causa: esse autem causam plus dicit, quàm esse conditionem, & idem est, ac esse rationem, seu virtutem agendi; ergo censet ita se habere respectu cæli: sed specialiùs, & expressius 2. libro de cælo, cap. 7. text. 42. vbi hæc verba legimus: *Calor autem ab ipsis, & lumen generatur attrito aëre ab illorum latione, nam natura aptus est motus ignire & ligna, & lapides, & ferrum;* quibus aperte docet, motum cæli aliquando ignire lapidem, & ferrum, dum per aërem mouentur, vel in eo atteruntur: quod non potest esse verum, nisi sit ratio, aut virtus agendi cælo: nam ignire, vel calefacere, solum dicitur illud, quod ignem, vel calorem producit, & solum producere dicitur, quod causa ignis geniti, vel caloris est, non quod est sola conditio. Sentit ergo Aristoteles, motum cæli non esse solam conditionem, sed causam, vel causandi rationem. Et probatur ratione satis efficaci ex eisdem verbis Aristotelis elicitæ, hoc modo: motus est causa caloris in corporibus calidis, quæ eo ipso, ac mouentur, incalescunt (vt euident experientia docet) sed non potest excogitari alia causa, vel virtus agendi, à qua producatür talis calor præter motum; ergo non potest negari, quod sit ratio agendi non solum cælo, sed aliis corporibus inferioribus. Probatur minor, nam dum per aërem quantumlibet frigidum, sagitta proicitur, vel nos ambulamus, illa, & nos incalescimus, & causa noui caloris producti non potest esse calor aëris, cum præsupponatur nimis frigidus; sed nec calor proprii corporis moti potest nouum calorem in se causare, quia calor non potest se ipsum intendere virtute propria, alioquin operaretur vltra propriam perfectionem se perficiendo. Relinquitur ergo, non dari aliam causam noui caloris producti præter motum, quare necesse est, fateri esse rationem seu virtutem agendi, & non solam conditionem. Et vrgo argumentum, quia cælum est quasi instrumentum intelligentis: instrumentum verò non operatur, nisi per motum, quo mouetur à præcipuo agente, & sæpè locali, vt patet de serra, & aliis instrumentis artis: ergo non habent aliam rationem agendi præter motum, quæ erit ratio agendi cælo. Et certè si motui cæli denegetur esse rationem causandi, nec potest esse maioris virtutis, nec possunt

possunt inferiora corpora magis dependere ab ipso, quam à motu aliorum corporum inferiorum, quod absurdum est.

Nihilominus probabilior longè sententia negat, motum cæli esse ei rationem agendi totalem, vel partialem, & solum concedit, esse conditionem applicantem virtutem actiuam cælorum ad diuersa loca, & corpora horum inferiorum. Ita Vallesius de sacra Philosophia, cap. 31. pagin. 263. & lib. 4. controuersiarum med. cap. 3. Toletus 2. lib. de generatione, quæst. 12. fundamento 1. & omnes recentiores ferè. Probatum primò, quia cælum, etiamsi non moueatur, est ens completum, habens virtutes operativas, sicut habent cætera corpora completa inferiora, ut ignis, vel aqua, immò longè efficaciores: sed inferiora corpora non indigent motu, pro ratione, seu virtute agendi etiam partiali, sed sine illo possunt agere in quodlibet subiectum capax intra propriam sphaeram actiuitatis existens, ut experimento constat; ergo nec cælum indigebit.

Secundò, quia motus localis, quicumque ille sit, solum habet esse viam ad acquirendam localem præsentiam, vel modum eius: sed constat, localem præsentiam actiuam non esse, sicut extensio localis, vel quantitas actiua non est, nec ideò posse effectum aliquem producere; ergo nec motus localis, qui est quasi fieri eius, ullam potest virtutem habere producendi effectum aliquem circa corpora. Et virgeri potest argumentum, quia effectus debet contineri aliquo modo in virtute causæ: sed qualitates, aut effectus alios productos per lumen, aut cæteras influentias non potest continere motus localis, cum sit res imperfectissima; ergo nec esse rationem, seu virtutem eos producendi. Probatum tandem, quia certum est, Solem quiescentem in bello Iosue, atque etiam post diem iudicij, illuminasse, & illuminaturum inferiora corpora, & consequenter, tunc eadem calefecisse, & calefacturum: ergo non habet motum pro ratione agendi totali, vel partiali: nam si haberet, non posset sine illo effectum aliquem producere. Accedit, probabilem esse & D. Thomæ expressam sententiam (ut mox videbimus) asserentem, cælum Empyreum influere in inferiora corpora, aliquem effectum in ea producendo, quod tamen immobile esse ab omnibus ipsum ponentibus asseritur: ergo motus non est ei ratio agendi, nec proinde cæteris corporibus cælestibus.

Vltimo argumento respondere oportet, (nam pro soluendis cæteris infra ad cap. 7. specialis controuersia erit agitanda) & primò negandum est, cælum esse instrumentum proprium intelligentiæ, quia quidquid cæleste corpus in hæc inferiora producit, siue ut præcipua causa, siue solum disponendo subiectum ad recipiendum effectum ab altera, propriæ virtuti eius, ut luci,

vel alteri influentiæ proportionatum est, vt de calore, quem media luce, & aliis qualitatibus, quas mediis aliis astrorum virtutibus causat, manifestum est, quia in eisdem virtutibus continetur, quare nec eas excedunt, neque ideò respectu earum, instrumentum intelligentiæ esse potest cælum, aut motus illius. Deinde etiamsi esset instrumentum, non deseruiret ei motus, ab intelligentia causatus, pro ratione agendi, sicut fortè contingit in instrumentis artis, sed solum pro conditione applicante, cum ex se habeat cælum sufficientem virtutem ad eos effectus. Vnde non est maioris virtutis motus cælestis, quàm aliorum corporum inferiorum, nec habent maiorem dependentiam inferiora corpora ab eo, quàm à motu cæterorum, tanquam à virtute, seu ratione agendi, quia neuter est ratio agendi, tanquam à conditione verò multò magis dependent, quia maiores, ac illustriores virtutes afferunt, à quibus magis dependent, & hac ratione maioris virtutis censetur.

QVÆSTIO IV.

An cessante motu cælesti, cessare debeant motus omnes, actionesque inferiorum corporum.

Certum est, actiones intentionales, & quæ non ordinantur ad generationem substantiarum, vt illuminationem, & productionem specierum intentionalium, non necessariò cessare, cessante motu cæli, sed permanere posse, ac permanuras esse post diem iudicij, cælo quiescente. Ita Diuus Thomas expressè, de potentia quæstione 3. artic. 8. & cum eo cæteri omnes statim referendi, cuius egregiam rationem reddit, quia actiones istæ minùs materiales sunt, & propter esse diminutum, & intentionale spiritualibus similes, nec ad materiales generationes substantiarum ordinatæ: ergo licet à cælo mundum illuminante depeendant, non tamen ab eius motu, sine quo illuminare posse constat; quare eodem cælo quiescente perseuerare possunt in mundo inferiori. Solum ergo habet locum præsens controuersia de actionibus, ac moribus corporum inferiorum pertinentibus ad motus eorum, & ordinatis ad generationem, & corruptionem substantiarum, an omninò cessarent, motu cæli cessante. De quibus apud omnes etiam constitutum reperio, necessarium esse motum cæli, vt actiones, & motus isti exerceantur à corporibus inferioribus, prout oportet ad conseruationem, & propagationem totius inferioris mundi. Cuius ea est ratio, quia nisi moueretur cælum, eodem semper modo illuminaret, eodem semper modo influeret, calorémque, aut frigus, aliásque qualitates, aut secundum excessum, vel defectum

defectum produceret semper, nec posset influxus eius, secundum distributionem accommodatam, communicari corporibus; illuminante verò eodem modo semper Sole, vel excessum caloris eis imprimeret; quo comburerentur, vel ita remissum, cum quo neque sibi similes effectus edere possent, per quos conseruarentur species, nec proprium eorum temperamentum dici posset consistere; necessaria igitur est alterna vicissitudo illuminandi, calefaciendi, atque influendi, quam constat sine motu non posse à cælo præstari; sine qua etiam vicissitudo generationum, & corruptionum, omniumque corporum actionum, & motuum, quam singulis annis conspiciamus, cessaret; nam cum plantarum germinatio, fructuum, segetumque productio, potissimum dependeat ex caloris, aliarumque qualitatum incremento, quod non potest prouenire à Sole, & aliis cælestibus virtutibus, nisi per motum approximatis, sit pro hac vicissitudine, & varietate generationum, corruptionum, & motuum, tantoperè necessaria ad bonum statum consistentiæ, atque conseruationem inferioris mundi, necessarium esse motum cælorum, & ex consequenti cessare eo cessante. In eo igitur sensu duntaxat locum habet quæstio præsens, nempe, an tanta sit naturalis dependentia corporum inferioris mundi à motu cælorum, ut eo cessante nullum motum corporeum habere possint; neque vlla possit substantiarum generatio, aut corruptio, vel qualitatum corporum productio ad eam ordinata contingere.

Et prior sententia asserit, omnes penitus cessare, cessaturisque post diem iudicii, cælo quiescente. Ita Simplicius, quem refert D. Thomas 2. libro de cælo, lectione 4. ad finem, Capreolus in 2. distinctione 14. Soncinas 12. Metaphysicæ, quæstione 11. Ferrariensis 4. contra Gentes, capite ultimo, Sotus in 4. distinctione 48. quæstione 2. articulo 2. (nisi ego fallor) Diuus Thomas 1. libro de cælo, lectione 4. in fine, de potentia quæstione 5. articulo 8. de malo, quæstione 3. articulo 1. in 2. distinctione 11. quæstione 1. articulo 6. ad 3. in 4. distinctione 48. quæstione 2. art. 2. & 4. lib. contra Gentes, ca. ultimo. Probant ex duplici vniuersali principio. Arist. primo quidem 1. l. Metaphysicæ, c. 2. text. 4. hisce verbis: *Nescimus autem verum absque causa, unumquodque verò id ipsum maxime aliorum est, secundum quod aliis uniuocatio inest, ut puta ignis calidissimum, etenim ceteris hic est caliditatis causa. Quare verissimum est etiam id, quod posterioribus, ut vera sint, causa est.* Quod communiter circumfertur sic: *Primum in unoquoque genere est causa seu mensura cæterorum.* Posteriori verò 2. lib. Physicorum, c. 8. text. 75. Quod autem, inquit, lationum circulatio prima sit, manifestum est. Ex quibus colligitur, motu cæli cessante,

nullam prorsus cæterorum permanere, quia cessante causa, præsertim vniuersali, cessat necessariò effectus. Deinde ratione: Primò, quia causæ essentialiter subordinatæ ita se habent, vt inferior agere non possit sine concurrenti superioris, cum essentialiter ab ea dependeat in agendo. Quod etiam docuit Aristoteles 2. Metaphysicæ cap. 2. text. 6. in hæc verba: *Quare si primum nihil est, omnino nulla causa est.* Sed inferiora corpora essentialiter subordinantur cælestibus, quod vsque adeò verum est, vt sæpè affirmet D. Thomas, esse quasi eorum instrumenta, quæ proinde non operantur, nisi mota ab eis: ita enim se habet in mundo magno motus cæli respectu aliorum, sicut in paruo (qui est homo) se habet motus cordis respectu aliorum membrorum: ergo non possunt quidquam agere, nisi mota à cælo, & ideo cessabunt motus omnes, actionesque inferiorum corporum motu cæli cessante, quemadmodum cessante motu cordis, cessant motus omnes aliorum membrorum. Quod expendens, atque confirmans Aristoteles 8. libro Physicorum, capite 1. text. 1. asseruit motum cælestem esse quasi vitam cæteris corporibus in natura existentibus, & 1. libro Meteororum, capite 2. *Oportere inferiorem mundum continguum, seu coniunctum esse superioribus rationibus, ut inde vis eius vniuersa regatur.* Et Plato in Theæteto, *Nihil aliud, inquit, per catenam, quàm Solem Homerus intelligit, quia quousque Solis circuitus se extendit, omnia tam deorum, quàm hominum sunt, atque seruantur.* Alludens ad auream catenam, per quam Homerus octauo Iliados, harum omnium causarum nexum explicabat.

Secundò probat Iauellus, quia necessarium est, omnem motum reduci in aliquod principium immobile: ergo necessarium quoque erit, omnem actionem generabilium corporum reduci ad aliam causam ingenerabilem: sed non est alia præter corpus cæleste: ergo ad illud tanquam ad vniuersalem causam reduci debet, ex cuius motu dependere necessarium est. Minorem probat, quia talis causa ingenerabilis non est intelligentia creata, quia hæc non potest immediatè transmutare materiam ad formam, neque etiam prima omnium causa, nempe Deus, quia prima causa non agit per se immediatè in hæc inferiora, sed per causas medias: ergo erit cælum; tum quia non exeat alia; tum etiam, quia cælo dedit virtutem, & motum, quibus mediis in mundo inferiori operetur, cum particularibus causis concurrens ad productionem suorum effectuum: motu igitur, & concursu eius cessante, necesse est subito cessare omnem actionem inferiorum agentium.

Tertio, quia mouere aut agere in motum proprium est primi agentis, & propterea cæteris repugnat, vt Aristoteles 8. lib. Physicorum sæpè repetit, & D. Thomas docet 1. part. quæst. 3. artic. 1.

ergo

ergo inferiora corpora mouere, aut agere nequeunt, nisi mota à primo corpore, non moto ab alio corpore, sed à solo spiritu: sed primum corpus mouet inferiora, per proprium motum ab intelligentià causatum: ergo nequeunt habere motum ullum eo cessante. Et vrgeri potest argumentum, quia post diem iudicii, nec motus, nec generationes erunt in inferiori mundo; cuius nulla potest alia ratio conueniens assignari præter cessationem motus celestis.

Posterior sententia negat, motus omnes, actiones, & generationes cessare cessante cælo; quam sequuntur Alexander, ut refert D. Thom. 2. lib. de cælo, lect. 4. ad finem, Scotus in 2. dist. 14. quæst. 3. Richardus distin. 2. circa tertium principale, quæst. 3. Durandus distin. 15. quæst. vltima, Argentina dist. 14. artic. 2. Iuxta quam sit prima assertio: Corpora sublunaria in suis actionibus, & effectibus producendis, non dependent per se, & intrinsecè à celestibus, nec sunt causæ eis essentialiter subordinatæ. Hæc est ex mente omnium, quos pro sententia posteriori retulimus. Tenet noster Suarez tomo 5. Metaphysicæ, disputatione 2. sectione 1. num. 10. & placet omnibus ferè recentioribus, quamuis contrarium teneant Iauellus 11. Metaphysicæ, quæst. 13. Soto 2. lib. Physicorum, quæst. 4. conclusionem 1. & in 4. dist. 48. quæst. 2. artic. 2. neque ab ea dissentit Ferrariensis 4. contra Gentes, cap. 97. §. Aduertendum tertio. Probatur primò, quia vel inferiores causæ sunt sufficientes, atque completæ in suo ordine particulari, & proximo, vel insufficientes, quarum defectus à cælo suppleatur; si hoc postremum detur, planè sequitur, quòd licet à cælo dependeat, sicut vna causa partialis ab altera, non tamen ei subordinentur: causæ enim essentialiter subordinatæ, quælibet est sufficiens in suo genere, licet inferior dependeat à superiori. Probatur consequentia, quia à natura totaliter, sed partialiter dependebit; si verò dicatur primum, sequitur non indigere auxilio, vel concursu cælorum, ad producendos proprios effectus, & ideo non subordinari eis essentialiter: probatur consequentia, quia non est excogitabile, quid eis præstare valeant, quo indigeant.

Et si dixeris, sufficientes quidem esse in suo ordine, in hoc sensu, quòd sufficientem adhibent concursum, particularem & proximum, sed cum adhibere non valent nisi cælo cum eis concurrente: neque erit absolute loquendo sufficiens concursus particularis earum, quamuis in ratione particularis sit sufficiens, nisi vniuersalis cælorum accedat. Contra hoc sic arguo, quia si concursus particularis sufficiens est vt particularis, vel dependet à concursu cælesti in esse, & conseruari, vel non dependere est impossibile, quia si particularis causa sufficiens est ad eum præstandum: ergo erit sufficiens ad esse eius, & ex consequenti ad

ri ad conseruationem, supposito concursu primæ causæ, à qua certum est vtroque modo dependere: quare non apparet vlla necessitas dependendi ab influxu cælesti, vel ei essentialiter subordinari. Secundò, quia ideò inferiores causæ subordinantur primæ essentialiter, quia non solum dependent in suo esse ab ea, sed accipiunt omnem virtutem operandi, & omnem concursum, vt virtus earum actiones, & concursus fiant, & consequenter à Deo, sine cuius influxu nec fieri, nec conseruari possunt. Sed euidentis est, non sic dependere à cælo, quia per solum concursum diuinum, & proprium ab eo simul factum, & conseruatum consistere potest virtus operandi earum, actio, & concursus sufficiens in suo ordine ad productionem effectus: ergo denegandum omninò est, quòd essentialiter subordinentur. Et vrgeri potest argumentum hoc modo: si particulares causæ non acciperent esse, virtutem operandi, operationes ipsas, atque concursus à Deo, & denique conseruationem horum omnium, sicut possent sine illo esse, & conseruari, sic possent sine eo concursum proprium præstare, & ex consequenti effectum producere, qui ab eis solum posset sufficienter dependere, & propterea non essent tales causæ essentialiter Deo subordinatæ: sed euidentis est, non accipere à corpore cælesti proprium esse, & virtutem operandi, & euidentius non fieri à cælo proprium concursum, & actionem earum, sed à solo Deo accipere esse, & virtutem operandi, & ab eodem concurrente cum propriis virtutibus præstari sufficienter, atque conseruari proprium concursum, propriamque actionem ex se sufficientem ad talem effectum: ergo nec dependent essentialiter in proprio esse, propriisque operationibus à cælo, nec sunt causæ essentialiter ei subordinatæ.

Secunda assertio est, cessante motu cæli, non cessarent eo ipso motus inferiorum corporum, nec omninò generationes viuentium quorumcunque, quia eandem prorsus virtutem operandi habent corpora cælestia sine motu, & cum illo, & per motum solum acquirunt maiorem approximationem diuersarum suarum partium, ad hæc, vel illa corpora inferiora: ergo cessatio motus non potest tollere, quin per virtutem agendi in eis permanentem operentur, circa corpora omnia intra spheram actiuitatis eiusdem virtutis contenta, & iuxta mensuram eius imprimere eisdem proprijs effectus. Antecedens probò, quia nihil virtutis effectiue in inferiora accipit cælum ab intelligentia mouente: hæc enim, iuxta communem sententiam Diui Thomæ 1. parte, quæst. 10. artic. 2. & 3. nihil potest corporibus imprimere præter motum localem, aut etiam impulsu ad illum: per motum autem localem, solum potest acquiri præsentia, vel nouus præsentia modus: ergo eadem semper perseverat virtus intrinseca effectiua

Actiua corporum cælestium; maximè cum hæc, vtpote naturalis potentia, conueniat corporibus ex propria forma, vt in aliis constat. Quod multis exemplis ostendi potest: nam cælo quiescente non tolleretur, quin Sol illuminaret inferiorem mundum, eumque calefaceret, atque etiam quin Luna humectaret, & moueret mare, & pari ratione per alias virtutes occurrat alios effectus produceret, per quos eadem inferiora corpora alteraret.

Secundò probatur, quia magnes etiam localiter immotus ferrum attrahit, & ignis intra spheram suæ actiuitatis calefacit contenta corpora, ad quos effectus, & motus edendos, cælesti non indigent, per quem nec augentur virtutes eorum, nec approximantur ad alia corpora; nec videtur excogitabile, quid aliud à motu cæli percipiant, sine quo eisdem effectus, ac motus edere non possint. Et pari ratione de cæteris virtutibus, etiam vitalibus fatendum est: per quas quædam corpora sibi familia generant, in eisdem generationibus cauſandi perseveraturas, cælo quiescente, cum ex se sint sufficientes ad tales effectus producidos, nec aliquid per motum cælestem accipiant à corporibus cælestibus, quod sine motu accipere nequeant. Virgèrique potest argumentum ex his, quæ in bello Iosue, Iudicum 10. cessante motu cæli contigerunt: mouebantur enim homines, & animalia, sicut prius, & id quidem sine nouo miraculo, nec ex virtute prioris, siquidem huius nulla est necessitas, nec fundamentum; ergo necessarium non est; motus, & actiones phisicas cessare, cælo quiescente.

Probaturn tandem, quia inferiora corpora non sunt essentialiter subordinata cælestibus, vt probauimus, sed prorsus accidentaliter, quantum ad aliquem modum exercendi has, vel illas operationes cum tali vicissitudine, aut varietate, aut etiam, quantum ad diuturnam perseverantiam in eis; ergo non dependent in eis exercendis simpliciter ab eis, vel eorum motu. Et virgeri potest: nam operationes minus materiales, vt illuminationes, sensationes internæ, atque externæ, operationesque obiectorum externorum, per quas immutantur sensus specièsque in eis produciuntur, hisque similes perseverare possunt, ac de nouo procedere à suis causis proximis, motu cæli cessante iuxta Diuum Thomam, & omnes opinantes: ergo non subordinantur ei essentialiter corpora, à quibus procedunt. Ex quibus efficaciter satis probatur, nec in cæteris motibus essentialiter ei subordinari, cum essentialis subordinatio communis sit omnibus, vt patet de subordinatione respectu primæ causæ. Quod enim minus sint materiales istæ, nil refert, siquidem intra genus phisicum, & materiale continentur, & solum dicuntur intentionales motus, & res minus materiales, quia intra genus materialium rerum magis diminutam

diminutum esse habent, quod impossibile est tollere dependentiam, vel subordinationem; si semel ponatur essentialis: non est igitur talis censenda, & propterea neque censendum, cessaturos motus, vel actiones sublunarium corporum, cælo quiescente.

Assertio vltima: cessante omni influxu cælesti, adhuc non cessarent motus omnes, nec generationes rerum, sed cessarent omnes generationes viventium, & aliorum, quorum vel non datur causa particularis inferior per se, vel non omnis sufficiens. Prior pars sequitur efficaciter ex prima assertione, quia si inferiores causæ non subordinantur essentialiter cælo, sequitur, quod sufficientes sint ad producendos proprios effectus, neque aliquid eis in proprio ordine causandi deficiat, ac proinde non indigebunt aliquo cælesti concursu, sed cum solo concursu primæ (cui essentialiter subordinantur) poterunt eos naturaliter producere. Sed adhuc eam probō sic: Plures sunt causæ inferiores, habentes proportionatam, ac sufficientem virtutem ad proprios effectus producendos. Vt ignis sufficiens est combustionis, & alterius ignis causa: ergo præter generalem concursum Dei, non indiget alio, ad talem actionem, & effectum producendum. Probatur consequentia, quia ex concursu primæ, ac proximæ causæ sufficientis resultat vnum integrum concursum, atque completum & perfectum, cui nihil deesse potest ad producendum effectum sibi similem in specie; neque est intelligibile, quid ei præstare possit corpus cæleste: quare etiamsi concursus eius omnino cessaret, non cessarent tales causæ à generatione, vel productione suorum effectuum. Probatur deinde posterior pars; quia generatio viventium indiget calore Solis, quia si non foueatur seminalis virtus, non valebit materiam disponere, neque organizare, & ex consequenti nec vnionem animæ cum eo attingere; & propterea de humana generatione loquens Aristot. 2. lib. Physicorum cap. 2. textu 26. verba illa protulit; *Sol, & homo generant hominem*, quasi dicat, non posse solum hominem perficere generationis opus, nisi à Sole adiuuetur, eiusque calore foueatur. Par est ratio de cæteris generationibus viventium, immò argumentum à maiori satis efficax ex humana generatione desumitur; probans de eis, quia si animal perfectissimum, quale est homo, habens perfectiorem longè animam, & iuxta perfectionem eius generatiuam potentiam valdè perfectiorem, non potest sine concursu cælesti hominem sibi similem generare, longè minùs poterunt imperfecta animalia generare sibi similia in propria specie: eo igitur cessante, cessabunt omnes generationes viventium, eorum præsertim, quæ non habent causam particularem, à qua disponatur materia, & organizetur corpus pro introductione animæ, qualia sunt, quæ ex putri.

putri materia generantur, ad quorum generationem necesse est, cælestia corpora concurrere, materiam disponendo loco particularis causæ, atque etiam Angelos, applicando actiua passiuis. An verò introductionem animæ, & vnionem eius cum corpore, ac proinde generationem substantialem attingant cælestia corpora, inferius definietur.

De pluribus etiam aliis generationibus non viuentium eadem ratione conuincitur, cælo non influente, non posse naturaliter permanere, vt de generationibus metallorum, in visceribus terræ, quæ cum non habeant aliam causam particularem per se, vel certè non sufficientem, per lucem, & calorem Solis, aliàsque cælestes influentias producuntur per se. Quare necesse est, his influentiis penitus cessantibus, cessare.

Addendum tamen est, quòd cessante motu cæli, omnique cælorum influxu, paulatim, ac post breue tempus, cessarent quæcunque actiones, generationes, & motus inferiorum corporum, quia omnia corpora mixta corrumpèrentur, & esse delinerent, maximaque ex parte in elementa abirent: nam si Sol, dum mouetur, tam intensum producit calorem in mundo inferiori, quantum magis intensum produceret, in eadem dispositione perseverans, cessante motu? quare temperamentum mixtorum destrueret, ipsaque dissiparet, & maxima ex parte in ignem conuerteret: ex opposito verò, partes inferioris mundi, quas sine motu non posset attingere, conuenienti calore destituerentur, & præ nimio frigore, & humore deficerent à proprio, ac naturali temperamento, & ita destruerentur, & in aquam, vel terram abirent; & propter hæc merito vocatur motus cæli quasi horum inferiorum vita, & conseruatio, quia ad temperandos cælestes influxus, dispersiendosque, pro cuiusque corporis inferioris natura, atque indigentia, vt ita possint singula, atque etiam collectio omnium, ex quibus integratur suo modo vniuersum, consistere, & in sua naturali dispositione conseruari, necessarius est, vt in principio huius controuersie, ex communi omnium Philosophorum consensu statuimus.

Ad testimonia Aristotelis, adducta pro priori sententia, respondemus, motum cæli esse primum omnium; illud verò, quod dicitur primum in vnoquoque genere esse cæterorum causam, verum est, si sit primum in aliquo genere causalitatis: tunc enim necesse est, cæterorum omnium illius generis esse causam; quòd si solum sit perfectione primum, non est causa cæterorum, sed mensura, ita vt quòd magis alia illius generis ad ipsum accedunt maioris sint perfectionis. Motus autem cæli non est primus in aliquo genere causalitatis, immò nec alterius motus causa est, neque efficiens, neque finalis, nec exemplaris, sed solum est perfectione primus, sicut homo in genere animalis: quare non sequitur

sequitur esse aliorum motuum causam, sicut neque hominem aliorum animalium, & propterea non sequitur, quod eo cessante, cessarent necessario cæteri motus.

Ad primam rationem, concessa maiori, neganda est minor absolute, quod inferiora corpora subordinantur necessario cælestibus: quadam tamen ratione, & modo limitato, & à nobis expectito, ad certas quasdam generationes, & motus, ac vicissitudinem earum subordinantur naturaliter cælo, & ideo hac sola ratione, & modo ab eo dependent, & ex consequenti, motu eius cessante, cessabunt, naturaliter, non simpliciter, & absolute loquendo. Testimonium verò Aristotelis in eodem argumento oppositum solum intelligitur de causis essentialiter subordinatis, quales sunt omnes secundæ respectu primæ, cuius concursu cessante, cessabunt necessario motus omnes, & actiones earum.

Quod verò additur de motu cordis, non est omnino simile; nec enim tam stricta est dependentia operationum aliquorum inferiorum à motu cæli, ac motuum aliorum membrorum à motu cordis, licet quoad aliquas, & omnium vicissitudinem, par est ratio, ut explicatum est in assertionibus.

Ad secundum argumentum Iauelli, concessio toto primo enthymemate, neganda est minor, quod non sit alia causa ingenerabilis, ad quam reduci debeant actiones generationum, præter corpus cæleste: est enim prima, nempe Deus, & cum addit, primam causam non agere per se immediate cum primis proximis particularibus, & mediatis, sed medio corpore cælesti, negandum est, sed ab ea, & particularibus sufficienter producit effectus, absque vlla necessitate cælestis influxus, si proximæ causæ sint sufficientes: quod si aliquid eis deficiat in suo ordine, indigent planè cælesti concursu id supplente, ex quo nulla subordinatio essentialis colligitur, sed solum, quod per modum partialis causæ proximæ in his casibus concurrant cum particularibus, & proximis, ut satis explicatum iam est à nobis.

Ad tertium distinguendum est antecedens, quod mouere immotum sit proprium primi agentis: nam mouere immotum actu, & potentia, hoc est, ita ut nec ab alio moueatur; nec moueri possit, soli primo agenti conuenit; cæteris verò solum potest conuenire, quod moueat non mota actu, eodem genere motus; quo pacto conuenit intelligentiæ mouenti cælum, & cælo alteranti per influentias inferiora corpora, & multis luminosis illuminare alia; quare non sequitur ex illo principio, quod nullum corpus inferioris mundi moueri, vel mouere possit, nisi motum à cælo, & ex consequenti, neque talem motum actiuum, neque passiuum, cessare necessario, cælo quiescente. Quod verò additur

additur de dispositione inferioris mundi, post diem iudicii nihil probat, quia licet vicissitudo generationum cessatura sit, & cætera, de quibus à motu cæli, ac naturaliter pendere admisimus: multa verò alia, quæ ab eo dependere negauimus, cessabunt quidem, non propter cessationem cælestis motus, sed per suspensionem diuini concursus.

TRACTATUS SECVNDVS.

De effectibus cælestis influxus.

Varij sunt effectus, quos cælestes influentias in inferiori mundo experimur edere: eos verò breuitatis studio ad quatuor genera referre placet, ac de singulis propriam controuersiam proponere, atque discutere. Primum effectum (ab imperfectioribus rem inchoando) constituunt corpora vitæ expertia, vt metalla, & pleraque alia, & ex euidentibus calor, cum cæteris primis qualitatibus, & ex secundis nonnullis; secundum, viuentia corpora infimæ sortis, vt pote, quæ non ex semine, sed ex putri materia generantur, vt mures: tertium, perfectiora viuentia ex semine producta, qualia sunt, perfectio organorum apparatu distincta, vt equus, vel leo: quartum, ea, quæ nullam habentes particularem causam per se, casu produci censentur, & ad hæc quatuor genera aliquo modo cælestia corpora concurrere dicuntur. Præter hæc superest quintum, atque postremum, idque cæteris excellentius, quem liberum vocamus, quia à solo libero arbitrio, seu libera voluntate tanquam à propria, proximaque causa elicitur, de quo duo à nobis sunt maxima breuitate disputanda, videlicet, an illud sua causalitate attingant corpora cælestia; præterea, an ex syderum obseruatione possit certò ab his, qui astrorum scientia pollent, prænunciari futurum. His igitur sex controuersijs eodem ordine discutiendis perficietur tractatus præsens.

QVÆSTIO I.

An cælestia corpora suo influxu producant metalla, & cætera corpora vitæ expertia, quæ non habent aliam causam particularem, ac sufficientem.

Inter eos, qui de metallorum generatione differunt, præcipui sunt Platin Timæo, Aristotel. 3. lib. Meteororum, c. vltimo, Plin. libr. 33. & 34. naturalis historia. Georgius Agricola in libro de ortu, & causa subterraneorum. Albertus Magnus in suo opere de mineralibus.

Et de locis quidem, in quibus generantur, subscribunt omnes

Aristoteli ibidem docenti, in sinu terræ produci, quod tanquam in loco præcipuo debet intelligi. Nam in aquis, atque etiam in aëre aliquando produci constat, non solum cætera mixta vitæ expertia, sed etiam metalla.

Ex qua verò materia proxima, examinandum est: Agricola putat ex aqua terræ admixta tanquam ex proxima materia generari, tum quia duo hæc in metallorum matricibus apparent, tum etiam, quia metalli pondus indicat planè naturam terream, liquatio verò, ac fluxus naturam aqueam. Aristoteles verò eodem capite citato putat, metallorum materiam proximam esse vaporem humidum intra terræ viscera lapidibus potissimum inclusum, & ob terræ, lapidumque siccitatem, ac frigus coagulatum; ita ut sicut ros, & pruina ex vaporibus eleuatis à terra, & aëris circumstantis frigiditate condensatis fiunt: modo simili metalla ex vapore nondum à terra eleuato, sed adhuc in sinu eius degente, & frigiditate: idem docet Albertus suprâ. Quod in primis rationi consentaneum est, ut eadem sit materia eorum, quæ per eleuationem à terra fiunt, & quæ intra ipsam adhuc retenta generantur. Deinde, quia experientia constat, ex vaporibus, atque exhalationibus, à terra ascendentibus, ferrum, & æs aliquando generari: quod in Perside contigisse referunt viri grauissimi, & in Valentia Hispaniarum Regno decidisse aliquando è nubibus massam lapideam metallicis venis infectam. Hos igitur vapores metallorum materiam fore existimandum est, sicut aliorum mixtorum imperfectorum in aëre productorum. Si igitur vapor, & exhalatio sic possunt in aëre addensari, ut in metallum transeant, facilius multò id poterit in sinu terræ fieri: nam in aëre solus motus, per quem feruntur, sufficit ea dissipare, efficerique, ut nec addensentur, nec solidentur, quod apprimè necessarium foret, ut in metallum verterentur. Albertus probat, quia dum liquefiunt metalla, in similem vaporem resoluuntur.

Hæc autem sententia ita attemperanda est, ut non intelligatur Aristoteles constituere vaporem solum materiam metallorum, sed quasi fumum aliquem, vel halitum ex vapore, & exhalatione constantem, in quo prædominetur humiditas vaporis, ideoque eodem illo capite meteororum citato asserit, metalla partim esse aquam, & partim non aquam; aquam quidem, prout coalescunt ex vapore, qui est aqueæ naturæ; non aquam verò, prout exhalatione terrea siccæ naturæ constant. Huius autem permixtio vaporis, & exhalationis ad proximam metallorum materiam constituendam à posteriori probatur, ex eo quòd metalla igniuntur, & liquefcunt: igniuntur enim propter siccam exhalationem, liquefcunt verò propter vaporem humidum, qui cum aqueus sit, sicut exhalatio terrea, participant metalla

talia naturam vtriusque elementi aquæ, & terræ, ex quo accipiunt gravitatem, & non ex eo, quod ex utroque elemento, tanquam ex proxima materia generentur, quamvis aqua, & terra in venis metallicis reperiantur, à quibus vapor, & exhalatio procedunt, quæ proxima materia eorum intelliguntur, remota verò elementa ipsa: & in hoc sensu vera est sententia Agricolæ, in alio verò falsa.

Circa causam verò efficientem metallorum, sunt qui negent, metalla de nouo fieri, putantes nullam dari sufficientem causam eorum in tota natura rerum, nec esse necessariam, quia non fiunt de nouo, sed à Deo fuerunt condita in prima creatione mundi: quod videtur rationi consonum, quia sicut terram Deus condidit, in qua verisimile est, condidisse lapides, pari ratione metalla, quæ velut lapides quidam sunt in terra reperti: & id quidem ad maximam perfectionem terræ, & inferioris mundi pertinebat, quod cum quasi prædiuitem, & opulentum conderet, metallorum ornatum egregium in sua conditione ei tribuens, sicut tribuisse constat terræ, ac toti mundo herbarum, arborumque pulchritudinem, & aquæ piscium varietatem: veritas nihilo minus huius rei vtrumque proficitur, videlicet, magnam metallorum copiam in terræ sinu conditam esse à Deo, & progressu temporis augeri accessione aliorum, quæ de nouo gignuntur. Cuius hæc est satis pulchra ratio, quia sicut Deus primas arborum, animaliumque species, à principio condidit, tribuens eis virtutem alias sibi similes producendi: ita fuit conueniens, ut à principio conderet ipse metalla, non tamen omnia, sed naturalibus causis vim conferret gignendi alia eisdem similia, qua virtute nobilitarentur, & quasi illustriores fierent. Quod experientia conuincit potest, quia constat metalla in principio condita tempore procedenti augeri in mineralibus, immò in nubibus, & aëre de nouo fieri, ut superius ostendimus. Constat etiam, margaritas, & pretiosos alios lapides in mari, ac terræ gremio paulatim efformari, & in dies usque ad statum perfectum concrelescere: causam igitur effectricem metallorum de nouo productorum querere oportet.

Quam non esse corpora cælestia, his argumentis ostendo: primo, quia causa (præsertim principalis) alicuius effectus debet eum continere formaliter (si vniuoca sit) vel eminenter (si sit æquiuoca) sed corpora cælestia neque vno, neque alio modo continent metalla, vel alia mixta eiusdem conditionis, ergo non possunt ea producere. Euidens est minor de continentia formali, quia corpora cælestia alterius sunt conditionis, & speciei à metallis: causa verò vniuoca eiusdem speciei esse debet cum effectu: sed probatur, quod nec eminenter ea contineant, nam quod eminenter continet aliud, debet habere gradum essendi superioris ordinis, ut anima rationalis non contineret sensitivam, & vegetatiuam,

nisi haberet esse alterius ordinis, nempe spirituale independens à materia: sed cælestia corpora habent eundem gradum, ac modum essendi cum metallis, & aliis mixtis corporibus, cum sint materialia, & quorum formæ educæ fuerunt de potentia materiæ, à qua dependent in esse, in fieri, & in conservari; non secus ac formæ metallorum, ut in nostris commentariis physicis ostendimus: ergo nequeunt ea continere eminenter, nec producere tanquam causa æquiuoca.

Secundò, quia metalla, ut plurimum gignuntur in terræ sinu, quò non potest influxus cælestis perungere: ergo nec potest ea generare. Antecedens probò, quia vel cælum attingit subterraneum locum per se, vel per propriam virtutem, siue (quod aiunt) immediatione virtutis, vel suppositi: non modo priori, cum constet per proprium suppositum illuc non peruenire, nec naturaliter posse: sed nec per virtutem propriam, quia cælum præcipuè agit per lucem, quam constat non posse tam magnam molem terræ, & corpus adeò opacum permeare, ut illuc possit perungere; quòd si lux non potest, multò minus poterit quæcunque alia virtus, seu influentia astrorum, cum sit illa harum omnium perfectissima, & cum materiales sint omnes, non est minus impossibile, cæteras penetrare totam terræ molem, quam lucem. Quod hoc modo virgeri potest; non potest naturale agens circa extremum corpus à se remotum agere, nisi agendo in medium (ut 1. lib. Physicorum ostendimus) sed nulla virtus cælestis potest agere in totam molem terræ intermediam: ergo nec in partes subterraneas, ac centro vicinas, circa quas gignuntur metalla. Probo iterum minorem, quia si in totum medium ageret, aliquem effectum produceret, quod patet esse impossibile, cum constet non producere eundem effectum, quia non gignuntur metalla in toto medio terræ, nec est excogitabilis effectus alter, quem per totum medium imprimat: ergo sine fundamento adscriberetur cælo effectus metallorum in subterraneis locis productus.

His tamen non obstantibus teneo cum communi sententia Scholæ, corpora cælestia esse causam effectricem metallorum, & aliorum mixtorum meteorologicorum, quæ in sinu terræ, atque etiam in nubibus, & aëre generantur. Sic in primis sentiunt antiquiores à principio huius controuersie citati: sic tandem recentiores omnes, præsertim Patres Conimbricenses tractatu 13. cap. 2. in libro Meteororum: quam sententiam ego intelligo de causa particulari, principali, & per se proxima, & totali: & sic probò primò, quia corpora cælestia habent virtutem producendi omnes primas qualitates, nempe, calorem, & siccitatem, quas à Sole produci præcipuè videmus per lucem, immò etiam ab aliis astris, à quibus producuntur etiam humiditas, & frigidi-

ras,

tas, nam Lunam experimur humectare inferiora corpora: ergo possunt per has qualitates disponere materiam, quam sua etiam virtute extrahunt ab elementis, ut humidos, & frigidos vapores, & exhalationes siccas à terra, & aqua, quibus mediis qualitatibus eandem materiam extractam addensare possunt, & ita eam disponendo formam metallorum, & aliorum mixtorum educere de potentia eius, eamque in eadem materia sic disposita inducere, integrumque substantiale compositum mixtum generare. Probatur tota hæc consecutio, quia cælestia corpora iuxta communem sententiam Scholæ, longè perfectiora sunt cunctis inferioribus vitæ expertibus, ut excellentiores effectus ab eis emanantes ostendunt: ergo sicut omnes primas qualitates, atque etiam secundas, pro dispositione materiæ necessarias ac sufficientes continent: sic necesse est, substantiales formas, ad quas educendas, atque inducendas in eadem materia ordinantur, & quæ tales dispositiones naturaliter consequuntur, sua eminenti virtute contineri, easque tanquam præcipuas causas, & immediatas inducere; & composita, quæ ex eis coalescunt; unde sequitur sine ullo fundamento denegare eis talem causalitatem.

Secundò, quia nullum elementum, neque omnia simul sumpta habent virtutem producendi metalla, & alia mixta, de quibus agimus, neque vlla alia corpora: ergo necesse est, aliquam aliam causam per se, ac particularem, & immediatam eorum designare. Probatur consequentia, quia in his, quæ secundum ordinem naturalium rerum quotidie producuntur de nouo, non est recurrendum ad primam causam, sed intelligendū planè, ad providentiam infinitam eius pertinuisse, particulares causas naturales ordinasse ad eorum productionem, sicut ordinavit ad productionem aliorum effectuum, secundum communem naturæ cursum producendorum. Antecedens probatur, quia mixta hæc longè perfectiora sunt elementis, ut ex formis, & proprietatibus, ac accidentibus eorum fit manifestum. Et virgeo argumentum hoc modo: Quodlibet elementum, dum congregitur cum cæteris, vel cum aliquo eorum, solum potest per se intendere, illud in se conuertere: nam qualitates, per quas operatur, solum intendunt per se, immò solum possunt per se inducere in elementum contrarium alias sibi similes pro sola forma substantiali eiusdem elementi disponentes materiam: ergo si ex tali congressu elementorum, vel vnus cum altero sequatur productio alicuius mixti (ut solet) per accidens, ac præter eorum intentum sequitur: solum igitur possunt tanquam causæ per accidens attingere productionem eius, & propterea necesse est, adhuc in casu isto aliam causam particularem

per se designare, & cum nulla alia reperiatur in mundo inferiori, & ex alia parte virtus cælestium corporum sufficiens sit ad ea producenda, necesse est concedere, quod ab eis, tanquam à causa particulari, & proxima, vel modum particularis, & proximæ habente producat. Et si dixeris produci quidem ab eis, non tamen ut causa per se, sed per accidens, sicut ab elementis produci admittimus: nam sic videtur sequi productio horum mixtorum per accidens, respectu calorum, sicut respectu elementorum, cum præter intentionem eorum sequantur, sicut sequi dicimus, præter intentionem elementorum. Respondeo, disparatam esse rationem, & ratio discriminis egregia satis est, quia natura elementorum, ac substantiales formæ eorum particulares sunt, & quæ solum possunt sibi similes producere, ut vniuoca causa ut ignis ignem, aqua aquam; quare solum possunt tales effectus per se intendere, & quidquid aliud resultat ex eorum actionibus, præter intentionem eorum sequitur, cuius propterea non possunt esse causa per se, sed per accidens, & horum ratio à posteriori est, quia formæ eorum substantiales, præter alias sibi similes, nihil aliud continent, nec ideo per se intendere, vel per se producere valent. At cælestia corpora eminentiora sunt ratione formarum substantialium, & inferiora hæc corpora vitæ expertia eminenter continent, quare ad productionem eorum per se ordinantur à natura: possunt igitur per se intendere productionem eorum, per se disponere materiam pro inductione formarum, per se eas à materia educere, & composita per se generare: falsum igitur est, quod assumitur, videlicet, præter intentionem, & per accidens, sequi metallorum, & aliorum mixtorum generationem respectu corporum cælestium, sicut præter intentionem, & per accidens sequitur respectu elementorum.

Argumenta verò in fauorem oppositæ sententiæ præfata sic dissoluenda sunt. Primum quidem, concessa maiori, & minori negata, videlicet cælestia corpora non continere eminenter metallorum, & aliorum mixtorum formas substantiales: & cum dicitur non posse vnum continere aliud eminenter, nisi habeat gradum essendi superioris ordinis, distinguendum est: nam si per hunc gradum intelligatur extra idem genus, vel prædicamentum eius, falsum est; nam lux continet eminenter calorem, & non habet gradum essendi extra genus, vel prædicamentum eius, sed in eodem prædicamento qualitatis collocatur, & fortasse intra idem genus eiusdem prædicamenti. Si verò per gradum essendi superioris ordinis intelligatur specificus saltem maioris, vel superioris perfectionis essentialis, absque dubio est necessarium, atque sufficiens, ut in eodem exemplo lucis ostenditur, atque etiam in anima sensitua cuiuslibet speciei animalis continente

nente vegetatiuam, quamuis sub eodem genere viuentis cum ea constituatur. Et satis est rationi consentaneum, vt id, quod habet superiorem gradum, maioris, ac distinctæ perfectionis essentialis respectu alterius, sua virtute contineat perfectionem eius tanquam inferioris, in quo si concurrant requisita omnia ad veram causalitatem eiusdem inferioris, poterit illud producere; cum ergo cælestia corpora respectu inferiorum habeant altiorem gradum efficiendi, specie distinctum sub genere corporis, vt pote ex propria natura incorruptibilia, & ex alia parte requisita omnia ad veram causalitatem, & productionem eorum, vt probabimus, non est eis deneganda dignitas propriæ ac principalis causæ respectu eorum.

Ad secundum negandum est antecedens, quod non possit virtus corporum cælestium pertingere ad subterranea loca, in quibus metalla generantur: nam lux Solis ad aliquam distantiam pertingere potest, & ab illa extendere propriam actionem per totam spheram actiuitatis suæ, quæ satis est magna, cum sit ipsa magnæ actiuitatis. Per hanc igitur actionem producit calorem in tota sphaera, per quem vapores, atque exhalationes extrahit à terra, & aqua (nam & aquam totam penetrare potest, propter eius transparentiam) & mediis eorum qualitatibus, nempe, frigore, & humiditate, ac siccitate addensare eos potest, & in metalla conuertere, quam conuersionem non parum iuuant Luna, cæteraque astra, in primis per lucem, sed præcipuè per occultas virtutes (quas influentias vocant) & quas habere ad effectus satis mirabiles, superius probauimus. Has autem influentias minùs sensibiles esse, minusque materiales quàm lux, in aperto est, cum non percipiantur per sensus, quare nec determinantur ad corpora diaphana, tanquam ad subiecta propria, sicut lux (quæ idèò opaca non potest permeare) sed opaca etiam peruadere possunt: ita quidem, vt in toto medio aliquem etiam occultum effectum producant (si eorum per quos generationem metallorum attingunt, capacia non sunt) si verò capacitate polleant, eundem. Quamuis autem effectus isti occulti sint, sicut virtutes ipsæ, per quas causantur, satis tamen efficaciter probantur tam ipsi quàm virtutes, per alios effectus non minùs certos, quàm occultos, sicut virtus magnetis, & effectus eius, atque etiam virtutes, & effectus aliorum lapidum. Et ecce tibi modum, quo cælestia corpora per virtutes proprias attingere possunt generationem metallorum, quantumuis in profundissimis terræ sinibus, vel aquæ locis generentur: sic solum est argumentum, atque confirmatio eius. Non enim probatur impossibilis diuersitas effectuum, in diuersis corporibus extremis, & intermediis, iuxta diuersam naturam, & capacitatem

eorum, quamvis non omnes subiiciantur sensibus, neque eos proinde sensibili modo percipiamus; satis est enim, alios sensibiles percipere, ex quibus illos produci colligitur efficaci ratione: nam licet corpora cælestia intermedia, inter Solem, & aërem non videamus, experimur tamen aërem illuminare per lucem, & media luce eum calefacere: & quamvis intelligamus in corporibus intermediis non producere calorem, censemus producere necessariò lucem, ea ratione ducti, quia agens naturale non potest agere in passum remotum, quin eundem effectum, vel alterum sua virtute producat in medium: nam si nihil in medium produceret, non posset virtus eius peruenire ad extremum, nec proinde circa illud agere, præcipuumque effectum ei imprimere.

QVÆSTIO II.

An cælum sit causa imperfectorum animalium, quæ generantur ex putri materia.

Præsupponit quæstio, quædam esse animalia imperfecta, quæ ex semine aliorum generantur, alia verò intra eandem speciem, sine semine ex sola putri materia: quod evidens experientia non solum in terra, sed etiam in mari contingere docet, testaturque expressè Aristoteles 6. lib. de historia animalium, cap. 16. & Plinius lib. 10. naturalis historię cap. 68. Hoc igitur tanquam certo præsupposito, de solis imperfectis animalibus, ex putri materia factis sciscitatur, an producantur virtute cæli. Et prima opinio docet non à cælo, sed ab intelligentia quadam inferioris mundi gubernatrice produci. Ita sentit Avicenna in sua Metaphysica, tractatu 9. cap. 4. & 1. sufficientiæ, cap. 10. & cum eo Themistius, & Alpharabius, quos Patres Conimbricenses referunt 2. libro de cælo, cap. 3. quæst. 6. artic. 2. Sed hanc meritò excludit D. Thomas 3. contra Gentes, cap. 69. & 103. & 1. parte, quæst. 110. artic. 2. hac ratione: Omne agens contendit, effectum sibi similem producere: ergo, quod compositum producit, compositum esse debet materia, & forma, aut formaliter; quemadmodum id quod producit. compositum est ex eisdem, vel eminenter, quia causa efficiens vno ex his modis debet effectum continere; sed constat, intelligentiam non continere formaliter materiale compositum, cui toti competit produci, sicut esse, nec etiam eminenter, sicut non continet utranque eius partem, nempe, materiam, & formam, sed à solo Deo continentur: ergo nullum agens spirituale præter Deum, potest producere materiale compositum, quare repugnat ab ulla intelligentia produci. Et eadem ratione probatur, nullam formam substantialem,

vel

vel accidentalem posse intelligentiam in corpore aliquo producere, nisi per accidens, applicando vnum corpus alteri, a quo produci possit: sed per se loquendo solum potest intelligentia mouere corpora motu locali, & in ordine ad hunc motum impulsus ei imprimere, quod tenet communis Scholæ consensus.

Secunda opinio affirmat, animalia hæc imperfecta produci à cælo, tanquam à causa particulari, & proxima. Ita sentiunt omnes illi, qui suprà tenuerunt, corpora cælestia nobiliora esse his. Quo supposito difficultate caret, quod ab eis producantur: sed fundamentum eorum refutauimus ibidem: quod verò imperfectius est, nequit propria virtute producere se perfectiora, tanquam præcipua causa: ergo repugnat, hæc animalia à cælo, vt à causa præcipua, & proxima produci.

Propterea asserit tertia sententia, à cælo quidem produci, non tamen vt à præcipua causa, sed tanquam ab instrumento intelligentiæ. Ita sentire videtur D. Thomas prima parte, quæstione 70. articulo tertio ad tertium, hisce verbis: *Corpus celeste, cum sit mouens motum, habet rationem instrumenti, quod agit in virtute principalis agentis, & idè ex virtute sui motoris, qui est substantia viuens, potest causare vitam. Quamuis duobus aliis locis eiusdem primæ partis videatur sentire, quod propria virtute, & tanquam præcipua causa ea producant, nempe, quæstione 45. articulo octauo ad tertium, sic inquit: *Ad generationem animalium imperfectorum sufficit agens vniuersale, quod est virtus celestis, cui assimilantur, non secundum speciem, sed secundum analogiam quandam. Neque oportet dicere, quod eorum forma creantur ab agente separato: ad generationem verò animalium perfectorum, non sufficit agens vniuersale, sed requiritur agens proprium, quod est generans vniuersum. Et tandem q. 91. articulo secundo ad secundum, ita ait: *Animalia perfecta, quæ generantur ex semine, non possunt generari, vt Auicena fingit: & paucis interpositis: Sufficit autem virtus celestium corporum ad generandum quadam animalia imperfectiora ex materia disposita: manifestum est enim, quod plura requiruntur ad productionem rei perfectæ.* Propriam tamen mentem D. Thomæ esse existimo, quod cælestia corpora, non propria virtute, nec tanquam præcipua causa, sed tanquam instrumentum intelligentiæ, producât eiusmodi animalia imperfecta, vt perspicue docet in primo loco: nam ita sentiunt omnes discipuli eius communiter, præsertim Capreolus in 2. diff. nona, quæstione vnica, Ferrariensis primo contra Gentes, capite 69. & Soncinas 7. libro Metaphysicæ, quæst. 14.**

Hæc etiam sententia difficilis est, propter duo hæc argumenta. Primum, quia intelligentia, etiam apud Diuum Thomam, non habet virtutem producendi hæc animalia, immò neque vllum compositum materiale, sed nec formam aliquam potest im-
M 5

mere corporibus : ergo nec medio cælesti corpore , tanquam instrumento potest aliquid horum præstare. Probatur consequentia , quia instrumentum non potest attingere effectum se præstantiorem , nisi eleuetur à præcipua causa , vel virtus eius sit ei concessa à natura , in ordine ad talem effectum producendum : sed neutro modo potest cælum esse instrumentum intelligentiæ ad generandum hæc animalia : ergo non possunt ab eo , vt tali instrumento , produci. Maiorem sic probō : causa præcipua ideo potest eleuare instrumentum ad productionem alicuius effectus , quia eum continet formaliter , aut eminenter ; nam si aliquo ex his modis eum non continet , non habebit virtutem eum producendi : quare neque poterit eam communicare instrumento , neque proinde illud pro tali effectu producendo eleuare : minorem verò , quòd neutro illorum modorum possit intelligentia eleuare cælum ad producenda illa animalia , ostendo , quia non continet ea formaliter , cum sit alterius ordinis , atque speciei , nempe substantia spiritualis , atque incorporea , non composita ex materia , & forma ; sed nec eminenter , quia non continet materiam , & formam , ex quibus corporea substantia componitur , nec proinde compositam ipsam substantiam ex utraque : non est igitur substantia hæc vlllo modo similis intelligentiæ , & propterea non potest ab ea produci , quia agens sibi simile aliquo modo producere debet.

Secundò probatur , quia intelligentia non potest vllam virtutem conferre corporibus cælestibus , præter motum localem , & impulsum , vt ex communi Scholæ sententia suprâ attulimus , atque probauimus : sed per impulsum , & motum localem , nequit attingere productionem horum animalium , cum non sit eis motus virtus , seu ratio agendi , sed solùm applicatio ad passum (vt etiam superius probauimus) ex eo igitur , quòd cælum moueatur ab intelligentia , nullam virtutem consequitur instrumentalem , per quam possit esse instrumentum eius ad producenda hæc animalia. Quod sic vrgeri potest : omnes virtutes cælestis corporis præsupponuntur motui locali eius , & ante motum intelliguntur præhaberi ab eo per naturalem emanationem , vel alio modo , sicut à cæteris corporibus : ergo per localem motum ab intelligentia nihil nouum habet , vt possit esse instrumentum eius , quod ante illum non habuerit : quare ex motu non habet instrumentalem concursum ad hos effectus , sed solùm applicationem ad corpora , circa quæ acturum est. Constat verò ante motum , nihil prorsus ab intelligentia recipere , nec posse esse instrumentum eius ad hos effectus se perfectiores producendos ; ergo nec per motum erit instrumentum intelligentiæ , & ideo nullo prorsus modo.

Ultima igitur sententia asserit, cælum producere eiusmodi animalia, tanquam instrumentum primæ causæ, nempe Dei, quia non est excogitabilis alia causa, cuius instrumentum esse possit, sed quam virtutem instrumentariam habeat, vel à Deo accipiat, aut quonam modo ab eo eleuetur, sic explicat: Cùm cælum sit primum alterans, ac nobilissima pars mundi corporei, & nihilo minus expers vitæ, conueniens fuit, hanc illi fecunditatis prærogatiuam ab authore naturæ dari, talemque virtutem ei communicari, vt ad omnium corporum viuientium generationem concurreret, & ad quorundam generationem, tanquam peculiare ipsius Dei instrumentum adhiberetur. Eiusmodi autem virtutem contulit ei Deus à sua primæua origine, aut creatione. Et intelligitur esse similis virtuti seminali, ita vt quemadmodum semini communicatur à viuente, à quo productum, atque decisum est, virtus quædam, per quam attingit generationem alterius viuentis similis in specie, tanquam instrumentum generantis (quamuis semen ipsum non viuat, sed inferioris speciei, aut generis sit) eadem similitudine communicata est corpori cælesti cum suo esse virtus, per quam attingere possit generationem viuientium (quamuis vitæ expers sit) tanquam instrumentum ipsiusmet Dei, à quo immediatè eam accipit per creationem. Hæc est sententia Durandi in 2. distinctione quintadecima, parte secunda distinctionis, quæstione secunda, quam præfato modo explicant, & sequuntur Patres Conimbricenses secundo libro de cælo, capite tertio, quæstione sexta, articulo secundo, & nonnulli etiam recentiores cum eis hanc sententiam amplectuntur.

Cæterum his præmissis hæc virtus sine fundamento tribuitur cælo; & ad effectum concursus instrumentalis in ordine ad generationem horum animalium imperfectorum, non est ei necessaria. Probatur manifestè primum, quia cùm foret virtus naturalis (si daretur) difficile creditu est, eam Aristotelem ignorasse, qui tam perfectas habuit cælestes virtutes, sed in tota eius doctrina neque vestigium eius reperitur, vt quilibet in ea versatus facile iudicare potest: ergo alienum est ab eius mente, eam tribuere cælo: neque extat ratio alicuius momenti, compellens nos talem virtutem multiplicare, sed ea sola necessitate excogitatur ab his authoribus, quia sine illa non occurrit eis ratio aliqua tribuendi cælesti corpori instrumentarium concursum ad generationem horum animalium. Vnde eadem facilitate, qua ab eis ponitur, negari potest, vel denegando ei talem concursum, & ex consequenti talem virtutem, vel negando, quòd sine illa non possit esse instrumentum Dei; vel denique negando, quòd per instrumentum aliquod concur

concurrat Deus ad tales generationes, quia sicut plerosque effectus alios per se immediatè producit, supplens defectus particularium causarum, sic potest quispiam alterere, has generationes per se immediatè efficere, cum desint particulares causæ, à quibus producantur. Itaque cum non sint multiplicandæ virtutes sine vrgenti necessitate, vel ratione, nec debet multiplicari talis virtus seminalis in cælo non compellente ratione, præsertim cum sit nobis prorsus incognita, de qua proinde non possumus nisi diuinando loqui. Quod verò non sit necessaria, probatur, quia certum est apud Aristotelem & omnes cælum concurrere ad generationem animalium perfectorum per virtutes alias, quas in eo agnouimus, videlicet, per lucem, calorem, & alias astrorum influentias: pro quo concursu præstando, nemo hucusque talem virtutem seminalem incognitam addidit: præter alias, quas in eo agnouimus, vel quas omnes ferè in eo admittunt, ex effectibus cõmixti: ergo multò minùs debet necessaria existimari ad generationes animalium imperfectorum, sed sufficienter concurrere ad eas posse, existimandum est per easdem, per quas concurrat ad generationem animalium perfectorum, quod ex nostræ sententiæ explicatione clariùs constabit.

Nostra igitur sententia solùm admittit, cælum concurrere ad generationem imperfectorum animalium, quæ ex putri materia generantur, tanquam instrumentum Dei, cui attribuantur tales generationes, tanquam causæ præcipuæ particulari & proximæ. Ut autem instrumentum Dei sit ad eiusmodi effectus, non indiget virtute illa superaddita luci, & influentiis, sed per eas potest eleuari à Deo, & instrumentalem concursum præstare in ordine ad tales effectus vitales. Hæc nostra sententia sufficienter probata est, ex aliarum refutatione: quòd verò cælum possit eleuari, ut instrumentum Dei, ad hos effectus, per virtutes has ordinarias, sic explico. Certum est apud Aristotelem, & omnes, cælum per virtutem naturalem, Solis præcipuè, concurrere ad omnes generationes animalium, etiam perfectorum, quem concursum explicuit Aristoteles 1. libro Physicorum, textu 26. illis verbis: *Sol & homo generant hominem. Quem concursum specialiter confert per lucem, & calorem à luce productum, calefaciendo, ac fouendo semen, iuuandòque seminalem eius virtutem, ut disponat, & organizet materiam, quod præstare non posset tali consortio, auxiliòque destitutum.* Calor autem Solis, quamuis eiusdem sit speciei cum elementari, ceterùm quia virtus est superioris, atque eminentioris causæ, longè perfectior est secundùm rationem indiuidualem, ratione cuius excellentiores habet effectus, quos non potest attingere elementaris, ut ostendit frugum ac fructuum omnium procreatio, ad quam deferuire non

non potest calor elementaris. Cuius perpulchrum, ac simillimum mihi sumo exemplum in calore naturali viuentium corporum, de quo etiam tenet probabilior sententia, eiusdem esse speciei cum elementari; per solam verò indiuidualem differentiam, quam habet ex eo, quòd animæ, atque corporis viuentis virtus est, vt ad vitales effectus edendos instrumentum esse possit vitalis potentia generatiuæ, aut nutritiuæ, quos non potest attingere calor elementaris, vt secundo libro de anima probauimus. Pari ergo ratione de calore Solis necessario fatendum est, comparatione elementaris, quamuis non omninò attingat effectus caloris vitalis, potest tamen, & verè concurrit cum eo, eumque fouet ad eos præstandos. Et hæc quidem considerata sunt ex parte cælestis virtutis; aliud verò ex parte animalium, quæ ex putri materia fiunt, quæ adeò sunt imperfecta, atque infimæ sortis in ordine vitalium corporum, vt eorum animæ dispositiones longè inferiores, atque imperfectiores postulent in materia pro sui éductione ex potentia eius, & inductione in ea, & præcipuè minorem longè, ac ferè nullius momenti organizationem in corpore, vsque adeò vt minimam postulet diuersitatem partium, & quasi homogeneum sit in pluribus eorum, vt constat in quibusdam imperfectissimis reptilis generis. Quo fit, vt calor Solis, & aliæ eius virtutes, quæ multum iuuant seminalem virtutem perfectorum animalium ad disponendam, & organizandam materiam, sufficere possint ad inducendas imperfectissimas dispositiones, & organizationes in materia pro inductione, & introductione imperfectissimæ animæ, & ita possint esse instrumenta Dei, ab eoque eleuari, ad talem animam educendam, atque introducendam in materia, & consequenter ad eorundem animalium generationem, quod sensit planè Diuus Thomas 1. parte, quæstione 71. articulo vnico ad 1. hisce verbis. *In naturali generatione animalium principium altissimum, & virtus formatiua qua est in semine in his, qua ex semine generantur, loco cuius virtutis in his, qua ex putrefactione generantur, est virtus caloris.* Atque etiam Scotus, & Bonauentura locis quæstione sequenti citandis: sic autem explicatam conclusionem, probo hac ratione: Agens quodcunque potest inducere in subiectum, vel materiam omnes dispositiones requisitas, & sufficientes pro aliqua forma substantiali, potest eam educere de potentia eius, vel eam vnire eidem materiæ, aut tanquam causa præcipua eius, si non excedat perfectionem propriæ speciei, aut tanquam instrumentum agentis perfectioris: sed corpora cælestia suis virtutibus possunt inducere omnes dispositiones requisitas, & sufficientes pro formis imperfectorum animalium, quæ ex putri materia fiunt: ego possunt eas

ex potentia talis materiæ educere, atque in ea introducere, compositæque generare, licet non tanquam propria, aut præcipua causa, quia perfectionem propriæ speciei superant, saltem ut instrumenta Dei. Maiorem probo, quia forma substantialis naturali sequela consequitur sufficientes dispositiones in materia, nam in hunc finem à natura ordinantur: ergo agens, quod eas potest inducere, poterit eandem formam educere, & compositum producere, tanquam præcipua, vel saltem instrumentalis causa. Minor verò sic probatur, corpora cælestia suis virtutibus continent omnes primas qualitates, atque etiam secundas, ex earum permutatione ortas, quas omnes passim producunt in corporibus inferioribus, possunt etiam iuvare virtutem vitalem, ac seminalem, ad organizandam materiam, pro educatione, & introductione animalium, etiam animalium perfectorum, ut nuper ostendimus: ergo possunt eandem disponere, & organizare imperfectissima illa organizatione sufficienti pro animabus imperfectissimis educendis atque inducendis in materia, & proinde composita generare, tanquam instrumenta Dei: nam ad talem actionem instrumentalem non requiritur vita; quemadmodum in semine non requiritur vita, neque virtus seminalis & vitalis; & si daretur illa virtus quasi seminalis, quam ultima sententia ponit in cælo, ut per illam possit esse instrumentum Dei ad generationem imperfectorum animalium, non esset vitalis, neque ut vitalem eam ponit, & nihilominus ratione utriusque concurrunt semen & cælestia corpora, iuxta eandem sententiam, ut instrumenta ad generationem animalium: ergo lux, & calor cælestis cum reliquis virtutibus cælorum concurrere possunt ad generationem imperfectorum animalium, tanquam instrumenta Dei, etiam si vitales non sint. Ad generationem verò animalium perfectorum, licet aliquo modo concurrant, non sunt tamen sufficientia instrumenta, quia perfectiores longè dispositiones, & organizationem postulat materia pro introductione animarum perfectarum, quæ sine semine nequit induci naturaliter.

QVÆSTIO III.

An animalia ex putri materia genita sint eiusdem speciei cum animalibus eiusdem nominis ex semine productis.

PRO utraque quæstionis parte extant non solum testimonia Aristot. sed rationes magni momenti, & propterea gravissimi auctores patrocinium utriusque susceperunt. Pro parte quidem negante, quod non possint esse eiusdem speciei, est testimonium Aristot. 5. lib. de historia animalium, cap. 1. circa finem sic loquentis: *Quæ autem per se, vel in animali, vel in terra, vel in stirpe,*
vel etiam

vel etiam in eorum ipsorum partibus creatur, eademque maris, ac
fœmina sexu distincta sunt, hi. cœuntibus gignitur quidam aliquis, sed
ex quo nihil amplius gigni possit, v. g. cœtu pediculorum lœdes dicta pro-
creantur, muscarum vermiculi, pulicum genus vermiculorum cui spe-
ciem referens, ex quibus nec ea, quæ generantur, proveniunt, nec aliud ul-
lum animal, sed id, quod, sunt, sordes tantum pers. sunt: Ex quo testi-
monio colligitur animalia hæc ex putri materia genita virtutem
habere generandi sibi similia ex semine, sic verò ab eis genita, ca-
tere tali virtute. Ex quo ego infero specie differe, & illatio-
nem probò: quia potentia generandi vitalis est, & ex virtute ani-
mæ sensitiuæ emanat, per modum proprietatis, & generatio vi-
uentis est actus vitalis. Illa ergo anima, ex cuius virtute emanat,
essentialiter est perfectior anima aliorum animalium carentium
tali virtute, & operatione, quia ex perfectiori potentia & opera-
tione, perfectior essentia colligitur: sed anima essentialiter perfe-
ctior constituit animatum corpus essentialiter perfectius, &
proinde diuersæ speciei, ergo animalia ex putri materia genita
specie differunt ab his, quæ semine generantur, ex mente Aristo-
telis, efficaci ratione comprobata.

Secundò, quia pro effectibus determinatæ speciei designauit
natura determinatas causas, per quas producerentur, ita ut non
nisi per virtutem earum produci possint, quod est intrinsecam
connexionem habere cum eis, ut constat ex cæteris speciebus
animalium, quæ non nisi à determinatis causis, ac determinato
modo operantibus producuntur; ergo impossibile est, eandem spe-
ciem animalium indifferenter produci ab his, vel illis causis, aut
hoc, vel illo modo operantibus; quare non erunt eiusdem spe-
ciei ea, quæ sunt ab aliis animalibus ex semine, cum his, quæ
non producuntur ab aliis animalibus, sed ab aliis causis diuer-
sis, nec ex semine, sed ex putri materia; immò cum vno ex his
modis produci valeant, superfluit alter, natura verò nihil ad-
mittit superfluum. Quare hanc partem sequuntur Auerroës octa-
uo libro physicorum, commento 46. Iand. septimo Metaphysi-
cæ, quæst. 15. Egidius secundo libro in Hexameron, cap. 28. Flan-
diensis septimo Metaphysicæ, quæst. 13. artic. quarto. Aquillinus
quæstionibus de physiognomia, & videtur etiam eandem tenere
Diuus Thomas, pluribus suæ doctrinæ locis: sed præsertim in
prima dist. 110. art. primo in corpore his verbis: *Non enim idem in
specie est à natura, & ab arte, nec per putrefactionem, & seminationem,
&c. & de potentia, quæst. 3. artic. 1. ad 1. vbi sic ait: Nec oportet eo-
rum, quæ sunt in genere, si specie differant, esse eundem modum proce-
dendi in esse, ut patet per animalia generata ex semine, & ex putrefa-
ctione, quæ in genere conueniunt, & specie differunt. Et tandem 1. pat-
te, quæstion. 71. artic. vñico ad primum, sic inquit: illa,*

qua naturaliter generantur ex semine, non possunt naturaliter sine semine generari.

Opposita verò pars, quòd sint eiusdem speciei, expressa videtur in doctrina Arist. duobus præsertim locis, 7. Metaphysicæ, textu 23. vbi habet hæc verba: *Harum autem quedam etiam à casu fiunt, & à fortuna, perinde atque in his, quæ à natura fiunt, quedam enim ex illis eadem, & ex semine, & absque semine fiunt, &c. & sectione 11. problematum, quæst. 64. Quam ob causam, inquit, animalium alia non solum coïtu, sed etiam sponte natura procreantur, alia coïtu duntaxat proveniunt, ut homo. & equus.* Et probatur hac ratione satis efficaci, quia ex accidentibus eiusdem omninò rationis, efficaciter colligitur, substantias esse eiusdem rationis, & essentiar: sed animalia ex semine, ac ex putri materia genita habent accidentia omnia eiusdem conditionis, eadem figuram, eundem calorem, eandem membrorum distinctionem, & magnitudinem, motum ac cæteras operationes, modumque operandi eundem: ergo pertinent ad eandem speciem; & ita sentit Diuus Thomas 7. lib. Metaphysicæ, lectione sexta post medium; vbi ex professo disputans præsens dubium, assert sententiam Auerroïs omninò negantis, quòd idem secundum speciem possit naturaliter produci ex semine, aut ex putri materia. Deinde assert sententiam Auicennæ oppositam, nempe, quòd omnia animalia, tam perfecta, quam imperfecta, utroque modo possint naturaliter produci, & aliquando producantur. Vtrunque verò reiecit, & mediam sequitur, tanquam Aristotelis propriam, quòd perfecta non possint, nisi ex semine produci, imperfecta verò (quæ sunt vicina plantis) utroque modo produci possint, intra eandem speciem, ita ut sicut accidit plantam produci sine semine, virtute Solis, & illa eadem sic producta semen emittit, cuius virtute producit altera intra eandem speciem; pari ratione producantur aliquando imperfecta animalia ex putri materia virtute Solis, & distincta quidem in marem, & feminam, quæ per seminalem propagationem producant animal eiusdem speciei. Eandem tenet, & probat Scotus, utraque reiecta, in prima distinctione secunda, quæstione septima, circa medium, §. Ad primum argumentum principale dico, quod Auicenna: asseritque esse expressam Diui Augustini tertio libro de Trinitate, capite 4. & 10. & diui Ambrosij de incarnatione Verbi ad finem. Richardi in 2. distinctione 17. quæst. 1. circa secundum principale, Okam in 2. quæst. 23. Theophrasti 1. lib. de plantis cap. 1. & est communis in Schola, & vera, quam efficaciter probat ratio dubitandi in fauorem eius posita, atque desumpta ex Scoto, vbi supra.

Ad testimonium Aristotelis pro parte negante respondeo, non sequi ex eo, quòd quedam animalia imperfecta ex semine producta

ducta nequeant per seminationem generare sibi similia, esse diuersæ speciei ab his, quæ generantur ex putri materia sub eodem nomine: nam ex accidenti aliquo prouenire potest, quod operatio generatiuæ potentia impediat, vel ex imperfectiōe seminis, ex quo fiunt, quod potentia generatiua careat, sicut videmus in hominibus, & aliis animalibus imperfectis, de quibus constat, non generare alia, nec tamen propterea negamus, esse eiusdem speciei cum cæteris sibi similia generantibus.

Ad primam rationem concedimus, effectibus determinatis naturam designasse determinatas causas magis quidem, vel minus determinatas, iuxta maiorem, vel minorem perfectionem eorum, & ideo animalibus perfectis solas causas suæ speciei designauit, & determinatum, atque perfectum modum producendi ab eis, quæ ideo nec ab aliis causis, neque alio modo, quàm per seminale propagationem multiplicare possunt; imperfectis verò, quæ non postulant causas adeò perfectas, nec modum producendi adeò perfectum, vno, vel altero modo fieri permisit, nempe ex semine, vel ex putri materia: neque tamen alter modus eorum superfluit, sicut non superfluit, quod ignis generetur ab alio igne, atque etiam aliquando per concursum radiorum Solis, vel per attritionem aëris.

Diuis Thomas autem illis locis intelligitur de animalibus, quæ ex natura sua adeò sunt imperfecta, vt non habeant virtutem producendi sibi similia, sed naturaliter exigunt, produci ex putri materia, vt minutissimi quidam vermiculi, quæ quidem animalia specie distinguuntur ab aliis. Præter hæc autem sunt alia, quæ propter suam perfectionem postulant ex natura sua produci ab aliis viuentibus similibus, vt contra Auicenam 2. lib. suæ Metaphysicæ, quæst. 42. merito docet sanctus Thomas 7. Metaphysicæ, lectione 16. & prima parte, quæst. 45. artic. octauo, & quæstione 91. artic. secundo, atque etiam tertio contra Gentem, cap. 69. & Scotus in 2. distinct. 8. quæst. 1. & Diuis Bonauentura ibidem, numer. 20. ex communi consensu: quò enim aliqua perfectiora sunt, eò plura ad sui productionem postulant. Denique sunt alia media, & ab utroque extremo specie saltem distincta, utroque modo producibilia, vt mures, vespræ, & similia, inter se tamen eiusdem speciei: quæ tria genera etiam reperiuntur in plantis, & non possunt eidem conuenire, & iuxta hanc distinct. optimè intelligitur S. Thomas, cum aliis, ne sibi sit contrarius.

Sed aduersus hanc doctrinam duo possunt opponi, quæ videntur probare, etiam perfecta animalia posse utroque modo produci in eadem specie, nempe ex semine sibi simili, atque etiam ex materia putri, vel ex terra. Primum est, quia sicut corpora cælestia sua virtute possunt disponere materiam pro

introductione animæ imperfectorum animalium, & ex consequenti eam producere, atque vnire materię, tanquam instrumenta Dei, pari ratione possunt eandem disponere, & organizare, pro introductione animæ perfectorum animalium, eamque educere de potentia materię, vel creatā à Deo vnire corpori tanquam instrumenta Dei: ergo possunt hoc modo perfecta animalia produci, & non solum per virtutem seminis ab alio simili. Probatur paritas rationis, quia dispositio materię pro vtraque anima consistit in certa temperie primarum qualitarum, quibusdam secundis additis ex eadem temperie primarum procedentibus, quarum productio non excedit perfectionem cælestis virtutis: ergo quemadmodum imperfecta animalia potest producere ex putri, vel ex terrea materia, pari ratione poterit perfecta.

Secundum, ex quibusdam experientiis: in quibusdam enim insulis, à continenti distantissimis, visa sunt perfecta animalia, quæ tamen neque ab his, quæ initio mundi creata sunt, propagari potuerunt, cum omnia hoc (paucissimis exceptis) diluuioperierint, sed nec post diluuium potuerunt narando eò peruenisse, propter vastissimum maris interiectum, nec tandem nauibus inuehi, quia complura eorum efferata sunt, vt leones, lupi, atque pantheræ: quare negari non potest, quòd cælesti virtute producta sint. Secunda, quia vt ab eodemmet Auicena, in libro de diluuiio, memoriæ proditum est, aliquando contigit vitulū in nubibus genitum excidisse inter imbres. Et à Plinio octauo libro naturalis historiæ, capite 42. & à Solino in Pol. histor. cap. 46. refertur equas in Lusitania animalem spiritum Fauonio flante concipere, & animal. quoddam gignere, quod triennium vitæ non excedit, quod in Cappadocia contigisse refert Solinus, in descriptione Cappadociæ, & Diuus Augustinus libro 20. de Ciuitate Dei, capite quinto, ac tandem fertur Phœnix vnica in mundo auis suæ speciei, non ex ouo, aut semine parentis, sed ex eimeribus propriis renasci, quod scriptores non pauci testantur: & non nisi cælesti virtute effici posse fatendum est; & cum numeretur inter perfecta animalia, negari non potest, hæc etiam sicut imperfecta vtriusque modo gigni, quamuis non ita frequenter.

Nihilominus propter hæc, non est à communi, & vera scholæ sententia recedendum, sed ad primum neganda est paritas rationis, in antecedenti desumpta, & ratio eam negandi est, diuersa vtrorumque animalium perfectio: nam per se est euident in generatione quarumlibet rerum naturalium, & materialium, quòd forma essentialiter perfectior postulat perfectiores dispositiones in materia, cum istæ debeant esse illi proportionatæ; sed constat animā perfectorum animalium esse longè perfectiorem animā imperfectorum; ergo tantò perfectiores dispositiones postulat in mate

materia, quanto perfectior est, videlicet longè maiorem diuersitatem partium, organizationem earum, figuram, & virtutem, ac potentiam ad exercendas operationes specie, & numero, ac varietate distinctas; eiusmodi autem dispositiones adeò perfectas, nec possunt per cælestem virtutem induci naturaliter in materia putri, etiamsi virtutem cælestem, tanquam instrumentum Dei accipias, sed virtutem instrumentalem longè perfectiorem requirunt, à qua producantur, vt videre etiam est in artifice.

Constat etiam, primas qualitates, quas potest inducere forma cælestis, non sufficere pro eisdem perfectis dispositionibus inducendis, sed altiore requiri materiam, hoc est, magis accommodatam, ac proportionatam (qualis est materia seminis) à viuenti perfecto decisam, & altiore virtutem eiusdem seminis formatricem perfecti corporis, ab eadem perfecta anima deriuatam, & tanquam instrumentum proprium ei à natura pro tali opere perfecto præstando collatum: ergo naturaliter est impossibile, quòd perfecta animalia sine semine producantur à virtute cælesti, etiam vt instrumento Dei, & ex putri, vel extranea materiâ, aliàs id sæpè contingeret.

Ex quibus satisfieri potest experientiis allatis. Ad illam de vitulo in nubibus genito, quam Auicena attulit, negamus talem generationem in nubibus factam, censemusque fabulosam esse, sed intelligi potest, aut ventorum vi fuisse delatam, vel arte dæmonum, vt in rebus aliis fieri solet: sed neque equas Lusitanas, aut Cappadoces vento concipi, aut gignere potuerunt, quamuis à Solino, aut D. August. aliòve graui historiographo referatur, quia id solùm referunt contigisse relatu aliorum sæpè vulgari. De Phœnice verò duo sentio. Primum quidem, si datur (vt satis probabile est dari, quia à multis visum esse refertur) non esse vnicum in toto mundo, quia etiam refertur ab eisdem, pluribus in locis, atque disunctissimis visum fuisse, & aliquando in vno, vel altero eorum interiisse, neque ibidem ex cineribus eius, aliòve modo genitum pro eo alterum. Quare si vera sunt, quæ de eo referuntur, vnicum esse non potest.

Secundò assero, neque ex cineribus eundem reuiuiscere, qui igne assumptus, neque alterum sibi similem, neque possibile esse aliter, quàm ex semine generari naturaliter, sed fortè, quia pauca admodum indiuidua in hac specie producantur, vulgare cæptum est, vnicum dari simul in tota natura. Quare dum sancti Patres vtuntur Phœnicis exemplo, ad suadendum corporum resurrectionem, id non asseuerant, neque ex propria sententia pronunciant, sed ex aliorum scriptis referunt, quasi dicere velint: si homines sibi persuadent virtute naturali posse contingere, vt Phœnix ex propriis cineribus reuiuiscat, cur non credant, posse

est, effectum, qui ex tali impedimento sequitur, (licet casualem comparatione eius, quia præter intentionem eius sequitur, & ideo absque eius concursu) per se cadere sub influxum causæ vniuersalis, sub qua continetur, ex cuiusque concursu operatur causa impediens, & ideo comparatione eius casualem non esse, sed per se, & sic rem se habere (ait) in causis corporeis respectu effectus; qui ex concursu vnius alteram impediens sequitur: nam licet respectu causæ impeditæ casualis sit, non respectu impediens, ex cuius effectu per se producto, quo alteram impedit, sequitur, & cum causa hæc contineatur sub primo cælo, ad quod tanquam ad vniuersalem causam reduci debent omnes effectus causæ corporeæ suo ordine militantes sub eis; necesse est talem effectum ad eam reduci, tanquam ad causam vniuersalem, sub qua continentur omnes, & ex cuius influxu per se procedunt quicunque earum effectus, vt qui ex eis sequuntur. Si verò in causis corporeis verum hoc non sit, sed aliquis effectus datur casualis, in quem non influat cælum, & ideo qui præter intentionem eius fiat, sequitur etiam dari aliquem effectum casualem, qui sequatur ex causa particulari impediens aliam, & præter intentionem Dei, & respectu eius sit casualis, in quem nullum influxum habeat, & ideo circa cuius consecutionem voluntas Dei non versetur, nec proinde impleatur, & tandem sequitur, friuolam esse rationem D. Thom. & conclusionem, quam probare intendit, planè falsam, quod est absurdum.

Nostra verò sententia est, talem effectum casualem esse, etiam respectu cæli, in quem neque in vllum alium casualem effectum, aliquem influxum habet. Ita D. Thom. 3. lib. contra gent. c. 36. & 49. & ibidem Ferrar. Alex. 1. part. quæst. 16. membro 3. artic. 2. Cæteranus 1. parte, quæst. 15. artic. 6. atque etiam Patres Conimbrienses 2. lib. de cælo, capite 3. quæstione 5. Et probatur primò, cælum est causa naturalis, agens ex determinatione ad vnum: ergo solum potest influere in effectum, ad quem producendum naturaliter inclinatur, vel ex eo naturaliter, & necessariò sequitur, sed in effectum casualem non inclinatur naturaliter, nec ex eo in quem inclinatur naturaliter, sequitur necessariò: ergo non habet vllum influxum circa illum. Minorem probo, quia effectus casualis sequitur, præter intentionem agentis per se: ergo præter influxum eius: probatur consequentia, quia agens naturale sicut non agit, nisi ex intentione, seu inclinatione propriæ naturæ, ita non influit nisi in effectum, in quem propria eius inclinatio, vel intentio naturalis tendit. Exempli gratia, lapis descendens solum intendit, centrum assequi, quia in ipsum tendit naturalis inclinatio grauitatis eius, quod verò hominem, vel aliud animal sibi obuiam factum percutiat, præter intentionem eius omninò est,

quia præter inclinationem naturalem. Quare nullum potest habere influxum circa illum, & pari ratione nec planeta naturaliter producus siccitatem, potest influere in extinctionem messium, & sterilitatem terræ, quia nec eas potest intendere, sed præter intensionem eius sequuntur, & ideo præter influxum.

Secundò probatur, quia casualis effectus sequitur per accidens ex concursu duarum causarum, sed neutra intendit per se concurrere cum alia, neque totum cælum intendit talem concursum: ergo neque influit in talem effectum, sed omninò sequitur præter concursum, & causalitatem eius, sicut præter concursum, & causalitatem inferiorum causarum. Maior experientia nota est, cum videamus messium conflagrationem sequi ex emissionem fulminis, & concursu siccitatis ab alia causâ cælesti inductæ, & pariter ex concursu plurium causarum efficientium, vel efficientis, & materialis, sequuntur alij casuales effectus inferiores. Minor verò, quòd neutra intendat concursum ipsum, non est minùs evidens in causis sese impediens: nam evidens est planetam intendentem generationem imbrium, non intendere concursum cum planeta alio impediens effectum eius, alioqui agens intenderet, quòd effectus eius impediatur; & hoc absurdum esse constat: sed neque planeta impediens intendit concursum, quia agens solum intendit producere effectum proprium, ad quem producendum ex propria natura inclinatur; quòd ergo incurrat in agens aliud, cuius effectum impediat, præter inclinationem eius est: ergo præter intensionem, quia solum intendit id, ad quod natura ipsum inclinat, & cum sit etiam præter eam, quòd planeta alter eo agente occurrat, repugnat ex intensione, & inclinatione eius, esse occursum eius, & ex consequenti, concursum utriusque, quem proinde repugnabit intendere.

Et tandem, quòd talis concursus non sit à toto cælo intentus, probatur, quia totum cælum non agit, neque concurrat ad effectus inferiores nisi per aliquam sui partem, si ergo à nulla parte agente potest intendi: ergo neque à toto cælo, & si concursum intendi repugnat, ex consequenti repugnabit, intendi effectum, quod ex eodem concursu præcisè sequitur, & aliam causam non habet. Quod efficaciter satis colligi potest ex doctrina Aristotelis in libro de divinat. per somnium, ubi fatetur, cælestia corpora impediri aliquando à suis effectibus, & ideo, quod ex impedimento sequitur non esse effectum illorum, quia vniuersaliter verum esse arbitratur, non produci à causâ per se operante illud, quod per accidens sequitur ex effectu per se eius, ut hisce verbis testatur, 6. lib. Metaphysicæ, tex. 4. *Neque enim qui facit domum, facit simul, quæ accidunt domui factæ.*

Et si dicatur per accidens saltem produci, ideo causam per accidens

cidens habere aliquem concursum, circa effectum per accidens subsequutum ex effectu, quem producit per se, sed casuale illum vocari, quia non est per se intentus, nec per se productus à tali causa, neque ab alia causa per se. Vnde sequitur, negari non posse, quòd cælestia corpora habeant concursum aliquem, circa effectus per accidens subsequutos, ex concursu, & effectu, quem per se intendunt, ac per se produciunt; alioqui dabitur effectus extra causas, vel non productus ab aliqua causa, quod patet esse absurdum. Consequentia verò probatur, quia causa nihil producit, nisi per concursum: si ergo nulla causa concurrat ad casuales effectus, à nulla causa producentur, vel si ab aliqua, sine concursu producentur, quod exemplo declaratur. Impedit planeta vnus per effectum siccitatis effectum alterius planetæ, & ex tali impedimento sequitur per accidens & casu effectus alter, vt extinctio messium, & sterilitas terræ, cuius erit causa per accidens idemmet planeta innuens siccitatem, ad cuius productionem per accidens sequitur; habebit igitur respectu talis effectus per accidens secutum concursum saltem per accidens.

Respondeo, nec dari influxum per accidens, neque causam per accidens vllò modo influere in effectum per accidens, quia sicut sequitur, præter inclinationem & intentionem causæ per se, ita sequitur præter operationem, & consequenter præter eius influxum, quia influxus agentis non est aliud, quàm ipsamet operatio, prout à se procedens. Operatio verò non potest nisi ex inclinatione agentis, atque ex intèntione eius procedere. Quare sicut casualis effectus non potest per operationem procedere, quia producitur effectus per se, ita nec ex influxu per se; præter quem non datur alter influxus eius, sicut nec datur alia operatio; sed sine operatione, & influxu agentis per se, subsequitur effectus per accidens. A quo verò agente, vel per quam operationem, & influxum producatur: Respondeo non posse produci ab vllò agente, naturali, particulari, vel vniuersali, nec per concursum eius, quia omne agens naturale operatur ex determinatione ad vnum, hoc est, ad eum duntaxat effectum, in quem ordinatur natura, & inclinatio eius, & cum neque ordinetur ad concursum cum alia causa, neque ad impedimentum actiuum, vel passiuum eius, hoc est, nec ad eam impediendam, nec vt ab ea impediatur, sed vtrumque sit præter inclinationem, & intentionem eius, non potest concursus, vel impedimentum per operationem, seu actualem concursum eius fieri; & ex consequenti neque effectus per accidens, vel casualis, qui ex tali concursu eius cum altero sequitur, necesse est, dari aliquam causam liberam, & vniuersalissimam, à qua per se fiat; liberam quidem, vt possit per se illum intendere, cum probatum sit, non posse intendi à causa naturali, propter

intrinsecum modum operandi, ex determinatione ad vnum: vniuersalissimam verò, hoc est, primam, à qua intrinsecam dependentiam habeant effectus omnes, concursus omnes, & omnium causarum operationes, & proinde cuius concursum nullus effectus, nullus concursus, nulla operatio aliarum causarum effugere possit, neque esse vllò modo in rerum natura, nisi per concursum eius fiat & conseruetur. Ab hac igitur sola causa intenduntur, & fiunt per se effectus, concursus, omnesve occurus aliarum, & impedimenta omnia, quæ vicissim sibi præstant, & effectus omnes per accidens, atque casuales, quæ sine concursu vllius alterius causæ vniuersalis, vel particularis sequuntur, sed per solum concursum primæ, respectu cuius nihil per accidens, casuale nihil, nihil fortuitum vocari debet, nec potest, sed omnia dependent per se, & fiunt per se ab ea, & solum vocantur aliqui effectus casuales, vel per accidens, aut fortuiti, respectu aliarum causarum, à quibus sicut intendi non possunt, sic nec fieri, vel produci. Ex quo infero, quòd si hæc prima causa, nempe, Deus optimus, & maximus, non foret libera, sed naturalis, ex determinatione ad vnum agens, repugnaret prorsus, per concursum eius sequi effectus per accidens, vel casuales, & ideò nihil casuale, aut per accidens daretur, nec dari posset in natura rerum, quia non posset per concursum alicuius causæ fieri; sine vllò verò concursu sequi, non est intelligibile.

Ut autem clariùs, ac faciliùs expediatur fundamentum oppositæ sententiæ, adnotanda est distinctio inter causas naturaliter operantes, & liberas, quòd illæ operantur ex determinatione ad vnum, & propterea eos duntaxat effectus intendere, & edere possunt, in quos virtus eius naturaliter inclinatur, & non alios, & ad eos tantum influxum præstare possunt: liberæ verò indeterminatæ, atque indifferentes sunt ad plures effectus, & quemlibet eorum intendere valent. Vnde circa eum quoque effectum, qui ex concursu duarum causarum sese impediendum sequitur, versari per se possunt, & si subsint potestati earum, per se intendere, & per se producere, & cum omnia subsint potestati diuinæ voluntatis, omnes effectus per se aliarum causarum, vel per accidens eos consequentes, potest intendere per se; & verè omnes per se intendit, & per se producit, neque vllus est, qui influxum eius effugere valeat, quantumlibet præter intentionem causarum naturalium, vniuersalium, & particularium, atque etiam liberarum sequatur, & casualis, aut per accidens, respectu earum iure vocetur. Ex hoc discrimine sequitur aliud, inter causam primam ex vna parte, & cælestia corpora ex altera, quantum ad concursum causarum sese impediendum; quòd cæleste corpus solum potest esse causa per se effectus vnius planetæ impediens alterum, in effectum

effectum verò subsequutum ex impedimento per talem effectum præstito, nullum influxum habere potest, quia præter intentionem totius cæli, & omium partium eius sequitur. Constat enim, nec totum cælum, nec aliquam eius partem intendere concursum planetarum sese impredientium, nec extinctionem messium, nec terræ sterilitatem subsecutam, ex impedimento pluviæ futuræ intentæ ab vno planeta, & impeditæ per concursum alterius. Causa autem prima, eiusque efficax voluntas non solum intendit, & concurrit ad effectum causæ impredientis, & ad impedimentum per eam præstitum, sed concursum vtriusque per se vult, per se intendit, per se efficit, atque etiam effectum ex tali impedimento per accidens, & casu subsecutum, vult per se, intendit per se, producit per se.

Cæterum D. Thomas de solo effectu vnius planetæ, per quem impeditur alter cum eo concurrens, loquitur, & in eo solum similitudinem cælestis corporis cum diuina voluntate assignare intendit, non in cæteris, de quibus ingenuè fatetur alio loco à nobis citato, præter intentionem cæli esse, & ideo etiam comparatione eius casualis esse, & vocari.

QVÆSTIO V.

An, & quonam modo cælestia corpora in intellectum, & voluntatem nostram influant.

Circa naturam intellectus humani errauerunt Empedocles, Democritus atque Homerus, putantes, materiale quid esse, aut corporeum, sicut sensum, vt testatur Aristoteles 1. lib. de anima cap. 3. textu 150. Ex quo errore in alterum incidisse necessarium fuit, videlicet, non minus intellectum, eiusque operationes, quàm sensum subiici influentiis cælestibus, ita vt sicut directè circa sensuum opera imprimere valent, pariter circa intellectum, & operationes eius, & consequenter circa voluntatem, quia eiusdem ordinis sunt potentia istæ. Ex qua sententia processit proloquium illud Homeri relatum ibidem ab Aristotele: *Talis enim mens est terrestrium hominum, qualem indies inducit pater hominumque, deorumque*: hoc est, Iupiter: quem summum Deum appellabant, per eum intelligentes totum cælum, vt docet Augustinus, 4. libro de Ciuitate. Et hinc etiam processit Stoïcorum error, qui putabant, cogitationem nostri intellectus causari ex hoc, quod sensibiles corporum imagines ei imprimuntur, sicut literæ imprimuntur papyro, etiamsi nihil efficiat, vt Boëtius refert 5. lib. de consolatione, & ex ipso D. Thoma 3. lib. contra Gentes, cap. 84. & propterea, cum subditus sit influentiis cælestibus, tanquam vniuersali agenti circa eum operanti, ex earum impressionibus

fiunt in nobis eadem operationes intellectus, & ex consequenti operationes voluntatis, circa quas influxum habebunt cælestia corpora.

Quod probari potest ex duobus, ex priori quidem, quia non videtur, aliam causam designari posse acrioris ingenij vnius hominis, & hebetioris alterius, nisi quia ille sub melioribus, magisque propitiis astris conceptus sit: quod Ptolomæus in Centiloquio significabat, dicens, cum Mercurius in alicuius natiuitate fuerit in aliqua domorum Saturni, & ipse fortis in suo esse, dat bonitatem intelligentiæ medullitis in rebus, ergo bona ingenij qualitas, operationesque eius ex cælesti influentia dependet, & ex eius impressione procedit; & ex consequenti bona operatio voluntatis ab intellectu motæ. Ex posteriori verò, quia constat, dæmones, qui puri spirituales sunt, allici, & fugari quibusdam herbis, ac lapidibus, quæ idcirco ad magicæ artis vltum conferunt, nec possunt effectus isti intelligi absque impressione aliqua ab eisdem corporibus, virtute stellarum, sub quarum constellatione applicantur, facta circa eosdem dæmones. Quod confirmat Pselus in libro de dæmon. asserens, nihil ferè nasci sub Luna, quod non ad alliciendos dæmones valeat.

Duplici tamen assertionem soluenda est quæstio proposita: & prior sit: corpora cælestia non possunt agere in voluntatem, aut operationes eius directè, & per se, aut immediatè, nec etiam circa intellectum, aliquid in eis immediatè imprimendo, & oppositum est error in fide. Assertionem hanc tenet communis Scholasticorum consensus, in 2. distin. 15. Diuus Thomas 3. contra gentes, cap. 84. & 85. 1. part. quæst. 115. artic. 5. & 12. quæst. 19. artic. 5. ex quibus locis duplicem rationem satis efficacem deducere possumus; prior talis est: corpus propria virtute non potest agere per se, & directè, in spiritum: sed cælum est corpus, & anima rationalis, eiusque potentiæ intellectus, & voluntatis, atque etiam harum operationes spirituales sunt: ergo non potest circa illas operari, vel influere cælum propria virtute per se, & directè: maior est euidens, quia corpus propria virtute nullum potest effectum producere, nisi corporeum, cum debeant proportionari effectus, & causa, & si spirituale produceret, foret effectus sua causa principali perfectior: sed spirituale subiectum incapax est effectus corporei in se recipiendi, cum sit ordinis superioris: ergo non potest illum recipere à corpore, nec proinde hoc in illud agere. Minor verò non est minùs euidens ex parte cæli, quod corporeum sit, & concessa ab aduersariis: ex parte verò animæ, quod sit spiritualis, probata est à nobis in nostris libris de anima: ergo vera erit assertio nostra.

Secunda ratio sumitur ex D. Damasceno, 1. libro orthodoxæ fidei,

fidei, capite 7. ubi tenet, & probat assertionem nostram hoc modo: corpora cælestia operantur naturaliter, hoc est, ex determinatione ad vnum, & absque electione, vel libertate; si ergo in voluntatem nostram per se, & directè eam mouendo, ad propriam operationem agerent, naturalis quoque, ac determinata ad vnum foret operatio eius: non ergo libera, nec ex electione, quod non solum fidei contrarium est, sed euidenti experientiæ: quare planè falsum est, quod cælestia corpora, per se immediatè, seu directè agant in voluntatem nostram, vel operationes eius. Quod verò contrarium asserere, sit error in fide Catholica, probari potest ex multis locis sacræ paginæ, ex quibus planè deducitur, scientiam, sapientiam, atque intelligentiam, non à cælo, vel astris accipere hominem, sed à Deo mouente intellectum eius, ac dirigente operationes eiusdem, & voluntatem non solum ex eodem excitari, moueri, ac dirigere in suis actibus, sed tanquam causam liberam eorum, ita ut non modo naturali moueatur, vel ex instinctu naturæ, sicut bruta, atque cætera inanimata mouentur, sed ingenua excitatione, ac morione, quam recipere, vel respuere, operari, vel operationem suspendere in eius sit potestate situm. Iob enim 25. *Vbi est Deus, qui fecit me, qui dedit carmina in nocte, qui docet nos super iumenta terra, & super volucres cali erudit nos?* Et Psalmo 93. de Deo etiam dicitur: *Qui docet hominem scientiam.* Genesis 4. *Subter te erit appetitus eius, & tu dominaberis illius,* quibus additur Ieremias 10. *Iuxta vias gentium nolite discere, & à signis cali nolite metuerè, qua timent Gentes.* Et sancti Patres ubicūque de influxu cæli circa humanam voluntatem loquuntur, constanter tenent eandem veritatem, quam definiuit Ecclesia in Concilio Brachar. i. c. 9. & 10. aduersus Priscillianistas hæreticos.

Assertio posterior communis etiam scholasticorum, quam tenet, & explicat Diuus Thomas, eisdem locis citatis: indirectè, & quasi remotè, & per accidens influunt corpora cælestia in intellectum, & voluntatem, actūsque harum potentiarum, qui cum dependeant à sensibus, & eorum operationibus, sub genere rerum materialium constitutis, per quandam redundantiam attinguntur ab influxu cælorum, quatenus per hunc aliquid imprimitur circa organa sensuum, ex qua impressione variatur modus operandi illorum, & appetitus sensitiui, vnde redundare solet non parua variatio circa intellectum, & voluntatem. Ita tamen hoc est intelligendum, ut per talem influxum cæli circa organa sensuum, & eorum operationes non possit etiam indirectè cogi, vel necessitari voluntas, sed quocunque eius influxu præsupposito, (organum suum non sic lædente, ut ordinatam eius operationem tollat) in potestate voluntatis positum esse, agere, vel non agere, & integrari, atque illam permanere voluntatem eius. Vbi illud aduertere

aduertere necesse est, quod egregiè adnotauit Diuus Thomas 1. part. quæst. 111. artic. 5. videlicet in hoc versari maximum discrimen, inter Angelos & animam nostram, quòd licèt omnes sint spirituales substantiæ, diuersa tamen ratione, quia Angeli sunt spirituales substantiæ completæ, atque perfectæ, non dependentes à corpore, nec potentes illud informare, quare nec à cælo possunt, etiam indirectè, & per accidens dependere. Anima verò rationalis, etsi secundum enitatem, & substantiam su spirituales, incompleta tamen, & partialis, quæ essentialiter potest informare corpus, & dum actu ipsum informat, dependet ab eo in suis operationibus aliquo modo, atque ex consequenti voluntas, quanquam magis remotè: vnde sequitur, circa Angelos nihil agere posse cælum directè, nec per se, aut etiam per accidens aliquid eis imprimere, quare neque in suis operationibus vllò prorsus modo, ab eo dependent; anima verò, propter dependentiam, quam habet à corpore, dū illum informat, indirectè, remotè, & per accidens, ab eo dependet in operationibus intellectus, & voluntatis.

Ad primam partem argumenti propositi, aduersus nostram sententiam respondeo, maius ingenij acumen ex ipsa natura vnius, & alterius animæ præcipuè prouenire, quæ licèt eiusdem speciei sint, ex differentiis tamen indiuidualibus quædam sunt perfectiores aliis, quamuis non ita necessariò, quàm reperiri possint aliquæ eiusdem perfectionis, etiam indiuidualis, vt copiosè ostendimus in nostris commentariis super secundum librum de anima. Iuuant tamen maximè meliora organa, ac dispositiones sensuum, & hac parte iuuant etiam maximè influentiæ cælestes, & signa, in quibus concipiuntur diuersi homines, atque etiam bonum temperamentum progenitorum, ex quibus solùm inferuntur modus indirectè, atque remotè agendi cælorum in intellectum, & voluntatem concessum, & explicatum in nostra secunda assertionem. Ad secundam partem negamus, quòd dæmones alliciantur herbis, & lapidibus, quia hæc aliquid in eos imprimant, sed solùm in quantum signa quædam sunt ex maleficorum pacto tacito, vel expresso cum eis iniuncto, cuius virtute accedere, vel recedere suis temporibus dicuntur pro effectibus edendis. Quòd verò Pselus ex hoc intulit, de rebus suis Lunæ aspectu ortis, planè falsum est.

QVÆSTIO VI.

Possintne Astrologi ex syderum obseruatione futura certò præcognoscere, ac prænunciare.

Astrologi, diuinatores & iudicarij multa se iactant certò prædicere, priusquam eueniant, non solùm naturaliter, & necessariò

necessariò euentura, sed calu, atque tortuò, immò, & quæ ex humana libertate dependent; posse autem se illa certò præcognoscere aiunt, in aspectibus quarundam stellarum, quas fatales vocant, non quia stellæ istæ, vel earum facies, aut aspectus tales effectus futuros efficiant, sed quia eos, quamuis ab aliis causis efficiendos, quasi denotant, vel significant instar literarum: ipsi vero iudicarij, aut diuinatores eandem aspicientes, quasi se in eis aspectis legere arbitrantur futuros euentus, eosque certò prædicere; vt vero alicuius hominis mores, fortunam, successus, ac exitus eorum, certò possint eidem prænunciare, certis quibuscumque instrumentis aut rebus vruntur, sub aspectu determinatæ cuiusdam stellæ, aut planetæ, in puncto natiuitatis eius regnantis, seu prædominantis, aut talem alium situm habentis, vt certam stellam in tali distantia Solis vel dispositione inspicientis, attemperatis, seu iuxta positis, & iuxta significationem huius, vel harum stellarum, censent sibi iudicandum de inclinationibus, aut propensionibus naturalibus talis hominis; ex quibus colligunt, tales esse futuros mores eius, & vitam, successusque in ea interuenientes, & hinc affirmare audent, in Principem, vel Regem eligendum, aut etiam summū Ecclesiæ Pastorem, vel successus cōtrarios aduersæ fortunæ habiturum, quos constat, ex libera, seu liberis hominum voluntatibus dependere. Hanc autem suam positionem videntur fundasse in illis verbis sacre pagine Genes. 1. *Fiant luminaria in firmamento cali, & diuidant diem, & noctem, & sint in signa & tempora, & dies, & annos, & paucis interpositis, Fecitque Deus duo luminaria magna, luminare maius, vt præset diei, & luminare minus vt præset nocti, & stellas*: Quas idcō colligunt factas esse à Deo, vt sint in signa futurorum euentuum: hæc enim pro se Originem, ita exponētem, vt testatur Eusebius Cæsariensis lib. 6. de præparatione Euangelica, cap. 9. Esse autem signa non possunt, nisi eorum quæ in mundo inferiori efficienda sunt, quos ad futuros euentus vocamus: hi ergo per easdem stellas, vel earum aspectus, tanquam per signa significantur nobis, & ex consequenti ducunt nos in cognitionem eorum, & eis inspectis poterunt ab Astrologis cōgosci, ac prænuntiari. Quod proculdubiò satis erat congruum, vt vniuersalibus corporibus tantò inferioribus perfectioribus, quantò ab eis remotioribus, insignis hæc prærogatiua concederetur, vt quasi speculum nobis forent, in quo effecta omnia ab eisdem inferioribus procedentia inspicere, ac veluti præcognoscere possemus, priusquam extra suas causas procederent, sicut constat in essentia diuina, eiusque idæa perfectius longè præcognosci à Deo, antequam fiant.

Vt autem planè, ac distinctè ostendamus, quidnam huic positioni,

tionem, & vñ eius concedendum sit & quid in vtroque non solum damnandum, & execrandum, sed euidenter falsum ostendendum, ex principiis veræ Philosphiæ has assertions statuere, ac probare decreuimus. Prima sit, & quasi fundamentum cæterarum: impossibile est per virtutes, vel aspectus stellarum, liberum aliquem effectum, seu euentum, vel aliquo modo ex libertate nostra dependentem, certo cognoscere, & ex consequenti certo prænunciare euenturum sine euidenti periculo errandi, vel mentiendo, immò sine frequenti errore, vel mendacio. Hanc probo primò ratione, magna ex parte deducta ex doctrina Diui Thomæ 2.2. quæst. 95. art. 5. & sic procedenti: vel stellæ significant futuros euentus liberos tanquam signa eorum naturalia, vel supernaturalia: vtrumque est falsum: ergo falsum quoque est, quòd sint signa eorum. Probatur minor, quia signum quodcunque naturale, & corporeum, vel est effectus rei, quam significat, vel procedit ad eadem causam cum eo. Exemplum prioris præbet fumus significans ignem, à quo tanquam effectus procedit; posterioris verò Iris in nubibus formatus, qui serenitatem quandoque significat, & à causa eiusdem serenitatis simul, vt effectus procedit, ita vt eadem sit causa serenitatis, & Iridis eam significantis vtrique communis; sed neutro ex his modis possunt stellæ, vel motus, aut dispositio earum, esse signa futurorum euentuum liberorum, aut ex libertate dependentium: ergo nec possunt naturaliter significare: minorem probo, quia impossibile est stellas, vel aspectus, seu dispositiones earum esse effectus rerum, vel euentuum inferiorum, cum isti nihil in cælestia corpora, vel stellas imprimere possint, vel immutationem aliquam in eis facere, vt per sese est manifestum; sed nec possunt habere aliquam causam cum eis communem, cuius sint communes effectus, quia prorsus omnis motus, aspectus, ac dispositio stellarum procedit à sola causa superiori; effectus verò liberi, aut ex libertate dependentes, procedunt per se, & propriè, ac proximè à causa inferiori: quare nullam causam possunt habere communem, præter diuinam prouidentiam, à qua constat, longè diuerso modo dependere: nam aspectus, ac dispositio stellarum disponuntur tanquam naturales causæ ad vnum determinatæ, & absque vlla libertate, & necessariò operantes. Liberi verò euentus, vel ex libertate dependentes disponuntur futuri per causas liberas, non necessariò, nec ex determinatione ad vnum operantes, sed ex indifferentia ad vtrumlibet, à quibus proinde non eodem modo proueniunt semper, sed variis, ac diuersis modis, & cum frequenti mutabilitate: impossibile est ergo esse causas naturales eorum, vel naturalia signa. Probatur consequentia, quia causa, vel signum eodem modo se habent semper, & quod ex determinatione
ad

ad vnum operatur, vel significat, id causare, vel significare non potest, quod variis modis, & cum frequenti mutabilitate, ex propria conditione prouenire aptum est, & ita semper prouenit. Quod verò non sint supernaturalia eorum signa, euidentius est: nam si supernaturalia forent, repugnat planè, lumine naturali, aut per naturalem scientiam, vel notitiam ab Astrologis cognosci, vt ipsi iactant se eos cognoscere, sed per solam reuelationem, vel supernaturale lumen deberent cognosci: quod satis magnum absurdum est, putare eis talem notitiam communicari, cum ex sacris literis constet, Deum sibi seruasse eorum præcognitionem. Temerarium igitur foret putare, vel præsumere sibi fuisse communicatam.

Ex quo secundum argumentum desumi potest, non minus efficax, quia Angeli iuxta communem totius scholæ consensum, per species sibi à Deo inditas à principio suæ conditionis cognoscunt, immò perfectè comprehendunt cælum, stellas, aspectus, ac dispositiones, & motus earum, & quæcunque naturalia corpora in toto munco facta à Deo; atque etiam virtutes, & significationes naturales eorum, cum sint superiores substantiæ, quibus debita est talis cognitio; sed constat ex sacris literis, non esse Angelis communicatam talem notitiam futurorum euentuum liberorum, aut ex libertate dependentium, vt mox ostendemus; ergo nec in stellis, aut eorum aspectibus, vel dispositionibus, seu motibus, tanquam in signis eorum naturalibus continentur, nec eorum inspectionibus, aut vllò alio modo possunt per eas ab Astrologis cognosci. Ac tandem vrgeri possunt rationes istæ, quia impossibile est, signa falsitatis, aut mendacij à Deo effici, vel institui: sed euidenti experientia constat, Astrologos futura prænunciantes ex harum stellarum fatalium significatione, aspectu, vel dispositione sæpè decipi, & sæpè euadere falsas eorum prædictiones: vel ergo fatendum est, per eas non significari, vel certè falsa, ac deceptoría signa Deum condidisse, aut instituisse, nisi fortè ignorantia eorundem Astrologorum adscribatur frequens eorum deceptio, quod ipsi concedere renuunt. Probatum minor, quòd decipiantur sæpè: nam si puer sub tali aspectu, vel dispositione, situ, ac motu talium planetarum, talem vitam, tales mores, tales successus, vel fortunam talem habiturus est, qualem ipsi certò prænunciant, euidentius est, sub eisdem stellarum aspectibus, ac dispositionibus in eodem puncto plures alios concipi, aut oriri, quos necesse foret, eandem prorsus conditiones habituros: experimur tamen habere valde diuersas; ergo fallacia planè sunt signa, & in earum inspectione, ac prædictione euentuum, vbi constat, locum non habere natiuitatis moram, quam prætendunt, quia in eadem prorsus duratione,

duratione, & in eodem puncto contingunt multa.

Probatum deinde ex sacris literis, Isaie 41. *Annunciate, quæ ventura sunt, & sciemus, quia dī estis vos*, & cap. 46. *Non est ultra Deus, nec est similis mei, annuncians ab exordio nouissimum, & ab initio, quæ dum facta sunt.* Et expressius adhuc cap. 47. ubi Deus Babylo-
nios, & Chaldaeos, hisce verbis reprehendit: *Defecisti in multitudine consiliorum meorum, stent & saluent te augures cali, qui contem-
plabantur sydera, ut ex eis annuntiarent ventura tibi.* Quam reprehensionem iustissime possumus his applicare, qui Astrologia futura ex eisdem causis prænuntiantibus fidem adhibent. Ex quibus locis Ecclesia aduersus eosdem Astrologos sæpè diffiniuit falsas, & commentitias esse tales eorum prædictiones futurorum euen-
tuum, damnans, atque anathematizans iudiciariam facultatem, & eius usum, ut constat ex 2. part. decretorum, capit. 26. per pri-
mas quinque quæstiones, & in Concilio Brachar. 1. ca. 9. & Tole-
rano 1. in assertionem fidei aduersus Priscilianum, & Alexandro
tertio, ut habetur capite ex tuarum, de sacrilegiis Sacerdotum, ubi
Sacerdotem, qui imprudentia magis, quàm impietate per astrola-
bium eo animo constellationem obseruauit, ut auctorem cuius-
dam furti reprehenderet, hac pœna multauit, ut per annum in-
tegrum non celebraret, monens illud factum cum grauissimo sce-
lere fuisse coniunctum. Denique Sixtus V. celebrem constitutio-
nem edidit anno millesimo quingentesimo octuagesimo sexto,
nonis Ianuarij, & sui Pontificatus primo, quæ incipit: *Cali, & ter-
ra creator Deus*, & cuius titulus sic habet: *Contra exercentes Astro-
logia iudiciaria artem, & alia quacunque diuinationum genera, libròs-
que de his legentes, ac tenentes*, per quam grauissimis verbis prohi-
bet omnem diuinationem, prædictionem, ac prænuntiationem
futurorum euentuum liberorum, aut ex libertate dependentium,
sapientissimis rationibus ostendens, non solum eas, sed artes
quaslibet, à quibus emanant, vanas esse, cōmentitias, perniciosas,
& à primò mendaciorum omnium parente ortum habentes,
quidquid Astrologi, Mathematici, Genethliaci, & Planetarij eas
profitentes, contendunt se ex variis stellarum signis, & aspectibus
eas haurire. Merito ergo sancti Patres plura aduersus eosdem
scripsere, ostendentes, sine fundamento prorsus in suis prædictio-
nibus futurorum loqui, immò falsa coningere fundamenta, stel-
larum, ac virtutum cælestium, ut miseros homines fidem eis ad-
hibentes decipiant. D. Clemens Papa lib. 9. recognitionum, D. Au-
gust. lib. 7. confessionum, cap. 6. D. Gregor. Homilia 10. in Euang.
Epiphaniz, & plures alios citat Pererius, noster Rubius quoque
libro 2. de diuinatione.

Ex hac autem assertionem infertur primò, nec posse hos Plane-
tarios futuros effectus, etiam ex hominum libertate non depen-
dentes,

dentes, sed casu euenientes certò præcognoscere ex syderum dispositione, & inspectione, vt quòd à lapide cadente interficiatur homo, vel animali aliquo terram effodiente manifestetur thesaurus. Probatur hac ratione, effectus isti casuales non habent præter primam, vllam causam certam per se, nec naturalem, & ex determinatione ad vnum operantem; nam idè dicuntur per accidens, vel casu euenire: ergo nec possunt contineri, nec naturaliter significari per stellas, vel alias causas naturales inferiores, vel superiores: quare nec excogitari potest illud principium, in quo vel ex quo possint certò cognosci, vel deduci aut prænunciari antequam fiant, vel eueniant; vnde sequitur temeritate, & vanitate plenas esse eorum prædictiones, vanòsque, & temerarios esse eos certò prænunciantes.

Secundò inferitur, non posse planetarios certi alicuius hominis, regni, ciuitatis, casus, aut fortunam, aliàsve circumstantias humanarum rerum, vel negotiorum certò cognoscere, nec prænunciare. Probatur ex duobus, ex priori quidem, quia horum plura dependent ex libera voluntate vnius, vel plurium hominum: sed cælestia corpora non influunt per se in humanam libertatem, vt superiori quæstione ostendimus; ergo nec possunt effectus ex ea dependentes certò cognosci, ac prænunciari ab homine, immò nec ab Angelo, seclusa diuina reuelatione: ex posteriori verò quia ex ea parte, qua non dependent ab humana libertate, nullam habent causam naturalem per se, nec certam, aut determinatam, nec ex determinatione ad vnum operantem, in qua possint certò præcognosci.

Inferitur tertio, non posse eos, qui Physionomicam aut Chiromantix artem profitentur, ex vultu hominis, nec ex lineis manuum, certò cognoscere, aut prænunciare futuros hominis mores, fortunam, aut successus alios, quod sic ostendo. Quamuis lineæ istæ, vultus, aut aliqua alia corporis dispositio, aliquo modo indicare possit inclinationem hominis ad hæc, vel alia vitia, vel ad hanc, vel illam virtutem, aut manifestare aliquam aliam passionem; semper tamen relinquuntur particularis actus virtutum, aut vitiorum in potestate voluntatis eius, ex quibus cum dependant mores, exitus vitæ, aut successus eius, præcognosci repugnat certò, aut prænunciari; quæ verò ad bonam, vel malam fortunam (vt aiunt) pertinent, partim ex eadem libertate dependent, partim casualia sunt, & ex vtroque repugnat certò præcognosci.

Quartò infero, non posse planetarios ex aspectu, vel dispositione syderum, aut planetarum, certò cognoscere, aut prænunciare cuiusunque hominis temperamentum, aut innatam propensionem, aut inclinationem; quod efficaciter probari potest, quia licet sydera influxum habeant circa hæc, quia corpora

per se sunt, non sunt tamen integra eorum causa, sed plura alia ad ea concurrunt, videlicet dispositiones materiæ, virtus formatrix, & aliæ causæ particulares, à quibus maleficatur concursus cælestis: sed non possunt omnes has causas, & dispositiones (quia magna ex parte occultæ sunt) exploratas habere: ergo nec possunt qualitatè affectus certò cognoscere: & his explicata sunt omnia, quorum cognitio eis denegatur, & quorum certa prænnuntiatio damnatur. Superfunt igitur explicanda, quæ certò, vel magna saltem probabilitate præcognoscere, ac prænnunciare possunt.

Sit igitur assertio secunda: syderum, planetarumque omnium ortus, & occasus, aspectus, & eclipses, & id genus alia ad statum cæli pertinentia, certò possunt præcognoscere Astrologi, ac prænnunciare, multo etiam tempore, antequam eueniant, sicuti expressit Sixtus Papa V. in eadem constitutione citata non longè à principio, hisce verbis: *Futuris euentibus ex naturalibus causis necessariò, vel frequenter prouenientibus, quæ ad diuinationem non pertinent, duntaxat exceptis.* Et ratione probatur: quia isthæc omnia non ex libero arbitrio, nec ex inferioribus causis modificantibus, sed ex sola dispositione, ordine, ac motu cælorum stellarumque dependent, in quibus suas habent determinatas, certas ac naturales causas, quas absque dubio possunt exploratas habere per scientiam ipsam Astrologiæ, & multo tempore antequam fiant; ergo possunt ea certò cognoscere, ac prædicere, sine vlla temeritate, aut errandi periculo, certitudine quidem physica, vel naturali: nam cum possit Deus immutare leges, & motus, ac dispositiones astrorum, pro suo beneplacito, sicut fecisse constat in bello Iosue, in horologio Achaz, & in sanctissima morte Saluatoris nostri, potest etiam deficere, quod per Astrologiâ cognoscunt, principiis eius in eodem ordine, motu ac dispositione cælorum innitentibus, per supernaturalem potentiam Dei.

Assertio vltima: morbos, frigora, tempestates, sterilitatem terræ, pluuias, siccitates, ac terræ motus vniuersales, possunt sæpè præcognoscere Astrologi, ac prænnunciare certa quidem cognitione, ea certitudine, quam habere possunt naturales causæ, ac naturales scientiæ, non quidem nunquam deficiente, sed rarò, vt plurimum verò eueniente. Hæc etiam absque dubio continetur, & colligitur euidenter ex illis verbis Sixti Quinti: *Futuris euentibus ex naturalibus causis necessariò, vel frequenter euenientibus:* nam per effectus euenientes necessariò intelligit effectus cælestes, & de his locuta est assertio nostra præcedens, & naturaliter deficere repugnat, non dependentes ex vllis causis inferioribus, sed solùm ex naturali, ac necessaria dispositione, & motu cælorum, non impedibili naturaliter, quate talis euentus naturaliter deficere repugnat, per effectus vero frequenter euenientes ex causis naturalibus, non eodem

eosdem effectus, qui in solis cælis, atque stellis fiunt, nam isti non solum frequenter eueniunt, sed semper, & ideo non possunt naturaliter, sed per miraculum duntaxat impediri, aut deficere; sed eos, qui ex naturalibus causis inferioribus, aut sublunaribus proueniunt, de quibus constat aliquando (licet raro) deficere, ut constat de hyemali frigore, & pluuiâ, de uerna serenitate & calore, ac de procreatione fructuum, quæ nihilominus certitudinem naturalem habere dicuntur, quamuis infimam, sufficientem tamen ad generandam naturalem scientiam. Hos igitur effectus & per hanc certitudinem posse sanè præcognoscere, & prænunciare Astrologos, aio, quia causas habent certas, & determinatas, atque ex determinatione ad vnum operantes, quas (uti proportionatas) possent exploratas habere; sed addidi in vniuersali, quia effectus isti dupliciter sumi possunt, nempe in ordine ad totam terram, vel saltem ad regionem aliquam magnam eius, ut ad Europam, vel aliam eiusdem extensionis, aut similis, atque etiam in ordine ad magnum temporis spatium, ut ad annum, aut quid simile, aut in ordine ad vnam vel alteram prouinciâ peculiarem, aut ciuitatem, & ad paruum magisque determinatum tempus, nempe vnius diei, vel vnius Lunæ quadrantis: & modo priori vniuersaliter dicuntur considerari magis, vel minus, pro maiori, vel minori extensione: morbos igitur, tempestates, sterilitatem terræ, aut terræ morus, iuxta priorem considerationem certò possunt præcognoscere, aut prænunciare; iuxta posteriorem verò, non certò, etiam certitudine naturali effectuum rarò deficientium, sed sola probabilitate, etiam frequenter deficiente. Rationem verò huius differentie assigno, quia licet easdem habeant causas effectus isti, utroque modo considerati, sed non eodem impedibiles; nam in ordine ad totam terram, vel maximam partem eius, & ad magnum temporis spatium rarò impediuntur, frequenter verò ex toto, vel maxima ex parte, si in ordine ad vnam vel alteram ciuitatem ac terminos eius, vel etiam in ordine ad paruum magisque determinatum tempus accipiuntur. Quod efficaciter potest à posteriori probari: nam experimur, rarissimè contingere sterilitatem totius terræ, vel partis eius maximæ, ut quod fructus nullibi prorsus procreentur, aut in tota Europa, quod per totam terram, aut Europam totam, pestis grassetur, vel pluuiæ deficient, in Beticâ verò, aut Castellana prouincia, vel intra terminos huius, vel illius ciuitatis, ac pro paruo tempore quadrantis Lunæ, vel vnius diei, non rarò, sed frequenter aliquid horum euenit; ergo naturales causæ facilius impediri possunt, & impediuntur modo posteriori consideratæ; modo verò priori rarò, quare certò possunt effectus, vel priuatio eorum præcognosci, &

prænnunciari in causis naturalibus modo priori, modo verò posteriori, probabili tantum cognitione sæpè deficiente: & hinc est, quòd Astrologi hos euentus prænnunciantes in vniuersali rarò falluntur, & ferè semper eueniunt, vt ab ipsis prænnunciantur (si peritissimi in sua sint facultate, & maxima diligentia adhibita decernant) prænnunciantes verò eosdem in particulari, sæpè decipiuntur, quia frequenter experimur, aliter euenire, ac ab ipsis prænnunciantur. Et ratio huius deceptionis est, quia vniuersales causæ modificantur à particularibus, & proximis, à quibus productio effectuum maximè dependet, & ideò ex earum mutatione impediri potest: sed constat, particulares causas non posse esse ab eis exploratas in particulari; vt ventum nubes dissipantem, aut congregantem in hoc vel illo particulari terræ situ, tali tempore regnaturum, quod à nemine potest certò præcognosci, propter occultissimam eius causam, iuxta illud Christi, Ioannis 3. *Spiritus ubi vult spirat, & vocem eius audis, sed nescis unde veniat, aut quò vadat*: ergo non possunt isti effectus in particulari certò præcognosci: ex quo dependet, vt pluuiæ tali tempore generentur, vel generari debeant, ex quo absque dubio contingit, prædictiones horum futurorum falsas reddi magna ex parte, & ideò certas non esse, etiam certitudine naturali, in quo assentior Patribus Conimbricensibus. Sed dissentio ab eisdem in alio, quod absque vlla distinctione, negant, hos effectus præcognosci, aut prænnunciari posse ab Astrologis certo iudicio, nõ certitudine naturali, sed probabili duntaxat, quod tamen negandum est, si sub tradita distinctione, quia iuxta primum membrum eius efficaciter probauimus posse certò prænnunciari, quanquam sub alio non certo, sed probabili iudicio possit.

Superest Astrologorum fundamentum explicare, & rationem reddere, ob quam eorum prædictiones sæpè sint eisdem futuris euentibus consentaneæ, ita vt magna ex parte sic contingat, sicut ab eis prænnunciantur, & verba quidem Geneseos ab eis opposita, quibus stellæ dicuntur à Deo conditæ, vt sint in signa temporum, in duplici sensu intelliguntur à sacris expositoribus in eorundem commentariis. In priori quidem ita vt signa dicantur imbrium, siccitatum, ventorum, tempestatum, ac morborum, & aliorum similium, quas in nauigando nauæ, in serendo agricolæ, ac in medendo Medici obseruare possint, & ex eorum obseruatione præcognoscere, ac prænnunciare futuros euentus eiusdem conditionis, de quibus in vltima nostra assertionem loquuti sumus, dantes eis, quòd in vniuersali possint eos certò cognoscere certitudine naturali, vt plurimum eueniente, aut rarò deficiente; in particulari verò, solum iudicio ac prædictione probabili non rarò deficiente: ita exponunt Diuus Chrysostomus, Theodoretus,

tus, Apolinarius, & Hugo. Posterior sensus non minùs literæ consonar, videlicet, vt dicantur stellæ à Deo conditæ, vt signa forent, quibus ordo, ac diuisio temporum notaretur, hoc est, vnde meridies, ac diei, noctisque horæ signarentur: quæ priùs quàm stellæ, Sol, & Luna fierent, nullum tale signum ætabat in cælo; quem sensum eisdem verbis tribuunt Beda, Iulius, Eucherius, & D. Thomas 1. part. quæst. 70. artic. 1.

Circa secundum triplicem causam redere possumus, ob quam non rarò consonant Astrologorum prædictiones euentibus futurorum, quamuis maiori ex parte mendaces, arque vanæ sint: sit autem prima, quam tradit Augustinus, 4. libro confessionum, capite 3. quia Deus aliquando cætas hominum mentes sic excitat, quasi instinctu quodam sibi incognito, vt nescientes profectant, quæ consulentes in ordine ad alios fines à Deo præstitutos audire oporteat. Quo fortassis modo sortes, quibus ethnici vti solebant, aliquando exhibebant futurorum significationem, sed casuale vtrumque reputandum est. Secundam causam affert etiam D. Augustinus, 5. libro de Ciuitate, cap. 7. hisce verbis: *Non immerito traditur, cum Astrologi mirabiliter multa vera respondent, occulto instinctu fieri damnum, non bonorum, quorum cura est, has falsas, & noxias opinionis de astralibus fateri humanis mentibus, atque firmare, non Ioroscopi notati, & inspecti arte, quæ nulla est Dæmones verò nec stellarum intuitu, nec aliunde futura contingentia, certò præcognoscere possunt, vt egegiè Diuus Thomas, 1. parte, quæstione 75. articulo 2. ex comuni scholasticorum consensu de cet, & probat: nec proinde plantarij ex eorum suggestione, & ideo cū eiusmodi prædictiones eis suggerunt, æquiuoca oratione, & quæ in diuersas partes interpretari potest, vtuntur, ita vt si res in oppositum euenerit, non ipsorum falsitati, aut ignorantie ascribatur, sed interpretum inscitia: tale fuit oraculum illud, quod Æacidæ reddiderūt: *Aio te, Æacida, Romanos vincere posse* Postrema causa, & fortè non minùs vera, est, quia ex multis prænunciatis, impossibile est, quin vnum, aut alterum casu eueniat: planetarij verò nimis multa quotidie prædicunt, ex quibus licet casu, (respectu prænunciatorum eorum) plura tamen coincidunt cum his, quæ ex aliis causis eueniunt; bene igitur stare potest, quòd fallaces sint eorum prædictiones, & nihilominus plura ex his, quæ prænunciant casu, & per accidens, coincident cum euentibus per se intentis, & per se productis à propriis causis.*

CAPVT IV.

Textus Aristotelis.

Figuram autem sphericam necesse est habere cælum.

Breuis expositio textus.

Intendit Aristoteles cõite præsentì docere, cuiusnam sit figuræ cæleste corpus, nec est diuisione, quia in eo solum statuit unicam conclusionem, eaque probat tribus argumentis. Conclusio talis est: Cælum habet sphericam, seu rotundam figuram; quam probat primò hac ratione; prima figura debetur primò corpori: sed cælum est primum corpus, cum sit omnium nobilissimum: ergo debetur ei prima figura: at spherica est prima, hoc est, perfectissima omnium figurarum, tam earum, quæ in planis, quam quæ in solidis corporibus cernuntur, cum simplicior sit, & vna tantum linea, aut vnica superficie constans, cui nihil addi potest, cum tamen aliz figuræ plurius contineantur lineis, aut superficiebus, vt patet: ergo hæc debetur cælesti corpori.

Secunda ratio procedit ex communi consensu Astrologorum, qui duplici via procedunt in constituendis figuris: nam quidam corpora diuidunt in superficies, ex quibus componi censent, & hi solam figuram sphericam inter solidas non soluunt in plures superficies, cæteras vero in multas resoluunt, vt pyramidem in quatuor triangulares; alij verò ordinem figurarum assignant, secundum species numerorum, accommodando figuras numeris, iuxta quorum sententiam circulus, tanquam simplicissima figurarum, accommodatur unitati etiam simplicissimæ in genere numerorum; iuxta vtramque igitur sententiam, spherica figura censetur simplicissima, deoque prima, primoque corpori (quod est cæleste) debita. Coligit Aristoteles ex rotunditate primi cæli cæteras cælestes sphas sub eo contentas, atque etiam elementaria corpora, eadem rotunda figura prædita esse, quia illud, quod rotundo adæquatur, ei que contiguum est, & omni ex parte ab eo continetur, eiusdem figuræ debet esse: sed constat sic se habere sphas omnes cælestes, respectu lunaris spheræ; omnes ergo habent figuram sphericam.

Tertia ratio procedit ex motu hoc modo: corpus cæleste mouetur motu circulari, ita vt vna eius pars succedat in spatio alterius: si igitur non haberet figuram circularem, sed aliquam ex rectis lineis, habentisque angulos inter sese distantes, fieret, vt in spatio vnus angulus alter succederet, & idè spatium hoc nunc esset corpore plenum, nempe dum ipsum occupat angulus, & postmodum vacuum, cum iam non occupetur ab angulo, sed soli intervallo interiecto inter angulos correspondeat: quare sequitur

sequitur supra cælum dari locum, dari vacuum, dari spatium corporeum, in quo extendi possit corpus, quod constat esse falsum, quia cum cælum sit ultimum, ac supremum corpus, nihil horum supra, aut extra ipsum dari potest, & eadem absurda sequi asserit, siue cælum dicatur habere oualem, siue pyramidalem, vel quamlibet aliam figuram ab sphaerica diuersam. Vrget deinde argumentum primò, quia euident est, motum cæli esse omnium motuum velocissimum, quia minus tempus, quàm cæteri consumit: necesse est ergo talem motuum breuissimum fieri per breuissimam lineam, qualis est circularis, ex iis scilicet, quæ percurri possunt ab eodem puncto incipiendo, & ad idem redeundo; ergo cælum, quod ex propria natura in circulo velocissimè fertur, circularem figuram habere oportet. Vrget secundo, quia licet elementa non sint inter sese continua, nihil vacuum inter ea reperitur, sed omni ex parte se contingunt, atque correspondent, aqua complectitur terram, aquam aër, aërem ignis, & concuum Lunæ omnia: sed constat de aqua & terra, esse corpora rotunda; de terra quidem experientia inferius ostendenda; de aqua verò probat, quia ad humiliorem semper locum confluit, neque vnquam quiescit, donec æquè à centro mundi distet, & par debet esse ratio de aëre, & igne, propter immediatam continentiam: necesse est ergo, cælum Lunæ omnia complectens globosam habere figuram, & pariter superiores sphaeras; ex quibus infert totum mundum sphaericum esse.

C A P V T V.

Textus Aristotelis.

Quoniam autem est dupliciter in circulo moueri, &c.

Breuis expositio textus.

INtendit Aristoteles capite præsentis, causam reddere, ob quam motus cæli fiat versùs anteriorem partem, hoc est, versùs hemisphaerium nostrum: hoc igitur inquit, & soluit, quia in semipiternis, quale est cælum, ac motus eius, cum semper eodem modo se habeant, nihil casu fit, sed ex instituto naturæ omnia: aliquam igitur in eadem habere debent causam, cum nihil sit, quod causam non habeat, præter primam, à qua depèdēt omnia: quòd igitur cælum sic moueatur, versùs anteriorem partem, & non alio modo, causam aliquam habere necesse est, & eam meritò inquit. Sed videri posset alicui, reprehensione dignum, talem causam adeò difficilem inuestigare velle: nam stultitiæ signum est, possibile existimare causas omnium, etiam difficilium inuenire, vel certè arrogantis animi, qui se omnia explicaturum confidit. Respondet nihilominus non statim inculandos

esse qui difficiles quæstiones excitant, sed inspicendum, quò animo id faciant; nam si animo ostentandi ingenium, famamque inaniter occupandi, reprehensione digni erunt; si verò inueniendæ veritatis desiderio ducantur, maxima est habenda eis gratia, si quid ingenio, ac labore reperiant, quod aut verum sit, aut saltem verosimile videatur. Respondet igitur dubio proposito, asserens naturam semper intendere id, quod optimum est, primaria scilicet intentione: nam contingit à primaria impediri, & tunc cum optima non possit, quasi secundaria intentione deteriora intendit, & facit, ut contingit in monstri productione; melius autem, ac præstantius reputatur, quòd cælum versùs anteriorem partem, nostrumque hemisphærium, à dextro in sinistrum moueatur, quàm modo opposito: nam dextrum digniorem partem denotat, à digniori verò motum incipere, in idemque peruenire, præstantius est, & hæc est integra huius capitis sententia.

Sed aduersùs eandem rationem dubitat Diuus Thomas, quia videtur in ea Aristoteles vitioso circulo uti; docuerat autem in superioribus, dextrum cæli in nostro Oriente esse, quia inde incipit motus eius; nunc verò probat, cælum moueri à nostro Oriente, quia ibi est dextrum: & respondet, distinctionem partium cæli, in ordine ad motum, causam esse, ob quam ab vna potius, quàm ab altera incipiat motus; quam distinctionem efficit intelligentia, priùs applicans virtutem vni quàm alteri: quod verò motus ab illa potius, quàm ab alia incipiat, non causa, sed signum distinctionis earundem partium est: absque vitioso autem circulo fieri potest, ut id, quod priùs à signo probatum est, rursùs probetur per causam, quia probatio prior à posteriori procedit, posterior verò à priori, & hoc modo processit in præsentiarum Aristoteles, cum in superioribus à signo, vel effectù, & ideò à posteriori processerit.

*Tractatus de figurâ, numero, ordine, & motibus
corporum caelestium.*

QVÆSTIO I.

An caeleste corpus sphaerica, seu rotunda figura præditum sit.

Magna fuit inter veteres Philosophos dissensio circa figuram cæli, ut Theodoretus in libro de materia, & mundo, atque etiam Plutarchus secundo libro de placitis Philosophorum testantur: nam quidam figuram, quasi oualem ei tribuebant, alij testudini similem, alij denique diuersas ab his, immò apud sanctos Patres non fuit concors sententia; sed placet, varios omnes modos sentiendi ad duas extremas classes referre breuitatis

tatis gratia. Prior igitur sententia denegat cælo rotundam figuram, eique tribuit figuram potius cuiusdam tentorii, quam hemicycli vocant, aut fornicis: ita sensit expressè Diuus Chrysostomus homilia 14. & 17. epistolæ ad Hebræos, quibus locis reprehendit eos, qui rotundam ei concedunt ex illis verbis: *Tabernaculi verò quod fixit Dominus*, sic loquens: *Vbi sunt, qui dicunt, mœneri cælum, & qui pronunciant sphaericum esse, utraque enim hæc sunt sublata per verbum, fixit.* In eadem ferè sententia fuit Diuus Basilii, Homilia prima Hexamerón post medium, vbi sic de cælo loquitur: *De figura quoque satis sunt ea, quæ idem ille dixit, Dei gloriam enarrando, qui constituit, inquit, cælum ut fornicem.* Quorum sententiam sequuntur alij sacrarum literarum expositores, quos retulit Diuus Damascenus secundo libro orthodoxæ fidei, capite sexto, atque etiam Lactantius libro tertio diuinarum institutionum, capite vigesimo quarto, vbi deridet eos, qui cælum omni ex parte rotundum posuere. In quos acrius inuehitur Procopius Gazeus in Commentariis super Genesim, capite primo & decimo septimo, exponens prima illa verba Genesim: *In principio creauit Deus cælum, & terram*: asserensque eorum sententiam alienam esse à fide Catholica, ideò aduersus eam in primis vtuntur variis sacræ paginæ testimoniis. Chrysostomus quidem obiicit verba illa, ex capite octauo epistolæ ad Hebræos: alij verò alia expressiora ex Psalmo 103. *Extendens cælum sicut pellem*: Vbi pellis nomine idem, quod tentorium, designatur: quibus expressiora adhuc sunt alia ex capite quadragesimo Isaïæ: *Expandie celos sicut tabernaculum ad habitandum.* Arguit deinde ratione Lactantius, quia si talis figuræ cælum foret, eandem haberet terram, quam constat, vnde quaque ab eo contineri, & quasi circumscribi, & propterea eiusdem est figuræ: quod ideò absurdum est, quia ex eo fieret, corpora omnia, quæ apud nos sunt, seu opposita omnia pendere.

Secundò, potest probari est stellis fixis, de quibus experientia docet, non semper æquè distare à terra, sed diuersis temporibus diuersam habere distantiā, quia dum prope horizontem versantur, maiores apparent, cuius non potest alia ratio designari, nisi quia tunc propinquiore cernuntur: Sol præterea, & Luna nostris oculis non sub sphaerica figura; sed sub plana apparent, puro etiam, ac sereno aëre: ergo non sunt rotunda corpora, sed alterius figuræ ex planis, & ex consequenti cælum, cuius partes sunt, vel cui affixa, vel saltem cui accommodata. Ac tandem si cælo tribuenda est rotunda figura, maximè propter rationem Aristotelis, quia sequeretur ex motu eius, extra cælum dari locum, & vacuum: sed nihil horum sequeretur, si oualem haberet figuram, vel instar cylindri esset; nihil ergo obstat, quin

aliquam ex his figuram habeat potiùs, quàm sphaericam. Probatur minor, quia si in figura oui, aut cylindri designetur axis ab vno apice ad alterum traductus, ita vt cælum circa, vtrumque apicem, tanquam circa polos voluatur, nunquam dabitur locus, vel spatium sine corpore, & ideo nec vacuum, vt consideranti patebit.

Vrgerique potest argumentum, quia capacissima figura debetur cælo, cum sub se complectatur totum inferiorem mundum: sed figura sphaerica secundum hanc extensionem, aut capacitatem est omnium minima, vt docet Archimedes in libro de Isoperimetris: ergo alia potiùs, quàm sphaerica figura cælo tribuenda est, & fortè quadrata erit congruentior, ob maiorem capacitatem, ac firmitatem, quarum ratione eam plures cælo concedunt Empyreo, vt in calce huiusce quæstionis videbitur. Et propter hæc fortasse dubius hæsit Diuus Augustinus libro secundo de Genesi ad literam, capite nono.

Posterior sententia asserit, cælum rotundam, seu sphaericam habere figuram omni ex parte perfectam: quam ante tempora Aristotelis in Italiam inuexisse refertunt Pythagoram, & in Ioniam Thalem Milesium, & hos secutos fuisse Babylonios, Chaldaeos, & Ægyptios: Ptolomæum 3. capite, libro primo editionis magnæ, Alphraganum differentia 1. atque etiam Platonem in Timæo. Postea verò Aristoteles in sua Schola Peripatetica eam ex professo docuit, atque probauit cap. 4. huius libri, à qua in nostram Theologicam ita emanauit, vt nemine dissentiente, eam amplectantur Scholastici omnes, tam antiqui, quàm recentiores. Sed priùs eam sequutus fuit Cicero secundo libro de natura Deorum, & post ipsum Diuus Hieronymus in commentariis capitis 5. Epistolæ ad Ephesios, vbi grauitè eos reprehendit, qui cælum non omni ex parte rotundum faciunt, sed fornicis instar curuatum. Quam sententiam non solum vt probabilior, sed tanquam veram amplectimur, nec solum censemus, sacris literis non aduersari, sed efficaciter colligi ex illis verbis Ecclesiæ. *Sol occidit, & in locum suum reuertitur, ibique renascens gyras per meridiem, & flectitur ad Aquilonem, lustrans vniuersa, in circuitu pergit spiritus, & in circulos suos reuertitur.* Quæ omnia præstare nequaquam posset, nisi sphaericam figuram haberet. Valdè etiam his similia sunt illa verba Ecclesiastici 24. vbi diuina sapientia loquens ait: *Gyrum cali circuitui sola.* Præter rationes verò Aristotelis capite quarto à nobis elucidatas, efficaciter probari potest ex astrorum moribus, hoc modo: euident experientia docet stellas fixas circundare terram, seruantes semper eandem distantiam inter sese, & eas, quæ prope polum sunt, moueri in circulum respectu eius, intra nostrum horizontem, seruantes semper

semper eandem distantiam ab stellis longius distantibus ab eodem polo, non secus ac mouentur clauī affixi corpori sphaerico apud nos; ergo motus eorum verè circularis est, & ex consequenti ipsæ circulares figuram habent, & cælum, cui affiguntur, & Sol, & Luna mouentur, tam respectu terræ, quàm maris, paulatim ascendentes ab horizonte vsque ad medium cælum, deinde ad Occasum perueniunt, paulatim descendentes, à quo iterum ad ortum circulari motu redeunt; quod fieri repugnaret, nisi cæli quibus affiguntur, perfectè rotundi forent, & vndique elementa complecterentur; quod euidenter ostenditur ex incrementis, ac decrementis Lunæ: siue enim corniculata sit, siue plena, siue ad plenilunium tendat per incrementum lucis, siue ab eo deficiat per decremēta, semper crescit, atque decrescit circulariter illuminata à Sole, quod constat esse impossibile, nisi sit corpus circularis figuræ. Propterea in exemplum demonstrationis quia à posteriori procedentis, hanc demonstrationem attulit Aristoteles 1. libro de posteriori resolutione, capite 10. Omne illud, quod in orbem augetur per illustrationem, est corpus sphaericum: sed Luna hoc modo augetur per illustrationem à Sole: ergo est corpus sphaericum: necesse est ergo, cælum, cui affixa est, corpus sphaericum esse. Et tandem experientia constat, diuersis motibus, & quodammodo oppositis moueri planetas, vt inferius explicabimus, & isti motus diuersi necessariò fieri debent supra polos, vel partes eorundem cælorum diuersas à polis, super quos mouetur cælum sydereum. Quod non posse fieri sine eorundem cælorum penetratione, vel scissione, si figuræ ouales forent, vel instar cylindri, faciliè à quocunque intelligi potest, & solum posse saluari tales motus per circulares figuram sphaericam. Hæc igitur habere necessariū est.

Næque ea, quæ sententia opposita attulit, aliquid aduersus nostram efficiunt, & in primis non significatur tabernaculi, vel fornicis, aut pellis nomine in scriptura figura cæli, sed officium; quasi dicatur, sicut tentorium, tabernaculum, vel camera obteggit ingredientēs omnes, eos intra se recipiens, eodem pacto cælum est quasi operimentum rerum omnium sub se degentium, & ideò veluti tabernaculum, siue tentorium, pellis, vel fornicis. Nec etiam, cum dicitur Deum extendisse cælum, sicut pellem, designatur figura eius, sed facilitas condendi illud, & ideò sensus horum verborum est, quem D. Augustinus eadem verba exponens lib. de Genesi 2. ad literam assert, tam facile Deo fuisse cælum condere, quam facile nobis est, complicatam pellem, quam manu tenemus, extendere. Quem etiam sensum indicauit planè Isaias cap. 41. hisce verbis: *Qui extendit veluti nihilum calos.* Sed nec ratio Lactantij aliquid probat: nam omnia corpora grauiora

in nostro, vel opposito Hemisphærio degentia, suo pondere, & gravitate ad centrum mundi tendunt, à quo non nisi ascendendo contra eandem eorum inclinationem deuelli possunt, quare non magis pendent, quæ in terra consistunt apud Antipodas, quàm quæ apud nos, & re vera nihil reperitur pendens in utroque Hemisphærio.

Ad secundum, negandum est, stellas in horizonte minùs à nobis distare, vel propinquiores esse, quàm dum in medio cælo versantur, quin potius, ut ex astronomica proportionem ostenditur, plùs distant in horizonte. Quòd verò maiores nobis appareant, concedimus; negamus tamen, rationem huius esse maiorem propinquitatem earum: sed densitas mediæ ex vaporum, atque exhalationum congerie causata, maiorem illam apparentiam efficit. Ut enim docet Aristoteles tertio libro Meteororum, capite quarto, atque etiam Seneca libro naturalium quæstionum, capite septimo, quò medium densus est, maiora, atque propinquiora videntur corpora omnia, quod docet experientia in his quæ per aquam cernuntur. Quod adeò verum est, ut etiam dum sunt in medio cælo, aliquando maiores, & postmodum minores nobis videantur, iuxta maiorem, vel minorem vaporum copiam mediò permixtam; quate maiores apparent hyemali, quàm vernò tempore, & flante austro, quàm borea, quia plures ventus ille vapores excitat; Sol autem, & Luna plana quidem nobis apparent corpora, ob nimiam distantiam, propter quam facilè visus decipitur circa figuram, quemadmodum circa magnitudinem: nam de utroque isto sydere iudicat, minoris longè magnitudinis esse, quàm terram, immò quàm turrim, vel aliud corpus apud nos degens.

Ad tertium dicimus, non posse vllò modo habere cælum figuram oualem, vel esse quàm cylindrum, quia repugnaret sub primo mobili, proprium motum conficere inferiores sphæras, cum super diuersos Polos à Polis primi mobilis moueri debeant; quin, aut se perfringerent, aut mutuò se pernaderent, si talem figuram haberent. Et præterea talem figuram habere debet cælum in ordine ad motum, ut vbicunque, & quomodocunque construantur Poli, non sequatur ex motu eius vacuum, quod pater non habere oualem, aut quamlibet aliam figuram præter rotundam. Quod verò additur, figuram sphæricam minimam esse inter omnes, distinguendum est: nam quoad loci occupationem, quam vocare possumus extrinsecam, siue externam capacitatem, verum est: quoad cavitatē verò, quæ vocari potest interna capacitas, potius est omnium capacissima, & talem debuit habere capacitatem cælum potius, quàm priorem in ordine ad finem, & effectus, propter quos conditum fuit à Deo.

QVÆSTIO II.

De numero caelestium sphaerarum.

PRæsupponendum est, ne in quæstione de nomine hæreamus, nomen cælum, quasi æquiuocum esse, plures ac diuersas habens significationes: nam primò accipitur pro superiore parte aëris, iuxta illud Psalm. *Volucres cali*. Secundò, accipitur pro globo includente omnes cælos, si plures sunt, &que frequenter in Scriptura viente nomine singulari, vt dum dicitur Matthæi 6. *Cælum, & terra transibunt*. Tertiò, ex multorum sententia accipitur pro corpore cælesti supremo, ac perfectissimo (quod Empyreum vocant) vt cum dicitur Diuus Paulus assumptus ad tertium cælum 1. Cor. 15. Vltimò, sumitur pro quolibet orbe, seu sphaera cælesti mobili, vt Psalmo 148. *Laudate eum cali calorū*: & iuxta hanc vltimam acceptionem procedit præfens controuersia de numero cælorum. Circa quam duo sunt hoc ordine discutiendæ; primum, an sphaeræ cælestes sint plures, vel vna tantum; postremum supposito quòd sint plures, quo numero definiantur.

Et circa primum tenet prior sententia, vnicam esse sphaeram cælestem, cui affixæ sunt stellæ, & cum quibus mouetur de Oriente ad Occidens: habet verò in profunditate cavitates quasdam, canalibus similes, in quibus inclusæ sunt planetæ, & per quas mouentur, motu quidem proprio ab Occidente ad Oriens: ad motum verò totius cæli ab Oriente ad Occidens, & motus prior est, quasi piscium in mari. Ita sentit D. Chrysostomus homilia 4. in Genesin, vbi ait, eos, qui multos cælos dicere audent, diuinæ Scripturæ auctoritati contradicere, cum Moyses vnum tantum cælum esse docuerit, ita scribens. *In principio creauit Deus cælum, & terram*. Cuius sententiæ adhæret Acarius in 1. cap. Genesim, & Andriæ Cuspinus lib. 3. Peripateticarum quæstionum, quæst. 4. & adhuc ex recentioribus non desunt, quibus placeat fundamentum huius sententiæ. Præter verba Scripturæ, videtur esse, quia varij motus cælestes, variorumque influentiæ in hæc inferiora saluari possunt cum vnico orbe cælesti, modo explicato se habente: ergo non debent plures admitti; nam res, præsertim grauissimæ, præcipuæque vniuersi partes, non debent sine grauissima, vrgenti-que necessitate multiplicari.

Communis tamen sententia scholæ tenet, plures esse orbes cælestes: ita senserunt omnes fermè antiquiores Philosophi, Ægyptij, Chaldæi, Locrensis Pythagoricus, Plato 10. libro de Republica, Aristoteles 12. Metaphysicæ, c. 8. tex. 47. & ex sanctis Patribus omnes fermè, qui de hac re loquuntur. Aug. l. 10. de Genesi, c. 29. & in Psal. 32. Ambrosius lib. 2. Hexameron, cap. 2. Basiliius homil.

homil. 3. Hexameron, Damascenus 2. lib. orthodoxæ fidei, cap. 6. & 7. D. Thom. 1. parte, quæst. 68. artic. 4. Theodoretus quæst. 17. in Genes. & omnes quotquot cælum Emphyreum ponunt: cum evidens sit, præter illud dari cælum stellatum, & id videntur Astronomi tanquam certum præsupponere. Quam sententiam imprimis colligo ex sacra Pagina, quæ multis in locis in plurali numero de cælo loquitur. Psalmo 148. *Laudate eum cali calorum, & omnia, quæ super calos sunt.* Ecclesiast. 24. *Ego feci, quod in cælis oriretur lumen indeficiens.* Ad Ephesios 4. *Ascendit super calos calorum.* Sed ratione probatur ex motu stellarum, & planetarum, nam planetæ in suo motu nec vllum inter sese, neque cum stellis ordinem seruant. Et ex priori sequitur non esse in eodẽ orbe; sed in diuersis diuerso modo motis, ex posteriori verò nõ esse in eodẽ orbe cum stellis, & ex vtroque plures esse orbes cælestes. At dicunt oppositæ sententiæ Patroni, in eodem quidem orbe moueri stellæ, atque planetas propriis motibus, atque etiam motu totius cæli, non ita vt ei sint affixæ, sed sicut pisces in mari aquam penetrando, seu peruadendo: nec enim ad vnum, nec alterum motum necesse est, esse cælo affixas: nam pisces in aqua vtrumque motum habent, etiamsi non affigantur, sed discontinui sint, propriam quidem peruadendo, ac diuidendo aquam: & præterea mota aqua versùs quamlibet differentiam loci eos secum rapit: ita ergo de stellis, ac planetis intelligi potest. Sed argumentum secundum probat, hoc esse falsum, & impossibile: nam vel stellæ mouentur diuidendo cælum, vel per quosdam circulos, & quasi canales, quos à natura habent, sed vtrumque est falsum. Primum quidem, quia ex eo sequitur, cælum esse corruptibile: nam per diuisionem tandem corrumpitur corpus diuisum in minutissimas partes, præsertim si non sit fluidum & facillè dissipabile. Quod non habere cælum docent verba illa Iob cap. 37. quibus dicitur, cælum esse quasi ære fusum, quod est esse solidissimum corpus. Si verò mouentur non diuidendo cælum, sed quasi per canales, quos à natura habent, hinc queram, an cavitates illæ, siue canales sint vacui omni corpore, vel aliquo pleni. Si primum, dabitur vacuum in natura rerum, contra totam Scholam philosophicam, & efficacissimas rationes, quas suo loco attulimus. Si verò sint pleni corpore aliquo, aut tale corpus est eiusdem naturæ cum cælo, vel diuersæ; si eiusdem, falsum est, quòd semper diuidatur per motum, quia sequitur esse corruptibile; si verò sit naturæ diuersæ, sequitur violenter ibi detineri. Dabitur ergo aliquid violentum à natura, atque etiam in eo statu perpetuò permansturum, & vtrumque est falsum. Impugnatur tandem, quia stellæ in suo motu retinēt eandem distantiam inter sese, sicut clauī affixi moti in corpore sphærico: ergo necessariò fatendum est, cælo affixas

affixas esse. Diuum autem Chrysostomum conatur exponere, & conciliare cum communi sententia D. Thomas 1. parte, quæst. 68. artic. 4. aiens, nomine vnius cæli intelligere vnum corpus, quod est supra terram, & aqua, plures sphaeras particulares, atque distinctas continens, quas communis sententia aliorum Patrum in plurali numero plures cælos vocat. Sacrae literæ iuxta proprietatem Hebraicæ linguæ, in qua magis consuetum est, cælum in numero plurali significari, quàm in singulari, passim loquuntur in eodem plurali numero, cælos cælorum, ad diuinas laudes excitandas, quo pacto eas intelligit idem Chrysostomus.

Præsupposito ergo, quod plures sint sphaeræ cælestes, quærimus secundo, quo numero definiantur, (de qua re se dubitasse asseruit Augustinus.) Et quidem duas tantum posuisse reperio. In qua sententia fuit Theodoretus, quæstione 21. in Genesim, vbi hæc verba scripsit: *Qui non credit secundum calum esse, rectam semitam transgreditur; cui verò plures nominare conatur, adhæret fabulis, postposita diuini Spiritus doctrina: nam Moyses duos tantum calos numerat, alterum factum ante lucem, alterum factum post lucem ex natura aquarum.* Atque etiam D. Damascenus 2. lib. orthodoxæ fidei, c. 6. vbi ære excepto, duos tantum cælos assignauit. Alij verò tres posuere, vt D. Ambrosius 2. libro Hexameron, capite etiam 2. vbi tertium cælum negare se non posse ait, plures verò non addit: quod videtur valde consentaneum doctrinæ Diui Pauli 2. ad Corinthios 12. sic de se loquentis: *Scio hominem raptum vsque ad tertium calum.* Præsertim, si per tertium cælum intelligatur Empyreum, vt D. Thomas cum aliis intelligit 2. 2. q. 171. artic. 3. hisce verbis: *Et sic tertium calum dicitur Empyreum, quod dicitur tertium respectu cali aërei & cali syderei, vel potius respectu cali syderei. & respectu cali aquei, siue crystallini, &c.* Consonat etiam rationi desumptæ ex illo, quod docet Aristoteles, libro 12. Metaphysicæ, capite 8. textu 48. videlicet, motum cæli esse propter motum astri ei affixi. Ex quo argui sic potest: supra cælum Empyreum nullum est astrum, cum cælum hoc sit supremum: ergo nulla est sphaera cælestis, nisi absque fine aliquo, & fundamento velit quis eam ponere: ergo si Empyreum omnino est tertium, ultra quod non est aliud, tres duntaxat numerari possunt sphaeræ cælestes, vt sentit D. Ambrosius.

Alij tandem sphaeras octo numerandas censent: septem quidem, quibus septem planetae affixæ sunt, videlicet, primam Lunæ, secundam Mercurij, Veneris tertiam, Quartam Solis, Martis quintam, Iouis sextam, Saturni septimam, octauam verò pro stellis, quas fixas vocant, quia in hac octaua sphaera firmiter insident, & motu eius mouentur, & propterea firmamentum vocatur. Quare de eis constat, distare plus à terra, quàm planetas, hunc

numerus

numerum sphaerarum cælestium posuere omnes fermè *Ægyptij*,
 & *Chaldæi*, *Timæus Locrensis Pythagoricus*, *Plato* 10. libro de
Republica, & tandem *Aristoteles* 12. libro *Metaphysicæ*, cap. 8.
 textu 47. & sic omnes intellexerunt, cælum sydereum, sicut est
 octauum, ita esse vltimum, aut etiam primum, & cùm censuerint,
 moueri omnes, cælum hoc vocarunt mobile primum, quod suo
 motu rapit cæteros, illosque motus complere facit viginti qua-
 tuor horarum spatio, quamuis proprios motus tardiores habeant.
 Fundamentum huius sententiæ potissimum est, diuersi motus
 planetarum, qui continua obseruatione cognoscuntur; nam se-
 ptem planetæ aliquando inter se separari conspiciuntur, atque
 etiam aliquando sibi viciniore fieri, vt in Sole, & Luna cunctis
 est manifestum: necesse est ergo, vel esse orbis distinctos, vel
 diuersis orbibus affixos esse, in quibus moueantur, quia repugnat
 in eodem motu eiusdem sphaeræ hanc diuersitatem, inimò oppo-
 sitionem inter partes reperiri, & numerus iste cælestium orbium
 diu receptus fuit in Schola, sed progressu temporis *Astronomi*
 plures, vt *Ptolomæus Alexandrinus*, *Alphraganus*, & alij diu-
 turna obseruatione se cognouisse testati sunt, cælum sydereum,
 seu firmamentum nonnihil retrogredi versùs partem occiden-
 talem centum annis vno gradu, vnde collegerunt, non esse
 primum mobile, sed hoc motu se mouere ab Occidente in O-
 rientem, sex millibus annorum perficiendo talem motum sibi
 proprium: motum verò diurnum ab alio corpore cælesti supe-
 riori habere, quia repugnat, motus ad eò oppositos posse conue-
 nire eidem corpori, nisi alter conueniat ei ex propria natura; alter
 verò quia rapitur à corpore superiori, & propterea necessariò ad-
 dendum esse aliud cælum, quod sit primum mobile secum ra-
 piens stellatum, & alios inferiores planetarum, eosque compul-
 lens ad complendum suum motum spatio viginti quatuor
 horarum, quamuis proprios tardiores habeant. Post verò *Astro-*
nomi posteriores, vt *Thebitius*, *Alphonfus Hispaniarum Rex*,
Georgius Purbachius, & *Ioannes Monte Regius*, præter hos duos
 motus in eodem firmamento cognitos, tertium animaduertērūt,
 quem vocarunt accessus, & recessus, aut motum trepidationis,
 quia stellæ visæ sunt, quasi in vnam partem aliquando inclinare,
 videlicet versùs vnum polum, quandoque versùs alterum, qui
 motus non potest conuenire eidem cælo stellato (cui affixæ
 sunt stellæ) ex propria natura, cùm habeat alterum ab Occiden-
 te in Orientem, quem absoluit triginta, & sex millibus annis; ne-
 cesse est ergo, supra ipsum ponere aliud cælum nouum, quod na-
 turaliter moueatur motu trepidationis, & secum rapiat per ta-
 lem motum cælum stellatum, quasi faciens ipsum trepidare, &
 supra nouum cælum trepidationis decimum, quod sit primum
 mobile

mobile perficiens motum proprium spatio viginti quatuor horarum, secumque rapiat inferiores orbes, eos faciens motu diurno moueri eodem modo. Præter hos verò decem orbes restat cælum Empyreum immobile, quo completur numerus vndecimus à multis iam in Schola receptus.

Sed aduersus duos illos cælos superadditos, nonum videlicet, ac decimum, obiiciunt recentiores quidam hoc modo: etiam si obseruationes Astronomorum de motu retrogrado cæli syderei, ac de quorundam astrorum trepidatione in eo veræ sint, non compellunt duos cælos addere. Sed potest quispiam excogitare, cælum hoc moueri à sua intelligentia vno quidem, atque eodem motu, sed ex illa parte retrogrado, atque etiam ex parte quarundam stellarum, quasi trepidante, & ita non erit necessarium, alios motus multiplicare distinctos, & minùs necessarium, multiplicare duo alia corpora cælestia. Nihilominùs obiectio hæc non habet difficilem solutionem, hoc modo à posteriori ex effectibus explicandam: nam communis sententia ponens sphæras septem pro totidem planetis, & octauum cælum, cui affixæ sunt stellæ (quod vocat primum mobile) asserit, primum mobile suo motu rapere cælos omnes inferiores planetarum, efficereque, vt motu diurno secum moueantur. Quo supposito necessarium erit, omnes conditiones eius participare motus orbium inferiorum, in quibus planetæ incident: si igitur cum retrogradatione illa, & trepidatione mouetur primum mobile, necesse est eadem participare motum diurnum Solis, & Lunæ, aliorumque planetarum, qui cum sint terræ proximiores (præsertim Luna) conspiceremus in motu eius tales defectus, quos nemo Astronomiæ peritus adnotauit. Signum igitur est, non dari in eodem motu cæli syderei, sed in motu alterius corporis superioris, & ideò si veræ sint obseruationes, ex eis deducetur nonum, ac decimum cælum, multiplicandum supra octo, quæ Aristoteles, & alij antiquiores Philosophi posuerunt.

Nihilominùs nostra sententia est, valdè probabile esse, nouem duntaxat sphæras cælestes ponendas esse, videlicet septem pro septem planetis, ita vt singuli in proprio, & cum proprio cælo moueantur, octauam sphæram, in qua stellæ fixæ sint, & firmamentum, ac primum mobile vocetur, secum rapiens cælos planetarum, vt posuerunt Aristoteles, & ceteri antiquiores Philosophi; & tandem supra omnes cælum Empyreum, tanquam beatorum sedem, de quo nonnulla dicemus quæstione sequenti. Ratio autem, quæ me mouet, ad non multiplicandum duas illas sphæras, est; primò, quia iuxta vniuersale illud principium, non sunt multiplicandæ entitates reales, maximè completæ, sine vrgenti necessitate. Sed non affertur vrgens argumentum,

quo probetur duo illa cælestia corpora addenda esse, præter no-
nem enumerata: ergo non sunt multiplicanda. Minorem probō,
quia solum multiplicata sunt propter Astronomorum testimo-
nium asserentium, duos illos motus se obseruasse, nempe retro-
gradum firmamenti ab Occidente in Orientem, adcoque tardis-
simum, vt vnā circulationem non minus quā sex millibus
annorum spatio absoluat; deinde motum trepidationis, quem
stellæ nunc accedendo, nunc verò recedendo à polis ostendunt,
quos motus constat non posse naturaliter conuenire eidem fir-
mamento, neque simul cum motu diurno ab Oriente in Occi-
dentem, & propterea necessariò esse multiplicandum aliud cæ-
lum, cui vnus motus eorum conueniat naturaliter, & proinde
aliud, quod sit primum mobile, & idemet firmamentum cum
cæteris omnibus sphaëris inferioribus secum rapiat ab Oriente
in Occidentem, compellens circulationem absolueri spatio
viginti quatuor horarum; firmamentum verò, seu stel-
latum cælum solum moueri naturaliter motu illo tardissi-
mo.

Sed obseruatio vtraque cum primis lubrica est, & valdè in-
certa, & parum probabilis, neque tanti momenti, vt compellat,
duo cælestia corpora multiplicare: ergo non sunt propter eam
multiplicanda. Probatur minor, quòd incerta sit; quia motus
est sensibile commune, circa quod passim sensus decipiuntur,
præsertim ad maximam, & prope infinitam distantiam, qualis
est ea, quæ versatur inter nos, & octauum cælum; ergo facile
est visum in obseruationibus illis decipi, ita vt talibus motibus
moueti stellas iudicet, aut cælum ipsum, cum verè non mo-
ueantur; & hanc probationem minoris vrgeo ex duobus; ex
priori quidem, quia longè minus à nobis distat Sol, quā stel-
latum cælum; & tamen circa magnitudinem eius decipimur, iu-
dicantes longè minorem esse, quia magnitudo commune sensi-
bile est, & longè distans; ergo facilius decipi possunt Astrologi
circa motus illos particulares firmamenti, ac stellarum eius, iu-
dicantes dati, cum non dentur. Ex secundo verò, quia motus,
qui tribuitur firmamento, tanquam proprius, tardissimus est,
cum vnā circulationem non compleat minus quā sex mil-
lium annorum spatio; ergo est imperceptibilis per sensum, præ-
sertim ad tam magnam, & pænè infinitam distantiam; quare re-
pugnat, per sensum iudicare, quòd moueatur tali motu, &
proinde quòd eius ratione multiplicandum sit aliud cæleste
corpus, quod sit primum mobile, ad cuius motum diurnum
moueatur.

Et argumentum hoc fortiùs conuincit, de accessu, & recessu
stellarum, quæ cum sint corpora in infinitum pænè minora eodem
firma

firmamento, cui affixæ sunt, & motus earum non velocior, longè minùs perceptibile erit per sensum.

Sed audio duplicem solutionem huius argumenti, quam pro Astrologis excogitare quis poterit: priorem quidem, quòd licèt tardissimus motus firmamenti, ac stellarum eius, non sit perceptibilis sensu, dum sit, aut statim, ac facta est aliqua eius pars; tamen post longum temporis interuallum percipit, quod aliquem (licèt minimum) motum absoluerit: quemadmodum constat nobis, arbuta crescere, quorum incrementum sensu non percipimus, dum sit; nihilominùs elapso tempore creuisse cognoscimus, & iuxta philosophiæ principia, motu continuo, quamuis sensu imperceptibili. Sic ergo motum proprium firmamenti tardissimum non percipimus fieri; elapso tamen tempore aliquo, sensu percipere possumus, motum fuisse, & nouam præsentiam, vel nouum eius modum comparasse. Ex quo cognoscimus motum eius: & hoc modo potuit continua Astrologorum obseruatione colligi proprius firmamenti motus, quantumlibet tardissimus, atque ex eo non moueri motu diurno tanquam sibi proprio, sed raptum ab alia superiori sphaera, necessario multiplicanda. Posterior solutio excogitari possit, quòd licèt visus per se non posset immediatè percipere talem motum, potest tamen per instrumenta quædam arte fabricata, quibus mediis experientia constat, ad longè maiorem distantiam idem corpus, aut motum eius percipi: tam perfecta ergo elaborari potuerunt similia instrumenta, ut eundem motum firmamenti (quantumlibet distantem) percipere eis mediis quispiam possit.

Nihilominùs neutra harum solutionum vim argumenti diminuit; non prior, quia si vna circuitio firmamenti eget sex millibus annis, impossibile est tempori viginti annorum, aut triginta correspondere partē ita notabilem eiusdem circulationis, quæ sensu percipi posset ab eodem homine ad tam magnam distantiam; constat verò ab eodem non posse longiorem, magisque continuam obseruationem adhiberi, propter vitæ eius breuitatem, ab ea ætate mensurandam, à qua potest obseruationem inchoare, in eamque terminandam, qua visus debilitari solet: ergo impossibile censendum est, similem motum tardissimum per se, vel aliquam sui partem continua obseruatione percipi sensu. Quod argumentum vrgentiùs probat de stellarum trepidatione, propter minorem longè earum magnitudinem, atque etiam propter motum illius stellæ (quam polum vocamus) respectu cuius desumitur accessus, & recessus earum: nam polus non est immobilis stella, cùm moueatur ad motum cæli, cui affixa est; sed immobilis vocari solet, quia suo motu breue spatium

percurrit, quod sufficit, ut fallax possit reputari observatio Astrologi putantis accessum, vel recessum apparentem stellarum ad polum, ex parte earum contingere, cum propter motum poli eisdem stellis adscribi possit. Posterior vero solutio longè debilior est, quia etsi ad limitatam aliquam distantiam multum iuvent alia instrumenta, & planè efficiant, ut corpus aliquod visu percipiat, quod sine eorum adminiculo percipi non posset, cæterum ad tam magnam inter nos, & octavum cælum intercedentem, planè est impossibile, aliquid adminiculi præstare, ut consideranti faciliè patebit, & hæc omnia non parum corroborare videtur motus eiusdem firmamenti rapti à superiori corpore, quod isti addendum putant; nam per ipsum lubricus valdè redditur proprius, magisque confunditur, sitque ex consequenti minùs perceptibilis ad tam magnam, & penè infinitam distantiam, cum sit tardissimus.

Secundum verò, quod in eadem minori argumenti dicitur, nempe observationem astronomicam tardissimi motus firmamenti, & trepidationis stellarum, non esse tanti momenti, ut propter eam probabilis efficiatur multiplicatio duarum sphaerarum, ex eo probanda est, quia motus cælestium corporum ex propria natura ordinatur ad influendum in sublunaria corpora. Sed ad talem influxum parum, aut nihil prodesse potest tardissimus ille motus firmamenti, & multò minùs quarundam stellarum nonnulla trepidatio ex parvo accessu ac recessu ad polū causata: quare incredibile videtur, ob tam leues causas auctorem naturæ duo cælestia corpora multiplicasse, cum per firmamentum, & cæteros orbes planetarum faciliè potuerit eisdem influxus præstare.

Denique etiamsi demus illas tres motus differentias in cælo re vera deprehendi, non ideò cogimur ad multiplicanda alia duo corpora cælestia: primò, quia fortè tempore Platonis, & Aristotelis hæ differentiæ fuerunt notatæ, quod negari nequit firmo fundamento, sine arrogantia Astronomorum huius temporis, & tamen octonario cælorum numero contenti fuere; non est ergo, cur nos compellat prædicta observatio (si datur) ad multiplicanda cælestia corpora, contra prædictos philosophos.

Secundò, omnes illæ differentiæ rectè possunt convenire eidem corpori ratione vnius tantum motus; ergo propter illas non sunt multiplicanda duo alia corpora cælestia. Antecedens probatur, quia solum tribuitur cælo stellato motus ab occasu in ortum ex eo, quod stellæ illi affixæ spatio viginti quatuor horarum non describunt circulum perfectum ad idem punctum deveniendo, sed quasi à tergo aliquantulum manent, ex quo loco rapiuntur alio die motu diurno; idemque quovis die contingit,

tingit; sed hoc in vno tantum motu respectu vnus corporis tantum potest optimè saluari, ex eo solum, quòd per illum non perueniat corpus in spatio viginti quatuor horarum, ad idem punctum, absoluen- do perfectè circulationem illa duratione, siue quia sic à natura statutum est, siue quia à corporibus inferioribus, quæ secum rapit primum mobile, aliquantulum retardatur motus illius, per impressionem impulsus, quasi contrarij, mediante illorum proprio motu contrario. Et similiter dicendum est de motu accessus, & recessus, seu de ista differentia motus (si datur) potest enim consistere in eodem motu primi mobilis facto per lineam gyrationem, ita vt ponamus in octaua sphaera, vel in cælo Empyreo superiori circulum Zodiacum tot gradus continentem, quot stellæ fixæ declinare videntur, tum ad Austrum, tum ad Septentrionem, quem circulum Zodiacum peragere poterunt stellæ fixæ per lineam gyrationem, spatio septem millium annorum, sicut Sol ex communi sententia, dum per lineam gyrationem vnico motu fertur, spatio vnus anni totum Zodiacum suum perlustrat, declinando interdum ad Austrum, interdum ad Septentrionem: nullum autem est fundamentum asserendi, octauum cælum moueri natura sua per lineam perfectè circularem, quæ ab eodem in idem omnino punctum redeat; siquidem nunquam id de facto contingit: neque Aristoteles vnquam id contendit, vt legenti constabit. Mitto quod alij hæc indicant, videlicet, principium illud Aristotelis, vnum corpus vnico sibi proprio motu debere cieri, intelligendum esse de corpore moto à principio actiuo intrinseco: à natura enim corporis maximè simplicis nequit, nisi vna facultas motiua ad vnum naturalem locum dimanare, non verò de motu ab extrinseco illato, præsertim, si hi motus non sint sibi contrarij, & vtiles sint ad influendum in hæc inferiora, in quem finem cælum natura sua inclinatur.

QVÆSTIO III.

Quidnam sit de cælo Empyreo sentiendum.

Q Vinque sunt de cælo Empyreo breuissimè expedienda, videlicet, an sit, quid sit, cuius rei gratia factum sit à Deo, hoc est, in quem finem ordinatum, an sua natura sit mobile, vereque moueatur, & cuius tandem figuræ. Circa primum dicimus, non esse certum, tale corpus cæleste dari, quia superiores substantias, quales sunt sphaeræ cælestes, non possumus à priori cognoscere, cum sint naturæ superioris, nimisque à nobis distantes, & alterius longè conditionis à sublunaribus, sed solum à posteriori per motum, vel effectum: motum verò huius corporis

nullum vidimus, immò neque vllum effectum sumus expertiæ nulla ergo ratione à priori, nec à posteriori conuincere possumus, quòd in natura rerum sit, sed sola auctoritate asseuerare possumus, non quidem sacræ paginæ, aut traditionis Ecclesiæ, vel Conciliorum definitionis, quia nihil tale extat, ex quo firmum duci possit argumentum: nam si ex verbo aliquo sacrarum literarum ab aliquo eatum Interprete deducitur, per solam accommodationem, vel similitudinem, aut metaphoram sit, non ex sensu literali, quod satis est, vt infirmum censatur argumentum. Auctoritas verò, quæ fidem huius rei cœpit facere, fuit Strabonis, vt refertur in Glossa ordinaria, Genesis primo, ad prima illa verba eius: *In principio creauit Deus cælum, & terram.* & eiusdem Glossæ subscribentis, atque etiā venerabilis, ac grauissimi Patris Bedæ, capite secundo Commentariorum in Genesim: à quibus id desumpserunt Magister in secunda, distinctione 2. vbi præfata verba interpretatur de cælo Empyreo, & ceteri Scholastici expositores eius; ibidem Diuus Thomas etiam prima parte, quæstione 61. articulo quarto; & quæstione 66. articulo tertio: Alensis secunda parte, quæstione 51. membr. primo, Magnus Albertus in tractatu de quatuor cœuis, quæst. 4. artic. 3. & 2. parte sui tractatus 3. quæst. 1. 2. Gulielmus 1. parte de vniuerso, Ægidius libro 2. Hexameron, cap. 36. quos secuti sunt recentiores vniuersi, & Imola titul. de opere sex dierum, disputatione tertia, id probat ex Scriptura, & Patribus; quare communis facta est sententia, cælum Empyreum ponens in Schola Theologica (nam Philosophica non fuit eiusmodi cæleste corpus assequuta) propterea temerarium iam iudicaretur illud negare, & hac censura notari debet Caietanus, qui illud negauit in illa verba 2. ad Corinthios 12. *Raptum huiusmodi hominem usque ad tertium cælum.* Neque omninò latuit cælum Empyreum sanctis Patribus, quia licet adeò expressis verbis, aut proprio nomine de eo non fuerint loquuti, non obscure videntur illud insinuare. Clemens Papa primo & secundo libro recognitionum, Basilius homilia 2. & 3. Hexameron, Damascenus 2. libro orthodoxæ fidei, cap. 6. Hilarius in illud Psalmi 122. *Ad te leuaui oculos meos, qui habitas in calis.* Theodoretus quæstione 11. in Genesim, Athanasius, Chrysostomus, Theophil. in illa verba octauæ capituli Epistolæ ad Hebræos: *Minister sanctorum, & tabernaculi veri, quod fixit Dominus:* videntur de cælo Empyreo accipere. Rupertus tandem libro 1. in Genesim, cap. 6.

Circa quidditatem, vel essentiam cæli Empyreici conueniunt omnes, esse compositam ex materia & forma, cum sit certum (præsupposito quòd sit) habere quantitatem, & esse accommodatam sedem corporum beatorum. Materia verò & forma eius lon-

gè diuersæ rationis est à materia & forma aliorum corporum cælestium, ac maioris longè perfectionis. Quod ex tribus efficaciter colligitur, nempe ex hinc, in quem inferius dicitur factum esse à Deo, nempe, ut sit quasi domus Dei, hoc est, beatorum domicilium, in quo Deus per claram visionem eis se ostendit, cui additur in eo etiam conditos fuisse Angelos, ut communis sententia Scholasticorum omnium tenet. Neque defunt qui affirmant, propterea Angelos vocatos fuisse à Deo astra matutina huius perfectissimi cæli, Iob 38. illis verbis, quibus eum interrogat: *Vbi eras, cum me laudarent astra matutina, & iubilarent omnes filij Dei?* & ita sua præsentia illum illustrare.

Colligitur secundò, ex supremo loco non nisi perfectissimo omnium corpori naturaliter debito, atque etià ex perfectissima luce, qua pollet, alterius quidem conditionis, ac superioris ordinis, respectu lucis solaris, & aliorum corporum, valdè simili luci beatorum corporum, cum sit eorum accommodatissima sedes, quæ proprietas eius est, perfectissimam naturam illius indicans, & ab hac proprietate vocatum est Empyreum, hoc est, igneum, non à calore nimio, sed ab eximia luce; & tandem ex immobilitate, nam adhuc ea inclinatione, quam cætera corpora cælestia habent ad motum, carere docent omnes. Constat verò, magnam perfectionem esse à motu penitus absolui, & esse quasi omnino à mutatione liberum, sicut status beatorum, quibus sedem præstat, immutabilis, atque æternus est ex propria conditione: sed si adeo magna, atque eximia luce ex propria natura splendet, qui fieri potest, ut ipsum oculis non inspiciamus, & ideo euidens nobis sit, quòd sit in rerum natura?

Respondet Richardus in 2. distinct. 2. quæst. 2. ad 3. principalem causam esse, quòd lux eius, quia perfectissima, excedit vim nostræ potentie visuæ, & cum solis oculis gloriosi corporis proportionem habet, vel quia cælum crystallinum sua densitate impedit, ne videatur à nobis, propter nimiam distantiam, ac tandem, quia subtrahitur à Deo concursus generalis, ne à nobis videatur. Alij verò dicunt rationem esse, quia solum ex parte interna diaphanum est, ex parte verò externa nos respiciente nimis densum: & hanc densitatem impedire, ac ad nos lucem effundat. Sed rationes istæ ex parte miraculosæ sunt, ex parte non consonant naturæ huius corporis, atque ex parte sunt insufficientes: quare melius respondet D. Thomas 1. parte, quæst. 66. artic. 3. ad 4. his verbis: *Potest aliter dici quòd habeat cæli Empyreum lucem non condensatam, ut radios emittat, sicut corpus Solis, sed magis subtilem, vel habeat claritatem gloria, qua non est conformis cum claritate naturali.*

Circa finem, in quem fuerit à Deo conditum cælum

Empyreum, cœpimus iam ostendere, cuius rei gratia factum fuerit ad supremum hoc cœleste corpus, videlicet, vt quasi Theatrum sit ad recipienda beata corpora in suis distinctis sedibus & veluti beatorum Curia, & hunc esse præcipuum finem, propter quem creatum sit à Deo, certum est apud nos. Sed an simul, vel ex consequenti fuerit ordinatum ad præstandum influxum aliquem circa reliqua corpora, vel nullum prorsus habeat, quæstionem habet, & prior sententia denegat omnem influxum, primo, quia ex fine, in quem condita est res à Deo, colligi debet operatio eius: sed cælum hoc non est conditum propter inferiora corpora, sed in gratiam rerum superioris, ac supernaturalis ordinis, nempe, Angelorum & hominum beatorum, vt quasi condigna sit sedes eorum: ergo nullam operationem, vel influxum habet circa inferiora corpora: nam si aliquem haberet, ex hac parte diceretur in eorum obsequium conditum, atque vt eis deserviret, quod videtur dignitati eius derogare.

Secundò, quia corpora cœlestia nec mouent, nec omnino agunt, nisi ab alio mota, cum motus, vt minimum, sit eis conditio agendi, vt superius à nobis statutum est, & ex se principio motus actiuo careant: sed cælum Empyreum ex propria natura est immobile, vt omnes statuunt: ergo nullum potest influxum habere circa alia corpora. Nec potest excogitari, qualisnam sit hic influxus, aut operatio, nisi prorsus diuinando. Et hanc sententiam tenuit D. Thomas in 1. distinct. quæst. 2. ad tertium, Alexander secunda parte, quæst. 47. & plures alij ex recentioribus eam sequuntur. Et ipse etiam Diuus Thomas 1. parte, quæst. 66. art. 3. ad 2. testatur, eam esse satis probabilem.

Posterior sententia, influxum aliquem circa alia corpora ei concedit, quam probabiliorē censet D. Thomas loco proximè citato, atque etiam quodlibeto 6. art. decimonono, eamque sequitur Magnus Albertus in tract. de quatuor cœuis, q. 4. art. 14. Macrobius in 2. dist. 14. Durandus, dist. 1. quæst. 2. Et Richard. quæst. 3. circa tertium principale: & quidam alij, quos refert ipse: atque etiam Bonauentura; in 2. dist. 2. parte 2. art. 1. & quæst. 2. numero 43. à quibus diuerso modo explicatur influxus iste; nam illi, quos Richardus retulit, empyreo tribuunt diuersitatem quorundam effectuum, qui in diuersis terræ partibus æqualiter ab vtroque polo distantibus cernuntur, quia non possunt tales effectus astris, vel cælis mobilibus adscribi: nam si ex horum influxu procederent, necesse foret, in toto illo climate contingere. Illi verò, quorum Bonauentura meminit, voluerunt circa nobilissimum corpus sublunare, nempe humanum, agere, quemadmodum empyreum ipsum nobilissimum omnium superiorum est, ita vt materiam præpararet ad infusionem animæ rationalis, sicut alia corpora

corpora cælestia inferiora eandem disponunt pro introductione animæ vegetatiuæ, & sensitiuæ, & tandem D. Thomas hisce verbis explicat influxum cæli empyrei, 1. parte, quæst. 66. articulo 3. ad 2. *Potest dici, quòd influit in primum calum, quod mouetur, non aliquid transiens, & adueniens per motum, sed aliquid fixum, & stabile, putà virtutem, continendi, & causandi, vel aliquid huiusmodi ad dignitatem pertinens.* Probat D. Thomas primò, quia res quælibet facta est propter aliquam operationem, vt docet planè Aristoteles, lib. 2. de cælo, cap. 3. textu 17. & 1. Ethicorum, cap. 7. & 9. atque etiam 9. Metaphysicæ, c. 9. textu 91. quod aliis verbis docuit D. Damascenus 2. lib. orth. fidei, cap. 23. incongruum esse affirmans, aliquam dari in mundo substantiam penitus otiosam, hoc est, omni operatione vacantem: necesse est ergo, cælo empyreo aliquam operationem tribuere, & transcuntem quidem, cum immanentis non sit capax: circa alia igitur corpora operabitur, vel otiosum erit, quod non est admittendum.

Secundò, quia partes vniuersi habent inter sese connexionem, & inferiora per superiora reguntur, & administrantur: sed administratio non est intelligibilis, nisi media operatione, & influxu: ergo cum empyreum sit pars vniuersi, & perfectissima quidem, necesse est ab ea dependere, ac regi aliquo modo inferiora corpora, quod non bene intelligitur, nisi media operatione, & influxu eius.

Nostra in hac re sententia duabus assertionibus aperienda est. Prima, certum est hoc cælum aliquam operationem habere; & de operatione, quæ sit simplex emanatio, vel resultantia effectus à causa, certum est, non dari creaturam ea carentem, quia nulla datur substantia creata accidentium incapax, quia intrinseca est imperfectio eius, esse per accidentia perfectibile, qua solus Deus caret: sed intima accidentia substantiæ, per quæ perficitur media emanatione ab eius essentia, sunt proprietates eius, quæ proximè oriuntur ab eadem essentia, tanquam ab efficienti: ergo nequit creata substantia carere operatione, prout simplicem emanationem comprehendit, & propter hanc saltem condita dicitur, hoc est, vt se per eam perficiat. Cum ergo certum sit, cælum hoc, quantumlibet perfectissimum, habere essentiam specificam, certum esse debet, habere proprietates, quæ sint accidentia ab ea emanantes, ac proinde necesse est, habere operationem, prout comprehendit simplicem emanationem, quæ est quasi actio immanens.

Assertio secunda. Valdè probabile nobis videtur, quòd habeat veram ac propriam operationem, circa aliquod corpus se inferius, ac proprium influxum. Probatur vtrumque hoc modo: omnes, quotquot cælum empyreum posuerant, censent esse

omnium perfectissimum, cui ideo supremum locum conceduntur deinde esse lucidissimum, non solum, quia longè maiorem lucem habet quàm Sol, sed quia longè perfectiorem, & quasi ordinis superioris, valdè similem luci beatorum corporum, ratione cuius congruum, ac accommodatissimum eorum domicilium est: ergo valdè probabile est, quòd primum cælum, & fortè plures alios eximia luce perfundat, quia cum sit corpora, non videtur negandum, quòd inferiores cæli talis illius actionis sint capaces, eamque recipiant intensiorem quidem, vel remissiorem, iuxta maiorem propinquitatem, vel elongationem: & cum illuminatio hæc sit vera, ac propria operatio, & lumen productum realis effectus in eis receptus, effectiueque productus à cælo empyreo, propriè etiam dicitur influere in inferiora corpora.

An verò, propter illuminationem, aliam habeat operationem, quam ponunt aliæ opiniones, lubricum est, & mihi valdè incertum, ita vt diuinare videatur eas illi tribuere: nam specialis ille influxus, circa introductionem animæ rationalis in corpore, nullo fundamento innititur, quia ita posset quispiam dicere, quòd ad conseruationem hominis specialem influxum præster, vel ad conseruationem aliarum specierum. Influxus etiam pro effectuum varietate in hac, vel illa terræ regione producendorum, potius quàm in alia, virtutibus stellarum tribui potest, non solis, sed modificatis per diuersam proprietatem, aut virtutem, in his terræ partibus existentem, & non in aliis: quare non erit pro his effectibus necessarius influxus empyrei. Quod verò D. Thomas docet, empyreum influere in cælum sibi proximum aliquid fixum, & stabile, vt virtutem continendi, & causandi, vel aliquid huiusmodi, ad illuminationem à nobis explicatam referri debet, per quam fortè augetur virtus eiusdem cæli, ita vt influxum aliquem habeat in inferiora corpora, quem non haberet, vel non ita perfectè, nisi per lumen ab empyreo receptum. Vnde fit, nostram sententiam esse valdè consentaneam Diuo Thomæ, & argumentis ab eo adductis eam planè confirmari, vt consideranti facillè constabit. Argumentis verò aliarum opinionum negauimus effectuum illorum varietatem Empyreo tribuendam.

Restat nunc, argumenta primæ opinionis denegantis Empyreo omnem influxum, soluere, & antecedens prioris, quòd Empyream non sit factum propter inferiora corpora, distinguendum est: nam propter illa, tanquam propter præcipuum finem verum est, quia finis præcipuus, cuius gratia Deus illud condidit, potius fuit, vt congrua sedes, condignumque domicilium omnium beatorum foret, & quasi Curia, aut Ciuitas Regiæ: cõsequenter verò, quia pars vniuersi est, cæteris partibus aliquo modo vniri debuit, quod non nisi media aliqua operatione transeunti circa reliquas partes,

partes, vel aliquam illarum fieri potest, ex qua non potest dici, in obsequium earum factum, cum per illam potius ab eo perficiantur, quam ipsum ab eis. Si verò in obsequium totius vniuersi factum fuisse velit quis concedere, nihil ex eo imperfectionis contrahet: tum quia totum vniuersum Empyreico perfectius iudicatur, sicut totum qualibet eius parte, utpote eam cum cæteris omnibus includens; tum etiam, quia beati omnes, tam homines, quam Angeli, ad vniuersum, tanquam partes eius pertinere est in aperto: cum ergo conditum fuerit Empyreum in obsequium eorum, mirum non est, immò necessarium in obsequium vniuersi conditum fuisse; neutrum nanque dignitati eius derogat.

Maiores verò posteriores argumenti, quòd corpora cælestia nihil omnino agant, nisi mota ab alio, planè falsa est, cum certò teneamus, illuminaturum Solem omnino immotum localiter post diem iudicii, & superius ostenderimus, cælestia corpora non solum medio motu locali agere in inferiora corpora, sed cessante omnino motu eorum. Quod vero vulgò dici solet, nullum corpus mouere non motum, interpretantur Patres Conimbricenses 2. lib. de cælo, cap. 3. quæst. 2. art. 2. asserentes, necessarium non esse, quòd actu moueatur, ut aliud moueat; sed quòd moueri possit. Empyreum verò, licet non moueatur, potest tamen moueri, sed id sufficere, ut aliquo modo in inferiora influat; verum non est necessarium per locum ab intrinseco, ut vnum corpus moueat aliud, quod ipsummet mouens possit moueri: hoc est, ut aliquam habeat naturalem inclinationem actiuam, aut passiuam ad motum, quia mouens, ut mouens, vel agens, ut agens, non mouetur, ut docet expressè Aristoteles, 3. lib. Physicorum, inde probans, quòd actio non sit in agente, sed in passio, ex quo sequitur, non esse necessarium, per locum ab intrinseco mouens moueri posse, quia aliud mouere nihil ponit intrinsecum in mouente, hoc est, nullum actum, nec vllam potentiam; ergo nec dicitur necessariam connexionem, cum motionem passiuam, neque potentiam eius. Quod etiam conuincitur exemplo Dei, & Angelorum; nam Deus propriissimè dicitur mouere omnia; & in ea agere, & tamen nec mouetur ipse, nec moueri potest: Angeli etiam mouent corpora cælestia, & nec mouentur ipsi, nec habent vllam inclinationem ad motum huiusmodi: ex quibus infero, quòd etiam si per impossibile excogitemus, vnum corpus nullo modo posse moueri à se, nec ab alio per se, nec per accidens, nihilominus posset aliud mouere: vniuersalis ergo illa propositio falsa probatur, & propterea non repugnat Empyreum omnino immotum in inferiora agere.

Præterea assero, cælum Empyreum nullam prorsus inclinationem

nationem habere ad motum localem, sed immobile esse localiter, ex propria natura, & solum præter naturam moueri posse, quia cum creatura sit, potentiam obedientialem habet respectu Dei, ut ab eo moueatur; Angelum verò arbitror non posse eum mouere per virtutem naturalem, quia cum sit ex propria natura omnium beatorum sedes, non subditur virtuti naturali Angelorum, quantum ad motum localem; nam vniuersale bonum totius Curie cælestis, quale est immobilitas, & quietum omnium beatorum domicilium, superioris ordinis est, respectu naturalis virtutis Angelorum, valdeque eam excedit: sicut extrahere integrum elementum, aut cæleste corpus à propria sede naturales vires vnius Angeli, immò & omnium, superat eo modo, quo libro 4. Physicorum ostendimus, easdem superare, quòd vacuum efficiat.

Circa figuram cæli empyrei non conueniunt recentiores pauci, qui de ea loquuntur; sed quidam asserunt, non esse rotundum sicut cælestia corpora, quæ mouentur: quod videntur colligere ex illo Apocalypsis 21. *Ciuitas in quadra posita est.* Nomine enim ciuitatis cælum videtur intelligendum, cui additur magis esse accommodatam pro beatorum sede quadratam figuram, quam circularem maiorisque capacitatis ad continendum tam magnam corporum multitudinem. Et hanc partem sequuntur Patres Conimbricenses 2. libro de cælo, capite 5. quæstione 1. articulo 2. Alij verò non putant, argumenta hæc probare, diuersam figuram tribuendam esse huic cælo à circulari, qua prædita sunt alia, sed omnia esse debere eiusdem circularis figuræ, cum sint quasi vnus globus: & præterea, quia supposito quòd empyreum aliquo modo influit in inferiora, quamuis non medio motu, accommodatior est figura circularis ad influendum, quia cætera, circa quæ influit, æqualiter, aut saltem secundum proportionem, eius influxum recipere poterunt; constat verò non posse, si quadratam figuram habeat. Ego verò vtramque partem valde incertam iudico, & argumenta earum valde infirma, quæ ideo cuique facile soluenda relinquo, & liberam electionem vtriusque partis.

QVÆSTIO IV.

An quòd sita eleuatiora sunt corpora cælestia, eò sint natura perfectiora.

PRæsupponit præsens controuersia ordinem cælorum, secundum situm, quem licet varium, & diuersum posuerunt antiquiores Philosophi, Astrologi ac Mathematici, inualuit iam in schola, & tanquam communis sententia in explicatione sphaeræ recepta

recepta est ea, quæ talem ordinem situs in eis statuit, vt infimum sit cælum Lunæ, secundum Mercurij, tertium Veneris, quartum Solis, quintum Martis, sextum Ionis, septimum Saturni, octauum firmamentum, ita vocatum, quia stellas firmiter inhaerentes, seu fixas, quæ proprium motum non habent, contineat, & propterea à Græcis, Aplanes, id est, errans appellatur: nonum verò, ac decimum, quæ ab aliis adduntur, aqueum cælum, siue crySTALLINUM communi nomine nuncupantur, eò quòd translucenti admodum, ac perspicui sint, vt aquarum, aut crySTALLI (quod quasi congelata aqua censetur) similitudinem referant, & vim refrigerandi habere censeatur, super quos Empyreum collocant, sicut apud nos supra firmamentum (nam in quacunque opinione supremum locum ei concedi debet.) Secundò, præsupponit Augroës hoc libro comment. parte 9. Iand. quæstione 12. & Durand. in 2. distinctione 14. orbes cælestes inter se esse specie diuersos, id quod docet Albert. Magn. tract. de 4. coæuis, quæstione 4. articulo 4. & hoc libro tract. 3. capit. 4. Diuus Thom. 2. contra gent. cap. 92. ibid. Ferrar. & Caiet. 1. part. quæst. 66. ad art. 1. probat ex Aristot. 2. de anim. text. 34. & 35. afferente, singularia in eadem specie multiplicari propter speciei conseruationem: at corporis cælestis species in vno indiuiduo conseruari potest, cum illud sit incorruptibile: ergo non sunt plures orbes cælestes eiusdem speciei ex mente Aristot. Ratione etiam probatur primò, quia in sublunari mûdo corpora, quæ naturæ ordine diuersa exigunt loca, specie diuersa sunt, vt inductione constat in 4. elementis, sed singuli orbes cælestes ordine naturæ exigunt diuersa loca; ergo specie inter se differunt. Secundò, materiæ cælestium sphaerarum inter se specie differunt, vt probauimus ad caput 2. libr. 1. quæstione 8. ergo formæ à quibus illæ speciem sumunt potiori iure dissidebunt specie inter se, ac proinde composita ex illis coalescentia, & alia cælestia corpora essent corruptioni obnoxia, vt ibi inferebamus. Tertiò, id ipsum roboratur ex diuersitate accidentium; maximè motuum singulorum orbium, quæ quoties alicui corpori præ aliis, ex natura rei conueniunt, perspicue denotant, distinctionem saltem specificam principij substantialis, & hæc fuit vnica via Philosophiæ agnoscendi substantiarum distinctionis ortum, & interitum, quæ omnia æquè probant, specificam diuersitatem inter orbes minores, & quasi partiales, de quibus infra, ac inter maiorem, & veluti totales sphaeras, vt expendenti constabit. His igitur præsuppositis, quærimus, an quò eleuationes sint, eò sint nobiliores, seu an idem sit ordo situs inter cælestes orbes, & ordo perfectionis, vel nobilitatis.

Et prima sententia tenet, non esse vniuersaliter verum, quòd
idem

idem sit ordo situs, & dignitatis inter sphaeras cælestes, quæ mouentur; sed in eis duntaxat, præter orbem Solis: nam constat ex multitudine, varietate, ac nobilitate effectuum, quos producere videmus, nobiliorem planetarum omnium Solem esse, & ex consequenti ipsius orbem perfectiorem omnium corporum cælestium, quæ mouentur: nam globi cælestes (vt testatur Aristoteles 12. Metaphysicæ, capite 81. textu 48. propter sydera, quæ suo motu secum deferunt, facta sunt, & tamen ex communi sententia, Sol, & cælum cui affigitur, quantum tenet locum; ergo non potest vniuersè verum esse, quòd idem sit ordo dignitatis, & situs. Ita sentit Richardus in 2. distinctione 15. quæstione 5. circa secundum principale, non paucos Astrologos sequutus. Quorum sententiam amplectuntur etiam Patres Conimbricenses, 2. libro de cælo, capite 5. quæstione 2. articulo 2. Addunt tamen æqua fortè probabilitate dici posse, inter omnes sphaeras eundem esse ordinem dignitatis, ac perfectionis, non includendo planetas, quia valdè probabile est, Solem non esse continuum eidem orbi, cum quo mouetur, sed contiguum duntaxat, nec esse eiusdem speciei, sed diuersæ, & nobilioris longè naturæ; & propterea Sol, quamuis perfectior sit cunctis orbibus mobilibus, atque etiam cunctis plauetis, quæ in eis, & cum eis mouentur: orbis tamen solaris eundem cum cæteris situs, & dignitatis seruat ordinem.

Secunda sententia absolutè docet, inter orbis cælestes, & planetas eundem esse ordinem perfectionis, ac situs. Hanc amplecti videtur Diuus Thomas 12. libro Metaphysicæ ad tex. 44. & cum eo alij: quam in primis colligunt ex doctrina D. Dionysij 6. capite cælestis Hierarchiæ, & ex Aristotele 4. lib. Physicorum, tex. 49. hoc modo: Idem ordo, qui reperitur inter ea, ex quibus constat superior mundus, nempe, angelicus, & inferior, nempe elementaris, reperiri debet inter ea, ex quibus constat mundus medius, nempe cælestis: sed inter ea, ex quibus componitur mundus angelicus, & inter ea, ex quibus componitur elementaris, idem est ordo situs, & perfectionis: ergo idem etiam esse debet inter corpora cælestia. Probatur minòr, quia suprema Hierarchia in ordine est etiam perfectione suprema, & eodem modo media & infima apud D. Dionysium, & apud Aristotelem idem est ordo situs, & dignitatis inter elementa: nam ignis situ excellens est omnium perfectissimus, & sicut terra obtinet infimum locum, sic etiam est omnium imperfectissima. Aristoteles 12. Metaphysicæ, capite 8. textu 44. docet expressè ordinem intelligentiarum mouentium cælestes sphaeras, esse secundum ordinem motuum, & mobilium, ita vt pro cuiusque sphaeræ natura suus respondeat motor, nempe inferiori ac imperfectiori inferior ac imperfectior;

etior; superiori verò, ac perfectiori superior, ac perfectior motor: sentit igitur aperte eundem esse ordinem situs, & dignitatis inter omnes sphaeras cælestes: nam valdè incongruum foret, & Angelorum dignitati dissonum, quòd perfectior moueret imperfectiorem, atque inferiorem sphaeram, & imperfectior superiorem, ac perfectiorem.

Probatur ratione: primò ex effectu: nam eò dignior est causa, quòd digniores producit effectus, cum in eius virtute contineri debeant: sed quò planeta eleuatiorem situm habent, eò nobiliores edunt effectus, & pariter sphaera, quibus insident (si ista habent distinctum influxum à planetis): ergo idem prorsus est ordo dignitatis, & situs inter eos. Probatur minor, quia Astrologi tribuunt Saturno vim conseruandi res fixas, & permanentes, & inclinandi ad altissimarum rerum contemplationem, iuxta propriam capacitatem: Marti verò fortibus viris præsidere, quos nobilissimos effectus esse, per se constat.

Secundò, corpus, quod continet aliud, comparatur ad illud, sicut forma ad materiam, & ex consequenti, tanquam dignius indigniori, vt testis esse Aristoteles 4. libro Physicorum, cap. 5. textu 49. ex quo colligit, elementum, quò superius est, eò esse nobilioris naturæ, quia inferius continet: sed sphaera superior, atque etiam planeta continet, ac circumdat inferiorem non secus atque elementum superius; ergo necesse est nobiliorem esse, & proinde eundem esse ordinem situs, & nobilitatis inter omnes. Vtgeò argumentum ex firmamento, seu stellata sphaera, variis stellis prædita, effectu, visuque insignibus atque etiam ex Zodiaco circulo duodecim signis splendente, sub quo planeta omnes incedunt, & vnde conseruatio omnium rerum corruptibilium, omnium temporum vicissitudines, totius terræ fructus, animantium omnium procreatio, ac denique totus hic mundus inferior dependet, quod proinde nobilius multò esse debet cæteris omnibus sphaeris inferioribus, atque etiam planetis omnibus in eis, & cum eis motis. Cuius etiam supremam dignitatem colligere licet ex dignitate suprema motus, per quem cæteras omnes sphaeras, ac planetas secum rapit, & motum diurnum explere facit. Eodemque argumento probatur de reliquis iuxta ordinem situs, qui idem proinde erit, ac dignitatis inter omnes, nulla sphaera, nullòque planeta excepto.

Nostra sententia asserit, eundem esse situs, ac dignitatis ordinem inter omnes sphaeras cælestes, secus verò inter astrata: ita autem nobis sentiendum esse iudicamus, quia efficaciora nobis videntur argumenta posterioris sententiæ, quantum pertinet ad ordinem sphaerarum, quarum superiores continent, atque compre

comprehendunt inferiores, quod non videtur stare posse, nisi nobiliores sint, cum naturalis comprehensio maiorem perfectionem importet, ut in elementis est manifestum. Excogitare vero, quod Deus fecerit sphaeram Solis quantitate minorem, dignitate vero, aut perfectione superiorem, fundamento rationis caret, quia si maior capacitas superiorum postulat maiorem perfectionem, aut maior perfectio maiorem capacitatem; & sphaera Solis perfectior est superioribus, ex propria natura postulabat capacitatem maiorem: quare necesse est fateri, non esse factam à Deo cum ea quantitate, quam natura eius postulabat, quod sine miraculo non potuit contingere; miracula verò in naturali rerum conditione ponere, alienum est à recta Philosophia.

Ceteris quoque argumentis non bene potest satisfieri, quantum ad ordinem sphaerarum pertinet, ut ea percurrenti facile constabit, & propterea iudicamus, quantum ad hanc partem, discedendum esse à priori sententia. A posteriori verò sententia discedendum duxi, quantum ad planetas: inter quos non videtur nobis necessarium, eundem esse ordinem situs, & perfectionis; nam de singulis stellis fixis certum mihi videtur, & à nemine in dubium reuocatum, nobilitate vinci à quocunque planeta, ut ostendunt nobiliores, atque euidentiores effectus, quos planeta edunt, & quos nemo concedit stellis singulis firmamenti, neque alios tantæ perfectionis, & tamen istæ situ excellunt omnes planetas. Et tandem cum Sole nemo audebit comparare quamlibet stellam firmamenti, quam tamen secundum ordinem situs eo superiorem nouit: non est ergo necessarium, eundem esse ordinem situs, & dignitatis inter planetas. Cui addo, nec inter eos vnum continere alteram, eumve comprehendere, ut propterea iudicandum sit, eum nobilitate vincere, sicut inter sphaeras contingit. Bene ergo potuit perfectior planeta in loco inferiori collocari, absque præiudicio suæ nobilitatis; quia partes ex propria natura ordinantur ad perfectionem, & bonum totius, cuius gratia fiunt, & fiunt quidem propter operationem propriam, iuxta proloquium Aristotelis, ut per eam totum ipsum perficiant. Talis ergo situs debetur cuique planetæ in vniuerso, qualis congruit exercitio propriæ operationis, & iste est conueniens propriæ perfectioni: multitudo itaque, varietas, & excellentia operationum solarium, quasi medium locum postulat in vniuerso; nam si superiorem haberet, nec illuminare, neque suo calore fouere posset sublunaria corpora, sed remisè quidem, propter nimiam distantiam; quare frigerent omnia, & caloris defectu perirent, neque possent vitales operationes fieri, nec ideo species viucentium corporum conservari, neque homines lucis defectu proprias exercere operationes; ergo sicut iste naturalis est, ei quemadmodum naturale

naturale est sua virtute vniuersale bonum totius vniuersi respicere, & quantum potest iuuare, ac perficere, & ex consequenti bonum singularum partium, quibus constat.

Et hæc multitudo, varietas, atque excellentia operationum, & effectuum planè conuincit nobilitatem naturæ solaris præ cæteris astris, & sphaëris. Quod est enim corpus cæleste? quod astrum? quis planeta? quem sua operatione, atque effectû Sol non perficiat? nullum profectò: cælestes omnes sphaëras, planetas omnes, omniâque astra, suo lumine perfundit, atque collustrat, vsque adeò, vt non pauci arbitrentur, nec micam luminis à se habere, sed quidquid habent, à Sole mendicare. Quod est etiam sublunare corpus, quod ab initio suæ generationis non incipiat iuuari, foueri, & perfici à Sole? Immò, quod Sole deficiente, produci possit in natura rerum? atque etiam iam productum conseruari? nullum profectò. De homine ipso creaturarum omnium corporearum perfectissimo protulit Aristoteles secundo libro Physicorum, non à solo parente, sed à Sole simul progigni, ita vt quasi alterum eius parentem eum vocare possimus. Audiamus sacram paginam Solis excellentiam his verbis egregiè extollentem. Ecclesiast. 43. *Sol in aspectu annuncians in exitu, vas admirabile, opes excelsi, in meridiano exurit terram, & in conspectu ardoris eius quis posset sustinere?* & paucis interpositis: *Magnus Dominus, qui fecit illum.* Audiamus etiam D. Dionysium, eximium Philosophum, atque præclarum Theologum, 4. cap. de diuinis nominibus, non longè à principio, eiusdem Solis encomia sic prosequentem: *Ita & diuina bonitatis manifesta imago, magnus iste, & totus splendens, & superlucens Sol, secundum multam resonantiam boni, & omnia quacunque participare ex ipso possunt, illuminat, & superextensum habet lumen ad omnem extendens visibilem, & sursum propriorum radiorum splendores:* & post pauca addit. *Sed & generationem visibilium corporum confert, ad vitam mouet, & nutrit, & augeat, & perficit, & mundat, & renouat.* Quibus ad Solis naturam commendandam, & super astra omnia, cælestiâque corpora efferendam, nihil elegantius, nihil sapientius proferri potuit. Quos omnes effectus non sola fide sapientium hominum, sed euidenti experientia nouimus: de cæteris verò astris, planetis, atque corporibus cælestibus, nec tot, nec tam varios, neque tantæ nobilitatis experti sumus; neque tantorum virorum testimonio comprobare possumus. Cum ergo ex effectuum nobilitate mensurari debeat nobilitas causæ, sequitur, astrum Solis, à quo emanant, primum nobilitatis locum obtinere inter astra omnia, planetas omnes, omniâque cælestia corpora: sed constat non habere supremum situm: ergo dicamus necesse est, non esse eundem ordinem nobilitatis, & situm inter planetas, nec inter planetas, stellas, & sphaëras cælestes,

quamuis facta comparatione inter solas sphæras idem sit.

Neque argumenta aliarum opinionum aliquid efficiunt: prioris quidem probant tantum de Sole, non eodem modo ordinari cum cæteris planetis, aut sphæris cælestibus secundum situm, ac secundum nobilitatem: de sphæra tamen eius comparatione aliarum non probant esse nobiliorem, quia neque est certum Solem esse partem eius, neque ei continuum, sed nec eiusdem speciei, quæ probare oportebat, ut probaretur, non esse eundem ordinem situs, & perfectionis inter sphæras cælestes. Quod intelligo, etiamsi quantum cælum tribus orbibus constet, ut asserit hæc sententia, de quibus omnibus mox erit statuendum.

Argumenta etiam posterioris sententiæ maiori ex parte solum probant facta comparatione inter solas sphæras. Quæ verò de peculiaribus, atque excellentioribus effectibus aliorum planetarum assumunt Astrologi ad probandum, nobiliores esse Sole, commensurata planè sunt, (ut bene adnotarunt Patres Conimbricenses secundo libro de cælo, capite 5. quæst. secunda, art. 3. & licet vera forent, falsum tamen, quod nobiliores effectibus à Sole emanantibus: nam vniuersaliores sunt isti, cum non solum ad inferiorem mundum, sed ad superiorem quoque extendantur, & modo longè nobiliori eos producit Sol, quam firmamentum cum suis stellis producat alios.

Quod etiam de signis Zodiaci assertur, confirmat potius maiorem nobilitatem Solis supra firmamentum, & stellas eius, cum effecta illa, quæ ex eis sequuntur, Soli potius nobiliori modo adscribi debeant, quam firmamento, atque stellis eius. Ac tandem, quod de perfectione continentis, aut comprehendentis corpus supra contentum, vel comprehensum assertur, probat quidem, sed de solis sphæris, inter quas continentia, ac circumscriptio locum habet, non tamen de planetis, quæ neque se continent, nec circumscribunt (ut satis per se est manifestum) sed nec est certum, sed valdè dubium, quod continui sint cum sphæris, & idèò tanquam partes earum se habeant, ut propterea sequatur superiorem sphæram eo ipso, quod inferiorem continet planetam ei continuum, ac eius partem contineat: sed probabilius fortè est oppositum; quare neque ex hac parte probatur, eundem esse ordinem situs, & nobilitatis, facta comparatione planetarum cum sphæris, sed de his plenius, & planius mox loquemur. Et de distinctione specifica orbium, & astrorum dicemus paulò inferius.

QVÆSTIO V.

*An quodlibet caeleste corpus sub primo mobili contentum
duplici motu moueatur.*

Communis est sententia Astrologorum, & Philosophorum, caelestes sphaeras præter primam duplici agitari latione, altera, qua à primo mobili rapiuntur; altera, per impetum à propria intelligentia impressum. Manifesto enim experimento comperum est, Solem, Lunam, & cæteros planetas ab Oriente in Occidens motu diurno cieri: ad sensum enim constat, tam stellas fixas, quàm errantes ab ortu supra nostrum horizontem ascendere, pergere deinde in Occasum, & iterum in Oriente nasci. Sed non minus exploratum est, dissimili quodam gradu retromere, & non semper ab eodem Orientis puncto ascendere per nostrum horizontem, sed modò ab vno, postea tardiùs ab alio mutata inter se, & cum stellis distantia; quod quidem nequit contingere, nisi præter motum raptus primi mobilis, aliis propriis, & distinctis inæqualiter planetarum orbes pergant. Hæc tamen communis sententia non eodem modo ab omnibus intelligitur. Quidam enim vulgari trutina rem expedientes existimarunt, inferiores orbes duplici motu distincto, & quasi modo opposito simul in orbem cieri: ita vt proprio motu, à propria intelligentia in Orientem tendant, ac simul ab intelligentia primi mobilis motrice in contrariam partem versus Occidentem rapiantur. Ita ex recentioribus multi, quos sequi videntur Patres Conimbricenses hic cap. 1. quæst. 4. art. 1. qui omnes sibi habuerunt persuasum, hunc esse sensum communis sententiæ sancti Thomæ, Doctorumque omnium mentem. Quorum fundamentum est, quia aliter non apparet, qua ratione stare possent ea, quæ in cælis perspicuè deprehendi diximus.

Alij tamen propiùs ad veritatem accedentes ita communem sententiam intelligunt, vt quilibet orbis inferior in rigore, & proprietate physica vnico duntaxat motu moueatur, qui tamen à duplici virtute motrice opposita, seu à duplici intelligentia è contrario impellente procedat, propria altera Orientem versus imprimente impetum, altera primi mobilis in contrarium repiente. Et prior pars statim probabitur. Secundam verò ita suadere conantur, quia nisi hoc detur, intelligi nequit communis sententia adstruens singulam inferiorum sphaeram duplici motu rotari, quam tradit expressè Aristoteles hoc 2. libro, capite 1. textu 16. & capite 6. textu 35. & capite 12. textu 60. Diuus Thomas ibidem, lectione 17. & 18. & omnes philosophi, & Astrologi planè supponunt, quos citant Patres Conimbricenses supra, & Pater Clavius in cap. 1. sphaeræ à pagina 51. immò nec alia via

constare possunt diuersi stellarum aspectus, coïtus, & distantia. Si enim motu tantum raptus ferrentur, æquabiliter semper, motuque, & distantia vniformi procederent. Cum tamen Astrologi certissimè obseruauerint, planetas non semper in eodem puncto horizonis oriri, sed nunc iuxta lineam æquinoctialem, nunc vltra, citraue, nec semper eodem temporis momento, sed tardiùs semper, ac denique inæquali inter se, & cum stellis fixis distantia, id quod stare nequit, nisi præter impetum primi mobilis alius à propriis intelligentiis versùs ortum inæquabiliter inferioribus sphaëris imprimatur.

Nostra in hac re sententia duplici assertione explicanda est. Prima sit, inferiores sphaëre propriè non mouentur simul duplici motu physico. Hæc conclusio est Doctorum secundæ sententiæ contra primam: quæ hac ratione efficaciter probatur: Motus localis est acquisitio localis præsentia, aut diuersi modi præsentia: sed inferior orbis non acquirit plures præsentias simul, aut plures positiones partium in loco, sed vnicam tantum versùs Occidentem: igitur non nisi vnico motu mouetur. Perspicua est consecutio: quia nequit simul ab eodem corpore eadem præsentia acquiri duplici motu opposito, aut quasi opposito, neque id intelligi potest. Minor probatur: ex communi enim omnium sententia non potest idem corpus naturæ viribus habere simul duas præsentias locales, aut duas diuersas positiones in eadem præsentia, sicut nec duo loca: igitur neque potest simul eas acquirere, quod nanque haberi repugnat, ita & acquiri. Nequit igitur hoc contingere, nisi cessante aliquo motu eo tempore, quo per alium quasi oppositum orbis tendat in partem oppositam. Hoc verò nullus dixit, dicereturque sine vlllo fundamento contra experientiam, quæ constat, semper orbem in occasum moueri, & contra rationem, cum semper eadem proportionem impellantur orbes, ac proinde eadem ratione æquabiliter debeant semper moueri. Confirmatur: quia inferior orbis nunquam reperitur simul præsens duobus spatiis totalibus, aut partialibus, sed in vno tantum spatio, eadēque positione, vt perspicuè obseruant Astrologi: ergo neque acquirit simul duas præsentias, seu duos præsentiarum modos, duobus loca: si enim duo simul acquireret, duo simul habere aliquando deprehenderetur. Ergo non mouetur simul duplici motu distincto.

Assertio secunda: idem motus inferiorum orbium prouenit à propria intelligentia, & ab intelligentia motrice primi mobilis, ita tamen, vt intelligentia propria non versùs ortum, sed in occasum impellat. Prior conclusionis pars est auctorum secundæ sententiæ, & valdè communis contra Vallesium & Physicorum capite 5. & nonnullos recentiores. quia non possunt
non

non inferiores sphaerae rapi motu primi mobilis, cum illud concitatissimè moueatur, & inferiores orbes perfectè comprehendat, qui utpote primo proximi, & contigui, solidæque naturæ, apprimè capaces sunt impetus recipiendi, ut cum illo circunuoluatur. Mouentur ergo inferiores orbes ab intelligentia primi, id quod in ore omnium Philosophorum, & Mathematicorum frequentissimè est, & hac de causa octaua, seu decima sphaera primum mobile nuncupatur. At inferior sphaera etiam circunuoluitur à propria intelligentia: igitur illius motus ab utraque intelligentia procedit. Minor inconfessa est apud omnes constituentes tot motrices virtutes, quot sunt orbes cælestes: & ex eo constat, quia, ut infra dicemus, nequeunt ab una eademque intelligentia tot orbes tam vastæ molis simul diuersimodè rotari. Et ulterius demonstratur, quia si inferiores sphaerae solo primi mobilis raptu veherentur, æquabili, aut proportionata celeritate inter se, & cum illo rotari necessarium foret, cum eodem modo semper raperentur, ac proinde semper planetæ inferioribus sphaeris affixi ab eodem horizontis puncto ascenderent, & eorum quilibet eandem semper seruaret cum aliis distantiam, quoad punctum natiuitatis, & lineam, per quam pergit, cuius oppositum euidenter observationibus Mathematici experiuntur. Fateamur ergo necesse est, inferiorum sphaerarum motus non à solo motore primi mobilis, nec à solo proprio, sed ab utroque prouenire.

Posterior pars nostræ assertionis, quam Vallesius supra cum aliis recentioribus contra plures alios tradidit, hac efficaci ratione à nobis probatur. Non est necessarius impetus à propria intelligentia impressus inferiori orbi versùs ortum, sed sat est impulsus eiusdem in occidentalem plagam impellens, & hic est naturæ cæli magis consentaneus: igitur hic, & non ille ponendus est. Antecedens, quoad priorem partem, probatur, & explicatur, quia idè impulsus ille ponitur à suis auctoribus, quia inferior orbis retrorahi deprehenditur comparatione primi mobilis, seu (quod in idem recidit) planeta illi insidens relatè ad inerrantem stellam: sed hoc stare potest ex eo solùm, quòd impetus illi impressus à primo mobili, & propria intelligentia non adeò efficax sit ad illum circunuoluendum, ac impetus illatus ipsi primo mobili ad huius volutionem, ut per se patet: igitur impulsus ille versùs ortum necessarius non est: uterque tamen ille impetus efficit motum in occasum non per eandem lineam, & in eisdem polis, ac primum mobile: quamvis enim ad id incliner rapiens impetus, attemperatur tamen impetu propriæ intelligentiæ illius sphaeræ inferioris, per lineam gyrationem mouere conantis, quæ etiam omninò id nō assequitur, sed ex utroque impetu quasi

attemperato per lineam aliquam gyratiuam mediâ inter lineam, primi mobilis, & propriam particularis sphæræ hæc fertur, non eadem, qua primum mobile, velocitate: quæ attemperatio specialis diuersa quæ est pro qualibet inferiori sphæra, quia quælibet speciali impetu, speciali quæ via à propria intelligentia impellitur, & ideo quælibet sphæra propriis polis, & per propriam lineam, propria quæ velocitate in orbem fertur: quæ omnia pro influxuum diuersitate congruenter attemperata sunt.

Secunda illius antecedentis pars de congruitate huius impulsus probatur primò, quia impetus ille versùs ortum impressus aliquo modo esset contrarius impulsui à primo mobili impresso versùs occasum, utpote in contrariam partem inclinans, quæ contrarietas, & pugna parum consentanea est corpori incorruptibili, quælibet alia contrarietate experti. Deinde ille impetus perpetuò fraudaretur suo effectu per se, cum nunquam cælestis sphæra moueatur propriè versùs Oriëntem, siquidem semper voluitur in occasum, & nequit simul in duas partes, præsertim oppositas ferri, ut prima assertione ostendimus. Denique si intelligentiæ inferiorum orbium illos impellerent in Orientem, non possent non multum retardare primum mobile, cum illi contigui sint, (ob quod ab ipso rapiuntur) ingentis magnitudinis, & vehementer in contrariam partem impendentes; quod quidem non deprehenditur; parum enim detinetur, ne absoluat perfectè circulationem spatio viginti quatuor horarum; id quod prouenit ex eo, quod inferiores orbes non nihil obsistunt per impetus sibi impressos, ne à propria linea gyratiua, per quam moueri exigunt ad lineam primi mobilis extrahantur, cuius ratione media pergunt via, ut diximus. Et sanè incredibile est, & sine vrgenti necessitate nequaquam adstruendum, intelligentiam primi mobilis motricem non solum rotare ingentem illam magnitudinem sui orbis, & simul rapere vastam reliquam molem inferiorum omnium sphærarum, sed etiam id præstare contra oppositos impetus ab aliis motricibus intelligentiis impressos. Est enim magna nimis perfectio limitatæ creaturæ cancellos prætergrediens.

Ex dictis ad argumenta in contrarium adducta satis constat: iam enim demonstrauius, qua ratione diuersæ planetarum distantia, & cõitus inter se, & cum stellis fixis, motuum etiam inæqualitatem constare possint, & reduci optimè in duplicem illum impetum cuiuslibet inferiori orbi à duplici intelligentia versùs occasum impressum, ob cuius diuersitatem dispari celeritate in diuersis quæ Polis, quælibet inferior sphæra intra superioris ambitum, & cauitatem in orientalem plagam pergit, & hæc ratione intelligendi sunt antiqui Doctores, præsertim Aristoteles, & Diuus Thomas, qui in vniuersum asseruerunt, inferiores sphæ-

has duplici motu moueri, quia scilicet à duplici virtute motrice, propria, & sapientis orbis, partim per lineam huius, partim per propriam, hoc est, per mediam inter vtranque ob vtriusque impetus attemperationem cientur: est enim diuersus motus, & per diuersam lineam, ac esset, si à sola propria intelligentia, aut solo primi mobilis raptu rotaretur: quod videtur expressisse Aristoteles textu illo 35. relato pro secunda sententia hisce verbis: *In his enim, quæ sunt sub illo (id est, primo calo, plures lationes in unum iam conuenire.* Ac si diceret, est vnus motus inferioris sphaeræ à virtute tamen composita ex duabus diuersum motum scorsum postulantibus. Nonnunquam etiam Aristoteles, & Diuus Thomas tum citatis locis, tum alibi plures motus attribuunt cuilibet inferiori orbi, totali scilicet, qui componitur ex pluribus partialibus, quorum cuilibet suus proprius motus conuenit, & ideo omnes simul totali orbi dicuntur conuenire. Et similiter cum docent, has sphaeras in Orientem etiam ferri propriæ intelligentiæ impetu, ex eo id affirmant, quia licet hæc in occasum impellat, signiori tamen impetu, & per specialem lineam gyrationis, quapropter minori velocitate orbis circumfertur, ac proinde comparatione primi mobilis celerius pergentis, è contrario moueri, & retromicare dicitur eo modo, quo debilis potentia positiua relatè ad perfectam potentiam impotentia nuncupatur, & aliquo modo contraria. Nec aliquid vnquam dictis aduersum in his Doctoribus per otium consultis inuenire potui.

QVÆSTIO VI.

An planeta, seu errantes Stella, sint partes continua, componentes orbes, quibus insident, & ad motum eorum moueantur.

Rationem dubitandi præbuerunt planeta, propter difformitatem quandam in propriis eorum motibus ostensam, quam non ostendunt firmamenti astraratione cuius difformitatis, nunc propinquiores terræ, nunc verò remotiores ab ea apparent, & ex consequenti, nunc maiores, nunc verò minores. Vt igitur Phænomenas has seu appatitiones seruare possint Astronomi, singulis planetis concesserunt peculiare orbes, ac discontinuos inter se, & à principali, còque minores, ex quibûsque idem præcipuus quodammodo componatur; ac tandem, qui propriis motibus ac distinctis à motu eius moueantur, non tamen eccentricos, sed concentricos, hoc est, habentes eundem centrum aliorum orbium, qui est centrum totius mundi. Pro hac sententia citantur Eudoxius, Calleppus, Ciuillus, Thilerus in libris de czlo: Fracastorius, in libro de homocentricis, Auerroës sæpè, immò & Aristoteles 12. libro Metaphysicæ, textu 45. & 46.

Astrologorum sententias recitauit, & hæc est prima sententia.

Alij verò putantes Phænomenas omnes, seu varias apparitiones non posse saluari per solos orbes proprios, ac discontinuos concentricos, posuerunt eos eccétricos, hoc est, diuersum centrum habentes inter sese, & à communi totius mundi, addideruntque ita hosce minores orbes se habere respectu planetæ, vt vnus eorum sit ei proprius, cui insit. Iste minor orbis vocatur quasi sphæra, aut epicyclus, in quo mouetur planeta ab Oriente in Occidentem, habens motum eius tanquam proprium. Et hæc est 1. sententia.

Alij tandem, & non pauci, Phænomenas omnes, seu varias planetarum apparitiones veras esse negant, sed apparentes tantum esse censent ex variis modis, quibus vapores inter planetam, & visum intercedunt, quorum ratione decepti, videntur sibi propinquiores interdum, & maiores, interdum verò remotiores, & minores, ac propterea non esse propter illas multiplicandos orbes planetarum, aut ponendos plures, quasi partiales, ex quibus singuli eorum orbes componantur, quia non sunt multiplicanda corpora (præsertim incorruptibilia, & adeo perfecta) sine vrgenti necessitate, quæ non probatur adesse in re præsentī.

Vt autem veram in re difficili sententiam statuamus, explicare oportet quonam modo excogitari possit compositio hæc eiusdem totalis orbis ex multis partialibus motui planetæ ita accommodata, vt per eam saluari possint vniuersæ apparitiones, circa eum contingentes: ita ergo excogitatur ab omnibus fermè Astronomiæ peritis, vt quilibet orbis cuiuscunque planetæ compositus sit ex tribus saltem minoribus orbibus, quasi partialibus, discontinuis, & inæqualibus inter sese, quia prius continetur quodammodo ab altero, & necesse est, contentum minorem esse continente. Ex his autem tribus orbibus vnus dicitur eccentricus simpliciter, quia vtraque eius superficies, tam concaua quam conuexa, habet centrum diuersum à centro sui orbis totalis, ac totius mundi, habetque iste idem orbis eandem profunditatem, seu grossitiem omni ex parte, atque immensus est intra profunditatem, atque grossitiem sui orbis totalis, vocaturque deferens planetam, vel cui planeta proximè insidet. Hunc orbem simpliciter eccentricum circundat duo alij orbes, etiam partiales, vnum versùs conuexum eius, & alter versùs concauum, sed diuersæ profunditatis, aut glossitici ambo: nam superior necessariò est valdè tenuis ex ea parte, qua eccentricus orbis, quem circundat, maximè à centro mundi distat, maximam verò profunditatem habet ex parte opposita: E contrariò verò inferior orbis est quasi concauus, & internus, & ita fit, vt conuexa superficies superioris orbis, & concaua inferioris, idem centrum habeant, quòd totalis

talis

talis orbis planetæ, centrum videlicet totius mundi, concaua verò superioris, & conuexa inferioris idem habent centrum, quod orbis simpliciter eccentricus, quem circundant, ratione cuius hi duo extremi orbis eccentricum circumscribentes dici solent eccentrici secundum quid, quia secundum vnâ tantum superficiem diuersum centrum habent à centro mundi, hi etiam duo orbis non mouentur motu eiusdem eccentrici, aut planetæ ab eo delati, sed motu alio diuerso. Et tandem in eodem eccentrico planetam deferente datur rotunda quædam pars omnino solida, ac rotunda, quasi paruulus quidam orbiculus, quem epicyclum vocant, & in quo planeta reuoluitur ab Oriente in Occidentem: eiusmodi autem epicyclos attribuendos esse censent Astronomi, omnibus planetis, propter Solem, cui sufficere arbitrantur orbis proprii, quorum ratione sufficienter saluantur omnes apparitiones eius. Lunæ verò ac Mercurio tribuunt motus alios, de quibus curandum non est.

Hanc verò compositionem orbium planetarum recentiores tertie sententiæ existimant, non esse necessariam pro motibus eorundem planetarum: alij tamen omnino impossibilem probatur hoc primò: nam positis duobus his orbiculis eccentricis, & inæqualis grossitiei, sequitur ex motu eorum penetratio, vel scissio vtriusque, vel certè admittendum esse vacuum; probatur consequentia, quia cum vtrunque moueatur, necesse est, partes grossiores aliquando coniungi, & aliquando etiam partes delicatiores, & aliquando etiam vtrasque separari, sed non possunt coniungi nisi ex parte se penetrando; cum non detur spatium sufficiens, in quo simul extendantur, sed eandem saltem partem idem spatium occupare necessarium sit, quod est ex parte se penetrare: dum verò coniunguntur tenuiores partes, minus spatium, quàm grossiores occupabunt, immò quàm grossiores vnus, & tenuiores alterius in alia parte motus coniunctæ: ex quo constat sequi, aliquam partem spatij occupatam in concursu grossiorum vtriusque, vel grossiorum vnus, & tenuiorum alterius; permanere vacuum in concursu tenuiorum vtriusque.

Secundò, ex eisdem orbibus ex parte saltem eccentrici sequitur, moueri cælestia corpora motu recto, qui vocatur ad medium, aduersus expressam sententiam Aristotelis 2. libro de cælo capite 2. afferentis, motum ad medium, & à medio conuenire solis corporibus sublunaribus; motum verò circa medium soli corpori cælesti. Probatur consequentia, quia his eccentricis positis, necesse est planetam per motum aliquando esse terræ proximum, aliquando remotum, remotum quidem fuerit in puncto superiori illius orbis, qui conuexum eccentrici circumferibit: proximum verò terræ planeta erit, dum in puncto

inferiori opposito fuerit: mouebitur ergo à puncto distantia à centro ad punctum proximum, quod est moueri ab vno in alterum locum; seu spatium respectu centri, & moueri ad medium, seu motu recto. Et potest vrgeri argumentum, quia si Luna, gratia exempli, circunvoluitur in suo epicyclo motu sibi proprio, sequitur, non semper nobis ostendere eandem partem, seu eandem faciem, sed vnā, dum est in parte superiori eius, & alterā, dum est in inferiori, aduersus experientiam manifestam: nam eandem partem maculatam eius videmus semper, & in hanc sententiam inclinare videtur Diuus Thomas 12. Metaphysicæ, lectione 10. quamuis probabile videatur censere, dari eccentricos, & epicyclos 2. de libro de cælo, lectione 17. & parte 1. quæstione 32. articulo 1. ad 2.

Alij verò illam compositionem orbium hoc argumento probant, non esse necessariam: non enim alia de causa necessaria existimatur, nisi pro saluandis apparentiis planetarum, qui vno tempore proximiores apparent, & ideò maiores; altero verò remotiores, & ex consequenti minores, quod non posset saluari, si propriis orbibus insiderent, sicut stellæ firmamenti, & ad motum eorum mouerentur, cum constet, stellæ has eandem semper distantiam à terra habere, & eiusdem semper magnitudinis apparere: Sed apparentiæ istæ etiam si veræ forent, sufficienter saluarentur, aut cum solis orbibus eccentricis, aut cum solis epicyclis, quia cum his, vel illis solis, eo ipso, quod motu distincto à totali orbe mouentur, necesse erit, ad partes eorum remotiores à terra aliquando peruenire, atque etiam aliquando ad proximiores; cum constet, remotiores esse partes eorum superiores, inferiores verò proximiores, & necessarium sit planetam omnes percurrere per circulationem; ergo saltem non erit necessarium orbem eccentricos ponere simul atque epicyclos, sed sufficienti hi soli, vel soli orbem concentrici.

Probabilius tamen nobis videtur, totam compositionem explicatam non esse solum possibilem, sed necessatio ponendam in orbibus planetarum: nam vtrunque in primis docent omnes Astronomi, & experientiis ita efficacibus probant, vt fidem facere mereantur. Vnde non solum non recedit ab eis Aristoteles, sed in multis eorum sententiam amplectendam esse à Philosophis arbitratur 2. libro de cælo, capite 8. text. 60. & 61. & vniuersaliter 12. Metaph. monet, Astronomos in astronomicis rebus esse consulendos, & primum quidem, quod possibilis sit, ex eo solo conuincitur, quod nihil in eo repugnans naturæ cælorum, aut motui eorum reperiatur, vt singula à nobis exposita percurrenti facile constabit, & solutiones argumentorum in oppositum à nobis mox adhibendæ ostendent. Quod verò necessatio ponenda

ponenda sit, non solum secundum orbem concentricos, sed etiam secundum epicyclos, probant Astronomi manifestis experimentis. nam Sol, & Luna, ut sæpè obseruatum à se esse testantur, atque etiam cæteri planetæ, nunc remotiores à terra, nunc verò propinquiores visuntur, & consequenter, nunc maiores, nunc minores, eorumque motus nunc velociores, nunc tardiores: cum certum sit eò maius apparere corpus, quoad minorem distantiam cernitur, & eò minus, quoad maiorem, cuiusque motus tardior videtur ad maiorem distantiam, & ad minorem velocior: sed impossibile id foret, si solo motu sui orbis mouerentur: nam tunc eodem semper modo distarent à terra, & semper sub eadem magnitudinis specie cernerentur, ut ostendunt stellæ fixæ, quarum nulla magis, aut minus distans à terra apparet, & ideo, nec vno tempore maior quam alio: necesse est ergo proprio motu moueri planetas, & circa diuersum centrum à centro totius mundi, quod nisi ponantur orbis eccentrici, patet esse impossibile. Maior verò probatur, nam Sol existens in Capricorno, aut in aliis signis australibus maior apparet, quam cum in Cancro, vel in aliis signis Aquilonaribus existit: hæc verò inæqualitas paulatim tollitur, prout à prædictis signis recedit: ergo magis distat à terra, dum in his signis versatur, dum verò in illis propinquior est.

Sed respondent aduersarij, has apparentias non prouenire ex maiori, vel minori distantia planetarum à terra, sed quia vapores, qui inter Solem & visum nostrum interponuntur, disgregant radios visuales, ut contingit diebus æstatis, cum Sol in ortu apparet maior, quam in meridie. Contra hoc tamen est, quia apparentiæ istæ contingunt serenissimo cælo, ac medio à vaporibus emundato, ac tandem planeta eandem eleuationem habente supra horizontem, ac propterea æstiuo tempore semper contingit caliginosum esse cælum, & medium magis turbatum, ac permixtum vaporibus, quam hyemali: ergo maior deberet apparere Sol in Cancro, quam in Capricorno, quod constat esse falsum. Necessariò ergo fatendum est, hanc inæqualitatem magnitudinis, sub qua apparet Sol, prouenire ex eo, quod dum minor apparet, existat in parte orbis eccentrici, quæ circumscribit partem grossiorem orbis contenti inferioris: quando verò maior in parte continente oppositam, & minus crassam partem eiusdem orbis.

Secunda experientia est, quia Sol plures dies insumit, dum percurrit signa borealia ab æquinoctio verno vsque ad autumnale, à die videlicet vigesimo Martij, vsque ad vigesimum quartum Septembris, quam dum percurrit Australia, tempore hyemali. Nam in prioribus signis insumit centum octuaginta septem

septem dies, in posterioribus verò centum septuaginta octo, quod non potest esse, nisi moueatur in aliquo orbe eccentrico circa terram, ita vt maior pars illius respondeat maiori parti terræ, quàm oppositæ: ergo necesse est, orbes eccentricos admittere. Quod verò soli orbes eccentrici nō sufficiant ad saluandas omnes Phænomenas, seu apparitiones varias planetarum: sed necessarium sit præter illos, addere sphæriculas, seu epicyclos, probatur tertio experientia, quia cæteri planetæ (præter Solem) existentes in puncto augis eccentrici, hoc est, in puncto à terra remotissimo, non semper eodem modo se habent ad terram, sed modò sublimiores, modò verò humiliores visuntur, & ex consequenti, nunc diametri eorum maiores, nunc verò minores, & pariter ipsimet planetæ, ac præterea motus eorum velociores, aut minoris velocitatis. Sed tanta hæc varietas non potest ratione solius eccentrici saluari, quia cum aux eccentrici semper sit in eadem distantia à terra, planeta in eo existens semper eodem modo apparet, quoad supradicta omnia, & planeta idem in auge existens deberet esse à terra remotissimus, & augis opposito propinquissimus. Cum ergo aliquando remotior, aliquando propinquior in auge eccentrici appareat, necesse est, sphæriculam, seu epicyclum ponere immersum intra profunditatem, seu crassitiem eccentrici, ad cuius motum planeta reuoluatur, & ita possit tam variis modis nobis apparere iuxta diuersitatem partium motus eiusdem epicycli sibi proprij.

Tertia experientia pro confirmandis epicyclis sumitur ex duplici eclipsi lunari, quam contigisse referunt Astronomi, Sole, & Luna in eodem situ manentibus, ita vt in vtraque Sol eandem distantiam habuerit à terra, atque adeò eandem vtroque terra vmbra protexerit. Obseruarunt autem vnā eclipsim maiorem fuisse, & plusquam alteram durasse. Ex quibus hoc argumentum satis efficax deducitur: maior, vel minor duratio eclipsis prouenit ab ingressu Lunæ in maiorem, vel minorem vmbra terræ; sed in vtraque eclipsi eadem fuit vmbra terræ, cum ponatur Sol æqualiter à terra remotus, necesse ergo fuit, Lunam in vna eclipsi minùs fuisse à terra remotam, in altera verò longius à terra distasse; cuius ea est perspicua ratio, quia cū vmbra terræ fiat ad modum pyramidis, necesse est, eò ampliorem relinqui, quò propinquior terra sit, & eò angustiores, quò remotior: quo fit, vt quò propinquior terræ fuerit Luna, eò maiorem pertranseat vmbra, minores verò, quò longius à terra recedit: & hinc procedit inæqualitas eclipsium, quoad magnitudinē, & durationem, sed constat Lunam (vt in Theorica planetarum declaratur) ex sola ratione sui eccentrici, non posse eiusmodi inæqualitates eclipsium pati, quia ratione illius in omni eclipsi eandem habet distantiam

à terra, cum semper tam in coniunctione eius cum Sole (in qua fit eclipsis, Solis) quam in oppositione (in qua fit eclipsis Lunæ, in auge sui eccentrici existat, necessarium est ergo, præter eccentricum epicyclum ponere, ut ratione peculiaris motus quem in eo habet planeta, saluetur diuersa distantia eius à terra, etiam si in eadem eccentrici auge permaneat, & ex hac distantia amplior, vel angustior umbra, ac tandem maior, atque prolixior eclipsis, aut minor, & breuior.

Quod potest corroborari ex his, quæ refert Clavius noster in sua sphaera, à folio 443. vsque ad 449. se vidisse duas eclipses: priorem in Ciuitate Conimbrica anno millesimo quingentesimo quinquagesimo nono circa meridiem, in qua directè interponebatur Luna inter visum & Solem, ita ut Solem integrum non per minimum tempus contegeret, fueruntque tenebræ quodammodo maiores quam nocturnæ, neque ubi quis pedem poneret, videre poterat, & clarissimè apparebant stellæ in cælo; & quod mirabilius erat, aues ex aëre in terram præ horrore ex tanta terræ obscuritate incusso decidebāt. Alia fuit Romæ anno 1567. etiam circa meridiem, in qua etsi Luna inter Solem, & visum interponeretur, non tamen ita ut totum Solem obscuraret, sed (quod nunquam fortasse alias euenit) relinquebatur in Sole circulus quidam, vndique totam Lunam ambiens. Ex quibus colligitur primo, Lunam, & Solem in his eclipsibus non habuisse eandem distantiam à terra, nec inter sese, alioqui eodem modo in vtraque eclipsi obscurarentur, ut à perspectiuis clarè demonstratur. Secundo, colligitur nec moueri eisdem motibus suorum orbium totalium, tanquam propriis, sed minores alios (ut sic loquamur) habere, & circa diuersum centrum à communi totius mundi, quod non est possibile, nisi præter totales orbes eis proprios, ponamus eccentricum simpliciter, & duos alios minores orbes, ex parte etiam, ac secundum quid eccentricos iam à nobis expositos. Tertiò tandem colligitur, præter hos tres orbes eccentricos, ponendam esse in medio orbe simpliciter eccentrico sphaerulam quandam in profunditate, seu grossitie eius immerfam, quæ proprio motu moueatur ab Oriente in Occidentem, & in qua planeta insideat, & cum qua circunuoluatur. Quibus positis Phænomenæ omnes, seu apparitiones variae planetarum non solum in suis motibus ostensæ, sed etiam eclipses, & varij modi earum saluantur. Ex his autem partialibus orbibus componi quodammodo dicuntur orbes totales planetarum, propter ordinem, quem cum eis seruant, & quia in profunditate, seu grossitie eorum vniuersi ponuntur, & à motu eius suo modo dependent. Quod quidem, ut à nobis explicatum, licet euident non sit, est tamen valdè probabile, & in continua obseruatione Astronomo-

rum fundatum, quæ circa effectus à nobis perceptibiles per se sensus versatur, & ideo fidem meretur efficere, id quod ex solutione argumentorum magis constabit.

Ad primum igitur negandum est, ex eccentricorum motu sequi penetrationem aut scissionem eorum secundum aliquas partes, aut etiam ex parte dari vacuum: & huius ratio est, quia non ita mouentur, ut aliquando debeant coniungi in eadem parte spatij grossiores partes utriusque, aut grossiores vnius cum delicatioribus alterius, sed proportionaliter ita simul mouentur orbis isti, quasi partiales ad motum totalis, ut partes grossiores vnius semper subsint delicatioribus alterius, atque etiam è conuerso, cum regularissimus sit, & vniformis earum motus, effque iuxta propriam naturam conuenit. Ex tali autem motu facile quisque intelligat, nullum ex illatis incommodis in argumento sequi.

Ad secundum neganda est consequentia, quòd ex eccentricis sequatur moueri cælestia corpora motu recto: nam ad motum rectum non satis est, corpus motum habere, vel acquirere diuersam distantiam à terra, vel ab alio corpore extrinseco, sed requiritur, quòd per lineam rectam eam consequatur, cum notum sit ex eodem Aristotele, atque eodem loco in argumento citato, motum rectum esse, qui per lineam rectam fit. Orbis verò eccentrici non mouentur per lineam rectam, sed per circularem, non tamen circa centrum mundi, sed circa proprium. Et præterea habent partes quasdam grossiores, tenuiores verò alias, & ratione utriusque acquirunt per motum circularem diuersam distantiam, non quidem à proprio centro, circa quod mouentur, nam hoc pugnaret cum motu circulari, sed à terra, vel à centro eius, quibus non commensuratur circularis eorum motus. Negandum est igitur moueri ab vno loco, seu spatio in aliud, sed mouentur ab eodem in idem, ut postulat motus circularis, sic autem moti acquirere possunt diuersam distantiam à terra.

Ad aliud verò, quo idem argumentum vrgetur, respondeo, non posse Lunam in circulo motam in proprio epicyclo nunc vnâ, nunc verò alteram faciem nobis ostendere, sed semper, & necessario eandem: nam cum voluatur in circulo circa proprium centrum proprio motui proportionatum, necesse est instabili quodam libramento permanere semper. D. autem Thomas pro hac sententia relatus nihil asserendo docet, sed referendo Astrologorum sententiam loquitur semper, & nunquam eam refutando, ut ex eisdem locis in argumento citatis facile constare cuique poterit.

Argumento tandem aliorum respondetur, variis obseruationibus Astronomis compertum esse, Lunam aliquando existentem in

in eodem puncto à terra remotissimo, non eandem ab illo habuisse distantiam, nec eiusdem magnitudinis apparuisse, & pariter in eodem puncto epicycli terræ propinquissimo, quæ etiam in aliis planetis obseruata sunt, atque reperta. Immo Clavius noster in sua sphaera, folio 444. testatur se vidisse paucis annis elapsis Martem sub tanta magnitudine, ut duplo maior tuæ cælo serenissimo appareret, quàm alio tempore, ita ut multi mirarentur, existimantes, nouum in cælo sydus effulxisse, quæ nec in solis eccentricis, nec in solis epicyclis referri potest, sed necesse est, in utroque referri, ut probauimus.

QVÆSTIO VII.

An omnes caelestes orbes sint inter se contigui, nullo alio corpore interiacente.

QUuâis cōtrouersia hæc ad interpretes sacre Scripturæ spectare videatur, quatenus ex diuersis Scripturæ locis ortum ducit: non tamen est à Philosophis aliena, quorum partes sunt, naturam & situm cæli inuestigare. In qua controuersia duæ sunt præcipuæ sententiæ extremè oppositæ.

Prima negat contiguitatem omnium orbium cælestium admittens veras ac elementares aquas inter omnes orbes mobiles, & cælum Empyreum, quas dicitur diuidere ab aquis permeantibus terram, totus globus cælestis mobilis. Ita sentit Pater Molina, 1. parte, disputat. 10. de opere sex dictum: & videtur manifesta sententia multorum Patrum: sic Iustinus Martyr, in responsione ad quæstionem 93. Orthodoxorum, Basiliius homilia 3. Hexameron, Theodorctus, quæst. 11. in Genesim, Ambrosius 2. libro Hexameron, capite 3. Chrysostomus homilia 4. in Genesim, Hilarius in illa verba Psalmi 135. *Qui fecit calos in intellectu.* Gennadius, & Siueria relati à Lippomane in illa verba Genesim 1. *Fiat firmamentum in medio aquarum*, &c. ac tandem Augustinus 2. super Genesim ad literam, his verbis: *Quomodo autem, & quales aqua ibi sint, esse eas ibi minimè dubitamus: maior est quippe huius Scripturae autoritas, quàm omnis humani ingenij capacitas.* Fundamentum huius sententiæ sunt exptessa sacre Paginæ testimonia, quæ supra cælos aquas constituunt: & cum supra Empyreum consistere non valeant, sit consequens, ut inter ipsum, & alium cælestem globum mobilem eas intercipi fateamur. Danielis 3. *Benedicite aqua omnes, quæ super calum sunt, Dominum: Psalmo 148. Laudate eum cali calorum, & aqua, quæ super calos sunt.* Et Psalmo 103. *Extendens calum sicut pellem, qui tegit aquis superiora eius.* Præterea firmamenti nomine in Scriptura intelligitur cælum stellatum, ut constat ex c. 1. Genesim: *Vocauit Deus firmamentum calum.* Et rursus: *Fecit luminaria in firmamento cali.* Ac tædem: *Fecitque Deus luminaria*

magna,

magna, luminare maius, ut praeffet dici, & luminare minus, ut praefset nocti: & stellas, & posuit eas in firmamento cali, ut lucerent super terram. At firmamentum mediat inter aquas, eadem Scriptura ibidem testante, illis verbis: *Fiat firmamentum in medio aquarum, & diuidat aquas ab aquis.* Igitur inter Empyreum caelum, & octauam sphaeram, veræ interceptiuntur aquae. Quod vrget Pater Molina supra ex eo, quod si in citatis verbis non intelligantur veræ aquae elementares, non stabit veritas, proprietas, & sinceritas Scripturae, sed violentia illi inferretur, siquidem vox *aqua* ex propria impositione significat elementares, ac veras aquas, à propria significatione extrahitur ad tropum, figuram, & metaphoricum sensum: quod si liceret, nihil stabile permanebit in Scriptura; nec vllum ex illo dogma poterit firmo argumento probari. Quæ doctrina praesertim vim habet in presenti, cū omnia relata testimonia possint sine vlllo incommodo de veris aquis intelligi: licet enim aquae elementares, & corruptibiles inter caelos ponantur, & ideò alterentur, non ideò consequens necessariò fit, ut corruptioni subdantur, siue propter ipsarum resistantiam, ratione multitudinis materię; siue ob qualitatem à Deo impressam, vel denique denegante Deo suum concursum ad actionem corruptiuam ex aliquo occulto fine. Neque etiam sequitur, ibi esse violentas, solum enim tendent in locū firmamenti nullum namque elementum grauitat, aut leuitat, nisi infra orbem Lunæ constitutum. Nihil igitur obstat, quominus loca Scripturae in sensu huius sententiæ intelligantur, ac proinde sic intelligi debent.

Quæ sententia intelligitur à suis patronis, de aquis elementaribus initio supra octauam sphaeram à Deo constitutis, non quasi ex continua vaporum eleuatione ibi in dies generentur, ut improbabilis quædam opinio adstruxit, quam tetigit Augustinus 2. super Genesim ad literam c. 4. & Diuus Thomas 1. parte, quæst. 68. art. 2. ad finem breuissimè retulit, & sufficienter refutauit his verbis: *Dicere enim quod aqua vaporatiter resoluta eleuentur supra calum sydereum, ut quidam dixerunt, quorum opinionem tangit Augustinus 2. super Genesim ad literam, est omnino impossibile, tum propter soliditatem cali, tum propter regionem ignis mediam, quæ huiusmodi vapores consumeret, tum quia locus, quod feruntur leuia, & rara, est infra concuum orbis Luna, tum etiam, quia sensibilibus apparet, vapores non eleuari vsque ad cacumina quorundam montium: quod etiam dicunt isti de rarefactione corporum in infinitum propter hoc, quod corpus est in infinitum diuisibile, (ut ideò vapores ad summam raritatem producti supra calos eleuari possint) vanum est: non enim corpus naturale in infinitum diuiditur, aut rarefit, vsque ad certum terminum.*

Probabilior tamen, & communis sententia tenet, supra caelestia corpora, aut inter vnum, & aliud, nec aquam, nec corpus aliud

extrauicium

extraneum reperiri, sed immediatè esse contigua. Sic Scholastici communiter in 1. distinct. 14. D. Thom. q. 1. artic. 1. Bonau. articulo 1. Durand. q. 1. Albert. Mag. art. 1. & plures alij ibidem. Aegidius 2. lib. Hexameron, c. 14. Lyranus, Abulensis, Caietanus, & Catherinus in cap. 1. Genesis, & idem D. Thom. 1. parte, quæst. 68. artic. 1. cum aliis. Probatur ex ordine, ac dispositione vniuersi, iuxta quam corruptibilia omnia, & elementaria corpora infra orbem Lunæ collocata sunt, vnde sublunaria dicta. Pugnat igitur cum hac dispositione, eorum aliquod intra vnum, & alterum cælum fuisse interiectum: incorruptibile verò corpus, præter cælum nullus agnouit. Præterea, si aquæ verè inter cælos continerentur, elementares forent: cum nemo alias præter elementares à Deo fuisse conditas excogitauerit, neque ad id extet fundamentum aliquod: sed hoc pugnat naturæ earum, ortus & interitus capaci, quæ proinde calore cælesti alteraretur, ac solueretur, nec non ex earum materia aliud generaretur corpus, aut ipsa omni forma orbata maneret, quod natura rerum, & ordo non patitur. Nec prodest subterfugium nostri Molinæ. Nam si sua natura relinquantur aquæ, non possunt non nimio calore dissolui ex parte saltem, ac proinde ibi essent generationes, & corruptiones. Multitudo verò materiæ prodesse poterit solum, ne tantum diminuantur, vel etiam, vt continua reactione in contrarium partes deperditas restarent. Afferere verò, Deum qualitatem aliquam restituiā aquis illis tribuisse, vel continuo proprium concursum ad aquarum alterationem cælo subtrahere, & liberum est, & parum philosophicum, cum miraculum in prima rerum naturalium conditione admittat contra omnes: & præterea nulla ratione necessarium, vt infra videbimus, ac proinde hoc solo titulo refellendum. Denique id ipsum confirmatur, quia aquæ supra cælum non possent non violenter, & contra propriam naturam detineri, vt pote extra cætrum, in quod natura sua propendunt, sicut aliæ aquæ elementares, cum eiusdem omnino naturæ sine dubio essent; perpetuam verò, aut diurnam valde violentiam tebus naturalibus concedere, alienum est à ratione. Nec satisfacit solutio P. Moli. scilicet, hoc solum conuenire corporibus elementaribus sub cælo Lunæ constitutis, quia vbiunque corpora collocantur, eiusdem remanent naturæ, & conditionis naturalis: sed esse sub aliis corporibus exigunt natura sua corpora grauiora, sicut leuiora constitui super grauiora, vel minùs leuia: igitur aquæ elementares ex natura sua postulant collocari sub elementis ignis, & aëris, & dum extra hunc situm detinentur, patiuntur violentiam contra internum impetum, & tendentiam in proprium locum; quod concedendum nequaquam est, maximè cum nulla appareat vtilitas, nullus eluceat finis, in quem huiusmodi aquæ, à propriis locis extractæ,

supra cælum fuerint relegatæ. Nam, quod nonnulli excogitarunt, relati à Beda in libro de natura rerum, vt testis est Petr. Perceira 1: commentariorum in Genesim, versic. 6. quibus accessit grauis quidam Doctor, referente Abulense in cap. 7. Genesim, videlicet, Deum intra cælum referuasse aquas pro inundatione terræ efficienda, tempore diluuij, signum profectò est. Nam in primis, cum iam tempus diluuij præterierit; dilapsæ essent huiusmodi aquæ, ac proinde modo non essent intra cælum, vt prima opinio asseuerat, & ideo ineptè, immò falsò, nunc ad diuinas laudes in Scriptura inuitarentur aquæ, quæ super cælos sunt: deinde earum aquarum locus perpetuò vacuus persisteret, cum aquæ diluuij causa illum relinquerent, & non sit aliud corpus potens cum replere præter cælum, quod nequit hoc præstare, nisi aut derelictione proprii loci, aut per rarefactionem, quorum neutrum naturaliter cælo conuenire potest, vt ex supradictis constat. Præterea ad inundationem terræ hoc non est necessarium, cum hæc optimè potuerit accidere ex effluxione aquarum maris, fontium, & fluminum supra terræ superficiem, & etiam per ingentem, & assiduam pluuiam è media aëris regione continuò aquis dilapsis. Vtcrius, si tanta aquarum copia è cælo descendisset, non posset non subito extingui tota sphaera ignis in itinere obuiam facta. Denique non possent aquæ in terram defluere ad efficiendum diluuium, nisi disrumpendo cælum, vel ipsum penetrando, cum aliàs nullus illis posset aditus patere; vtrunque verò naturaliter est impossibile, ac proinde placitum hoc planè improbabile.

Nec minùs probandum est, quod venerabili Bedæ suprà magis placuit, nempe, aquas supra orbem stellatum sitas fuisse, ad temperandum ardorem stellarum: sine fundamento enim, & contra rationem est, syderibus ardorem tribuere, aliàs incorruptibiles non essent ex propria natura, cum istæ qualitates ad corruptionem disponant subiectum, vt in superioribus diximus: solùm ergo continetur in stellis eminenter, secus etiam Saturno insideret summa frigiditas formaliter, pro qua temperanda præparari debuisset inter eosdem cælos elementaris ignis, & idem est de aliis planetis. Effet igitur in cælis continua actio, & reactio contraria, ac proinde substantialis transmutatio, & frequens vicissitudo generationis, & corruptionum contra experientiam, & communem sensum.

Superest, vt argumenta primæ sententiæ diluamus, & simul aperiamus perspicuè verum sensum locorum Scripturæ, quæ in varias sententias auctores adhuc nostræ opinionis distraxerunt. Nam Bonauentura, Durandus, Albertus, & plures alij ex supracitaris, ita explicant, vt aquæ, vel aquarum nomine intelligatur in Scriptura locis citatis, & similibus cælum crystallinum, situm supra octauam sphaeram, quæ vocatur firmamentum, siue ipsum solùm,

solum, siue etiam cum aliis planetarum orbibus, & hoc firmamentum dicitur, diuidere aquas ab aquis, id est, veras aquas elementares, & sublunares à cælo illo crystallino, quod aqueum, siue aqua appellatur æquiuocè, propter similitudinē cum veris aquis, eo quod perfluidum, & diaphanum sit omni ex parte, secus quàm alij inferiores orbes stellis, & planetis distincti.

Sed tamen hic sensus nobis non placet, quippe qui multa continet difficilia. Et imprimis falso innititur fundamento, supponēs supra stellatū cælum esse corpora alia cælestia præter empyreum, quod in superioribus falsitatis conuicimus. Immo & si admitteremus, dari huiusmodi cæleste corpus supra octauam sphaeram, saltem hoc non est certum, sed valdè dubium, & non solum rudi illi populo, cui alloquebatur Moyses, verū maiori, ac meliori Philosophorum parti, & antiquitati omni prorsus ignotum. Quo ergo pacto credi potest certissimā rem per eam, de qua valdè dubiū est, vel ignotum omnino, an fuerit à Deo condita, enarratam, & explicatam fuisse à sacro Scriptore? Præterea hac explicatione obscurissimus redditur contextus sacer, creationē describens; in eo enim tripliciter variaretur significatio vocis aquæ: nam cū primò dicitur: *Spiritus Domini ferebatur super aquas*; aquarū nomine intelligunt Doctores isti materiā primam, seu corpulentam quandam massam: & cū dicitur: *Fiat firmamentum in medio aquarum*: eodē nomine agnoscunt nonum cælum: cū autem subiungitur: *Congregentur aqua, quæ sub calo sunt, in locum unum*, planè est sermo de elemento aquæ, quod quidem in re tam graui, ac rudi populo enarrata ab Scriptore canonico, admittendum non est.

Denique similitudo illa adducta inter nonā sphaeram, & elementarem aquam parui momenti est, cū ea omnia, in quibus similitudo consistere dicitur, in aliis etiā octo inferioribus orbibus reperiatur; cū omnes sint lucidiores, & magis diaphani, quàm aqua, eiusdem etiā rationis & apparentiæ, secundū omnes suas partes: & saltem eadē prorsus ratio erat de decima sphaera iuxta eorundem opinionē, immò & de cælo Empyreo, vt cōstat: nulla ergo specialis similitudinis ratio est in nona, ac in aliis sphaeris cælestibus.

Item secundo argumento adducto refutatur sententia Originis Homilia in Genesim non longè à principio, intelligentis nomine aquarum existentium super carlos, substantias angelicas, eo quod ad diuinas laudes excitentur, quarū materiales aquæ capaces nō sunt: quæ sententia ab omnibus relicta. Epiphanius Epist. ad Ioann. Hierosolymitanum, & Hieronymus Epistola ad Pamachium, eam, vt errorem, referunt, Aug. cū id docuerit 13. confessionū c. 15. tanquam inconsideratè dictum, retractat 2. li. retractionum c. 6. & D. Basilius hom. 3. in Gen. tacito auctoris nomine, eam quasi somnium, anilemque fabulā refellit: infert enim

verbis manifestam vim, trahens ea ad sensum, non modò non intentum, sed neque vlla ratione cum antecedentibus, & consequentibus coherentem, vt legenti constabit. Et manifestè reuincitur ex cantico trium puerorum, vbi postquam inuitantur Angeli ad laudandum Deum, deinde memorantur aquarum, *Quæ super calos sunt*, cum aliis creaturis, quæ etiam si rationis expertes, dicuntur laudare Deum, quatenus sua perfectione, varietate, & pulchritudine, Deum auctorem commendant, & ad ipsius laudes creaturas ratione pollentes prouocant, quod ex mente Damasceni egregiè docet Diuus Thomas de spiritual. creat. artic. 6. ad 14. his verbis.

Ad decimum quartum dicendum, quòd secundum Damascenum (scilicet libr. 2. cap. 6. in fine) cæli dicuntur enarrare gloriam Dei, laudare, & exultare materialiter, in quantum sunt hominibus materia laudandi, vel enarrandi, vel exultandi. Similia inueniuntur in Scripturis de montibus, & collibus, & aliis inanimatis creaturis, & iuxta placitum Origenis, nomine torris, glaciæ, & reliquorum non viuientium, & expertium rationis, quæ ad laudes Dei inuitantur, deberemus intelligere alias creaturas rationales, quæ solæ laudandi Deum propriè capaces sunt, quod est absurdum.

Consequens ergo fit, vt cum pluribus Doctoribus nomine aquarum in Scriptura, veras ac elementares aquas intelligamus, vt nomen ipsum præ se fert, quod non est cur à propria significatione in alienos, atque etiam extortos significatus extrahatur, vt bene admonet Pater Molina suprà, siquidem cum omni proprietate accipi potest, ac proinde vt sonat, sumi debet iuxta regulam Augustini interpretibus Scripturæ satis familiarem. Quapropter veræ, ac elementares aquæ sunt, quæ dicuntur esse super cælos, & à terrestribus aquis per firmamentum diuidi. Pro cuius intelligentia scire oportet, *firmamentum* in sacra pagina propriè accipi nunc pro aggregato ex omnibus orbibus cælestibus mobilibus cum elemento ignis, & aëris, nunc verò pro aliqua parte huius aggregati: qua etiam ratione non semel vsurpatur cælum, quod tradit D. Thom. 1. parte, quæst. 68. artic. 1. adducens verba Augustini ex 2. super Genesim ad litteram, commendantiâ hanc positionem hoc modo: *Hanc considerationem laude dignissimam iudico. & expressus in solutione ad primum. Idem expressit D. Hieronymus Epif. 85. ad Oceanum his verbis: Inter calum, & terram medium existitur firmamentum, &c.* Rupertus 1. libro de Trinitate capite 22. sic inquit: *Firmamentum non solidum quid, aut durum, vt vulgò putatur, sed aër est extensus, &c.* Et statim: *Scriptura illud firmamentum nuncupauit, videlicet, eò quòd diuidas aquas ab aquis.* Beda in Genesim asserit, pro toto prædicto spatio accipi firmamentum in

in historia creationis. Sequitur Durandus in 2. dist. 24. Eugub. in Cosmopœia, Caletanus in 1. caput Genesis, ex nostris Pater Pereira lib. 1. in Genesim. Et Pater Suarez 1. tomo Metaphysicæ, disputatione 13, sectione 22. & vox firmamentum in Hebræo, ut apud peritos linguæ constat, significat extensionem, & quasi expansionem, explanationem, & explicationem eius, quod complicatum erat: id quod egregiè explicuit Regius Psalter, Psalmo 13. *Extendens calum sicut pellem*, hoc est, *sicut tabernaculum*, quam vocis significationem expresse runt septuaginta interpretes, quod toti illi quasi aggregato, & cuilibet parti competit. Quæ eadem vox Hebræa, teste Lypomano, Catena in caput primum Genesis, interdum etiam significat stabilitatem, seu firmamentum; quo sensu Psalmo 103. dicitur: *Terminum posuisti* (scilicet aquis maris) *quem non transgredientur*. Et ideo Septuaginta transtulerunt illud verbum Hebræum per Græcum significans, dans firmitatem, & vulgatus vertit *firmans*. Vtrunque egregiè complectitur Augustinus 2. super Genesim ad literam, capite 10. his verbis: *Nec nomen firmamenti cogit, ut stare calum putemus: firmamentum enim non propter stationem, sed propter firmitatem, aut propter intransgressibilem terminum superiorum, & inferiorum aquarum, intelligere licet: quæ iuxta statim dicenda accipienda sunt*. Ratio igitur firmamenti propriè conuenit secundum utranque significationem toti huic globo inter cælum Emphyreum, & terram intercepto, ut illum consideranti per se constabit. Et propriè etiam conuenit infimæ regioni aëris nebulosæ dictæ, ob ingentem vaporum, & exhalationum admixtionem in ea errantem. Est enim expansio, seu extensio maxima, in qua aues, homines, & bruta, quasi in quodam tentorio degunt. Est præterea immobilis intercapedo, & situs, seu fixus, & stabilis terminus, non immobilitate partium, sed quasi æquiualentia, & positione totius sphaeræ partialis aëris, inter aquas terrestres, & aëreas, hoc est, inter aquas regentes terram, vel aliquam illius partem, & eas quæ in media aëris regione ex continua vaporum eleuatione indefinenter generantur. De hac itaque regione aëris propriè dicitur firmamentum, & hoc est firmamentum, secundo die factum, in medio aquarum, diuidens aquas ab aquis, immediatè utrasque attingendo, propriissimè, & in rigorosa significatione. Idem firmamentum vocauit Deus cælum, ibi enim nequit intelligi de aliquo orbe cælesti, cum secundum probabiliorem sententiam, iam omnes præsupponerentur facti primo die. Dicitur verò cælum (cuius sunt aues) per accommodationem, signanter tamen, ut egregiè Diuus Thomas 1. parte, quæstione 68. artic. 1. ad 1. hisce verbis: *Per firmamentum verò secunda die factum intelligitur spatium aëris, in quo nubes condensantur, quod etiam calum a quibusdā dicitur*,

& ided ad æquiuocationem designandam, signanter dicitur, vocauit Deus firmamentum cælum, &c. Nomine igitur firmamenti vtitur sacer Textus pro diuersis eius partibus, ita vt ex antecedentibus, & consequentibus semper possit intelligi, pro qua parte accipiat, & ita tollatur æquiuocatio, vt dum dicitur, Deus stellas in firmamento posuisse, sumatur duntaxat pro cælo stellato: dum dicitur Solem, & Lunam collocasse in firmamento, accipiat pro primo, & quarto orbe: cum autem asseritur, factum fuisse firmamentum in medio aquarum, aut diuidere aquas ab aquis, intelligenda venit infima pars aëris: & idem dicendum est de cælo, vt scilicet nunc pro vno, nunc pro alio sumatur corpore, ex determinatione antecedentium, & consequentium, sublata æquiuocatione, vt dum dicitur, Deus principio cōdidisse cælum, pro omnibus corporibus incorruptilibus simul, pro aliquo verò eorum speciatim, cum illius proprietas exprimitur; vt cælum Lunæ, Solis, stellarum, cæli cælorum pro Empyreo, aut omnibus incorruptilibus: cum autem firmamentum secunda die factum, & diuidens aquas ab aquis, nuncupatur cælum, & supra cælos dicuntur esse aquæ, & in cælo aues degere, manifestum est, non pro æthereo cælo, sed pro aëreo vsurpari, cum æthereum cælum aues non pertingant, & aquæ non possint supra cælos locari. Ponitur autem aliquando nomen cælum in plurali, etiamsi vnum tantum corpus significet, iuxta Hebræicam phrasim, quia hoc nomen in lingua Hebræa singulari caret. Diciturque hoc firmamentum, & cælum, eodem secundo die, quo factum est, aquas diuississe, vel quia simul aquæ, seu nubes in media regione aëris, à Deo collocatæ sunt, pro similibus generandis, vel quia statim eleuati sunt aliqui vapores, & in nubes condensati: non enim sufficit, ad veritatem Scripturæ asserentis, firmamentum diuidere aquas ab aquis (vt putauit Pater Pereira supra) futuras esse postea aquas in regione aërea, quas firmamentum diuideret à terrestribus.

Ex quibus iam constat ad argumenta prioris sententiæ, & in primis Patres ibi relati, iuxta ea, quæ diximus, cum pluribus Patribus, & Doctoribus, de acceptionibus firmamenti, & cæli explicari optimè possunt, vt legenti constabit. Ex eisdem etiam perspicuè constat, verus, & germanus sensus locorum sacræ Scripturæ, in quibus cælum, & firmamentum manifestè accipiuntur aliquando pro incorruptibili sphaera, vna, vel pluribus; nonnunquam verò pro sphaera, aut regione aëris, præsertim infima, vt in superioribus ostendimus. Fatemur ergo, in Scriptura aquarum nomine veras, & elementares aquas intelligi: inficiamur tamen eas esse supra cælum æthereum, sed supra aërem tantum, supra infimam scilicet aëris regionem, vt explicatum est. Quæ verò addit doctissimus Pater Molina, & falsa sunt, & supra à nobis refutata.

QVÆSTIO VIII.

*An cælestia corpora moueantur à propria forma substantiali,
vel ab intelligentia.*

PRæsupponit quæstio moueri cælestia corpora motu circulari, quod manifestum est ex motu stellarum, quæ eis insident, quas moueri videmus, seruata semper eadem distantia inter sese, quod constat non posse fieri, nisi corpus ipsum cæleste, cui affixæ sunt, motu circulari euolueretur. Quod enim immoto cælo non moueantur, vt quidam decepti crediderunt, hac ratione conuincitur: si stella mouetur immoto orbe, vel mouetur intra proprium orbem, aut superficiem eius: sed ex utroque sequitur apertè dari vacuum: ergo. Probatum minor, quia si intra proprium orbem mouetur, necesse est, vnum locum relinquere, & ad alterum se transferre per motum. Constat verò, non dari corpus aliud, à quo relictus locus repleatur: permanebit igitur vacuum. Et pariter, si moueatur per superficiem proprii orbis: nam inter illam, & superficiem alterius orbis immediati permanebit vacuum spatium, per quod mouetur, cum nec detur corpus, à quo repleatur.

Quo præsupposito, in dubium reuocat, an moueatur cælum virtute formæ substantialis propriæ, tanquam principij efficientis intrinseci, vel solum ab intelligentia, tanquam à principio externo: & quod priori modo moueatur, sicut viuientia effectiue à propria anima mouentur, docuerunt nonnulli, quos Diuus Bonauentura in 2. distinct. 14. artic. 3. quæst. 2. retulit, & sequutus est Albertus Saxoniz 8. libro Physicorum, quæst. vltima, cui principio intrinseco alij ex antiquioribus philosophis à Conimbricensibus citati 1. libro de cælo, cap. 15. quæst. 5. artic. 2. atque etiam Vallesius controuersia 11. ad tyrones post medium, addiderunt intelligentiam, ita vt, vel motus idem, partim ab interno principio effectiuo, partim ab externo procederet, vel certè motus vnus à dextra ad læuam ab intelligentia, alter verò à læua ad dexteram à propria formâ, vt asseruerunt alij. Probatum primò, quia si forma cælestis non præstat efficientiam ad motum; ergo nullum concursum præstare potest, & sic erit otiosa, & ex consequenti frustra eidem corpori concessa. Probatum sequela prior, quia præter actiuum concursum, solum potest præstare passiuum; nam ad motum, nec finalem, nec formalem, præstare manifestum est. Sed passiuum concursum sola materia præstat, cum sit materialis causæ proprius: ergo nullum præstabit forma. Probat Vallesius secundò, quia corpora grauia, & leuia ignobiliora sūt cælestibus: sed valdè probabile est, moueri à propriis formis, tanquam à principiis efficientibus internis: ergo

probabilius erit, hoc idem orbibus cælestibus esse concedendum, præsertim apud Aristotelem, qui intelligentias veras eorum formas esse, videtur docuisse.

Opposita sententia, quod cælestia corpora non moueantur à principio interno effectiuo, sed ab externo, duntaxat, quod est Angelus, seu intelligētia, communis est in vtraque Schola, Theologica, ac Philosophica; quantum ad vtranque partem, vt optime adnotauit Pereira noster, lib. 1. suæ Philosophiæ, cap. 1. & lib. 2. in Genesim, quæst. 6. asserens, quasi per manus traditam fuisse inter antiquos Philosophos, & postea à Theologis acceptam, quod certè magnum est veritatis argumentum, præsertim eius rei, quæ non potest euidenti argumento conuinci. Eam enim tenuit in primis Diuus Thomas, quæst. 6. de potentiâ, articulo 3. & 1. parte, quæstione 70. articulo 3. D. Bonau. in 2. dist. 14. art. 3. quæst. 2. Scotus ibidem, quæst. 1. Durand. quæst. 2. Ægidius quæst. 5. Albertus Magnus artic. 6. & 12. Metaphysicæ, tractatu 2. cap. 10. Capreolus in 1. disputatione 9. quæst. 1. artic. 3. Ferrariensis 3. contra Gentes, cap. 46. Sorus 2. libro Physicorum, quæst. 11. ibidem, Pater Toletus, & Patres Conimbricenses 2. libro de cælo, cap. 5. quæst. 5. Pater Suar. tomo 1. Metaphysicæ, disputatione 18. Sectione 3. numero 3. Iuxta quam duo asserimus. Primum est, non esse possibilem naturaliter potentiam, aut formam intrinsecam, à qua cælum effectiuè se moueat, quod probauit D. Thomas 3. contra Gentes, cap. 23. ratione 4. hoc argumento. Motus localis non potest emanare à forma, tanquam à principio efficiente, nisi terminus, per talem motum per se comparatus, sit debitus formæ eius, vel certè eidem corpori, ratione talis formæ, vt euidenti inductione probari potest, per singulos motus locales elementorum, & aliorum corporum discurrente, & ratio id ostendit, quia inclinatio actiua in motum, speciem capit à termino naturaliter debito, tanquam à proprio actu, per quem perficitur: sed constat, nullam præsentiam, vel modum eius, quem potest cælum acquirere per motum, esse ei debitum ratione suæ formæ satis perfectè per eam, quam habet supra omnia alia corpora, & ideò nullam aliam desiderantem, cum omnes sint eiusdem omninò rationis: ergo non potest esse motus cælo naturalis, ratione suæ formæ, tanquam principio efficiente eius: sed non potest naturaliter dari potentia intrinseca ad motum, si is non sit naturaliter debitus mobili: ergo non est possibilis naturaliter talis potentia intrinseca cælo. Neque fit satis argumento si dicatur, non esse cælo motum debitum ratione termini, sed vt eo medio fiat proximum inferioribus corporibus, vt ita approximatum possit influxum habere circa illa, & ea perficere, atque etiam se ipsum, id quantum virtutes eius per exercitium suorum actuum perficiuntur.

ciuntur. Hoc, inquam, non satisfacit, quia potentia motiua localis solum potest respicere per se præsentiam in loco, vel spatio loci, & solum per eam perfici, quemadmodum potentia calefactiua solum calorem, & ideo solum ordinatur per se ad calefactionem: cæteri vero motus, vel actiones, & earum termini extra rationem eius sunt, & per accidens ad illam se habent: ergo cum non possit esse debita cælo alia præsentia localis, erit impossibile dari potentiam ad illam cælo intrinsecam; cum hæc nihil præter præsentiam localem secundum se respiciat. Nam quod corpus localiter motum fiat præsens his, aut illis temporibus, & quod præsens possit alterare, corrumpere, vel generare, per accidens omnino est, respectu eiusdem localis motus, aut motiue potentiæ, quæ ex hoc nihil præter variatur, & per se solum ordinatur ad perficiendum proprium corpus, cui concessa, & debita est. Est enim motus ex Aristotele 3. libro Physicorum textu 17. actus mobilis, prout mobile existit, id est, qui solum per se ordinatur ad perficiendum corpus, in ordine ad proprium terminum. Ergo idem est, non esse talem terminum per se potentiæ debitum, aut corpori, & non esse possibilem talem motum, aut potentiam motiuam ad eum acquirendum.

Probatur tandem idem assertum, quia impossibile est, corpus esse violenter in loco sibi naturaliter debito, cum sit naturæ eius consentaneus: sed id sequitur in cælo, si ei concedatur virtus, à qua effectiue moveatur: ergo contradictionem implicat dari, vel ab ea moueri. Probatur minor, quia cum talis virtus, & motus ab ea eliciendus sit naturalis; eo ipso, quod ab ea cessauerit, permanserit in eodem loco violenter, cum permaneat contra impetum propriæ inclinationis: erit ergo in statu violento, quantumdiu in eodem loco, aut in eadem præsentia sibi debita, aut modo illius permanserit: siquidem qualibet præsentia, aut modo illius dato, ab interno impetu aliam præsentiam, vel modum adipisci conatur: & ideo contra internum impetum ea carer, ac proinde cum violentia. Et vrgeo argumentum hoc modo: Repugnat dari naturalem inclinationem ad actum, vel motum, nisi respectu alicuius formæ determinatæ, vel termini per eum comparandi, cum motus ex propria essentia sit fieri alicuius termini: sed motus circularis cæli non tendit in aliquem determinatum terminum, vel præsentiam, quia cælum in nullam determinatam inclinatur, nec in vllâ quiescit, sed solum postulat supremam, respectu omnium corporum, quam constat habere, etiamsi non moveatur, & quam habuit in primo instanti, in quo conditum est à Deo, in quo non mouebatur: ergo repugnat dari naturalem inclinationem effectiuam in cælo ad motum.

Secundum assertum; orbes cælestes à forma extrinseca mouen-

tur, nempe ab intelligentiis : sic vnanimiter omnes citati suprâ, ex quibus Diuus Thomas opusculo 10. artic. 3. & opusculo 11. articulo 2. docet esse omnino certam sententiam, & Physicis rationibus demonstratam; & de potentia, quæstione 6. articulo 3. inquit, fidei sententiam esse, quod substantiæ separatz, siue Angeli, moueant corpora cælestia. Bonauentura suprâ vocat sententiam fidei consentaneam, illam statuit Aristoteles 8. Physicorum, cap. 6. textu 12. & libro 12. Metaphysicæ, capite 8. textu 43. Plato 1. de legibus, cum reliquis ferme omnibus vtriusque Scholæ; qui eam confirmarunt, ex ordine inter res creatas constituto, qui in eo maximè positus est, quod inferiora per superiora in propriis functionibus regantur, & corporalis creatura coniungatur cum spiritali, atque adeo, sicut in paruo mundo, homine videlicet, corpus per spiritum gubernatur, simili modo in maiori mundo contingat. Quæ ratio probata est sacris etiam Doctoribus, ex quibus ea vtuntur D. Dionysius cap. 5. cælestis Hierarchiæ, & de diuinis nominibus, capite octauo, D. Gregorius quarto Dialogorum, capite 4. D. Augustinus tertio de Trinitate, capite quarto cum aliis. Idem etiam Philosophi sibi habuerunt persuasum. Quia cum cælestium orbium motus, mira æquabilitate, & constantia perfici obseruarent, non nisi ab intelligentiis à materiæ concre-tione semotis, circunuolui corpora cælestia, consulto iudicarunt: immò hinc illi aditum ad intelligētiarum notitiam inuenēre, qui ferè omni ex parte præclusus illis esset, solis principiis philosophicis ducti, si nullam haberent efficientiam. circa motus cælestium orbium, cum nec ex causa, vel aliis effectibus, in Angelorum notitiam possent ritè peruenire, nec alias constaret connexio rerum sensibilium seu intelligibilium, seu mundi corporei, & incorporei, quam fateri necesse est.

Quod etiam confirmatur ex illo Iob 9. capite : *Sub quo curuantur, qui portant orbem.* Iuxta quorundam interpretationem, qui id de Angelis intelligunt suo motu cælestem mundum continuò circunuoluentibus. Et de eisdem non incongruè intelligi potest illud eiusdem Iob capite 26. *Columna calis contremiscens, & pauent ad nutum eius.* Et aliud ex capite 38. *Cum me laudarent astra matutina, & iubilarent omnes filij Dei.* Hi denique videntur esse virtutes cælorum, quæ in die iudicii mouebuntur iuxta Matth. 24. Subiungo vltimam, & efficacem rationem hoc modo: Corpora cælestia motu circulari petperuò euoluuntur, vt in principio quæstionis ex communi consensu, & manifesta experientia stabilitum reliquimus : sed non mouentur à principio sibi intrinseco, vt etiam in primo asserto efficacibus rationibus probatum manet. Igitur euident est, moueri à principio extrinseco, seu assistente forma; siquidem nullum est medium inter principium intrinse-

intrinsecum, & extrinsecum. At hoc principium extrinsecum, motus cæli nullum aliud congruenter potest esse, nisi Angelus. Ergo ipse est principium efficiens cælestis motus. Hæc virtus minor, in qua est difficultas, probatur; quia hoc principium nequit esse corporeum, cum nullum eiusmodi naturaliter sit supra cælum, neque in ipso cælo esse queat, sine penetratione viribus naturæ impossibili, siquidem tam ipsum, quam cælum propriis quantitatis dimensionibus præditi foret. A corpore verò aliquo sublunari cælum localiter moueri, & merum figmentum à nullo vnquam excogitatum, & planè absurdum esse quis non videat? Superest ergo, vt à substantia aliqua perfecta à materia, & corpore immuni cælum circumagatur. Hæc autem non est Deus ipse se solo, quandoquidem hoc per Angelos præstare optimè potest, sicut innumera alia munia, & officia per suas creaturas, ipso cum illis concurrente, administrat. Quòd naturis rerum, ordini, & connexioni vniuersi valdè congruit: per Angelos ergo id præstat, cum non supersit alia substantia spiritalis completa ad id munus exequendum. Angelos verò posse propria virtute mouere localiter cælos, in confesso apud omnes est. Sunt enim insignis virtutis, & efficacitatis, & quibus, vt potè longè perfectioribus, subduntur omnia corpora, saltem quo ad motum localem. Concludamus igitur, cælestes orbes à formis extrinsecè assistentibus, seu ab intelligentiis localiter moueri.

Superest, vt argumenta prioris sententiæ diluamus. Ad primum negamus, formam cæli esse frustra, etiamsi non sit principium efficiens localis motus, plura enim alia munera habet in genere causæ formalis, & efficientis etiam. Constituit nanque simul cum materia compositum cæleste, & est principium efficiens saltem instrumentale naturalium passionum, & proprietatum cæli, nec non mediis propriis potentiis, & qualitatibus actiuis effectiue concurrat ad plures effectus, qui cælo attribuantur.

Ad secundum concesso antecedenti, neganda est consequentia. Non enim negamus corporibus cælestibus potentiam internam effectiuam motus localis, propter eorum imperfectionem; sed quia naturaliter non possunt non esse in proprio loco; neque ab illo extrahi queunt. Virtus autem motiua maximè in non viuientibus, solum potest esse ad acquirendum proprium locum, & alias nunquam esset cælum in statu naturali, sed in violento, vt supra probauimus: necesse ergo est, vt cælestia corpora tantum moueantur ab intelligentiis, quas formas solum extrinsecas, & cælo assistentes posuit Aristoteles, vt legenti constabit. Cum quo tamen stat, quòd naturaliter moueantur, quia vt partes

tur, nempe ab intelligentiis : sic vnanimiter omnes citati suprà, ex quibus Diuus Thomas opusculo 10. artic. 3. & opusculo 11. articulo 2. docet esse omnino certam sententiam, & Phycis rationibus demonstratam; & de potentia, quæstione 6. articulo 3. inquit, fidei sententiam esse, quod substantiæ separaræ, siue Angeli, moueant corpora cælestia. Bonauentura suprà vocat sententiam fidei consentaneam, illam statuit Aristoteles 8. Physicorum, cap. 6. textu § 2. & libro 12. Metaphysicæ, capite 8. textu 43. Plato 1. de legibus, cum reliquis ferè omnibus vtriusque Scholæ, qui eam confirmarunt, ex ordine inter res creatas constituto, qui in eo maximè positus est, quod inferiora per superiora in propriis fuctionibus regantur, & corporalis creatura coniungatur cum spiritali, atque adeò, sicut in paruo mundo, homine videlicet, corpus per spiritum gubernatur, simili modo in maiori mundo contingat. Quæ ratio probata est sacris etiam Doctoribus, ex quibus ea vtuntur D. Dionysius cap. 5. cælestis Hierarchiæ, & de diuinis nominibus, capite octauo, D. Gregorius quarto Dialogorum, capite 4. D. Augustinus tertio de Trinitate, capite quarto cum aliis. Idem etiam Philosophi sibi habuerunt persuasum. Quia cum cælestium orbium motus, mira æquabilitate, & constantia perfici obseruarent, non nisi ab intelligentiis à materiæ concre-tione semotis, circunuolui corpora cælestia, consultò iudicarunt: immò hinc illi aditum ad intelligentiarum notitiam inuenire, qui ferè omni ex parte præclusus illis esset, solis principiis philosophicis ducti, si nullam haberent efficientiam. circa motus cælestium orbium, cum nec ex causa, vel aliis effectibus, in Angelorum notitiam possent ritè peruenire, nec alias constaret connectio rerum sensibilium, seu intelligibilium, seu mundi corporei, & incorporei, quam fateri necesse est.

Quod etiam confirmatur ex illo Iob 9. capite : *Sub quo curuantur, qui portant orbem.* Iuxta quorundam interpretationem, qui id de Angelis intelligunt suo motu cælestem mundum continuò circunuoluentibus. Et de eisdem non incongruè intelligi potest illud eiusdem Iob capite 26. *Columna cali contremiscunt, & paueant ad nutum eius.* Et aliud ex capite 38. *Cùm mo laudarent astra matutina, & iubilarent omnes filij Dei.* Hi denique videntur esse virtutes cælorum, quæ in die iudicii mouebuntur iuxta Matth. 24. Subiungo vltimam, & efficacem rationem hoc modo: Corpora cælestia motu circulari perpetuò euoluuntur, vt in principio quæstionis ex communi consensu, & manifesta experientia stabilitum reliquimus : sed non mouentur à principio sibi intrinseco, vt etiam in primo asserto efficacibus rationibus probatum manet. Igitur euidens est, moueri à principio extrinseco, seu assistente forma; siquidem nullum est medium inter principium intrinse-

intrinsecum, & extrinsecum. At hoc principium extrinsecum motus cæli nullum aliud congruenter potest esse, nisi Angelus. Ergo ipse est principium efficiens cælestis motus. Hæc ultima minor, in qua est difficultas, probatur; quia hoc principium nequit esse corporeum, cum nullum eiusmodi naturaliter sit supra cælum, neque in ipso cælo esse queat, sine penetratione viribus naturæ impossibili, siquidem tam ipsum, quam cælum propriis quantitatis dimensionibus præditum foret. A corpore vero aliquo sublunari cælum localiter moueri, & merum figmentum à nullo vnquam excogitatum, & planè absurdum esse quis non videat? Superest ergo, vt à substantia aliqua perfecta à materia, & corpore immuni cælum circumagatur. Hæc autem non est Deus ipse se solo, quandoquidem hoc per Angelos præstare optimè potest, sicut innumera alia munia, & officia per suas creaturas, ipso cum illis concurrente, administrat. Quòd naturis rerum, ordini, & connexioni vniuersi valdè congruit: per Angelos ergo id præstat, cum non supersit alia substantia spiritualis completa ad id munus exequendum. Angelos verò posse propria virtute mouere localiter cælos, in confesso apud omnes est. Sunt enim insignis virtutis, & efficacitatis, & quibus, vtpote longè perfectioribus, subduntur omnia corpora, saltem quo ad motum localem. Concludamus igitur, cælestes orbes à formis extrinsecè assistentibus, seu ab intelligentiis localiter moueri.

Superest, vt argumenta prioris sententiæ diluamus. Ad primum negamus, formam cæli esse frustra, etiamsi non sit principium efficiens localis motus, plura enim alia munera habet in genere causæ formalis, & efficientis etiam. Constituit nanque simul cum materia compositum cæleste, & est principium efficiens saltem instrumentale naturalium passionum, & proprietatum cæli, nec non mediis propriis potentiis, & qualitatibus actiuis effectiuè concurrat ad plures effectus, qui cælo attribuuntur.

Ad secundum concesso antecedenti, neganda est consequentia. Non enim negamus corporibus cælestibus potentiam internam effectiuam motus localis, propter eorum imperfectionem; sed quia naturaliter non possunt non esse in proprio loco; neque ab illo extrahi queunt. Virtus autem motiua maximè in non viuentibus, solum potest esse ad acquirendum proprium locum, & aliàs nunquam esset cælum in statu naturali, sed in violento, vt supra probauimus: necesse ergo est, vt cælestia corpora tantum moueantur ab intelligentiis, quas formas solum extrinsecas, & cælo assistentes posuit Aristoteles, vt legenti constabit. Cum quo tamen stat, quòd naturaliter moueantur, quia vt partes

tur, nempe ab intelligentiis : sic vnanimiter omnes citati suprâ, ex quibus Diuus Thomas opusculo 10. artic. 3. & opusculo 11. articulo 2. docet esse omnino certam sententiam, & Phÿsicis rationibus demonstratam; & de potentia, quæstione 6.articulo 3. inquit, fidei sententiam esse, quod substantiæ separatæ, siue Angeli, moueant corpora cælestia. Bonauentura suprâ vocat sententiam fidei consentaneam, illam statuit Aristoteles 8. Phÿsicorum, cap. 6. textu 5. 2. & libro 12. Metaphysicæ, capite 8. textu 43. Plato 1. de legibus, cum reliquis fermè cõntribus vtriusque Scholæ; qui eam confirmarunt, ex ordine inter res creatas constituto, qui in eo maximè positus est, quod inferiora per superiora in propriis fuctionibus regantur, & corporalis creatura coniungatur cum spiritali, atque adeo, sicut in paruo mundo, homine videlicet, corpus per spiritum gubernatur, simili modo in maiori mundo contingat. Quæ ratio probata est sacris etiam Doctoribus, ex quibus ea vtuntur D. Dionysius cap. 5. cælestis Hierarchiæ, & de diuinis nominibus, capite octauo, D. Gregorius quarto Dialogorum, capite 4. D. Augustinus tertio de Trinitate, capite quarto cum aliis. Idem etiam Philosophi sibi habuerunt persuasum. Quia cum cælestium orbium motus, mira æquabilitate, & constantia perfici obseruarent, non nisi ab intelligentiis à materiæ concrectione semotis, circunvolui corpora cælestia, consulto iudicarunt: immò hinc illi aditum ad intelligentiarum notitiam inuenire, qui ferè omni ex parte præclusus illis esset, solis principiis philosophicis ducti, si nullam haberent efficientiam. circa motus cælestium orbium, cum nec ex causa, vel aliis effectibus, in Angelorum notitiam possent ritè peruenire, nec alias constaret connectio rerum sensibilium, seu intelligibilium, seu mundi corporei, & incorporei, quam fateri necesse est.

Quod etiam confirmatur ex illo Iob 9. capite: *Sub quo curuantur, qui portant orbem.* Iuxta quorundam interpretationem, qui id de Angelis intelligunt suo motu cælestem mundum continuo circunvoluentibus. Et de eisdem non incongruè intelligi potest illud eiusdem Iob capite 26. *Columna cali contremiscunt, & pauent ad nutum eius.* Et aliud ex capite 38. *Cum me laudarent astra matutina, & iubilarent omnes filij Dei.* Hi denique videntur esse virtutes cælorum, quæ in die iudicii mouebuntur iuxta Matth. 24. Subiungo vltimam, & efficacem rationem hoc modo: Corpora cælestia motu circulari perpetuo euoluuntur, vt in principio quæstionis ex communi consensu, & manifesta experientia stabilitum reliquimus: sed non mouentur à principio sibi intrinseco, vt etiam in primo asserto efficacibus rationibus probatum manet. Igitur euident est, moueri à principio extrinseco, seu assistente forma; siquidem nullum est medium inter principium intrinse-

intrinsecum, & extrinsecum. At hoc principium extrinsecum motus cæli nullum aliud congruenter potest esse, nisi Angelus. Ergo ipse est principium efficiens cælestis motus. Hæc vitima minor, in qua est difficultas, probatur; quia hoc principium nequit esse corporeum, cum nullum eiusmodi naturaliter sit supra cælum, neque in ipso cælo esse queat, sine penetratione viribus naturæ impossibili, siquidem tam ipsum, quàm cælum propriis quantitatis dimensionibus præditum foret. A corpore verò aliquo sublunari cælum localiter moueri, & merum figmentum à nullo vnquam excogitatum, & planè absurdum esse quis non videat? Superest ergo, vt à substantia aliqua perfecta à materia, & corpore immuni cælum circumagatur. Hæc autem non est Deus ipse se solo, quandoquidem hoc per Angelos præstare optimè potest, sicut innumera alia munia, & officia per suas creaturas, ipso cum illis concurrente, administrat. Quòd naturis rerum, ordini, & connexioni vniuersi valdè congruit: per Angelos ergo id præstat, cum non supersit alia substantia spiritalis completa ad id munus exequendum. Angelos verò posse propria virtute mouere localiter cælos, in confesso apud omnes est. Sunt enim insignis virtutis, & efficacitatis, & quibus, vtpote longè perfectioribus, subduntur omnia corpora, saltem quo ad motum localem. Concludamus igitur, cælestes orbes à formis extrinsecè assistentibus, seu ab intelligentiis localiter moueri.

Superest, vt argumenta prioris sententiæ diluamus. Ad primum negamus, formam cæli esse frustra, etiamsi non sit principium efficiens localis motus, plura enim alia munera habet in genere causæ formalis, & efficientis etiam. Constituit nanque simul cum materia compositum cæleste, & est principium efficiens saltem instrumentale naturalium passionum, & proprietatum cæli, nec non mediis propriis potentiis, & qualitatibus actiuis effectiuè concurrat ad plures effectus, qui cælo attribuantur.

Ad secundum concessio antecedenti, neganda est consequentia. Non enim negamus corporibus cælestibus potentiam internam effectiuam motus localis, propter eorum imperfectionem; sed quia naturaliter non possunt non esse in proprio loco; neque ab illo extrahi queunt. Virtus autem motiua maximè in non viuentibus, solùm potest esse ad acquirendum proprium locum, & aliàs nunquam esset cælum in statu naturali, sed in violento, vt supra probauimus: necesse ergo est, vt cælestia corpora tantùm moueantur ab intelligentiis, quas formas solùm extrinsecas, & cælo assistentes posuit Aristoteles, vt legenti constabit. Cum quo tamen stat, quòd naturaliter moueantur, quia vt partes

tur, nempe ab intelligentiis : sic vnanimiter omnes citati suprà, ex quibus Diuus Thomas opusculo 10. artic. 3. & opusculo 11. articulo 2. docet esse omnino certam sententiam, & Physicis rationibus demonstratam; & de potentia, quæstione 6. articulo 3. inquit, fidei sententiam esse, quod substantiæ separatz, siue Angeli, moueant corpora cælestia. Bonauentura suprà vocat sententiam fidei consentaneam, illam statuit Aristoteles 8. Physicorum, cap. 6. textu 3. 2. & libro 12. Metaphysicæ, capite 8. textu 43. Plato 1. de legibus, cum reliquis fermè omnibus vtriusque Scholæ, qui eam confirmant, ex ordine inter res creatas constituto, qui in eo maximè positus est, quod inferiora per superiora in propriis functionibus regantur, & corporalis creatura coniungatur cum spiritali, atque adeò, sicut in paruo mundo, homine videlicet, corpus per spiritum gubernatur, simili modo in maiori mundo contingat. Quæ ratio probata est sacris etiam Doctoribus, ex quibus ea vtuntur D. Dionysius cap. 5. cælestis Hierarchiæ, & de diuinis nominibus, capite octauo, D. Gregorius quarto Dialogorum, capite 4. D. Augustinus tertio de Trinitate, capite quarto cum aliis. Idem etiam Philosophi sibi habuerunt persuasum. Quia cum cælestium orbium motus, mira æquabilitate, & constantia perfici obseruarent, non nisi ab intelligentiis à materiæ concre-tione semotis, circunuolui corpora cælestia, consulto iudicantur: immò hinc illi aditum ad intelligētiarum noticiam inuenēre, qui ferè omni ex parte præclusus illis esset, solis principiis philosophicis ducti, si nullam haberent efficientiam. circa motus cælestium orbium, cum nec ex causa, vel aliis effectibus, in Angelorum noticiam possent ritè peruenire, nec alias constaret connectio rerum sensibilium, seu intelligibilium, seu mundi corporei, & incorporei, quam fateri necesse est.

Quod etiam confirmatur ex illo Iob 9. capite : *Sub quo curuantur, qui portant orbem.* Iuxta quorundam interpretationem, qui id de Angelis intelligunt suo motu cælestem mundum continuò circunuoluentibus. Et de eisdem non incongruè intelligi potest illud eiusdem Iob capite 26. *Columna cali contremiscunt, & paueant ad nutum eius.* Et aliud ex capite 38. *Cum me laudarent astra matutina, & iubilarent omnes filij Dei.* Hi denique videntur esse virtutes cælorum, quæ in die iudicii mouebuntur iuxta Matth. 24. Subiungo vltimam, & efficacem rationem hoc modo: Corpora cælestia motu circulari perpetuò euoluuntur, vt in principio quæstionis ex communi consensu, & manifesta experientia stabilitum reliquimus : sed non mouentur à principio sibi inherens, vt etiam in primo asserto efficacibus rationibus probatum manet. Igitur euident est, moueri à principio extrinseco, seu assistente forma; siquidem nullum est medium inter principium intrinse-

intrinsecum, & extrinsecum. At hoc principium extrinsecum, motus cæli nullum aliud congruenter potest esse, nisi Angelus. Ergo ipse est principium efficiens cælestis motus. Hæc vitima minor, in qua est difficultas, probatur; quia hoc principium nequit esse corporeum, cum nullum eiusmodi naturaliter sit supra cælum, neque in ipso cælo esse queat, sine penetratione viribus naturæ impossibili, siquidem tam ipsum, quam cælum propriis quantitatis dimensionibus præditum foret. A corpore verò aliquo sublunari cælum localiter moueri, & merum figmentum à nullo vnquam excogitatum, & planè absurdum esse quis non videat? Superest ergo, vt à substantia aliqua perfecta à materia, & corpore immuni cælum circumagatur. Hæc autem non est Deus ipse se solo, quandoquidem hoc per Angelos præstare optimè potest, sicut innumera alia munia, & officia per suas creaturas, ipso cum illis concurrente, administrat. Quòd naturis rerum, ordini, & connexioni vniuersi valdè congruit: per Angelos ergo id præstat, cum non supersit alia substantia spiritalis completa ad id munus exequendum. Angelos verò posse propria virtute mouere localiter cælos, in confesso apud omnes est. Sunt enim insignis virtutis, & efficacitatis, & quibus, vtpote longè perfectioribus, subduntur omnia corpora, saltem quo ad motum localem. Concludamus igitur, cælestes orbes à formis extrinsecè assistentibus, seu ab intelligentiis localiter moueri.

Superest, vt argumenta prioris sententiæ diluamus. Ad primum negamus, formam cæli esse frustra, etiamsi non sit principium efficiens localis motus, plura enim alia munera habet in genete causæ formalis, & efficientis etiam. Constituit nanque simul cum materia compositum cæleste, & est principium efficiens saltem instrumentale naturalium passionum, & proprietatum cæli, nec non mediis propriis potentiis, & qualitatibus actiuis effectiuè concurrat ad plures effectus, qui cælo attribuantur.

Ad secundum concessio antecedenti, neganda est consequentia. Non enim negamus corporibus cælestibus potentiam internam effectiuam motus localis, propter eorum imperfectionem; sed quia naturaliter non possunt non esse in proprio loco; neque ab illo extrahi queunt. Virtus autem motiua maximè in non viuentibus, solùm potest esse ad acquirendum proprium locum, & aliàs nunquam esset cælum in statu naturali, sed in violento, vt suprà probauimus: necesse ergo est, vt cælestia corpora tantùm moueantur ab intelligentiis, quas formas solùm extrinsecas, & cælo assistentes posuit Aristoteles, vt legenti constabit. Cum quo tamen stat, quòd naturaliter moueantur, quia vt partes

probabilius erit, hoc idem orbibus cælestibus esse concedendum, præsertim apud Aristotelem, qui intelligentias veras eorum formas esse, videtur docuisse.

Opposita sententia, quod cælestia corpora non moueantur à principio interno effectiuo, sed ab externo, duntaxat, quod est Angelus, seu intelligētia, communis est in vtraque Schola, Theologica, ac Philosophica; quantum ad vtranque partem, vt optimè adnotauit Pereira noster, lib. 1. suæ Philosophiæ, cap. 1. & lib. 2. in Genesim, quæst. 6. asserens, quasi per manus traditam fuisse inter antiquos Philosophos, & postea à Theologis acceptam, quod certè magnum est veritatis argumentum, præsertim eius rei, quæ non potest euidenti argumento conuinci. Eam enim tenuit in primis Diuus Thomas, quæst. 6. de potentiâ, articulo 3. & 1. parte, quæstione 70. articulo 3. D. Bonau. in 2. dist. 14. art. 3. quæst. 2. Scotus ibidem, quæst. 1. Durand. quæst. 2. Ægidius quæst. 5. Albertus Magnus artic. 6. & 12. Metaphysicæ, tractatu 2. cap. 10. Capreolus in 2. disputatione 9. quæst. 1. artic. 3. Ferrariensis 3. contra Gentes, cap. 46. Sotus 2. libro Physicorum, quæst. 11. ibidem, Pater Toletus, & Patres Conimbricenses 2. libro de cælo, cap. 5. quæst. 5. Pater Suar. tomo 1. Metaphysicæ, disputatione 18. Sectione 3. numero 36. Iuxta quam duo asserimus. Primum est, non esse possibilem naturaliter potentiam, aut formam intrinsecam, à qua cælum effectiue se inoueat, quod probauit D. Thomas 3. contra Gentes, cap. 23. ratione 4. hoc argumento. Motus localis non potest emanare à forma, tanquam à principio efficiente, nisi terminus, per talem motum per se comparatus, sit debitus formæ eius, vel certè eidem corpori, ratione talis formæ, vt euidenti inductione probari potest, per singulos motus locales elementorum, & aliorum corporum discurrente, & ratio id ostendit, quia inclinatio actiua in motum, speciem capit à termino naturaliter debito, tanquam à proprio actu, per quem perficitur: sed constat, nullam præsentiam, vel modum eius, quem potest cælum acquirere per motum, esse ei debitum ratione suæ formæ satis perfectè per eam, quam habet supra omnia alia corpora; & ideo nullam aliam desiderantem, cum omnes sint eiusdem omnino rationis: ergo non potest esse motus cælo naturalis, ratione suæ formæ, tanquam principio efficiente eius: sed non potest naturaliter dari potentia intrinseca ad motum, si is non sit naturaliter debitus mobili: ergo non est possibilis naturaliter talis potentia intrinseca cælo. Neque fit satis argumento si dicatur, non esse cælo motum debitum ratione termini, sed vt eo medio fiat proximum inferioribus corporibus, vt ita approximatum possit influxum habere circa illa, & ea perficere, atque etiam seipsum, in quantum virtutes eius per exercitium suorum actuum perficiuntur.

ciuntur. Hoc, inquam, non satisfacit, quia potentia motiua localis solum potest respicere per se præsentiam in loco, vel spatio loci, & solum per eam perfici, quemadmodum potentia calefactiua solum calorem, & ideo solum ordinatur per se ad calefactionem: cæteri vero motus, vel actiones, & earum termini extra rationem eius sunt, & per accidens ad illam se habent: ergo cum non possit esse debita cælo alia præsentia, localis, erit impossibile dari potentiam ad illam cælo intrinsecam; cum hæc nihil præter præsentiam localem secundum se respiciat. Nam quod corpus localiter motum fiat præsens his, aut illis temporibus, & quod præsens possit alterare, corrumpere, vel generare, per accidens omnino est, respectu eiusdem localis motus, aut motiue potentiæ, quæ ex hoc nihil prorsus variatur, & per se solum ordinatur ad perficiendum proprium corpus, cui concessa, & debita est. Est enim motus ex Aristotele 3. libro Physicorum textu 17. actus mobilis, prout mobile existit, id est, qui solum per se ordinatur ad perficiendum corpus, in ordine ad proprium terminum. Ergo idem est, non esse talem terminum per se potentiæ debitum, aut corpori, & non esse possibilem talem motum, aut potentiam motiuam ad eum acquirendum.

Probatur tandem idem assertum, quia impossibile est, corpus esse violenter in loco sibi naturaliter debito, cum sit naturæ eius consentaneus: sed id sequitur in cælo, si ei concedatur virtus, à qua effectiuè moueatur: ergo contradictionem implicat dari, vel ab ea moueri. Probatur minor, quia cum talis virtus, & motus ab ea eliciendus sit naturalis; eo ipso, quod ab ea cessauerit, permanebit in eodem loco violenter, cum permaneat contra impetum propriæ inclinationis: erit ergo in statu violento, quantumdiu in eodem loco, aut in eadem præsentia sibi debita, aut modo illius permanferit: siquidem qualibet præsentia, aut modo illius dato, ab interno impetu aliam præsentiam, vel modum adipisci conatur: & ideo contra internum impetum ea caret, ac proinde cum violentia. Et vrgeo argumentum hoc modo: Repugnat dari naturalem inclinationem ad actum, vel motum, nisi respectu alicuius formæ determinatæ, vel termini per eum comparandi, cum motus ex propria essentia sit fieri alicuius termini: sed motus circularis cæli non tendit in aliquem determinatum terminum, vel præsentiam, quia cælum in nullam determinatam inclinatur, nec in vllā quiescit, sed solum postulat supremam, respectu omnium corporum, quam constat habere, etiamsi non moueatur, & quam habuit in primo instanti, in quo conditum est à Deo, in quo non mouebatur: ergo repugnat dari naturalem inclinationem effectiuam in cælo ad motum.

Secundum assertum; orbes cælestes à forma extrinseca mouen-

tur, nempe ab intelligentiis : sic vnanimiter omnes citati suprà, ex quibus Diuus Thomas opusculo 10. artic. 3. & opusculo 11. articulo 2. docet esse omnino certam sententiam, & Phÿsicis rationibus demonstratam; & de potentia, quæstione 6.articulo 3. inquit, fidei sententiam esse, quòd substantiæ separatæ, siue Angeli, moueant corpora cælestia. Bonauentura suprà vocat sententiam fidei consentaneam, illam statuit Aristoteles 8. Phÿsicorum, cap. 6. textu 52. & libro 12. Metaphysicæ, capite 8. textu 43. Plato 1. de legibus, cum reliquis ferè cunctis vtriusque Scholæ, qui eam confirmant, ex ordine inter res creatas constituto, qui in eo maximè positus est, quòd inferiora per superiora in propriis functionibus regantur, & corporalis creatura coniungatur cum spiritali, atque adeò, sicut in paruo mundo, homine videlicet, corpus per spiritum gubernatur, simili modo in maiori mundo contingat. Quæ ratio probata est sacris etiam Doctoribus, ex quibus ea vtuntur D. Dionysius cap. 5. cælestis Hierarchiæ, & de diuinis nominibus, capite octauo, D. Gregorius quarto Dialogorum, capite 4. D. Augustinus tertio de Trinitate, capite quarto cum aliis. Idem etiam Philosophi sibi habuerunt persuasum. Quia cum cælestium orbium motus, mira æquabilitate, & constantia perfici obseruarent, non nisi ab intelligentiis à materiæ concretionem semotis, circunuolui corpora cælestia, consultò iudicarunt: immò hinc illi aditum ad intelligentiarum notitiam inueniẽre, qui ferè omni ex parte præclusus illis esset, solis principiis philosophicis ducti, si nullam haberent efficientiam, circa motus cælestium orbium, cum nec ex causa, vel aliis effectibus, in Angelorum notitiam possent ritè peruenire, nec alias constaret connectio rerum sensibilium, seu intelligibilium, seu mundi corporei, & incorporei, quam ferri necesse est.

Quod etiam confirmatur ex illo Iob 9. capite : *Sub quo curuantur, qui portant orbem.* Iuxta quorundam interpretationem, qui id de Angelis intelligunt suo motu cælestem mundum continuo circunuoluentibus. Et de eisdem non incongruè intelligi potest illud eiusdem Iob capite 26. *Columna cali contremiscunt, & pauent ad nutum eius.* Et aliud ex capite 38. *Cùm me laudarent astra matutina, & iubilarent omnes filij Dei.* Hi denique videntur esse virtutes cælorum, quæ in die iudicii mouebuntur iuxta Matth. 24. Subiungo vltimam, & efficacem rationem hoc modo: Corpora cælestia motu circulari perpetuò euoluuntur, vt in principio quæstionis ex communi consensu, & manifesta experientia stabilitum reliquimus : sed non mouentur à principio sibi intrinseco, vt etiam in primo asserto efficacibus rationibus probatum manet. Igitur euident est, moueri à principio extrinseco, seu assistente forma; siquidem nullum est medium inter principium intrinse-

intrinsecum, & extrinsecum. At hoc principium extrinsecum motus cæli nullum aliud congruenter potest esse, nisi Angelus. Ergo ipse est principium efficiens cælestis motus. Hæc vltima minor, in qua est difficultas, probatur; quia hoc principium nequit esse corporeum, cum nullum eiusmodi naturaliter sit supra cælum, neque in ipso cælo esse queat, sine penetratione viribus naturæ impossibili, siquidem tam ipsum, quam cælum propriis quantitatis dimensionibus præditum foret. A corpore verò aliquo sublunari cælum localiter moueri, & merum figmentum à nullo vnquam excogitatum, & planè absurdum esse quis non videat? Superest ergo, vt à substantia aliqua perfecta à materia, & corpore immuni cælum circumagatur. Hæc autem non est Deus ipse se solo, quandoquidem hoc per Angelos præstare optimè potest, sicut innumera alia munia, & officia per suas creaturas, ipso cum illis concurrente, administrat. Quòd naturis rerum, ordini, & connexioni vniuersi valde congruit: per Angelos ergo id præstat, cum non supersit alia substantia spiritalis completa ad id munus exequendum. Angelos verò posse propria virtute mouere localiter cælos, in confesso apud omnes est. Sunt enim insignis virtutis, & efficacitatis, & quibus, vt potè longè perfectioribus, subduntur omnia corpora, saltem quo ad motum localem. Concludamus igitur, cælestes orbes à formis extrinsecè assistentibus, seu ab intelligentiis localiter moueri.

Superest, vt argumenta prioris sententiæ diluamus. Ad primum negamus, formam cæli esse frustra, etiamsi non sit principium efficiens localis motus, plura enim alia munera habet in genere causæ formalis, & efficientis etiam. Constituit nanque simul cum materia compositum cæleste, & est principium efficiens saltem instrumentale naturalium passionum, & proprietatum cæli, nec non mediis propriis potentiis, & qualitatibus actiuis effectiue concurrat ad plures effectus, qui cælo attribuantur.

Ad secundum concesso antecedenti, neganda est consequentia. Non enim negamus corporibus cælestibus potentiam internam effectiuam motus localis, propter eorum imperfectionem; sed quia naturaliter non possunt non esse in proprio loco; neque ab illo extrahi queunt. Virtus autem motiua maximè in non viucentibus, solùm potest esse ad acquirendum proprium locum, & aliàs nunquam esset cælum in statu naturali, sed in violento, vt suprà probauimus: necesse ergo est, vt cælestia corpora tantùm moueantur ab intelligentiis, quas formas solùm extrinsecas, & cælo assistentes posuit Aristoteles, vt legenti constabit. Cum quo tamen stat, quòd naturaliter moueantur, quia vt partes

partes vniuersi naturaliter habent propensionem, vt à potentia naturali perfectioris ordinis in bonum inferiorem circunuoluuntur. Quam inferiorum gubernationem, & exteriorem executionem, sphaëris cælestibus Deus commisit, ipso cum ipsis concurrente, semper tamen internam earundem directionem sibi reseruauit. Quo sensu intelligitur illud Iob 33. *Quem constituit alium super terram aut quem posuit super orbem, quem fabricatus est, &c.* Et in eodem sensu loquitur Diuus Greg. ibi, & Boëtius lib. 4. de consolatione Philos. profa 4.

QVÆSTIO IX.

An quilibet orbis cælestis à propria intelligentia moueatur.

Quamuis præcedenti quæstione stabilitum sit, orbes cælestes ab intelligentiis moueri, adhuc sciscitandum relinquitur, an ab vna omnes, vel singuli à singulis ciantur, quod in præfenti examinandum proponimus.

Sed antequam in hac re varias proponamus sententias, nonnulla tanquam certa iam apud omnes præmittenda sunt, vt clariùs postea & inoffenso pede curramus. Primum statuendum est, Deum se solo non mouere aliquod cæleste corpus, quod vt certum supponunt omnes Doctor. communiter cum Bonauentura in 2. distinctione 14. articul. 4. quæstione 1. & D. Thoma opusculo 17. capite 12. in vniuersum asserente, nullum corpus moueri immediatè à solo Deo, quoad motus, qui facultati naturæ subduntur. Cuius ratio sumitur ex ordine diuinæ sapientiæ, & prouidentia, quem supra ex Patribus Gregorio, Dionysio, Augustino, & aliis ratum, & firmum esse diximus, vt scilicet ima à mediis, id est, corpora sublunaria à cælestibus, & media à summis, hoc est, cælestia ab Angelis moueantur. Sine fundamento autem ab hoc ordine primum mobile, aliudve corpus cæleste exciperetur; maximè cum altioris ordinis munera, qualia sunt quæ ad intellectum illustrandum & excitandum voluntatem spectant, ipsis Angelis, immò & hominibus Deus sæpè commiserit. Cum igitur possit Deus per Angelum primum mobile rotare, sicut Angelorum opera cæteras sphaëras circunuoluit, siquidem hoc non excedit virtutem angelicam, vt supra ex communi consensu diximus, sine vilo prorsus fundamento, immò planè contra rationem inficiabitur quis, motum primi mobilis ab Angelo provenire. Quapropter in hoc planè errauit Aristoteles existimans motorem primi mobilis specialem, & immediatum esse Deum, vt testatur Pletho. capite 2. libro de iis, quibus Aristoteles à Platone dissidet, Alexander, & Simplicius 8. Physicorum, Diuus Thomas 1. 2. Metaphysicæ ad textum 36. & alij, quos citant, &

tant, & sequuntur Patres Conimbricenses in 2. de cælo, capite 3. quæstione 6. artic. 2. & constat ex 8. Physicorum, capite ultimo, ubi docet, Deum in parte supremi globi, quæ velocius agitatur, insidere; quia scilicet eiusmodi motus ab eo efficitur. Præterea apud Aristotelem, primus motor est omnis mutationis expers, quod soli Deo conuenit: deinde 8. Physicorum ex motu primi orbis, primum, semper ætèrnumque motorem intulit, & 12. Metaphysicæ, capite 8. textu 45. inter intelligentias mouentes cælum, Deum recensuit. Non me latet, Auicenam, Bonauenturam, Aureolum, Scotum, Heruzum, & Ferrariensem, relatos à Conimbricensibus, maiori pietate, quàm probabilitate ductos asseruisse, Aristotelem motum primæ sphæræ Deo adscribere, non vt efficienti immediato, sed tanquam fini, eò quòd 12. Metaphysicæ, capite 7. textu 38. dixerit, Deum mouere primum orbem, vt id, quod amatur. Verùm loca à nobis allata adeò expressa sunt, vt interpretationem non patiantur. Citatus verò ab his Doctoribus adstruit, Deum appeti, vt rerum omnium finem: quæ ratio communis est, respectu omnium motuum, & non excludit motionem causæ effectricis.

Secundò animaduertendum est, fuisse sententiã Abulensis ad caput 13. Exodi, quæstione 5. existimantis, fieri nequaquam posse, vt Deus corpus aliquod se solo moueat: ducebatur autem in eam sententiã, quia cùm motus localis sit quidpiam imperfectum, utpote actus entis in potentia, si immediatè à Deo solo procederet, aliqua actio diuina imperfecta esset, quod est planè absurdum & impium. Et confirmari potest, quia infinita virtus mouet puncto temporis, teste Aristotele 8. Physicorum, capite 10. textu 78. cùm infinita proportionem exsuperet quamlibet vim motricem creatam: at motus localis ex sua natura tempus exigit: implicationem ergo inuoluit, fieri à Deo: sed tamè hanc sententiã erroris nomine coarguit Diuus Thomas 1. parte, quæstione 105. artic. 2. & nulla prorsus ratione sustineri valet. Nequit enim sine errore negari, posse Deum per se immediatè efficere omnes determinatos effectus naturales, quos secundæ causæ naturales efficienter edunt: cùm ipse earum omnium virtutem, & efficacitatem in se excellentiori modo contineat. Et si rationes Abulensis aliquid conuincerent, probarent sanè de omnibus quibuscunque mutationibus, cùm omnibus sit intrinseca imperfectio viæ, & tendentiæ in terminum; ac proinde nihil prorsus Deus extra se vnquam produxisset, cùm nequeat intelligi aliquid produci sine aliqua actione, seu mutatione, saltem laudè sumpta. Ac proinde prædictæ rationes nullius momenti sunt. Licet enim motus sit quid imperfectum, quia est via, & subiectum constituit in potentia, tamen in suo genere perfectum est; habens scilicet

scilicet perfectionem, suæ naturæ congruentem, & ideo nullam dicit imperfectionem in agente, sed in mobili, ut per se patet. Aristoteles item solum ibi loquitur de virtute infinita ex necessitate mouente, ac proinde tota necessario applicata: non de libera exhibente concursum, iuxta exigentiam effectus producendi.

His præmissis fuit quorundam opinio, teste Fracastorio in suis homocentricis, cap. 7. sectione 1. existimantium, vniuersam cælorum machinam ab eadem intelligentia circumuolui; quæ his argumentis potest confirmari. Primò, quia intelligentia mouens cælum præstantioris longè naturæ est, utpote totalis & completa substantia, quàm rationalis anima incompleta, & partialis: at vna & eadem anima rationalis simul præstat operationes magis diuersas, quàm sint motus cælestium orbium: ergo faciliori negotio, hos omnes pariter præstare poterit eadem intelligentia. Minor probatur, quia ipsamet anima rationalis secundum gradum vegetandi, coquit cibum in ventriculo, recoquit in iecore, & venis, & tandem in substantiam viuientis conuertit. Præterea eadem, secundum gradum sentiendi, sensuum operationes elicit, & corpus localiter mouet, ac denique secundum intelligendi gradum spirituales operationes appetendi, & intelligendi habet: quæ omnia diuersæ speciei, & generis sunt. Cum tamen omnes motus locales cælorum eandem sortiantur rationem, & speciem ab eadem præsentia eodem circulari modo acquisita emendicatam. Igitur, si illa, quæ magis diuersa, & magis etiam perfecta sunt, anima rationalis valet attingere: non est cur intelligentiam perfectiorem valde ea, quæ minoris perfectionis, & discriminis inter se sunt, exequi posse inficiemur. Quod si intelligentia vna id valet efficere, plures, utpote superflue, non sunt ad id munus designatæ.

Secundò, cælum nulla ratione resistit intelligentiæ mouenti, ac proinde non plus vna, quàm plures sphæræ conatui Angeli obfistunt: ergo quælibet vis motiua sat erit ad cælorum omnium conuersionem efficiendam: vbi enim nulla adest repugnantia, à qualibet virtute etiam minima procedit actio. Antecedens probatur, quia non apparet, qua ratione possit corpus resistere, nisi per grauitatem, vel leuitatem, aut etiam per impulsum contrarium, sibi impressum: corpora autem cælestia non sunt grauitate, aut leuitate prædita, ut in superioribus diximus, neque impulsus aliunde habent, quàm ab intelligentia: ergo ex se non habent, quo resistent virtuti impellenti Angeli, aliàs defatigaretur intelligentia mouens, quæ proinde non potiretur beatitudine, quæ secretis malis omnibus bonorum omnium complexio est. Quod planè est absurdum: concludamus

damus ergo, omnia cælestia corpora ab vna eadēque intelligentia in orbem cieri.

Opposita tamen sententia vera est, & expressa ab Aristotele 12. Met. capit. 8. à text. 47. vbi tot enumerat intelligentias motrices, quot orbes cælestes. Eandem sententiam supponunt semper Theologi, & sequūtur etiam omnes Philosophi. Ratio efficax illius est, quia Angelus habet determinatam sphaeram spatij, in qua potest esse præsens, maiorem, vel minorem, iuxta propriæ naturæ perfectionem, vt docent Theologi, in 1. dist. 37. & 2. part. qu. 5. 2. vnde eorum, & multorum Patrum sententia nequit Angelus in cælo simul, & terra esse: ergo non potest idem Angelus simul omnibus cælestibus orbibus adesse: sed non potest eos impellere, & mouere, nisi eis adsit, vt per se patet. Quamuis enim necessarium non sit Angelum impellentem coniunctum, & immediatum esse, immediatione suppositi, vt aiunt, omnibus partibus mobilis, sed sufficiat ei coniungi in certo situ, & inde impetum toti sphaeræ communicare; tamen nec fieri, nec intelligi potest, vt ab eodem situ omnes orbes simul diuerso modo & pro diuersis motibus compellat, cum stare non possit, quod impetus, seu impulsus corpori distanti imprimatur, quin corpori medio capaci etiam communicetur, ac proinde illud eodem motu ac aliud distans moueatur, & ideo primum mobile, cui intelligentia insidere diceretur, simul cum proprio motu, omnium aliarum sphaerarum motibus ageretur, quod & inauditum est, & experimento manifesto contrarium. Quod si quis dicat, Angelum, licet eadem præsentia non possit adesse omnibus cælestibus sphaeris, ac proinde nec eadem existente omnes ad motum impellere; posse tamen eundem, multiplicatis præsentis, cui libet orbi, & omnibus simul, saltem secundum aliquam partem determinatam assistere, & impetum inferre: si hoc, inquam, dixerit non nemo, facile poterit explodi, quia etiam si aliqui existiment, posse Angelum simul esse in duobus locis inadaquatatis per contactum virtutis, vt ipsi loquuntur, hoc est, ita vt moueat corpora in duabus vltimis, & oppositis partibus spatij, cui adest, sine eo quod in medio illius spatij virtutem applicet, & moueat; tamen nullus ferè hucusque asseruit, nec sustinere licet, posse eundem Angelum naturaliter simul adesse pluribus spatiis adæquatis suæ virtuti, & in eis corpus agitare, & aliàs nullum illorum esset adæquatum, quandoquidem vltra illud ad aliud se extenderet virtus angelica: & ideo plures sancti Patres existimarunt, non posse esse simul Angelum præsentem terræ, & cælo, quod de vna, & pluribus præsentis intellexerunt, secus si pluribus præsentis adæquatis id posset contingere naturaliter, non benè inferrent Patres ex eo, quod

quod Angeli in terra nonnunquam appareant, localiter intelligentiam moueri, quod ipsi intendebant: immo etsi præsentia distinctæ inadæquatæ essent, extra spatium tamen adæquatum, quia inde etiam sequeretur, per illas posse Angelum simul esse in cælo, & in terra contra Patres, & licet præsentia inadæquatæ distinctæ in eodem spatio adæquato continerentur, non posset vnus Angelus naturaliter illis affici simul, sicut nec id habere potest naturæ viribus idem corpus ex omnium sententia: vni enim rei vna tantum præsentia naturaliter debetur. Ad supernaturalem autem virtutem confugere in naturalium rerum dispositione, & administratione, nec licet, nec decet Philosophum. Confirmatur præterea, quia virtus Angeli finita est, & limitata, utpote ortum ducens à limitata, & finita natura, & quæ non valet quemlibet effectum attingere. Cum igitur tam insignis, & multiplex sit omnium cælestium sphaerarum motus, non est, cur eidem virtuti adscribatur: maxime, quia licet daremus omnes, vel plures cælestes orbes ab eadem intelligentia simul moueri posse, congruentius tamen natura est, plures effectus totales, & perfectos, pluribus causis attribuire: & ideo magis consonat naturis rerum, ut Deus cuilibet orbi cælesti suum Angelum motorem designauerit, quandoquidem cuilibet homini suum constituit Deus Angelum Custodem, cum tamen illud vniuersalius bonum sit, utpote ad plura se extendens, quæ est ratio Diui Thomæ de spiritualibus creaturis, artic. 6. ad 2. Denique Scripturæ loca, quæ adstruere videntur intelligentias motrices cælorum, eadem similiter adstruunt ipsarum pluralitatem. Concludamus igitur, tot esse intelligentias mouentes cælos, quot sunt sphaeræ mobiles.

Hoc verò duobus modis intelligi potest, aut ita, ut non plures constituentur Angeli, cælorum motores, quam constituuntur orbes, quasi completi, & totales, octo videlicet iuxta nostram sententiam; seu decem, vel vndecim, secundum aliorum placitum; aut potius ita, ut tot adstruantur intelligentiæ mouentes, quot designantur orbes quasi partiales; eccentrici, scilicet, concentrici, & deferentes. Et priorem partem id confirmat, quod pro vno corpore completo vna videtur sufficere virtus motiua, maxime perfectioris, & altioris longè ordinis, sicut ad motum localem totius animalis, etiam secundum diuersas sui partes, satis superque est vna, & eadem vis motrix ipsius. Denique argumenta supra allata, quæ intelligentiarum motricium multitudinem suadent, non plures, quam totales orbes conuincunt. Verosimilius nihilominus mihi apparet placitum Aristotelis 12. Metaphysicæ, cap. 8. & aliorum ferè omnium Philosophorum, constituentium singulas intelligentias motrices pro singulis sphaeris minoribus, seu

seu minùs præcipuis constantibus maiores, & principales orbes. Huius asserti fundamentum, præter Philosophorum, & Astronomorum, immò & Theologorum auctoritatem, illud debet esse, quia ex eo sphaera istæ minores, & quasi partiales distinguuntur, quia diuersæ percipiuntur situs positiones, aspectus, & distantiae Astrorum inter se, & quoad nos. Hæc verò omnia nequeunt nisi in diuersis orbibus constare: sed hoc idem conuincit, has sphaeras minùs præcipuas diuersis motibus per se moueri, siquidem per proprios motus diuersos hanc astrorum aspectum diuersum efficiunt. Consequens ergo necessario sit, has omnes minores sphaeras propriis motibus, & inter se diuersis cieri: sed non possunt hi motus, & diuersi orbium quasi partialium ab eadem intelligentia causari, à qua orbis totalis circunuoluitur: ergo torponenda sunt intelligentiæ motrices, quot sphaera minores constituuntur. Subsumptio hæc vltima, in qua tantum potest esse difficultas, efficaciter probatur eadem ferè ratione, qua supra stabilitum reliquimus, admittendas esse plures intelligentias cælorum motrices. Quia scilicet huiusmodi effectus distincti distinctas etiam causas per se exigunt, maximè cum virtus Angeli mouentis suis sit circumscripita cancellis, quæ proinde effectus adeò diuersos non valet attingere. Præterea nequit idem Angelus, naturæ viribus simul esse præsens omnibus minoribus sphaeris constantibus eundem totalem & maiorem orbem, neque eadem præsentia; cum per hanc tam vasto spatio respondere, & tam ingenti moli adæquari non possit: aliàs simul vna præsentia cælo, & terræ adesset, contra communem sensum Patrum; neque distinctis præsentis, cum has simul eidem rei nullus communi naturæ lege concedat. Sed non potest Angelus has sphaeras simul impellere, nisi cuilibet secundum aliquam saltem partem assistat. Si enim vni mediante alia impetum imprimeret, non posset non sphaera illi mediæ eundem impetum, & motum communicare, siquidem illius capax est: ac proinde illa ciere-tur simul omnibus motibus, quibus aguntur aliæ sphaeræ, quæ ab illa media intelligentia impelluntur, quod inauditum est, & planè falsum. Fateamur igitur, necesse est, tot esse intelligentias motrices orbium, quot sunt minores sphaeræ, inter se distinctæ, quarum numerum assignandum Astronomis relinquamus, ex quibus alij quadraginta septem, alij quinquaginta quinque, alij aliter enumerant, dummodò nobiscum tantum agnoscant octo maiores orbes, qui circulariter ferantur. Quæ verò pro opposito modo philosophandi adduximus, parum vrgent. Propter diuersitatem enim, & distantiam harum sphaerarum necessario exigunt distinctas virtutes motrices pro diuersis motibus, vt probauimus; nec in hoc dissimilis est ratio de maioribus, &

minoribus sphaëris, de virtute autem motrice animalis alia est ratio, eo quod cuilibet parti mobilis debite est approxima-
ta; quod virtuti motrici cælorum non contingit, vt satis ostendimus.

Hic tamen animaduertendum duxi, Christiano Philosopho non sufficere eas tantum intelligentias agnoscere, quæ cælestibus sphaëris circumsoluendis assistunt, quarum numero contentus fuit Aristoteles 1. 2. Metaphysicæ, tex. 47. & 48. in quo etsi lapsus, venia tamen dignus est, cum ex solis principiis naturalibus, quibus ipse utebatur, vix aliud colligi possit. Nobis verò Scholasticorum, & sanctorum Patrum consensus, & ipsa fidei veritas contrarium suadet. Quod aperte sumitur ex Iob 25. *Nunquid est muneris militum eius?* Apocalypsis 5. vbi dicitur Angelorum numerus esse *millia millium*, & idem ostenditur ex custodia Angelorum, singulis enim hominibus singuli Angeli Custodes deputantur, vt constat ex Matth. 8. *Angeli eorum semper vident faciem Patris mei*, adiuncta sanctorum Patrum expositione, & traditione Ecclesiæ. Et ratio id ipsum comprobatur. Natura enim rerum suo iure exigere videtur, ne substantiæ spirituales completæ tam paruo numero claudantur, siquidem eademmet in rebus materialibus perfectione valde dissimilibus, maiorem pluralitatem, & numerum assequitur. Sed hoc vberius confirmare cælestis disciplinæ ratio non postulat, & ideo Theologis missum facimus, qui cum Dino Thoma 1. parte, quæst. 50. art. 3. & aliis locis id ex instituto versant. Illud autem silentio prætereundum non est, videlicet, Angelos cælestium orbium motores esse ex ordine Virtutum. Distinguuntur enim Angeli ex sententia Theologorum, & sanctorum Patrum, & iuxta doctrinam Diui Dionysij c. 6. & 7. cælestis Hierarchiæ, in tres Hierarchias, quarum primæ proprium est illuminari, & doceri à Deo, ipsique intimius adhærere cognitione, & amore, partiturque in tres ordines, seu Choros, in Seraphinos scilicet, Cherubinos, & Thronos. Tertiæ autem proprium est, homines custodire, & instituere, quæ etiam complectitur alios tres ordines, videlicet, principatus, Archangelos, & Angelos. Secunda denique est, quæ immediatè illuminatur à prima de vniuersalibus rebus, quæ ad hominum gubernationem pertinet, & potestatem habet in Angelos tertiæ Hierarchiæ, illis iniungens, quæ ab ipsis executioni mandanda sunt, quæ similiter amplectitur tres Angelorum ordines, Dominationes nempe, quæ nullum immediatè ministerium exequuntur, sed dominium, & potestatem exercent circa duos alios ordines eiusdem Hierarchiæ, & circa omnes tertiæ. Tertius ordo est, Potestatum, quæ gubernandi potentiam habent, tantum circa Angelos tertiæ Hierarchiæ: secundus verò Angelorum ordo, & medius
huius

huius Hierarchiæ est eorum Angelorum, qui ea exequentur munera, quæ ad totius Vniuersi ordinem, & communem omnium causarum dispositionem pertinent, ad quæ magna virtus requiritur, & ideo hi Angeli Virtutes appellantur: ex hoc igitur ordine dicimus, esse intelligentias rotantes cælos, ut probabile visum est Diuo Thomæ 3. contra Gentes, cap. 80. & opuscul. 10. articulo 17. & sumitur ex Dionysio supra cap. 8. dicente: Virtutum nomen diuinam quandam, & inconcussam vim ad cælestes operationes obeundas præ se ferre: & ratio est, quia motus orbium cælestium maximè pertinent ad communem mundi ordinem, & gubernationem, quæ Angelis huius ordinis à Deo commissa dicitur. Idem colligitur ex illo Præfat. *Cali calorūque Virtutes*. Et ex 24. Matth. *Virtutes calorū monebuntur*, quo loco Virtutum nomine Angelos cælorum motores significari dicit D. Thomas ibi.

Argumenta autem adducta pro sententia negante pluralitatem intelligentiarum mouentium cælestes orbés, facilem habent solutionem. Ad primum fatemur ingenuè intelligentias cælorum motrices perfectioris longè naturæ esse, quàm animam rationalem, & hanc etiam functiones perfectiores, & magis inter se dissidentes, quàm sint cælorum motus habere. Inficiamur tamen eandem intelligentiam posse simul rotare omnes cælestes sphaeras, non est enim eadem proportio Angeli ad cælestia corpora, & animæ rationalis ad suum corpus: nam anima rationalis eadem indiuisibilis immediatè informat totum corpus, & singulas eius partes, vnde rectè & absque vlla confusione potest in diuersis partibus, & per diuersas potentias, omnia illa munera quantumuis diuersa præstare. Angelus verò nequit esse præfens secundum substantiam omnibus cælestibus sphaeris, sed in situ quodam determinato, ex quo si diuerso modo ad diuersos motus cælos impelleret, non motus, sed tumultus potius cælestium orbium sequeretur.

Ad secundum distinguendum est antecedens, iuxta doctrinam sancti Thomæ de potentia, quæstione 3. artic. 4. ad 16. quia etsi cælum non resistat virtuti mouenti per aliquam qualitatem in contrarium impellentem, sicut lapis resistit proiicienti sursum: obstat tamen quadam resistantia, quæ in improportionem consistit, quia scilicet corpus, aut corpora pro sua magnitudine, & distantia maiorem impetum, & maiorem approximationem virtutis impellentis exigunt, & hac ratione concedendum est, omnes cælestes orbés simul vni Angelo resistere, si omnes simul rotare tentaret. Ex hac tamen resistantia nulla sequeretur defatigatio intelligentiæ, cum sit omninò corporis expers: defatigatio enim, aut lassitudo prouenit ex resolutione membrorum, & spirituum, quorum ministerio motus exercetur. Plura hæc

supererant explicanda, quæ quæstionibus sequentibus examinanda veniunt.

QVÆSTIO X.

Qua facultate caelestes orbes ab intelligentiis moveantur.

EXplicuimus in superioribus, quænam, & quot virtutes cælorum motrices sint: explicandum superest, qua ratione, id est, qua facultate, seu virtute hoc munus exequantur, id quod in præsentiarum enodare conabimur.

Et in præsentij controuersia prima sententia adstruit, potentiam, qua Angelus localiter mouet cælum, aut aliud corpus, esse idem cum intellectu, & voluntate ipsius, quatenus ad motum referuntur. Hanc amplectitur Auerroës 12. Metaphysicæ, commentario 36. Argentina distinct. 8. quæst. 1. articulo 1. Bassol. disputatione 14. quæst. 2. Capreolus distinct. 7. quæst. 2. art. 1. Heruæus distinct. 14. quæst. 1. art. 4. Soncinas 12. Metaphysicæ, quæst. 35. & hanc sententiam valde probabilem iudicant Patres Conimbricenses 2. de cælo, capite 5. quæst. 7. art. 2. & tutatur Pater Vazquez 1. parte, disputatione 102. capit. 3. & 4. & disputatione 218. cap. 3. in fine, & Zumel 1. parte. Fauet Pater Molina 1. parte, quæst. 54. in art. 5. fauent alij, qui cum Scoto, Ferrara, & Canar. existimant in Deo potentiam non distingui ab intellectu, & voluntate, quos refert & sequitur Pater Vazquez primo loco citato. Fauet denique Diuus Thomas locis infra citandis, cum aliquibus recentioribus.

Quæ sententia suaderi potest his rationibus: primò, quia iuxta commune prologium, ea, quæ in inferioribus dispersa sunt, colliguntur in superioribus, cum hoc ad perfectionem pertineat, vt constat in sensibus externis comparatione interni, & in his omnibus comparatione vnus intellectus. Igitur vis motiua, quæ in nobis distincta est ab intellectu, & voluntate, in Angelis vt pote superioribus, & perfectioribus cum intellectu, & voluntate coincidet; maximè, cum non videatur assignabilis alia potentia naturalis operatiua in rebus spiritualibus præter intellectum, & voluntatem, & ideo Aristoteles 1. Ethicorum has duas tantum potentias intellectuales constituit, per intellectuales idem intelligens, ac spirituales: hæc certè sufficere videntur ad motum; si enim intellectus imperet, & voluntas exequat illius imperium, planè sequitur effectus: frustra ergo quaeritur alia facultas motrix præter istas. Præterea arguit Pater Vazquez, disputatione 102. c. 3. quia iam separatis à materia frustra ponitur alia potentia motiua præter eam, quæ est in corpore mobili. Ergo tantum illis superest intellectus, & voluntas. Antecedens probatur

probatur ex Aristotele 3. de anima, ubi definiens, quæ sit potentia secundum locum in anima, sic ait: *Hæc igitur amb. intellectus, & appetitus mouendi, motu dicto principia sunt.* Et statim ad vnum hæc duo reducens subiungit: *Vnum igitur est id, quod mouet ipsum, inquam, appetitum.* Et circa finem capituli addit: *Id verò, quod mouet, atque mouetur, quia ipsum principium appetendi, id autem, quod mouetur, est anima ipsum: at, quo mouet appetitus, ut instrumento, id iam corpori tribuitur.* Ex mente ergo Aristot. in separatis à materia non est aliud principium motus præter appetitum, & voluntatem, licet quando corpori adiunguntur, exigant in ipso corpore instrumentum aliquod motus. Rursus facultas exequens ab intellectu, & appetitu distincta ideò ponitur, ut illis pareat, & non nisi ad nutum appetitus operetur: sed hæc subiectio nequit intelligi in simplicissima substantia, qualis est Angelus, quamuis in composita, ut homine, bene intelligatur: ergo non est ponenda talis potentia distincta. Denique in Deo non est talis potentia distincta formaliter ab intellectu, & voluntate, sed ex his præcisè coalescit omnipotentia, ut cum multis docet Pater Vazquez supra: ergo non est necessariò ponenda hæc distinctio realis potentiarum in Angelo. Antecedens præter dicta probatur, quia talis distinctio omnipotentia à voluntate imperfectionem Deo affert. Fit enim inde concipi voluntatem diuinam à nobis sine virtute perfecta, cum alia facultas nostro modo concipiendi superaddatur, qua ut instrumento operetur, & sanè perfectior conciperetur voluntas Dei, ita ut quidquid velit facere, per se ipsa assequatur: ergo non est ponenda alia facultas in Deo, ac proinde, nec in Angelo; eadem nanque videtur ratio. Et huic sententiæ videtur fauere Diuus Thomas, quatenus 1. parte, quæstione 23. articulo 1. ad 4. post quam, etiam si oppositum primò docuerit, statim subiungit: *Vel dicendum scientiam, vel voluntatem diuinam, secundum quod est principium effectuum, habere rationem potentia.* Et quæstione 54. articulo 5. sic: *Vnde de viribus anima non possunt eis (id est, Angelis) competere, nisi intellectus, & voluntas.* Et quæstione 79. articulo 1. ad 3. Dicendum, quod in Angelis non est alia vis, quàm natura intellectiva, & voluntas, qua ad intellectum consequitur. Et clariùs quæstione 16. de malo, articulo 1. ad 14. his verbis: *Ad decimum quartum dicendum, quod in Angelo, aut Damone non est alia potentia, neque operatio, nisi intellectus, & voluntas.* Et statim: *Vnde nulla virtus, seu potentia in Angelo potest esse, nisi pertinet ad apprehensionem, vel appetitum intellectualem: non autem est inconueniens, quod Angelicaliqua corpora solo imperio voluntatis moueant, motu duntaxat locali.* Videmus enim quod anima humana solo intellectu, & voluntate mouet corpus sibi vniuersum. Denique de spiritualibus creationibus art. 6. ad 8. sic habet: *Probabiliter*

dicatur, quòd imperio voluntatis substantialis mouet corpus celeste. Et statim, Quòd ei obedire ad nutum possit secundùm transmutationem localem, & in nobis apparet, in quibus statim ad imperium voluntatis sequitur motus corporalium membrorum.

Quamuis relata sententia mihi satis probabilis videatur, probabiliior tamen apparet opposita, quæ potentiam motiuam Angeli ab intellectu, & voluntate ipsius realiter distinctam agnoscit. Vt certum diximus tractatu de anima separata, quæstione octaua. Eam sustinent Henricus quodlibeto 13. quæstione sexta, Aureolus apud Capreolum in secunda, distinctione septima, quæstione secunda, articulo 1. Matrrou. in 1. distinctione 43. quæstione 5. Godophredus quodlibeto 1. quæstione 4. Pater Suarez tomo. 2. Metaphysicæ, disputatione 35. Sectione 6. numero 22. Patres Conimbricenses 2. de cælo, capite 5. quæstione 7. articulo 2. cum Caietano 1. parte, quæstione 54. articulo 5. illam veriore, & probabiliorem censent, etsi Caietanus iudicauerit, potentiam in Deo non differre formaliter ab intellectu, & voluntate diuina. Quàm sententiam facilius amplectuntur plures, qui cum Durando in 1. distinctione 38. quæstione 1. & Patre Suarez suprà disputatione 30. sectione 17. numero 45. constituit in Deo potentiam formaliter, aut ex natura rei ab intellectu, & voluntate diuersam; quibus multùm fauet Diuus Thomas 1. parte, quæstione 19. articulo 4. ad 4. & expressiùs quæstione 25. articulo 1. ad 4. ubi sic scribit: *Potentia non ponitur in Deo, ut aliquid differens à scientia, & voluntate, secundùm rem, sed solum secundùm rationem, in quantum potentia importat rationem principij exequentis id, quod voluntas imperat, & ad quod scientia dirigit.* Et idem repetit ibidem articulo 5. ad 1. si enim in Deo potentia distinguitur ab intellectu, & voluntate, quia licet hæc sit infinitas efficacitatis, non intelligitur operari ad extra eo ipso, quòd vult, nisi nostro modo concipiendi applicet potentiam quasi executricem, potiori iure denegandum erit voluntati creatæ Angeli posse per suum velle immutare res alias, & expressè docet nostram sententiam, quæstione 6. de potentia, articulo 7. ad 12. quod argumentum contendebat, Angelum solo suæ imperio voluntatis posse corpus mouere. Et D. Thom. responderet his verbis. *Ad duodecimum dicendum, quòd imperium Angeli requirit executionem virtutis, unde oportet, quòd sit quidam tactus spiritalis ad corpus, quod mouet.* Idem habet quodlibeto 9. artic. 10. ad 2. *Dicendum, quòd Angelus agit in hæc corpora, mouendò ea localiter per imperium: sed imperium non dicitur hic sine virtute actiua.*

Probatum efficaciter nostra sententia ratione. Primò, quia nulla potentia valet naturaliter, immò neque lege absoluta Dei, vagari extra suum proprium obiectum, & modum proprium ver-

fandi,

fandi, & attingendi illud: sed motus localis non continetur intra obiectum intellectus, & voluntatis Angeli, nec intra modos operandi harum potentiarum; ergo nequit vlla ratione fieri ab his facultatibus, sed alia distincta necessario constituenda est. Maior syllogismi per se est manifesta, & recepta ab omnibus; vnica enim ratio constituendi, & distinguendi potentias emendicatur ex diuerso modo attingendi obiectum, seu quod idem est, ex distincto obiecto formali: hoc siquidem dat speciem, & distinctionem, quamlibet verò rem perfectione propriæ speciei circumscribi necesse est; vnde nec visus sonum, neque auditus colorem vllatenus percipere valent. Minor verò non minus perspicue demonstratur. Quia ratio motus in nobis constituit, & dat speciem potentie motricis essentialiter & genere diuersæ ab intellectu, & voluntate. Et ideo non continetur, nec contineri potest intra limites obiecti intellectus nostri, & voluntatis, vt omnes pleno ore fatentur. At intellectus, & voluntas intelligentiæ sunt eiusdem rationis specificæ, aut saltem genericæ cum nostris, quandoquidem eandem veritatem, & bonitatem eodem modo saltem generico respiciunt. Igitur intelligi nequit, motum contineri intra cancellos harum facultatum Angeli, ac proinde ab illis procedere.

Neque eluditur vis argumenti, si quis dixerit, motum localem habere in se rationem veri, & boni, sub quibus possit contineri sub obiectis intellectus, & voluntatis, & ab his facultatibus attingi: quia si hoc sufficeret, idem intellectus posset elicere omnes operationes voluntatis, sensuum, & aliarum omnium facultatum, si quidem omnes, & earum obiecta ab intellectu attingi possunt, sub ratione veri, & idem contingeret in voluntate, quod fingimentum nullus vnquam excogitauit. Inutilis ergo est illa identitas realis, sed attendi debet specialis ratio obiecti, aut effectus, sub qua nullo modo localis motus ad obiectum intellectus, & voluntatis spectat.

Secundo, diuersitas actionum, & modi operandi distinctionem facultatum, à quibus proueniunt, constituunt, aut certe denotant perspicue: sed ea est diuersitas intellectiōis, & volitionis à motu locali, quæ sufficiat assignare principia omnino distincta: hæc igitur in Angelo necessario admittenda sunt. Minor, in qua est difficultas elucidatur facile, & in primis in nobis eadem operationum diuersitas sat est, ad plures facultates distinctas constituendas: ergo & vbicunque. Cum, iuxta tritum illud proloquium, idem, in quantum idem est, semper sit natum facere idem. Deinde, motio localis est actio transiens, constituens suum obiectum in rerum natura: volitio verò, & intellectio neutrum habent, & certe non minus distinctæ actiones sunt mouete,

& velle, quàm velle, & intelligere. Immo illæ maiorem inter se distinctionem vendicant propter duo nuper dicta. Si ergo diuersitas volitionis, & intellectiōis requirit duas potentias diuersas, potiori iure id exigit illarum, & motionis dissensio. Et aliàs anima rationalis per suum velle sine vlla facultate motiua proprium corpus sibi coniunctum mouebit, quia licet minoris virtutis sit, quàm Angelus, maius tamen habet dominium in illud, & maiorem cum illo proportionem, ac proinde sine fundamento id negaret, quod omnes communiter merito inficiantur. Vt diximus 3. de anima, in cap. 10. quæst. 2.

Tertiò probatur, quia intelligentia nequit efficere motum orbis cælestis per suum velle, tanquam per actionem; quia nec ipsum velle potest esse motio ipsa localis, cum essentialiter distinguantur, sicut termini ipsi, præsentia scilicet, & amor, & diuersis inhæreant subiectis, nempe voluntati, & mobili: neque minùs potest esse productio motus localis, cum hic sit actio, cuius non datur alia actio, & terminus essentialis volitionis sit amor. Et idem argumentum potest confici de intellectu intellectus. Sed neque potest Angelus causare motum localem, per ipsam potentiam voluntatis, & intellectus, quia hæc nequaquam valent elicere, nisi volitionem, & intellectuē permanentes, nec aliud intelligi potest, cum tota essentia voluntatis, & intellectus, per quam ab aliis facultatibus distinguuntur, sita sit in eo præcisè, quòd possint velle, & intelligere; quæ quidem magis distant à motione locali, quàm inter se, cum illa sit transiens, factiua termini, tendens non in obiectum, sed in effectum, & per se non vitalis; secùs volitio, & intellectio, quæ etiam magis inter se connectuntur, & subordinantur, quàm latio, & volitio: igitur si velle, & intelligere duo principia exigunt, potiori iure suum principium distinctum motus localis, seu impulsus ad illud exigit. Et saltem non potest idem motus localis ab vtraque ista potentia elici, vt censet opposita sententia, quia cum motus sit vna, & eadem actio, quæ est effectus egressus ab agente, nullatenus naturaliter potest à duplici causa totali pendere; dicere autem à qualibet istarum facultatum procedere potentialem actionem, & inde totalem coalescere, nullius est momenti, quia intelligibile non est, quomodo ab intellectu, & voluntate, essentialiter diuersis, proueniant parciales actiones eiusdem prorsus naturæ, & rationis, constituentes entitatem aliquam totalem, homogeneam, qualis est motus localis cæli, aut alterius corporis mobilis.

Quartò denique nostra sententia stabilitur ab absurdo, quia si Angelus cælum circumuolueret per intellectum, & voluntatem præcisè, fieret inde, vt ex qualibet distantia illud mouere posset;

per

per has enim facultates æqualiter se habet intelligentia ad res distantes, & propinquas, ut per se patet: consequens verò nullus admittet, omnes enim requirunt determinatam, & proportionatam distantiam, ut posset Angelus orbem rotare, & ideo vocant intelligentiam formam assistentem, seu adhærentem, quod frustra coningeretur, si ex qualibet distantia id posset exequi. Ex eo igitur præcisè, quòd Angelus velit efficaciter mouere sphaeram, nisi addatur vis motrix distincta, nulla ratione mouebit, sicut ex eo quòd efficaciter velit intelligere, id non consequetur, nisi per superadditam, & distinctam facultatem intellectricem. Et quòd diximus de virtute motrice Angeli comparatione cæli, aut alterius corporis, dicendum similiter videtur, respectu motus localis ipsiusmet intelligentiæ, ut pleraque ex supradictis manifestè conuincere videntur.

Argumenta verò prioris sententiæ parum negotij nobis faciunt. Ad primum respondeo, illud principium non esse in vniuersum verum, alioquin intellectus, & voluntas, quæ in hoc distinguuntur, subirent in Angelo vnius potentiæ rationem, quòd nullus admittet. Collectio ergo illa, & vnio solum accidit frequenter, & cum eam rerum natura patitur, quòd in præsentì non contingit, ut ex dictis constat. Ad confirmationem verò iam assignauimus potentiam motiuam ab intellectu, & voluntate ex obiecto, actu, & modo operandi distinctam, & eam esse necessariam, manifestis rationibus conuicimus. Aristoteles autem tantum meminit intellectus, & voluntatis, cum potentias spirituales, seu intellectuales recensuit, quia hæ tantum propriæ sunt substantiæ spiritualis, cum tamen vis motrix etiam corpori insideat, & non solum spiritui.

Ad secundum negamus antecedens, & ad illius confirmationem dicimus, Aristotelem vocare appetitum principium motus animalis imperans, & dirigens, non proximum, & exequens, ut ex verbis illius patet, id quòd nos ut verissimum amplectimur. Ad aliud etiam inficiamur, non posse intelligi subiectionem potentiæ motiuæ ad intellectum, & voluntatem in simplici substantia, quin potius optimè intelligitur, sicut in eadem substantia agnoscitur subiectio, & subordinatio intellectus ad voluntatem.

Ad vltimum posset aliquis respondere, concessio antecedenti, negando consequentiam; est enim diuersa ratio in Deo, & creaturis propter summam Dei perfectionem, & simplicitatem; etenim huiusmodi argumentandi genus à diuinis ad creata, parui momenti esse solet. Et ideo Caietanus primum concessit, expostitque secundum, ut supra retulimus. Nos autem cum Durando, Patre Lua, & aliis, immò & cum sancto Thoma supra, non admittimus antecedens: & ea, quibus stabilitam relinquimus

distinctionem realem facultatis motricis Angeli ab intellectu, & appetitu ipsius, suadent efficaciter, distinctionem formalem per nostrum intellectum, inter omnipotentiam Dei, & intellectum, ac voluntatem eiusdem, ut consideranti constabit. Ad confirmationem autem negamus, ex nostra distinctione inferri, voluntatem diuinam non esse, aut non concipi omnino perfectam: quinimmo perfectissima est, & concipitur in ratione voluntatis, cum realiter, & identice claudat omnem perfectionem diuinam, & formaliter concipiatur potens attingere perfectissimo modo quamlibet rationem obiecti voluntatis, in quo summa eius perfectio sita est, non in eo, quod ultra obiectum voluntatis diuagetur, & per suummet conceptum intelligatur exequi, quicquid efficaciter vult. Alioquin perfectio voluntatis diuinæ esset, ut per se ipsam formaliter intelligeret, cum intelligere efficaciter vult, & non per intellectum, quod planè est falsum: & tamen non minus distat obiectum actus, & modus operandi potentie executricis ab obiecto, actu, & modo operandi voluntatis, quam ab his differt obiectum actus, & modus operandi intellectus, ut ex dictis manifestò liquet. Non est ergo de perfectione formali voluntatis diuinæ, posse se ipsa formaliter, & proximè res executioni mandare, cum hoc sit extra suum obiectum formalem, & proprium modum operandi. Ac proinde in Angelo hoc non pertinet ad eandem facultatem voluntatis, sed ad aliam distinctam.

Testimonia denique sancti Thomæ non suffragantur prioræ sententiæ, & in illa solutione 4. nobis fauet, ut fatetur Pater Vazquez. In primis enim loquitur de Deo, de quo non est eadem omnino ratio ac de Angelo, ut ex Caietano, diximus; deinde primo loco, ut vidimus, nostram doctrinam disertis verbis tradit, tanquam veriore scilicet, & postea aliam solutionem iuxta oppositam sententiam, probabilem adducit, ut sæpè fieri solet. Denique illa verba intelligi possunt, ita ut sensus sit intellectum, & voluntatem diuinam, habere rationem potentie non formaliter, sed realiter; idcò enim dicit, eas facultates habere rationem potentie, secundum quod sunt principium effectuum, id est, non ut tales potentie sunt, sed sub alia ratione formali, qua tantummodò facultates, & attributa in Deo distinguuntur, in doctrina Diui Thomæ, vel potius intendit, eas facultates formaliter habere suum potentie & causalitatis executricis modum, non proximè, & immediatè exequendo, sed quasi mediatè imperando, & dirigendo. Et hic videtur germanus sensus illorum verborum. Ad secundum respondetur, sensum esse de viribus animæ tantum, Angelo competere intellectum, & voluntatem, id est, ea ratione, qua sunt in anima, in qua illæ solùm spirituales

spiritales sunt, aliæ autem materiales, quæ Angelo non conueniunt, ac si diceret, Angelo solùm conueniunt facultates spiritales; at ex his duæ tantùm sunt in anima: ergo ex facultatibus animæ duæ solùm Angelo compètunt.

Tertium minoris momenti est, solùm enim contendit D. Thomas non esse in Angelis vires sensitivas & nutritivas, sicut habet anima rationalis in corpore, sed tantùm intellectivas, hoc est, spiritales, quapropter Angelus appellari potest mens, & intellectus, secùs quàm anima. Duo postrema loca Diui Thomæ magis vrgere videntur, verùm cùm in aliis adductis pro nostra sententia, illi expressè subscripserit, conandum nobis est, ea in bonum sensum interpretari, ne admittamus, Doctorem Angelicum adhuc iuniorem contrarium sibi extitisse, & ideò ad illud ex solutione ad 14. respondemus, ibi solùm negasse Diuum Thomam, Angelis facultatem naturalem, quæ scilicet non feratur ductu rationis, & imperio voluntatis, atque adeò omnis facultas, & operatio Angeli reducitur à D. Thoma, ad intellectum, & voluntatem elicitivè, seu imperativè, & propterea in sequentibus verbis solùm dicit, nullam vim esse in Angelo, quæ non pertineat ad apprehensionem & appetitum, hoc est, quæ horum directionem fugiat: qua ratione dicitur Angelus, monere solo suo imperio; quia, scilicet, vult applicare potentiam executricem motus, sibi omninò subiectam, & hunc esse sensum huius loci ex eo mihi habeo persuasum, quòd illum confirmat, quia anima humana solo intellectu, & voluntate mouet corpus sibi vnitum, cùm tamen ex communi omnium sententia anima moueat localiter corpus, per virtutem motricem superadditam. In ultimo autem loco tantùm docet D. Thom. probabiliter illud dici, quod nos fatemur, & eadem prorsus ratione, qua præcedens exponi potest: nam illud etiam confirmat ex eo quòd in nobis ad imperium voluntatis sequitur statim motus membrorum, quod sine motrice facultate ab intellectu, & voluntate distincta non euenit.

Q V Æ S T I O X I.

Quomodo sphaera caelestes ab intelligentiis rotentur.

IN hac quæstione nonnulla venient discutienda, quæ ad doctrinæ traditæ perfectionem desiderari videbantur, ne in aliquo studiosis nostris deficiamus, ex quibus vnum, vel alterum verbum à Doctoribus obiter prolatum reperies. Primum, & præcipuum examinandum nobis erit; quo impetu intelligentia cælum circunuoluat, deinde quo operandi modo, naturali scilicet, an libero. Tertium denique qua applicatione, & præsentia id exequatur.

Circa

Circa priorem quæstionis partem est prima opinio assertentium, intelligentiam efficere motum localem, per impulsum mobili impressum. Ita docet Pater Ludouicus Molina 1. part. quæst. 54. artic. 5. & obiter indicant Patres Conimbricenses 2. de cælo, capite 5. quæst. 5. articulo 4. in fi. sequuntur aliqui recentiores. Quam sententiam probabilem iudicat Pater Suarez, tom. 2. Metaphysicæ, disput. 35. sessione 6. num. 24. & eam P. Molin. intelligit tam de motu ipsiusmet Angeli, quàm rei externæ. Alij sine distinctione loquuntur. Hæc sententia probari potest ex sancto Thoma de spiritualibus creaturis, articulo 6. ad 12. ubi sic habet: *Dicendum, quod corpus celeste. in quantum mouetur à substantia spirituali, est instrumentum eius, sicut ferra artis, &c.* At instrumenta artis mouentur per impulsum impressum ab artifice: ergo ex mente Diui Thomæ cælum mouetur à sua intelligentia per impulsum: & idem potest colligi ex corpore articuli, quatenus dicitur, Angelos vniri cælis per modum, quo motor vnitur mobili, scilicet, in motoribus inferioribus, qui certè per impulsum corpora mouent localiter. Ratione etiam confirmari potest, quia proprius modus mouendi localiter ab extrinseco, est per impulsum, vt in nobis patet: sed intelligentia est motor cæli extrinsecus: igitur per impulsum cælum impellit, maximè cum cælum non minùs sit impulsus capax, quàm aliud corpus inferius, & non appareat, quia alia ratione possit à motore impelli.

Secunda sententia est, Angelum mobili assistentem non imprimere illi impulsus, sed motum ipsum immediatè. Hanc amplectitur Pater Suarez loco citato, num. 24. & videtur sententia Diui Thomæ, suprâ, articulo illo 6. ad 9. ubi hæc habet verba: *Substantia spiritualis, qua mouet celestia corpora, vnitur eis secundum moueritantum.* Si autem intelligentia impulsus sphæræ imprimeret, non secundum moueri tantum ei vniretur, sed in actu primo etiam, & per modum potentie, per impulsus diceretur vnita contra D. Thomam. Fundamentum huius sententiæ est, quia impulsus solum adstruitur, vt instrumentum mouentis separati à mobiliat Angelus sphæræ mouendæ adest: igitur necessarius non est impulsus, ac proinde inficiandus. Et hac ratione melius defenditur communis sententia Scholasticorum cum Diuo Thom. affirmâs, corpora Angelis non subdi, nisi quoad motum localem.

Nostra in hac re sententia media incedit via, iuxta quam dux extremæ relatæ verum habere, & in concordiam redigi possunt. Quæ duplici assertione explicanda est, quarum prima sit: Intelligentia sufficienter coniuncta, & approximata mobili, non imprimit illi necessariò impulsus, sed proximè motum. Hoc assertum congruit secundæ sententiæ, & aliis fundamentis roboratur.

hærat. Et confirmari potest, quia motrix facultas immediatè, & per se est productiua motus: sed in Angelis est vis motiva secundum locum: ergo ab illa poterit immediatè, & sine medio impulsu motus procedere. Illustratur maior primò, quia in animalibus ex communi sensu à virtute motrice præcisè sæpè provenit motus, & in omnibus corporibus sublunaribus gravitas, & leuitas, quæ sunt virtutes loco motiue; sufficiunt verò corpora sine impulsu, etsi illum per accidens producant, iuxta aliquorum sententiam. Deinde potentia motrix ex propria ratione generica, & specifica proximè, & essentialiter respicit motum, & ubi, tanquam propriam causalitatem, & effectum, à quibus speciem desumit, sicut calefactiua facultas calefactionem & calorem, & reliquæ similiter. Igitur sicut à cæteris virtutibus immediatè procedit actio, & effectus tribuentes speciem, ita à facultate motrice intelligentiæ, quam esse necessariò adstruendam ostendimus quæstione præcedenti: ex quo liquet consequentia prioris syllogismi, videlicet, à facultate motiua Angeli posse immediatè, & proximè oriri motum localem, ac proinde quoties mobile debitè approximatum est, sine interiacente impulsu, motus eueniet. Quod videtur convincere saltem de motu ipsiusmet intelligentiæ, contra Patrem Molinam, cum ibi nil omnino obstat possit, & adsit sufficiens virtus, & applicatio: sed minùs efficaciter procedit ratio, de motu cælestis spheræ, aut alterius rei spiritualis, vel corporeæ, Angelo immediatè coniunctæ, licet enim non sit tam stricta coniunctio, & proportio, ac in priori casu, sufficiens proculdubio existit ad hunc effectum, quia cum motus localis non sit actio immanens, sed transiens, sicut calefactio, effectrix illius viæ sola subiecti contiguitate, nimis contenta est. Quemadmodum non plures exigit calor, & aliæ facultates, actione transeunti operatrices; non igitur est necessarius impulsus, cum approximatum est mobile sufficienter intelligentiæ motrici, ac proinde nec ponendus, tum quia superuacaneus, tum quia ex communi sensu nil Angelus corporibus imprimit præter lationem, vel ut plurimum, id, quod ad motum necessario exigitur. Diximus inclusivè intelligentiam sufficienter coniunctam, quia si desit sufficiens, & debitæ applicatio, aut ratione separationis, aut magnitudinis corporis, alia est ratio, ut iam aperiemus.

Secunda conclusio: quoties intelligentia à mobili diuulsa illud agit, id præstat per impulsus impressionem. Quæ assertio contra Patrem Suarez supra, in fine, congruit primæ sententiæ, illiusque fundamentis fulcitur, & ulterius corroboratur. Quia motor corporum per impulsum agit corpus à se distans, ut cum communi scholæ sensu diximus, & Physicorum: ergo sine funda

fundamento id intelligentiæ detrahemus, cum altioris, & efficacioris virtutis sit, præsertim ad mouendum localiter. Denique implicat aliquid moueri, quin omnibus partibus, secundum quas mouetur, motus inhæreat; sicut repugnat, constitui album sine albedine: sed intelligentia ad tam magnam distantiam localiter mouet, ad quam non possit motus ab ipsa immediatè fluens pertingere: igitur in illis partibus remotioribus alia virtus ponenda est, à qua motus illarum proueniat. Minor, in qua difficultas sita est, illustratur, quia intelligentia motrix primi mobilis, v. g. ex aliqua illius parte, cui tantum adhæret, vt statim dicemus, integrum illud mobile circunuoluit, immò & eodem motu inferiores sphæras rapit: sed nequit intelligi eadem actio procedens à potentia existente in illo loco, per se ipsam attingere extremas partes valdè inter se, & à potentia dissidentes; & saltem implicat illa eadem actione, & motu cieri inferiores orbes, quia nec potest motus transilire de subiecto in subiectum, nec reproducere aliam actionem, vel motum in alio subiecto, siquidem actionis non.

Et hæc, & terminus eidem semper inhærent subiecto: igitur in his partibus, seu mobilibus extra sphæram immediatè processionis motus à potentia Angeli existentibus, necessario ab ipso producitur impulsus, quo vt instrumento vtatur ad lationem peragendam. Quanta verò sit sphæra facultatis motricis intelligentiæ, in qua per se ipsam immediatè sine consortio instrumenti motum eliciat, nequit à nobis certò definiri. Illud tamen nobis statutum videtur, scilicet, intra illam sphæram integrum cælestem orbem non claudi, esset enim limitatæ virtutis nimia perfectio: in reliquis verò partibus, impulsus intelligentia imprimi, media facultate motrice, tanquam ratione producendi in ordine ad motum, ad quem ordinatur mediatè, vel immediatè, aut tanquam conditione prærequisita, qui impulsus producitur, medio alio producto, in proximioribus partibus, licet in his non esset omninò necessarius, vt probauimus: ille tamen & virtus motiua, cum voluntati Angeli subdantur, ita producuntur, & attemperantur mobili, vt ex eis constans, vt æquabilis oriatur motus cæli iuxta ipsius voluntatis imperium.

Et iuxta dicta intelligitur ex proprio, & germano sensu Diuus Thomas citatus pro prima sententia: verè enim erigit impulsus intelligentiæ pro motu sphære cælestis, sed quatenus deest debita mobilis approximatio, non secus; & idem contingit in motu inferiorum, vt patet. Ad rationem respondeo, Angelum ita esse motorem extrinsecum, vt debitè sit applicatus per suam virtutem motricem, & sibi ipsi, dum mouetur, & sphære cælesti secundum

cundum aliquas partes, & ideo sine impulsu motum in eis eliciet, pro distantioribus verò, defectu applicationis indiget impulsu, cuius faremur esse capax cælum, insiciamur tamen non posse aliter moueri.

Ad fundamenta secundæ sententiæ, quatenus nostræ aduersantur, facile est respondere. Et primò D. Thomas solum negat intelligentiæ vnionem, quæ non sit per motum, aut in ordine ad motum, sine informatione propria, quod duplici modo relato contingere potest. Ad rationem dicimus, impulsu requiri ad motum mobilis separati, aut non debito modo applicati, quæ ratione exigitur in cælo, vt explicuimus. Doctores autem communiter negant, corpora subdi intelligentiis quoad aliquam formam, quæ non sit motus, aut principium, seu terminus motus, quibus nos libenter subscribimus.

In calce huius quæstionis aduertendum est, nonnullos carpere Aristotelem, teste Diuo Thoma, quæstione 16. articulo 10. quasi dixerit intelligentiam rotare suam sphaeram, non secundum intellectus regulam, sed necessitate naturæ impetum impertiendo; cuius fundamentum potuit esse, quia 12. Metaphysicæ, capite 8. asseruit Philosophus, intelligentiam quoad virtutem motiuam ita suo orbi commensuratam esse, vt alium superiorem mouere non possit. Quod confirmari posset ex nostra doctrina, iuxta quam cum intelligentia moueat per potentiam à voluntate distinctam, & etiam per impulsu, mirum non est, si naturali impetu & determinatione impellat, ac proinde quantum potest, ita vt intelligentia motrix inferioris orbis non possit superiorem agitare. Verum etsi fundamentum Aristotelis nobis non probetur, iude tamen non necessariò infertur, intelligentias necessariò mouere, aut id Philosophum existimasse. Fundamentum autem falsum est, quia sine fundamento, & contra communem sensum: licet enim Deus ita efficere potuerit, vt scilicet vnaquæque intelligentia tantum valeat propriam sphaeram impellere, nulla proisus extat ratio, vt factum putemus, immò oppositum naturis rerum magis congruit. Verum cum id contingere potuerit, etiam si intelligentiæ liberæ mouerent cælos, vt patet, non bene infertur ex eo, quòd Aristoteles dixerit, intelligentiæ virtutem ita suo orbi commensurari, vt nil ultra possit agitare, eum sensisse, intelligentias necessariò impellere: sed cuiusvis fuerit hoc placitum, falsitatis conuincitur. Quia vt quæstione 10. resuluimus, D. Thomas cum omnibus scholasticis perspicue docet, Angelum mouere corpora imperio voluntatis, seu per intellectum & voluntatem, quod intelligendum est, aut de potentia proxima motiua, vt plures ibi citati volunt, vel saltem de facultate dirigente, & imperante,

ut nos stabiliuimus. Neque aliud potest cum fundamento dici, neque apparere, à quo talis determinatio oriatur in substantia omnino intellectuali, cum etiam in nobis, immò & in brutis applicatio virtutis motricis, & impressio impulsus imperio apperitus subdantur, & hoc ad perfectionem spectat, ac proinde naturæ angelicæ perfectiori iniuste detrahetur. Neque ideo verendum est, Angelos à motu celorum cessaturos pro sua libertate ante diem iudicij: vtget enim lex illis à Deo imposita de permanetia & æquabilitate motus, id rerum natura & ordine enixe exigente.

Vltimò scite oportet id, quod in superioribus obiter attigimus, intelligentiam circunuoluentem orbem, non toti orbi, sed determinatæ tantum illius parti assidere, non quia eidem parti continuo adhærens cum ipsa in gyrum feratur, sed ita ut ex eadem determinata parte spatij impellar partes illac successiue transcurrentes, & quasi fluentes, & his mediis orbem integrum modo supra explicato. Hic videtur communis sensus, & utranque partem expressit sanctus Thomas de spiritualibus creaturis articulo 6. ad 6. ex mente Aristotelis, his verbis: *Ad sextum dicendum, quod secundum Philosophum in 4. Physicorum, motor cali est in aliqua parte eius, & non in toto, & sic non circueit gyrum calis.* Quæ lectore indigent, non expositore. Ratio prioris est, quia intelligentia sicut est determinatæ naturæ, ita etiam virtutis limitatæ, in ordine ad præsentiam localem, quam virtutem planè excedit, ubi in toto orbe, ut per se patet, & aliàs posset simul Angelus naturæ viribus cælo, & terræ adesse, cum plus inter se dissideant partes eiusdem orbis, quàm earum aliquæ & terra. Sequelam verò & falsam esse, & contra sanctos Patres, & Scholasticos, supra ostendimus. Secunda autem pars ex eo constat, quia nec decet naturam intelligentiæ beatæ, ut tam celeri & rapido motu, cum sua sphaera continuo agiteretur, nec id est vlla ratione necessarium; siquidem eo modo quo diximus, potest impellere & indefinenter orbem mouere, cum nulli parti sit physicè vnita; sed non propterea inficiamur, posse intelligentiam motricem mutare spatium, sed tantum id esse necessarium ad exequendum motum.

Quantum verò ad spatium, & præsentiam motoris Angeli, nihil potest certò definiri; communiter dici solet esse in aliqua parte superficiiei conuexæ sui orbis, quia inde optimè videtur posse impellere, & ideo nuncupatur forma assistens, quasi exterius coniuncta. Posset etiam non incongruè affirmari, intelligentiam existere in aliqua parte profunditatis propriæ sphaeræ, quia ex illa facilius in omnes sphaeræ partes, utpote sibi propinquiores impetum transliceret, maximè cum intelligentia spiritualis

Spiritualis omnes cæli partes sine impedimento possit transmeare. Forma verò assistens dicitur, non quia extra cælum sit, sed quia illud non informat tanquam proprium subiectum, & materia: finito autem rotationis tempore ad communem beatorum sedem motrices mentes, sicut & custodes, hominum perfectio munere se recipient.

CAPVT VI.

Textus Aristotelis.

Posthæc motum ipsius uniformem, & non difformem esse, demonstramus oportet, &c.

Breuis expositio textus.

Intentum Aristotelis est in præsentī capite probare motum primi mobilis, & aliarum sphaerarum, quatenus ab ipso rapiuntur (de hoc enim loquitur) esse uniformem, & æquabilis semper velocitatis. Quod probat aliquibus argumentis. Et hæc est summa totius capitis, quod ideo diuisione non indiget. Prima ratio Aristotelis est: motus inæqualis habet intensionem velocitatis, statum & decrementum eiusdem, qui status est, aut in principio motus, aut in medio, vel fine, ut in diuersis motibus videre est: at motus cæli, utpote circularis, & æternus, principio, fine, ac medio caret: ergo & inæqualitate. Præterea inæqualitas motus prouenit à mouente, vel à mobili: à neutro tamen potest prouenire in cælo, cum hoc incorruptibile sit; ac proinde semper eodem modo, & motor eadem semper virtute moueat. Tertiò, non est motus cæli inæquabilis secundum totam sphaeram, quia talis remissio ab imbecillitate proueniret, nec quoad partes, aliàs stellæ octauæ sphaeræ non semper eandem inter se distantiam seruarent. Tandem, motus cælestis non posset infinito tempore augeri, & infinito diminui, alioqui esset infinitus & indeterminatus, & nec haberet certos terminos, nec tempus præfixum, sed nec augeri, & remitti potest quadam vicissitudine, quia nulla huius vicissitudinis ratio afferri potest, & sensu ab omnibus perciperetur.

Doctrina huius capitis satis perspicua est, solum est animaduertendum, motum cæli esse uniformem, & æquabilem, secundum omnes partes, non æqualitate spatij, quod decurritur, quandoquidem tempore æquali partes polis viciniore minus spatium peragant, maius verò distantiores; sed æqualitate temporis, quod consumitur in tali spatio peragando. In quo sensu Aristoteles, & reliqui Philosophi loquuntur, id quod experimento constat, alioqui non possent Astrologi certò prænunciare, quo die, & hora futuræ essent Solis, & Lunæ eclipses, & syderum coniun-

etiones, quod vim sensibus affert. Id autem ex eo euenit, quòd Angelus pro sua libertate ita suam virtutem motricem, & impetum attemperat per continuam impressionem, vt rerum natura, & indefectibilis æquabilitas motus cælestis exigit, quoties autem insoliti planetarum cõitus, & aspectus stellarum, stationesque cælorum deprehensæ sunt, id præter statutam rerum legem, & supernaturali Creatoris vi contingit.

CAPVT VII.

Textus Aristotelis.

*De his autem, quæ stella vocantur, deinceps dicendum
esse videtur; &c.*

Breuis expositio textus.

Agreditur iam Philosophus disputationem de partibus cæli, nempe de stellis. Et diuiditur caput in duas partes: in prima explicat naturam, figuram, & motum astrorum; in secunda quandam dubitationem mouet, & soluit. Et quod ad primam attinet, breuiter dicit, rationi consentaneum esse, vt stellæ eandem cum cælo naturam fortiantur, & idem intelligit de figura, & motu earum. Quod veterum Philosophorum testimonio comprobatur; qui licet falso existimauerint, stellas esse igneæ naturæ; consequenter tamen, cum cælum ipsum igneum posuerint. In secunda parte capituli obicit hac ratione: nullum corpus emittit, quod in se non habet: at stellæ ignem emittunt: sunt igitur igneæ. Respondet, stellas non emittere à se ignem: sed earum motu excitari, sicut contingit in corporibus sublunaribus, licet hæc calefiant, non stellæ, quia distantes, & ignis incapaces. Nec ex hoc sequitur, inquit, quòd sicut cælestium sphaerarum motus æquabilis semper est, ita aër æquabiliter semper incalescat, quia caloris incrementum prouenit etiam ex maiori solis accessu, & radiorum reflexione, quæ non semper eadem contingit. Vnde non intendit Aristoteles, vt adnotat D. Thomas hic lectione 10. vnicam causam caloris cælestis inferioris esse aëris motum, & attritionem ortam à motu cælestium sphaerarum, sed etiam ad id concurrere radiorum luminis reflexionem.

QVÆSTIO I.

*An Astrorum natura sine eiusdem rationis cum suis
orbibus, & inter se.*

Quæstio hæc procedit tam de stellis fixis, seu inerrantibus, quàm de errantibus, & planetis. Et missa opinione (cuius meminit Aristoteles hoc cap. 7.) Philosophorum ipso antiquiorum, asserentium cælum & astra eiusdem substantiæ cum sublunari mundo

mundo esse, quos, & ipsorum inter se dissensiones, referunt Patres Conimbricenses 2. de cælo, cap. 7. quæst. 1. art. . hanc tamen opinionem satis refutauimus 1. lib. cap. 2. quæst. 6. & 7. Inter eos qui asserunt, tam astra, quàm cælestes sphaeras, ex quinta Peripatetica substantia constare, dissidium est, Num stellæ in eadem infima specie cum suis orbibus conueniant. Et affirmatiuam partem in vniuersum tenent Massalachus, libro de sphaera mota, Auerroës commentario 79. huius libri. Albertus Magnus tract. 3. cap. 4. Maior quæst. 8. & idem videtur existimare Ricard. in 2. dist. 14. artic. 3. quæst. 6. cum aliis nonnullis. Quæ sententia præbæri potest primo ex Aristotele in hoc capit. 7. dicente, stellæ eandem cum suis orbibus naturam sortiri, quod de identitate specifica videtur intelligendum; identitatem enim genericam etiam habent cum sublunaribus, siquidem in genere corporis cum illis conueniunt. Ratio præcipua, immò & vnica huius sententiæ esse videtur, quia nullum est sufficiens fundamentum eiusmodi distinctionis specificæ inter stellæ, & proprios orbés: igitur non est adstruenda, cum sint partes eorundem corporum simplicium, sicut aqua est pars aquæ, & aër aëris. Antecedens probatur, quia si aliquod esset diuersitatis principium, seu signum à posteriori, maximè maior astrorum densitas, intensior lux, & perspicua effectuum diuersitas, addè diuersum planetarum morum: sed horum nihil ad hoc cogit, ac proinde non est, cur hanc specificam distinctionem admittamus. Elucidatur minor: nam in primis illa omnia accidentia duntaxat sunt, & ideo non valent essentialem diuersitatem per se inducere. Deinde neque illam distinctionem constitutam præmittunt, quia in diuersis partibus homogeneis aquæ, v. g. contingere solet, eadem accidentium dissensio, cum possit vna rarefieri, illuminari, aut localiter cieri, & per has qualitates diuersos edere effectus; altera existente densa, tenebrosa, immota, & similes effectus non producente. Igitur, hæc omnia in astris, & eorum orbibus, cum specifica vnitæte stare possunt.

Secunda sententia asserit, Planetas (Sole excepto) siue discontinuedur à suo epicyclo, vt Luna, siue non, vt reliqui, specie nequaquam distingui ab illo, nec à differente, bene tamen à cæteris orbibus; stellæ verò fixas ab octaua sphaera non differre. Ita docent Patres Conimbricenses 2. de cælo, c. 7. quæst. 1. art. 2. de Sole verò dixerant cap. 5. quæst. 2. æquè probabile esse à suo orbe discerni, & specie distingui. Primum probant, quia cæli, sicuti elementa, specie distinguuntur pro ratione situum, & locorum. At planetæ, epicycli, ac sphaeræ differentes, eundem situm inter se habent, idemque percurrunt spatium, secus inferiores, aut superiores orbés: igitur illa inter se eandem habent speciem, ab his

verò diuersam. Secundum, & eadem ratione, & argumentis primæ sententiæ fulcitur; quod tamen fatentur hi Doctores esse contra Dium Thomam.

Verior tamen nobis semper visa est sententia Diui Thomæ, 2. de cælo, lectione 10. dubio 2. Soncinatis 1. Metaphysicæ, quæst. 10. Fonseca tom. 2. Metaphysicæ, quæst. 1. ad 3. Patris Molinæ 1. parte, tractatu de operibus dierum, disputatione 15. & aliorum, astruens specificam distinctionem inter quodlibet astrum, seu planetam, & suum orbem totalem, aut partialem. Quæ sententia infertur, & probatur efficaciter ex his, quæ diximus cum pluribus Doctoribus, lib. 1. cap. 2. quæst. 8. videlicet, materias cælorum inter se specie differre ex diuersa ratione formali respicienti proprias formas, & alias cælos fore corruptioni obnoxios, quod eodem prorsus modo sequitur, si aliquæ sphæræ discontinuæ, seu astra eiusdem speciei constituerentur, vt legenti ibi dicta constabit: esset enim materia huius sphæræ capax formæ alterius incomparabilis cum priori in eadem materia, ac proinde ex natura sua hæc sphæra esset corruptibilis. Quod si materiæ quorumlibet orbium cælestium & astrorum specie differunt, potiori iure diffidebunt formæ, & composita, quæ à formis speciem desumunt. Hic etiam vim habent, quæ quæst. 4. præcedentis tractatus adduximus, ad probandum sphæras cælestes specie inter se differre. Et confirmatur primò, de sphæralis, & planetis discontinuis, quia ideò hæc corpora inter se, & à suis orbibus realiter discernuntur, quia diuersis motibus ciuntur, quibus diuersas exhibent apparitiones: sed inde etiam infertur, diuersitas specifica corporum inobilium: ergo hæc adstruenda est inter illa. Minor probatur, quia eidem corpori simplici secundum speciem solum potest naturaliter conuenire vna acquisitio termini, & vnus modus acquirendi, & existendi in illo, vt constat in elementis, & eorum partibus, quarum quælibet separata, sicut & coniuncta, ad idem vbi, & per eandem lineam, ac eodem modo semper nata est tendere. At sphæræ cælestes, orbiculi, & planetæ, per diuersam lineam ex natura sua agitari exigunt, & diuersam termini acquisitionem, seu diuersum acquirendi modum perpetuò habent, ac alia corpora cælestia, à quibus realiter distinguuntur: igitur ab eisdem differunt specie; siue enim motus ipsi specie inter se diffideant, vt fatentur Patres Conimbricenses, siue secus, sufficienter indicant specificam inobilium corporum maximè simplicium, distinctionem. Et certè potior distinctionis ratio petitur à diuersitate motus, quàm à situum, & locorum discrimine, vnde eam inter orbes decerpunt Conimbricenses ipsi.

Secundò in vniuersum confirmatur, quia vnicum principium discer

discernendi à posteriori diuersas rerum naturas, & essentias semper extitit propriorum accidentium, & effectuum diuersitas, quod maximè vim habet in corporibus simplicibus; sed quilibet planeta, & astrum habet accidentia propria, & inseparabilia densitatis, & luminis, ac orbis, cui insidet, & diuersus effectus, & proprius illi attribuitur: necessàriò ergo infertur astra quælibet à propriis orbibus essentialiter differre, & consequenter realiter discontinuari, & idem infertur de astris ipsi inter se, maximè de planetis, quibus diuersi effectus, & situs conueniunt: & idem dicendum est de stellis fixis, ob priores præsertim rationes, licet Pater Molina super hoc non iudicauerit in vniuersum necessarium, quod ampliùs constabit ex solutione argumentorum aliarum opinionum.

Ad testimonium Aristotelis in fauorem prioris sententiæ adductum respondetur, ipsum planè loqui de identitate generica stellarum cum suis orbibus, solùm enim contendit, eas non esse sublunaris naturæ, sed alterius quintæ substantiæ, sicut cælum ipsum, cui sunt affixæ. Ad rationem pro eadem sententia negamus antecedens primi enthymematis, & minorem syllogismi in antecedentis confirmationem adducti. Ad illius verò minoris elucidationem non defuerunt aliqui relati à D. Thoma, quæst. 67. artic. 3. qui futilibus quibusdam argumentis ducti, existimauerunt, lucem esse formam substantialem, substantialemve corpus, apud quos facilè distinguerentur astra ab sphaeris cælestibus per lucem: verùm hac via non est soluendum argumentum, verissimè enim Peripatetica schola cum Aristotele 2. de anima, cap. 7. contra Academicam tenet, lucem esse accidentariam formam, & qualitatem, cum sub aspectum cadat, remissionem, & intensiorem patiatur, & cum alia forma substantiali aëris, v. g. in eadem materia existat, quorum nullum substantiali formæ conuenire potest: lux præterea transineat perspicua corpora, & in instanti per totum spatium portigitur, quæ corpori planè repugnant. Alij verò fatentur argumento ex diuersitate luminis non posse colligi distinctionem astrorum (Sole excepto) à propriis orbibus: existimant enim, quidquid luminis singulæ stellæ habent, id totum à Sole haurire, quod alij ad Lunam restringunt. Horum tamen sententia falsa est. Quamuis enim contra Auicenam, & Macrobiū verum iudicemus, omnes stellas tam fixas, quàm planetas lumen à Sole mutuari, id quod de Luna fatentur omnes, & luce clarius est, cum pro vario ad Solem aspectu variè illustretur, diuersasque induat figuras, vnde idem infertur de reliquis astris. Et confirmatur, quia planetæ, quò magis Soli propiniores sunt, cò cæteris paribus magis lucent, vt in Marte, & Venere compertum est. Quapropter in medio planetarum Sol videtur

collocatus, ut inde tam illis, quàm fixis astris lumen commodè diffundant. Quamvis, inquam, hoc verum sit, non minùs verum puto, cum D. Thoma hîc lectione 10. post medium, tam stellas fixas, quàm planetas aliquid ex se lucis possidere. Si enim alicui astro ignoto lux esset deneganda, maximè Lunæ, & ideò illi præsertim eam detraxerunt auctores citati, Anaximander, Antiphon, & Cleomedes: at Lunæ nequit denegari: ergo multò minùs reliquis astris. Minor ex eo liquet, quòd dum eclipsim Luna patitur, nonnihil in ea lucis deprehenditur, cum tunc etiam rubeat, & tamen à Sole tunc temporis non illuminatur. Interdum verò pars Lunæ à Sole non illuminata nobis non apparet, quia licèt aliquid habeat lucis, nimio Solis splendore obscuratur, sicuti interdum obscurantur reliquæ stellæ, in quibus non deprehenditur defectus lucis, quia illustrationi Solis nec terra, nec aliquid aliud impedimento esse potest, & ideò omninò semper ab ipso irradiantur: & si in Venere, & Mercurio aliquis discessus lucis Solis contingit, non deprehenditur, quia valdè exiguus, & quia eorum natura lux vberior est, quàm Lunæ: in qua etiam, maximè in plenilunio, secundùm partes aliquas lucis defectus seu macula deprehenditur, quia scilicet illius partes inæqualis sunt densitatis, & densiores plus luminis reflectunt, minùs autem rariores, cum faciliorem traiectionem radiis solaribus præbeant.

Nos igitur ad prædictam minorem fatemur, densitatem, & propriam astrorum lucem accidentia esse, ac proinde non constituere diuersitatem specificam illorum inter se, & à propriis orbibus, nec illam effectuum dissimilitudinem causari: contendimus tamen eam distinctionem supponi, & ex his à posteriori deduci, non quia lux, & densitas vnius astri non sit eiusdem speciei cum densitate, & luce alterius, aut ipsius orbis, immò & cum sublunariis, ut bene D. Thom. cum aliis, in 4. distinct. 44. quæst. 2. articulo 4. nullum enim extat specifici discriminis fundamentum, cum eiusdem prorsus rationis in se formaliter omnia lumina appareant. Immo contrarium conuincitur ex eo, quòd lumen reliquorum astrorum, & inferiorum etiam corporum intenditur à lumine Solis, quæ verò se intendunt, in eandem coeunt entitatem, & rationem, ut per se patet. Illam ergo distinctionem astrorum inter se, & cum orbibus colligimus ex eo, quòd astra singula ex natura sua specialia exigunt accidentia, seu specialem accidentium intensiorem, & modum, & speciales effectus diuersæ etiam speciei, quæ illorum orbibus non conueniunt ex natura sua, quod sufficientissimum signum distinctionis est (etsi alia supradicta non extarent) præsertim in corporibus simplicibus, quale est cælum. Hoc enim solo fundamento diuersitatis accidentium, aut intensiorem illorum naturalis, ab omnibus distinguuntur.

tur specie elementa, licet aliter fortè contingat, in partibus corporis mixti. Quod verò additur de diuersis accidentibus, & effectibus aquæ, friuolum est, quia illa diuersitas non prouenit aquæ à natura, & propria forma, sed ab extrinseco, secùs quàm in præsentia. Ex quibus constat ad secundam partem secundæ opinionis. Ad fundamentum primæ respondetur, diuersitatem illam situum esse signum distinctionis, præcipuam tamen esse à nobis assignatam, desumptam ex accidentibus, & effectibus propriis.

QVÆSTIO II.

Virum calor à luce, vel motu ortum ducat.

AD enodandam mentem Aristotelis in hoc capite, hanc difficultatem versant illius interpretes hoc loco. Ex cuius solutione constabit ad argumentum pro priori sententia factum quæst. 3. prioris tractatus, in caput 3. libri secundi. Et circa priorem quæstionis partem, Durandus in 2. distin. 14. quæst. 1. singulariter existimauit, lucem sua vi non posse calorem producere. Cuius placitum hoc modo firmari potest, quia calor est prima qualitas; igitur ortum non ducit ab alia qualitate, maximè cum non appareat, quomodo in virtute lucis contineatur; & aliàs omnia corpora lucida calefacere, cuius oppositum constat in aliquibus astris, quibus virtus infrigidandi tribuitur, & in aliquibus corporibus sublunaribus, vt gemmis, & similibus.

Opposita tamen sententia in schola recepta communi calculo Doctorum cum Arist. 1. Meteororum cap. 3. & sæpè alibi, & D. Thoma hîc, & aliis locis, & quotidianis experimentis euidenter suadetur. Nullus enim non est expertus, inferiora corpora Solis luce caleferi, & ideò illius accessu, & recessu, æstatem, & hyemem contingere. Reflexione item radiorum solarium magis incalescit hæc infima aëris regio, & alia corpora opaca, quæ vt impediunt radiorum transfectionem, sic eos supra seiplos retorquendo, occasionem intensioris caloris præbent, vsque adeò, vt aliquando ex radiorum coitu ignis euadat; quod tunc præsertim euenit, cum per lineas magis rectas radij retorquetur, magisque variuntur. Et eadem caloris productio in aliis luminosis experimento constat, vt videre est in lumine iaculato à Luna, propter quod Aristoteles 4. de partibus animalium, capite 5. asseruit, noctes plenilunij tepidiores esse, eò quòd Luna tunc vberiore ex se lucem refundit. Et 4. de generatione capite 2. dixit, sicut Sol per annum accessu, & discessu, æstatem, hyememque facit, ita Luna per mensem incremento, & decremento luminis, inde scilicet intensiori, & minus intenso calore producto. Quod equidem naturæ valde consentaneum fuit, vt præstantissima

qualitas primi corporis, hoc est, cæli, vim haberet producendæ qualitatem nobilissimam inter sensibiles corporibus alterabilibus propriam. Nullum enim est inconueniens, quod prima qualitas corruptibilium corporum, à qua aliæ secundæ oriuntur, ab alia qualitate propria corporis perfectissimi, & incorruptibilis ortum ducat, & in eius virtute eminenter contineatur, & per hoc constat ad argumentum pro Durando factum. Ad illud verò, quod tanquam absurdum infertur, fatemur ingenuè, omnia, quæ lucem obtinent, habere, quantum ex se est, vim aliquid caloris imprimendi in ea corpora, ad quæ lumen transmittunt: verum id sæpè non deprehenditur, aut præ sua tenuitate, quia lumen etiam perexiguum est, aut quia simul per alias virtutes frigus, seu humorem in eisdem corporibus producant, ut de corporibus cælestibus asserit perspicuè D. Thom. hîc lectio 1. versus finem, his verbis: *Dicendum est ergo, quod omnia corpora caelestia secundum communem virtutem luminis habent calefacere, sed secundum alias proprias virtutes singulis corporibus attributas, habent non solum calefacere, & infrigidare, sed etiam omnes alios effectus corporales efficere in istis inferioribus.*

Maior difficultas est in secunda quæstionis parte definienda, quamuis enim constitutum sit, & sensu exploratum, corpora motu locali incallescere, huius tamen nodum enodare, & rationem reddere adeò est difficile, ut in duodecim sententias Philosophorum agmen distraxerit. Itaque rem ipsam tradit Academica schola cum Platone in Theæteto, Periparetica cum Aristotele hoc cap. 7. textu 42. 1. Meteororum, cap. 3. Sectione 5. problematum, quæst. 13. & Diuo Thoma, lectione 10. cum communi scholasticorum assensu, id quod quotidianis experimentis notum est. Videmus enim tritu duorum lapidum, & ferri, ac silicis conflictu, ignem elici. Item globos plumbeos è tormentis explosos per aërem incallescere, & interdum liquefieri; sagittas, molas farinarias, curruum axes, equorum soleas, & aërem celeri raptu percussam, calefieri, splendere & igniri. Denique ipsa aqua maris suapte natura frigida crebro ventorum statu agitata intepescit, & animalium membra latione mota, calorem concipiunt. Si quando verò per motum localem frigus conciliamus, id ex accidenti eueniet, aut quia calidi extrinseci præsentiam, seu reflectionem radiorum hac via vitamus, aut quia aër ambiens à nobis calefactus discutitur, alio frigidiori succedente, ut in respiratione, v. g. aut denique, quia motionè vapor calidus exhalatur & dissipatur, & natua frigiditas, aut ambientis corporis incalescit. Semper igitur ex se motus localis est aliquo modo causa caloris, licet formaliter non sit calefactio, cum formaliter tendat ad præsentiam, & inde speciem sumat; ac proinde specie distia

distinguantur, sicut termini ipsi calor, & præsentia. Quod constat ex Aristotele in Antepredicamentis, & 5. Physicorum, capite 1. & 2. & ex omnibus aliis ibidem, qui omnes statuunt, lationem non esse per se causam caloris, quia utpote entitas imperfectissima, nequit continere illum formaliter, aut eminenter in se, neque in proprio termino, qui etiam est entitas modalis imperfecta, & nullius rei efficienter actiua.

Circa rationem verò assignandam huius manifesti experimenti, missis pluribus sententiis, quæ longè ab scopo veritatis aberrant, & eas percurrere operosum nimis, & inutile esset, prima earum, quæ magis ad veritatem accedunt, asserit, calorem motu editum oriri à calore virtuali, inhærente corporibus, quæ fricantur. Ita philosophatur Durandus in 2. distinctione 15. quæstione 3. cum aliis quibusdam maximè recentioribus. Verùm hæc sententia non est vniuersim vera. Quamuis enim aliqua sublunaria corpora huiusmodi calorem virtualem contineant, quæ motu quasi excitata calefiant, in omnibus tamen corporibus sub Lunæ orbe contentis, illum calorem constituere, fundamento rationis caret, immò rationi aduersatur, cum aliqua sint corpora solida, aquea, vel terrea, ac proinde eximè frigida, ex quorum attritu calor oritur. Oportebat etiam ostendere, quomodo calor ille latens, & virtualis per lationem excitetur, vel augeatur, quod Durandus non explicat, & ideo quæsitam rationem non est assequutus. Quam ut inueniat Thom. Garbius 2. libro suæ summæ, tractatu 2. quæstione 6. in quolibet mixto partes dissimiles agnoscit, alias quidem subtiliores, & calidiores, igneas scilicet, & æreas, alias verò magis densas, ac frigidas, plus terræ, & aquæ retinentes. Hoc autem posito existimat, mutua corporum collisione partes illas igneas, & æreas, à centro ad circumferentiam corporis euocari, & per distractionem, & rarefactionem quasi diuelli à partibus frigidis, & sic ipsas calidiores apparere, & ad alia corpora contigua calorem fundere. Sed nec positio placere omnino potest, quia insufficienter rem explicat, & falsa quædam assumit. Nam in primis nequit cum fundamento assignari in quibuslibet mixtis, ut in crystallo, & similibus, ea partim dissimilitudo, quæ ad hoc sufficiat. Liberè enim omnino, & contra rationem supponitur, omnia mixta plus caloris habere in partibus abditioribus, quam in extrimis. Et quidem Garbius videtur sentire, formas elementorum actu latere in mixto contra Aristotelem, & communem sententiam à nobis corroboratam in libris de generatione. Denique licet admitteremus in qualibet re mixta partes illas dissimilares ab hac sententia excogitatas, & ex eis abditiores esse calidiores, nequit intelligi, qua ratione internæ partes solidorum corporum non

viuentium (de fluidis nanque, & viuentibus alia est ratio) exteriorum attritu , è centro ad circumferentiam euoluantur , cum aliis extimis continuè sint , & eas non possint penetrare ; neque sicut fluidæ propriam in corpore positionem cum aliis muraret : adhuc ergo superest , adæquatam huius effectus causam assignare.

Albertus Magnus 1. Meteororum tractatu 1. capite 15. & Zimara in suis Theorematis, propositione 45. eiusdem rei causam inuestigantes, eam reddidère, quia scilicet partes corporum, quæ colliduntur, rarefiunt, & media rarefactione excitatur calor, ad quem præuia dispositio est raritas. Verùm neque hi Doctores quæsi causam attigerunt, non enim apparet qua ratione inducatur raritas per motum localem in corporibus solidis, nec minori hoc indiget explicatione, quàm id, quod inuestigamus, & saltem non introducitur tanta raritas, quæ ad hoc sufficiat, cum sensu non deprehendatur in his corporibus statim post collisionem. Et ideò Partes Conimbricenses in hoc cap. 7. quæst. 6. artic. 2. cum aliis, quos ipsi citant, quibus sententia Alberti aridet, addiderunt, per motum non solum raritatem induci in corporibus solidis se percutientibus, sed etiam, & maxime, in aëre intercepto, & aliso, quam raritatem calor consequitur. Sed tamen hoc modo, licet assignetur maior raritas, nondum ostenditur sufficiens causa illius, nedum caloris excitati per lationem, quam quærimus, quia adhuc difficile, & inexplicarum relinquitur, quænam sit causa raritatis. Præterea, licet raritas assecla sit caloris, tamen non ipsam calor, sed calorem ipsa consequitur iuxta communem sensum, utpote qualitas secunda ex permixtione caloris, & aliarum primarum qualitatuum ortum ducens, quæ utpote qualitas secunda specie distincta à calore, ex eo longè imperfectior, neque illum producere, nec formaliter, aut eminentet continere, ut constat ex Arist. 4. Phys. text. 87. Et si dicatur cum Partibus Conimbr. non sequi calorem ex raritate, ut ex causa, sed ut ex comite: igitur adhuc est superassignanda causa caloris, quæ tamen ab his non assignatur. Et ulterius, calor non solum est comes raritatis, sed illius causa, vel potius habens se ex parte causæ, ut dispositio præuia: igitur non potest esse effectus raritas, aut comes præuius: alia ergo causa inuestiganda superest.

Denique D. Thomas hoc loco lect. 10. asserit, ideò motum localem eam habere prærogatiuam, ut calorem efficiat, quia est omnium motuum primus, & auctore Arist. 10. Metaphys. capit. 4. primum in vnoquoque genere est causa reliquorum. Hæc tamen Angelici Doctoris coniectura, seu congruentia verissima est, etsi Theorema illud Aristotelis, ut alibi diximus, intelligi debeat de primo in aliquo genere causalitatis: superest tamè explicandum, qua

qua ratione id contingat, & ideo alia verba inferius subiunxit
 Dñus Thomas, quæ in veriori huius rei explicatione expendemus. In qua facilius sanè est, quid alij dixerint impugnare, & quæ
 non sit adæquata ratio ostendere, quàm proprium sensum, & perspicuam huius rei rationem demonstrare. Vt autem vtrunque,
 quantum fieri potest, dilucidè assequamur, aliquot sunt conclusiones subiiciendæ.

Prima conclusio: motus localis in animalibus, peculiari ratione, est causa caloris, quatenus occasione lationis, maior spirituum vitalium, & animalium copia, ad externas animantium partes adueniat. Id quod duplici de causa videtur contingere: primò, quia facultas motrix huiusmodi spirituum ministerio utitur ad motionem exequendam, & ideo vberiore spirituum copiam tunc temporis attrahit. Secundo, mediante motu locali, animantium pori protrahuntur, & liberiores spiritibus aditum relinquunt: ex quo fit, vt prolixiori motu animalia defatigentur, ob spirituum scilicet dispendium. Cùm igitur huiusmodi spiritus calidissimi sint, hinc prouenit, vt eorum interuentu partes animalis incallescant. Accedit, quòd etiam ad has partes, dum moventur, plus sanguinis, & spirituum vitalium in se recipit, quæ vt in se multum caloris habent, in partes sibi proximas transmittunt.

Secunda conclusio: ex mutua corporum sublunarium collisione, tanquam ex conditione, raritas ortum ducit. Hanc conclusionem supponunt communiter Doctores, vt vidimus, referentes varias sententias, & probat experimentum ipsum. Constat enim corporum partes aëris præfessim, mutua attritione, nonnihil inter se distrahi, & maius occupare locum, quod aliter, quàm per rarefactionem contingere nequit, cùm id eueniat sine additione quantitatis: id quod ex sequenti assertionem amplius intelligetur, & roborabitur: Dixi, tanquam ex conditione, quia sicut non potest latitudo esse causa, seu causatio propria caloris, sic neque raritatis, cùm, per se solùm tendat ad vbi, tanquam ad proprium terminum, qui specie, vel genere à raritate dissidet. Quia igitur motu locali variè agitantur partes mobilis, & maximè corporis medij, ratione cuius agitationis diuersimodè disponuntur in ordine ad primas qualitates, ex quibus raritas pullulat, hinc fit, vt medio motu locali, tanquam conditione consurgat raritas: ex quo fit, priorem esse productionem caloris, quàm raritatis, vt diximus, tantum abest, vt raritas sit causa, aut præuia conditio ad effectum caloris.

Tertia conclusio: motus localis dicitur causa caloris, eo quòd medio motu partes minùs calidæ, & siccæ distrahuntur, relictis calidioribus, & siccioribus, in quibus proinde intensior calor

calor deprehenditur, & producitur, & per quas in corpus continuum transmittitur. Quæ conclusio prius explicanda est, deinde probanda. Pro cuius elucidatione in memoriam reuocandum est id, quod 2. libro de generatione diximus, aërem elementarem esse calidum, ferè in summo gradu, & valdè rarum, quamuis continua vaporum, exhalationumque terrestrium permutatione, frigiditatis & densitatis multum imbibat. Præterea, cum ex occurso duorum corporum calor, seu ignis consurgit, aër interceptitur, & attenuatur; quod verum est, siue corpora sint distincta ab aëre, siue sint partes eiusdem aëris solidiores, quæ mediis tenuioribus se per motum offendunt. In corporibus item solidis communiter sunt duo genera partium, aliæ crassiores, in quibus viget frigiditas terrea, aliæ minùs crassæ, & magis disseccatæ, in quibus calor, & siccitas, illius assecta pollent. Licet hoc non eodem modo in omnibus corporibus mixtis reperiatur, & ideo aliqua corpora dicuntur terrea, vel aquea, alia ignea, vel aërea: non quia in illis elementorum formæ maneant, ut aliqui decepti putarunt; sed quia alicuius elementi qualitates propriæ in aliquibus mixtis, aut in quibusdam eorum partibus magis telucent, in aliis verò proprietates elementi alterius.

His igitur prælibatis nostra conclusio probatur hac ratione: motus localis est causa caloris: at hoc non potest haberi vlllo ex his modis, quo id explicant relatæ sententiæ, bene tamen in sensu nostræ conclusionis: igitur iuxta illam solum verum habere potest propositio illa ab omnibus recepta. Minor quoad priorem partem liquidò constat, ex refutatione aliorum modorum explicandi prædictum axioma. Quoad posteriorem verò probatur primò, quia nulla alia probabilis via superest, hoc explicandi: deinde roboratur ex ipsa rei natura, quia quoties duo corpora solida sibi inuicem occurrunt media latione, quò magis approximantur, magis arteritur aër interceptus (in hoc enim contingit, motum esse causam caloris, vel in hoc maxime) hoc est, magis segregantur, & expelluntur partes illius crassiores, & aduentitiæ, terreae scilicet, & aqueæ, & peregrinæ impressiones, quæ omnes, utpote magis densæ, magis impediunt occursum illorum corporum, & fortius ab illis impelluntur, & detruduntur, relictis interim prioribus & disseccatioribus partibus aëris: sed in his partibus aëris viget calor propè summus, natura sua, & si aliquid caloris ab extrinsecis impressionibus sublatum fuerit, illis remotis in statum pristinum à propria forma per naturalem emanationem se reducunt: igitur ablatis impedimentis, intense percipietur calor in his partibus purioribus; ac in corporibus ipsis localiter motis similis calor in paulò minori intensione ab aëre produce

producetur, & idem est de siccitate calori congenita, & affecla raritate: quibus mediis accedente contrariorum remotione forma ignis nonnunquam introducit in ipsa præsertim materia aëris, qui frequenti exhalationum siccarum appulsu, & commixtione, ab ingenita summa humiditate, qua igni posset resistere, detruditur, & sic in flammam nonnunquam conuertitur, quæ frequentius verus ignis non est, sed particulæ aëris nimis raræ & siccæ. Quæ quasi segregatio, & euolutio partium optimè potest in aëre contingere, cum fluidus sit, fluxui, & refluxui obnoxius, cuius aliquæ partes, præsertim extraneis infectæ halitibus, facile resiliunt, & à corporibus solidis discedunt. In aliis autem corporibus non ita facile id euenit, ut cuique videre est: contingit autem facilius caloris, immò & flammæ generatio ex percussione aliquorum corporum, ut chalybis, & silicis, v. g. quia ea aptiora sunt ob ingenitam duritiem, & angulorum distinctionem, ad prædictam aëris percussionem, & attritionem, seu attenuacionem in puriores, & minores partes. Accedit, quòd aliquando ipsa corpora non parum caloris habent in partibus minùs crassis, licet inmixtum cum nimia densitate, & frigiditate in partibus crassioribus: attritu autem alterius corporis hæ partes hebetiores ex parte diuiduntur, cum in illas, ut quæ magis illi contrariantur, fortius agat corpus durum, occurrens, manentibus aliis, quæ & in se sunt calidiores, & ad calorem suscipiendum magis aptæ: quæ distractio, & diuisio partium laxiori, & in propria significatione videtur appellari nonnunquam à Doctoribus raritas, seu rarefactio. In quo sensu possunt benignè interpretari aliqui ex Doctoribus relatis suprâ, & hanc viam exponendi commune illud axioma manifestè videntur ingressi Aristoteles, & Diuus Thomas, ille in hoc capit. 7. illis verbis: *Caliditas ab ipsis (id est, stellis) lumens, adèò fit, quia aër ab illarum motione fricatur, seu attrito aëre ab earum latione.* Diuus verò Thomas ibidem dicit, hoc contingere per contritionem, compressionem, siue confriktionem aëris, non ita ut calefactio sagittarum, v. g. sit causa calefactionis aëris, sed è contrario, ut Alexander exposuit Aristotelem, cuius rationem reddit sanctus Doctor, quia scilicet aër est propinquior naturæ ignis: igitur ex eo apertè putant motum esse causam caloris in aëre, quia per illum magis relinquatur aër suæ naturæ viciniori igni, quod non potest aliter euenire, nisi modo à nobis explicato, & satis indicato à Diuo Thoma & Aristotele. Et quòd non proueniat calor ex præcedenti aliqua raritate tradit sanctus Thomas eadem lectione his verbis: *Alteratio autem secundum omnes alias qualitates causatur ex alteratione primarum quatuor qualitatum, inter quas dua ætina, scilicet, calidum, & frigidum, sunt priores.* Motus igitur localis est causa caloris

caloris vniuersaliter, per accidens, & vt applicans causam per se, quoties per ipsum partes aëris medijs attenuantur, & magis ab extraneis, & crassioribus purgantur intimius applicatis, vt explicuimus, & medio calore in causa est raritatis: in animalibus verò alia præterea est via concipiendi calorem, vt explicuimus; & hanc rationem explicandi communem doctrinam de calore orto ex motu locali subodorati sunt aliqui Doctores ex relatis, etsi nullus id, quod mente concepit, planè expresserit.

CAPVT VIII.

Textus Aristotelis.

Cùm autem & stella transferre videantur, & totum calum, &c.

Brevis expositio textus.

IN hoc capite agit Aristoteles alteram quæstionem ad stellas pertinentem, & statuit, eas non moueri per se, sed motu suorum orbium circunuehi, id quod tribus rationibus concludit. Et hæc est totius capitis summa. Prima ratio est, stellæ, & cælum circunvoluuntur perpetua conuersione: sed hoc nequit contingere, stella, & orbe quiescentibus, cùm id aduersetur manifestæ experientiæ; neque vtroque motum subeunte, quia aliàs stella, æqua velocitate moueretur cum orbe cui coniuncta est, quod probat esse absurdum, quia in naturalibus, quò vnunquodque maius est, eò velocius motu proprio mouetur, vt in pergrandi saxo comparatione lapilli constat. Deinde hæc æqualitas nequit provenire necessitate naturæ, quia si stella minoris orbis in maiori ponatur, velocior erit, & è contrariis: neque euenire potest fortuito, quia sic non in omnibus circulis eodem modo se res haberet, & quæ casu eueniunt, sunt præter naturæ ordinem. Neque denique rationi congruit, vt orbes quiescant, & moueantur stellæ, quod ex eisdem absurdis probat, & quia cælum dissecarent: consequens ergo fit, stellas non cieri proprio motu, sed infixas suis orbibus ab eis circunduci.

Secunda ratio sic procedit; si stellæ proprio motu cierentur, cùm sint rotundæ, & globosæ figuræ, vt aspectu ipso apparet, & omnes concedunt, aut is motus esset conuersio, hoc est, in eadem parte, in eodemque loco; seu volutatio, id est, in orbem cum mutatione situs totius mobilis, & alternata facie: at neuter est, quia per conuersionem nūquam aliò transferrentur contra experientiam, & per volutationem non semper eadē facies appareret, cùm tamen aliter contingat. Quæ ratio solum contendit, non moueri stellas orbibus totalibus immotis, non tamen obstat, quominus in suis epicyclis motu distincto à totali orbe deferantur. Denique non mouentur astra motu ptoressiuo, cùm eis ad eum motum organa necessaria non tribuerit natura, cùm tamen in necessariis

sariis non deficiat, & ad eundem inutilis sit figura globosa, qua prædix sunt stellæ. Superest ergo, ut stellæ suo orbi sunt continuæ, & motu illius ferantur.

CAPVT IX.

Textus Aristotelis.

Ex his autem patet id, quod dictum est à quibusdam, &c.

Breuis expositio textus.

Ostendit Aristoteles in hoc capite astrorum latrone concentum aliquem non effici. Diuiditur caput in duas partes: in priori Pythagoreorum dogma cum suis fundamentis refert: in posteriori illud confutat. Placuit itaque Pythagoreis astrorum motu sonum temperatum, & concentum quandam effici; quia apud nos is sonus euenit ex corporibus motis, & eò maior, quò plura sunt corpora grandiora: & celerius mota: igitur id eueniet in orbibus cælestibus, licet huiusmodi concentus à nobis non percipiatur, ob assuetudinem; illi enim ab ipso ortu assuefacti sumus: sicuti accidit artificibus æris sonum malleorum non distinguuntibus. Verum, inquit Aristoteles, hoc concinne & musicè dictum est, non tamen verè & philosophicè, quia præterquam quòd absurdum est asserere, nos eiusmodi sonum non percepturos, non posset non hæc inferiora vehementer lædere: siquidem minor sonus tonitruui non solum animantia, sed & durissima saxa interdum frangit. Secundo id ipsum coarguit, quia quod in alio fertur & per se non mouetur, sonum non facit, ut patet in partibus nauigij, firmiter coherentibus; at astra feruntur in sphaeris cælestibus illis affixa, ut superius ostensum est: non ergo efficiunt sonum, quem certè efficerent, si aërem, vel ignem suo motu rumperent. Ad naturæ tamen prouidentiam spectat, ne detur talis strepitus, qui non posset non omnia apud nos turbare.

CAPVT X.

Textus Aristotelis.

De ordine verò ipsarum, quomodo quaque disposita est, &c.

Breuis expositio textus.

Asturus Aristoteles de stellarum, planetarum præsertim, ordine, situ, & distantia, ad Astrologos horum considerationem remittit, quorum partes sunt, non Philosophi, magnitudines, portiones & distantiam scrutari. Subiungit breuiter id, quod ad Philosophum spectat, scilicet, quanto Planeta altior est, & primæ sphaeræ propinquior, tanto proprium ipsius motum

motum tardiores esse; minus verò, quò magis distat, inuerso tamen ordine contingit in motu, quo à prima sphaera rapiuntur.

CAPVT XI.

Textus Aristotelis.

At, qui figuram vniuscuiusque stellarum rotundam, &c.

Breuis expositio textus.

Intendit Aristoteles hoc capite probare, singulorum syderum figuram esse rotundam, id quod ex dictis satis liquebat, cum eadem syderum, & sphaerarum sit natura, ac proinde eadem affectio, & figura. Id verò probatur duplici ratione. Prima, natura nihil frustra facit; igitur cum stellæ haud aptæ sint moueri per se, eanrillis figuram tribuit, quæ minus apta sit ad motum progressuum, hæc autem est rotunda, cum nulla organa admittat. In quo non committit circulum vitiosum Aristoteles, quia vt aduertit Diuus Thomas hic, antea non probauit Aristoteles, stellas non moueri præcisè, ex eo, quò habeant rotundam figuram, sed aliis etiam rationibus. Secunda ratio: eadem est figuræ ratio in Luna, & in reliquis astris: atqui Luna est rotunda, quia cum crescit, & decrescit, arcus similitudinem refert, & cum Sol Lunæ interpositione obscuratur, concæuus appareat: igitur omnia astra rotunda sunt.

CAPVT XII.

Textus Aristotelis.

Cum autem duæ sint dubitationes, de quibus quinis, &c.

Expositio textus.

IN præsentī capite duas proponit Aristoteles quæstiones discussiendas, quod in duas præcipuas partes diuiditur. In priori reuerentis, & arrogantis deprecata suspitione proponit dubitationes, difficilesque reddit, in posteriori easdem dissoluit. Ad primam igitur accedendo partem, quærit Aristoteles, quare errantes stellæ non eò pluribus motibus cientur, quò magis à primo orbe distant, cum hoc videatur rationi consonum, vt cum prima sphaera vna tantum motione feratur, proxima inferior rapiatur duplici motu, & alia triplici, ac ita reliquæ deinceps: & non potius aliqui inferiores orbes paucioribus agitentur motionibus, quàm superiores nonnulli, vt Sol, v. g. tribus tantum motibus fertur, & tamen alij situ superiores planetæ quatuor cientur motibus. Deinde rursus quærit Philosophus, cur supremo orbi tam insignis, & à nobis incomprehensibilis astrorum multi

multitudo insideat, inferiorum verò singulis singula tantum, non seruata in hoc proportionem debita. In secunda parte capitis, quæstionibus iam satisfacit, & prius priori, cuius responsio, multis obscure satis prælibatis, sic breuiter formari potest. Corpora cælestia, utpote vniuersales rerum omnium causæ, in eum finem agitantur, ut sublunaris mundi effectus in lucem edant, & tueantur: igitur ex hoc fine & non ex suis ordine, plures, paucioresve motus sortiri debent: ac proinde loci dignitate non obstante vnusquisque globus iis motibus exigit circumagi, quos influendi efflagitat ratio, qui pro singulis spheris ab Astronomis numerantur. Posterioris quæsti triplicem rationem assignat Aristoteles: prima desumitur ab excellentia primi orbis, proueniente à perfectiori intelligentia motrice, & à causalitate in inferiora vniuersaliori; secunda est, quia voluit natura stellarum multitudine compensare motuum multipliciter, quam inferioribus spheris præ omnium prima contulit. Tertia denique, quia si in orbibus inferioribus essent plures stellæ, non esset proportionata virtus, & impulsus primi motoris communi lege primo mobili impressus, pro tam perfectis orbibus secum rapiendis.

Q V Æ S T I O I.

Quomodo astra moueantur.

EX iis, quæ Aristoteles, his quinque proximis capitibus tractat, aliqua adeò perspicua sunt, ut altiori discussione non indigeant: alia ex superius dictis liquidò constant, non pauca ad Astronomos spectant, ipso Aristotele testante. Reliqua autem vnica hac quæstione quantum satis fuerit, perstringemus, prius examinantes, an stellæ moueantur, deinde de iis, quæ motui astrorum accidunt, disseremus.

Et circa priorem partem, non defuerunt, qui existimauerint, omnia astra in orbem peragi immoto cælo. Constat enim vel ipsis oculis astra moueri, secus de orbe ipso; quod contingere potest, sicut immota aqua euenit motus piscium in mari. Dicendum tamen est primò, orbis cælestes simul cum astris moueri. Hic est communis sensus Doctorem vtriusque scholæ. Philosophicæ, & Astronomicæ, & ideò nullū in speciali referre oportet. Cuius asserti efficacissimum fundamentum est, quia si stellæ immoto orbe illum per lationem peragrarent, planè sequeretur, cælum esse corruptioni obnoxium aduersus suprà dicta ex communi sensu: ergo non ita contingit. Illustratur sequela, quia stellæ nequeunt orbem perneare per penetrationem, cum vtrunque sit corpus quantum, cuius naturalis affectio est impenetrabilitas: igitur facta ipsius orbis diuisione, & dissecatione, ut infert Aristoteles, cap. 8. quæ planè incorruptibilitati

repugnat, cui non minùs aduersatur, nunc orbem cælestem ratiocinere, nunc densari: utrunque enim in sola corpora corruptioni obnoxia conuenit, & quantumuis rarefiat, non potest astro aditus, seu transitus patere, sine penetratione, aut scissione partium, ut per se constat. At confingeret non nemo, in cælo quoddam quasi canales, quibus illabantur astra. Verùm hoc figmentum facilè falsitatis conuincitur, nam & sine ullo fundamento hanc cæli peregrinam constructionem mente architectaretur, cum altiori alia cælum constet, & contra rationem: nam vel canales illi essent oppleti aliquo corpore, vel secùs: si hoc detur, dabitur & vacuum naturaliter contra naturæ ordinem, & communem sensum: si aliud, aut illud corpus esset sublunaris naturæ, aut cælestis; non primum, quia iam esset in cælo corruptibile aliquid, & violentum, quod proinde non posset ibi perpetuò conservari, & spatium relinqueret: non posterius, quia cum illud corpus esset eiusdem naturæ cælestis, cum orbibus, qui solidi sunt, ut suprà probauimus, solida etiam naturæ erit, ac proinde inutile ad spatium per fluxum replendum. Accedit, quod cum astra non semper eadem incedant via, sed diuersa valde, ut Astrologi admonent, totum orbem infinitis pæne riuulis intercidi necesse foret, quod soliditatem, ac per consequens incorruptibilitatem cæli de medio tollit. Ex quibus fundamentum partis oppositæ solo manet æquatum.

Dicendum est secundo, astra firmamenti non alio, quàm motu proprii orbis moueri, & idem est de planetis, respectu orbium partialium, quibus insident. Hoc assertum quoad primam partem probauit Aristoteles ex instituto capite 8. præcedenti. Et confirmant Astronomi ex eo, quod stellæ firmamenti eundem omnino inter se seruant situm, quod certè non contingeret, si propriis motibus agerentur, & non essent orbi infixæ, ut nodi tabulæ. Et certè huius rei argumentum efficacissimum est, quod nullum extet priuati motus fundamentum, siquidem nihil in stellis apparet, quod in motum propriæ sphaeræ reduci non possit, aut etiam in conditionem, seu diuersitatem mediij, per quod visuntur, quæ etiam probant de motu errantium syderum, relato ad peculiare orbis eà differentes, qui eccentrici nuncupantur, ut consideranti patebit. Nec ullum est argumentum distinctionis motuum, cum eo præcisè hæ sphaerulæ eccentricæ distinctæ constituentur, ut diuersæ, aspectus planetarum, & distantia inter se, & à terra, cum motu suorum orbium stare possint: (loquor de motibus circularibus planetarum: an verò eorum aliqui ulterius ciantur cum suo epicyclo, Astronomis discutiendum relinquimus.) Hoc tamen discriminis versatur, inter astra firmamenti, & errantia syde-

ra, quòd illa eodem, quo totalis orbis circumaguntur motu. Planetæ verò licet latrone partialis sphæræ circumferantur, diuersa tamen à latrone orbis totalis: propter quam nunc magis, nunc minùs à fixis stellis, & terra distant, & errantia nuncupantur.

Hic tamen animaduertendum est, cum Aristoteles capite 8. citato, etsi vnquam alibi asseruit, stellas esse orbibus propriis continuas, non loqui de continuitate strictè sumpta, quæ reperitur inter ea, quorum vltima sunt vnum, sed laxè pro coniunctione, & similitate inseparabili, etiam sine vnione. Colligit enim illam ex eo, quòd non mouentur stellæ motu distincto à suis orbibus, ad quod proculdubiò sufficit inseparabilis coniunctio sine vnione propria, nec alia inde infertur, & suprà probauimus omnia astra à suis sphæris distingui specie, ac proinde non continuari.

Ex dictis constat Pythagoræ; & ipsius auditorum dogma, de sono, seu concentu astrorum, figmentum esse, & vt ait Basilijus homilia 1. Hexameron, imposturam veteratoriam, & ruinosa carie perflaccidam: nam præterquam quòd incredibile prorsus est, tam acrem astrorum sonum à nobis non audiri, vt argumentatur Aristoteles, cap. 9. corpus, quod non per se, sed omninò infixum alteri mouetur, qualiter astra moueri probauimus, implicat edere sonum, vt ipse prosequitur Aristoteles, cuius doctrina verissima est, non solum de motu astrorum, sed etiam ipsorum orbium, quæ præter primam rationem probatur à priori, quia vt ex Aristotele diximus, 2. de anima in caput 8. quæstione 2. productio soni exigit tria corpora realiter distincta, etsi non semper discontinua, quorum duo se percutiant, resiliante altero; sit enim tantummodò sonus vel violenta percussione, vel diuisione violenta, vt omnes fatentur, & inter cælestes sphæras, non est tertium corpus, quod resiliat. Nec contingere potest diuisio, seu percussio violenta, cum inter se sint omninò contiguae, leues, & bene coherentes: igitur fictitijs omninò est huiusmodi concentus cælestis, licet alium concentum cælo non inficiemur. De quo Iob capite 38. dixit: *Concentum calis quis dormire faciet*: hoc est, vt Hieronymus ibi interpretatur, harmoniam, & pulchritudinem cælorum, qua Angeli, hominesque inuitantur, & alliciuntur ad Dei factoris laudem, nemo obscurare, impedireve potest, qui concentus nuncupatur à Boëtio, lib. 1. musicæ, capite 3. musica mundana, quæ scilicet, in nexu, consensu, ordine, ac proportionem rerum inter se sita est.

Circa posteriorem quæsti partem plura tradunt Astrologi, quorum hæc propria sunt, nonnihil tamen, prout instituti nostri ratio postulat, quàm maxima breuitate ex ipsis trademus. Et

primò perspicuè ostendunt, primum mobile suam explere circuiti-
onem ab ortu ad occasum spatio vigintiquatuor horarum,
quo motu incredibilis celeritatis secum rapit omnes inferiores
globos, etsi non pari celeritate cum ipso, & inter se. Saturnus
verò (& quod de planetis dicimus, de suis differentibus sphaëris
dictum puta) proprium perficit motum ab occasu in ortum re-
trocedendo eo modo, quo supra explicuimus, annis ferè triginta.
Iupiter item annis ferè duodecim. Mars annis ferè duobus, Sol
diebus tercentis sexaginta quinque, horis quinque, minutis cir-
citer quadraginta nouem, quod spatium annus solaris nuncupa-
tur. Venus, & Mercurius eodem ferè tempore, quo Sol suum cir-
culum peragunt. Luna denique suum conficit motum diebus
viginti septem, horis ferè octo. Vbi animaduertendum duxi, præ-
dictum cælestium orbium ordinem, & situm, manifestis Astro-
logorum obseruationibus ratum esse, ita vt in dubium vocari ne-
queat: quamuis Aristoteles, vt ex capite 12. liquet, Solem & Lu-
nam infimo planetarum loco collocauerit, sicuti alia etiam non-
nulla eodem capite asseruntur ab Aristotele, quæ longa Astrolo-
gorum obseruatione aliter se habere reperta sunt. Præterea, ex
sententia Aristotelis, vt vidimus capite 10. quò propinquiore
sunt orbes planetarum primo mobili, eò velocius diurno motu
rapiuntur; propriam verò circuitiorem tardiores habent, quod
iuxta nuper dicta accipiendum est, vt verum habeat. Cuius ra-
tionem reddit Diuus Thomas hîc lectione 15. quia scilicet mo-
tus ab Oriente in Occidentem est causa sempiternæ durationis
rerum, & ideò perfectius competere debet cælestibus sphaëris,
quò magis accedunt ad substantias spirituales compotes immor-
talitatis: alius verò motus recessus ab occasu in ortum genera-
tionis, & corruptionis patens est, teste Aristotel. libr. 2. de ortu, &
interitu, cap. 10. textu 56. & ideò naturæ rerum consonat, vt velo-
cior reperiatur in eis sphaëris, quæ ad res corruptioni obnoxias
magis approximantur. Et de inæqualitate motus rapti confirma-
ri potest, quia cum inferiores sphaëræ à prima diurno motu ra-
pantur, mirum non est, quinimmo valdè congruum, vt minùs
magis distantes impellat: minùs, inquam, quoad consumma-
tionem circulationis, spatio vigintiquatuor horarum, non quo-
ad agitationem partium; nam cum superiores vastioris molis
sint, longè maius spatium eodem tempore percurrunt. De in-
æqualitate etiam motus proprii ea potest esse congruens ratio,
quia cum sphaëræ, quò inferiores sunt situ, eò sunt minoris ma-
gnitudinis, faciliùs possunt æquali impetu velocius agitari,
quàm maiores infra primum mobile: de hoc enim alia est ratio,
propter constantem, & ratam diurnam astrorum reuolutio-
nem.

De numero verò stellarum incurrentium non fuit eadem sententia. Alij enim plures, & penè innumerabiles, alij pauciores agnouerunt. Astrologi tamen nostri temporis pugnacissimè tradunt, & se perspicuè obseruasse testantur in firmamento duas de viginti supra mille duntaxat stellas; quod verum ego existimo, si intelligatur, vt illorum aliqui intelligunt, de stellis, quæ faciliè, & quouis anni tempore notari possunt: de aliis enim, quæ haud faciliè designari queunt, verè docent cum aliis Patres Conimbricenses 2. de cælo, cap. 12. quæst. 1. art. 1. multò plures inueniri. Dixit enim Aristot. hoc capit. 12. esse penè innumerabiles, quod de numero illarum stellarum ab Astronomis assignato verificari non potest, & libro 1. Meteororum, cap. 8. asserit, aliqua esse astra, quæ certo situ deprehendi non possunt. Et idem tradit Augustinus 16. de Ciuitate Dei, cap. 23. hisce verbis: *Quando quisque acutius stellas insuetur, tantò plures videt. Vnde & acerrimè cernentibus aliquas occultas esse meritis estimatur, exceptis iis syderibus, quæ in alia parte orbis à nobis remotissima, oriri, & occidere prohibentur.* Denique vrgentiùs ex sacris litteris inferri videtur innumerabilis stellarum multitudo. Genes. 15. dixit Deus Abrahamo: *Suspice cælum, & numera stellas, si potes.* Et capite 22. *Benedicam tibi, & multiplicabo semen tuum, sicut stellas cæli, & velut arenam, quæ est in littore maris.* Et Psalmo 146. tanquam ingens Dei præconium, & specialis excellentia dicitur, *qui numerat multitudinem stellarum.* Quæ quidem omnia maiorem procaldubio astrorum numerum conuincunt, & Astronomorum in hac re autoritatem exhibent contemnendam, vt testatur Augustinus statim post verba suprâ relata hac ratione: *Postremò, quicumque vniuersum stellarum numerum comprehendisse, & conscripsisse iactantur, sicut Aratus, vel Eudoxus, vel siqui alij sunt, eos libri huius, id est, Geneseos, contemnit auctoritas.* Quæ August. verba refert, & approbat S. Thom. in cap. 15. Genes. si eius est illud opus. Astronomi autem stellas firmamenti à se perspectas diuidunt in quadraginta octo constellationes, seu imagines, vt sic faciliùs stellæ per partes distinctæ possint designari, in quibus præcipua sunt duodecim signa cælestia splendentia in Zodiaco: est verò constellatio certus stellarum numerus, effigiem animalis, alteriùsve rei repræsentans, de quibus imaginibus quàm plura Astronomi, & iudiciarij, sicut de stellarum magnitudine plura plures pronunciauerunt: quas in sex ordines magnitudine discretos artificiosa notatione distinxere, quæ omnia libenter omitto, ne Philosophiæ cancellos transgrediamur.

CAPVT XIII.

Textus Aristotelis.

Restat autem de terra dicere, ubinam iaceat, &c.

Breuis expositio textus.

Disputat Aristoteles in hoc capite, & sequenti de elemento terræ varias Philosophorum sententias, de terræ situ, quiete, & figura in præsentī commemorans, & explodens, vt in alio propriam de hac re ferat sententiam, & corroboret. Præsens verò caput in tres diuiditur partes, in quarū prima proponit varia auctorum placita circa situm terræ, & quid momenti habeant, expendit. In secunda, quid alij senserint de figura terræ proponit, & discutit. In tertia denique circa motum, & quietem terræ id ipsum præstat, examinans præsertim plures rationes, quæ ab aliis afferuntur ad quietem terræ stabiliendam. Ad primam igitur accedens partem, prima opinio fuit, inquit Aristoteles, constituentium mundum finitum, qui terram in medio illius collocarunt. Hi fuerunt Anaximander, Anaxagoras, Democritus, Empedocles, & Plato. Quod asserere non potuerunt infiniti molis assertores, cum infiniti medium non sit. Secunda opinio fuit Pythagoreorum, existimantium, ignem in medio mundi situm esse, utpote perfectiorem, cui proinde perfectior locus, qualis est medius, & aptior ad conseruationem, debetur. Terram verò dicebant circa medium mundi in gyrum moueri, cui aliam oppositam terram circa hanc in orbem motam adiungebant. Fundamento verò relatæ sententiæ respondet Aristoteles, non semper medium magnitudinis esse perfectius, licet medium naturæ, id est, in quo conseruatrice virtus totius continetur, perfectius sit.

Quoad secundam partem capitis, quidam ex antiquis arbitrati sunt terram esse globosæ figuræ; alij latæ potius, quasi tympani, ex eo, quod Sol, quando oritur, aut occidit, secundum rectam lineam secatur à terra: si verò terra globosa esset, secaretur proculdubio sectione circulari, vt constat in Solis eclipsi. Cui respondet Aristoteles, hoc ita apparere ob nimiam distantiam, licet aliter eueniat. Secundò, ipsum confirmant, quia lata figura maxime idonea est ad quietem, quæ terræ conuenit: sphærica verò ad motum, quæ etiam ratio ex dicendis corrui.

Tandem circa tertiam partem prima sententia est iam relatā Pythagoreorum, qui ex prædicto terræ motu existimabant, provenire, vt plures sint Lunæ eclipses, quàm Solis: neque huic positioni obstare aiunt, quod horizon videatur secare semper cælestem sphæram in duas partes æquales, hoc enim visus deceptione euenit. Verū licet huiusmodi deceptio contingere possit,

possit, si terra parum distaret à medio, secus tamen si ab eo longo spatio seiuncta sit, vt Pythagorei constituunt. Aliorum exitur sententia constituentium terram in medio vniuersi, ita tamen, vt in eodem semper circunuoluatur. Alij complures in id conspirarunt, vt terræ quietem concederent, diuersis ducti rationibus. Xenophanes causam quietis terræ esse dixit, infinitam eius profunditatem, radicibus in inferius spatium immensum diffusis; quam sententiam derisit Empedocles. Thales Milesius fecit sensisse, terram quiescere, quia ab aqua sustinetur, sicut lignum aquæ innatans. Quæ sententia confutatur primò, quia aqua eleuata descendit sicut terra: ergo oportet, assignari aliud, quod aquam sustineat: deinde grauiora naturaliter subsident leuioribus, terra verò grauior est quàm aqua. Tertiò eadem est natura totius, ac partis: terræ autem pars, vt experimento constat, subsidet aquis: ergo & tota. Alij referente Anaximene, quietem terræ in eius latitudinem contulerunt, propter quam nequit aërem subiectum dissecare, sed eum premit, qui loco fugæ non repperit, impositam terram sustinet. Quod refutat Aristoteles, primò, quia supponitur terra figuræ non rotundæ: item quia prædictæ sustentationis non tam videtur causa latitudo terræ, quàm magnitudo, quod idem eueniret, si terra esset globosa: tertiò, si qua in medio mundi est terræ violentia, motus ad medium non erit ei naturalis, sed violentus, quod est absurdum.

Empedocles asseruit, ideò terram quiescere, quia cælum rapidissima sua conversione eius motum non paritur. Quod ex eo refellitur, quia si hoc ita esset, cæli motu cessante, terra aliquò itura foret: quò igitur? Non sursum, nec deorsum, vt patet, & ipso Empedocle consentiente, terra quiescebat, antequam cæli mouerentur. Et contra rationem est, terræ propriam quietem non concedere, sicut igni in propria sphaera, & hoc probat motus partium terræ deorsum, sicut motus partis ignis sursum. Denique alij ideò terram immotam consistere aiunt, quò æqualiter distet ab extremis, & ad neutrum magis inclinet. Sed neque hæc ratio satisfacit, quia idem posset dici de igne, si in medio constitueretur. Præterea, partes terræ ad medium tendunt, cum tamen sit eadem natura totius, & partis, ac proinde non tantum quiescit in medio ob illam perplexitatem. Tandem illum locum non habet in aliis elementis, & tamen similis deberet esse in omnibus quiescendi ratio: videturque sophistica ratio, quæ in aliis perplexitatibus fieri solet, & insufficiens, cum non ostendat, quomodo corpora moueantur ad diuersa loca, & idem de igne in medio posito dici posset, qui tamen absque dubio mouebitur, perplexitate contempta.

CAPVT XIV.

Textus Aristotelis.

Nos autem primò dicamus, utrùm habeat motum, an maneat, &c.

Expositio textus.

IN præfenti capite iam ex propria sententia definit Aristoteles quæstiones in præcedenti positas de quiete, situ, & figura terræ. Quod caput in tres partitur partes, in quarum prima statuit terram non moueri circulariter, sed in proprio loco quiescere: in secunda docet, proprium terræ locum esse centrum mundi: & in tertia, figuram illius esse globosam. In priori igitur parte primum probat, quia nihil violentum perpetuum esse potest. At motus ille circularis violentus foret terræ, aliàs terræ partibus naturaliter conueniret, quod falsum esse constat. Fieret præterea, vt terra non vno, sed pluribus ciceretur motibus; quidquid enim in orbem fertur, prima sphaera excepta, plures subit motus. Fieret deinde contra experientiam, vt non semper in eisdem terræ locis, iisdemque punctis horizontis stellæ inerrantes nobis orirentur, & occiderent. Tertiò, pars terræ, medium mundi, quoad fieri potest, sortita, quiescit; igitur tota in medio consistens, quietem habet; mouentur autem grauià ad medium mundi per se, & per accidens ad medium terræ, quia hoc cum illo coniungitur. Vnde si terra alio in loco esset, adhuc grauià ad medium mundi tenderent. Quòd verò grauià ad medium tendant, ex eo constat, quòd inde violentè extracta non lineis, parallelis, seu æquè ab se distantibus, sed ad pares angulos, ita vt ablato impedimento, sibi in centro occurrerent, moueantur. Quiescit igitur terra in medio mundi, cum nihil moueatur in loco, ad quem naturaliter tendit.

Ex quibus pro secunda parte capitis colligit, locum terræ esse centrum mundi, siquidem in illud suapte natura fertur, & quiescit terra, & ab illo per violentiam auellitur, & aliàs non ita se haberent, quæ ab Astrologis circa ortus, occasus, magnitudinem, & distantiam stellarum obseruata sunt.

In tertia denique capitis parte, probat Aristoteles, terram esse globosæ figuræ, primò, quia quælibet terræ pars suo pondere in medium nititur, & conglobatur, & omnes vndecunque motæ vergunt ad angulos rectos, & sibi paulatim appropinquant. Omnibus igitur partibus compressis vndique versùs centrum globosa figura euadet, quòd si ex aliqua parte, ingentis magnitudinis pondera accrescant, adhuc terra in globosam ibi figuram, quia maius pondus versùs aliam partem impellit, donec ad æqua

æqualitatem omnes partes circa mediũ cocant. Affectat enim terra, vt ipsius medium, vniuersi medium sit. Consumatur Astro-
nomicis rationibus, quia Luna, cũ deficit, per circulearem se-
ctionem secatur, ex eo scilicet, quod terra, cuius interiectu ob-
scuratur, rotunda est, cũ hoc semper eueniat, & nunquam aliàs.
Præterea, si terra globosa non esset, Austrālibus incolis, & Aquil-
lonaribus idem omninò esset horizon, earundemque stellarum
aspectus, quod experimento manifesto repugnat. Ex quibus eui-
denter colligitur, non solum terram esse figuræ sphericæ, sed
etiam non eximiæ magnitudinis, alioqui in tam parua distantia
locorum, non tam diuersus accideret stellarum aspectus: ambitus
autem terræ, iuxta Mathematicos temporis Aristotelis, continere
dicebatur quadraginta stadiorum millia, quæ moles ad quanti-
tatem stellarum relata nequaquam magna est.

Multa Aristoteles in his duobus capitibus, quæ longam hinc
videbantur discussionem suo iure exigere; verum quia in tertio,
& quarto huius operis libris non pauca de elementis cum ipso
Aristotele nobis sunt agitanda, placuit disputationem de elemen-
to terræ in eum locum remittere, vt doctrinam de elementis ea-
dem disputationis serie complectamur, ne fortè iterum de ele-
mentis ex instituto acturi, eadem referre ad fastidium cogamur,
& ideo hæc pro secundo libro dicta sufficiant.



ARISTOTELIS
STAGIRITÆ, DE CÆLO,
ET MVNDO,
LIBER TERTIVS.

Postquam Aristoteles 1. lib. de vniuerso, & eius attri-
butis disseruit; & in secundo de cæli, & syderum figu-
ra, motibus, aliisque affectionibus egit, aggreditur
iam his duobus libris disputationem de reliquis cor-
poribus simplicibus, quatuor scilicet elementis, qua-
tenus grauiā & leuiā sunt, motusque habent ad loca sibi iuxta
vniuersi ordinem congruentia, necnon de aliis simplicium cor-
porum affectionibus: est enim huius operis scopus, vt iniriò dixi-
mus, vniuersum, vt ex simplicibus coagmentatum corporibus, &
hæc simplicia, quatenus partes vniuersi sunt: horum igitur dispu-

tationem nos quoque aggrediamur oportet. Verum, quia mens Aristotelis in his libris perspicua satis est, textuum expositionem pressius, & illorum doctrinam brevius deinceps perstringemus, ne si ad amussim expendere velimus, plus æquo opus excrescat.

CAPVT I.

Textus Aristotelis.

De primo igitur calo ac partibus, & de stellis, quæ in ipso feruntur, &c.

Perbrevis expositio textus.

PRæmissa quadam præfatiuncula refert Aristoteles præsentî capite opinionem aliquorum Philosophorum negantium, generationem, necnon alias sententias aliorum, variè de rerum ortu, & interitu sentientium. Præsertim recenset Platonis placitum, existimantis, omnia corpora ex figuris planis componi, & iterum in easdem dissolui, & interire, in cuius refutatione, aliis interim omissis, totus est Aristoteles, probans non posse corpus ex superficiebus fieri, sicut nec superficies ex lineis, nec istæ ex punctis: & quia partes componentes corpus graue, aut leue, præditæ esse debent gravitate, & leuitate; superficies verò, lineæ, & puncta his vacant, hæ enim elementorum affectiones sunt, quibus corpora recta mouentur, quæ fusiùs persequitur Aristoteles.

CAPVT II.

Textus Aristotelis.

Esse autem necessarium corporibus simplicibus natura motum aliquem vniuersis competere, &c.

Expositio textus.

INtentum Aristotelis in hoc capite est, probare omne corpus physicum vèdicare sibi aliquem motum naturalem. Quod probat ex eo, quòd sensu constat, corpora simplicia moueri; mouentur ergo naturaliter; vel si violentus est motus, idèò est, quia est contrarius motui naturali, qui vnus erit specie ab vna natura, quæ principium est motus, & quietis. Deinde probatur ex quiete, nam vel corpus quiescit naturaliter, vel per vim si naturaliter, motus ad eum locum naturalis erit; si violenter, naturalis erit motus ad locum, in quem conatur. Deinde aliorum placita inter se comparat, & carpit, ex probatòque asserto colligit, omnia corpora, quæ recto motu feruntur, gaudere gravitate, aut leuitate, vt principiis motus naturalis, cum ad inedium, vel à medio moueantur, & quibus motui violento resistunt; ad vtrunque autem æter conducit. Denique inferit Aristoteles ex dictis, motum esse, & genera

generationem, licet aliqua sint, quæ generari non possunt, ex quibus est mundus; quod inefficaciter probatur ex eo, quod aliàs antequam mundus generaretur, existeret in natura vacuum.

CAPVT III.

Textus Aristotelis.

Restat autem dicere, quorum est corporum generatio, & quam ob causam est, &c.

Expositio textus.

IN hoc capite, ut generationis principium inuestiget Aristot. explicat naturam elementi, & quoduplex sit, ac in rerum natura dari ostendit. Elementum, inquit, est id, in quod cætera corpora diuiduntur, in quibus potentia, aut actu inest, ipsum verò in specie diuersa est indiuisibile. Dicitur, *Potentia, aut actu*; quia neutrum horum determinatur, & non diuidi in specie diuersa, sicut heterogenea, quia homogeneous est. Ex qua diffinitione infert Arist. dari quatuor elementa, ignem, aërem, aquam, & terram, cum illis conueniat definitio. Denique opinioni Thalæ, dicentis, vnum tantum dari elementum, & Anaxagoræ admittentis alia, ut carnem, & ossa; præfert sententiam Empedoclis statuentis, quatuor vulgata elementa esse principia cæterorum, quod confirmat ex moribus simplicibus à medio, vel ad medium, qui proprij sunt elementorum: hæc igitur ponenda sunt in rerum natura.

CAPVT IV.

Textus Aristotelis.

Consequens autem est vtrum sint finita, an infinita, &c.

Expositio textus.

INtentum Aristotelis in præfenti capite est, probare elementa non esse infinita: quod primò probat contra Anaxagoram, deinde contra alios Philosophos: nam partes similes mixtorum sunt compositæ, cum resoluantur in terram, aërem, aquam, & ignem, elementum verò compositum non est, sed simplex. Præterea licet partes eiusdem rationis elementa essent, non ideo hæc infinita forent, cum non omnia, ex similibus partibus constent. Vterius elementorum differentie certo numero continentur, sunt enim calidum, & frigidum, siccum, & humidum, ergo finita sunt elementa ex illis constituta. Reprehendit deinde Leucippum, & Democritum, constringentes principia, seu simplicia corpora infinita, quorum concursu omnia procrea

procrearentur, quia omnia ex numeris componebant, & finita principia sufficiunt: determinataque sunt principiorum differentia, ut diximus. Conuincuntur præterea negare multa, quæ sensibus conspicua sunt, & alia admittere experientia contraria, ut quod detur corpus, quod diuidi nequeat. Et ulterius, quod illa corpora magnitudine, & paruitate inter se differant, necnon infinita esse, & tamen figuris distingui. Denique motus simplicis, qui proprii sunt elementorum, certo numero comprehenduntur, nempe à medio, vel ad medium, loca etiam, quæ his motibus comparantur, igitur & elementa.

CAPVT V.

Textus Aristotelis.

Quoniam autem finita esse necesse est, considerare restat, &c.

Expositio textus.

Discutit iam Aristoteles in hoc capite, utrum elementum vnum sit, vel plura, & refert prius aliorum placita: deinde ea refellendo, quid res habeat, exponit. Plures Philosophi ex antiquis vnum tantum esse elementum arbitrati sunt, alij medium quid inter aërem, & aquam sufficiens generationis principium per raritatem, & densitatem, quos triplici ratione refutat Aristoteles. Alij vnicum elementum posuerunt, ignem, diuersimodè tamen, quos etiam multipliciter refellit Philosophus. Omnes verò vnius elementi assertores, hac vniuersali ratione redarguit: quia si omnia naturalia corpora ex eodem principio coalescerent, eiusdem essent naturæ, eodemque naturali motu cierentur, ad eundemque locum: quod palam à veritate abhorret: plura igitur sunt elementa supra enumerata.

CAPVT VI.

Textus Aristotelis.

Considerandum est autem primò, utrum sempiterna sint, an generentur, & corrumpantur.

Breuis expositio textus.

VT elementorum numerus, & vniuscuiusque affectiones certo consent, inquit Aristoteles hoc capite, num elementa generationem, & interitum subeant, & respondet non esse æterna, sed reciprocis mutationibus secundum partes dissolui, quæ dissolutio infinita esse nequit, quia aliàs infinita esset duratione elementi constructio; nec finem habere potest, id est, usque ad vltimam partem, quia hæc non est indiuidua, secus si
elementum

elementum conflatum ex indiuisibilibus, indiuiduum esset. Generantur autem elementa, non ex non corpore, neque ex alio corpore antiquiore, neutrum enim stare potest, sed mutuò ex se ipso, id est, vnum ex materia alterius, & è contrario.

CAPVT VII.

Textus Aristotelis.

Rursus igitur considerandum est, quisnam sit mutua generationis ipsorum modus, &c.

Breuis expositio textus.

Pergit Aristoteles ad inuestigandum generationis elementaris modum, & prius aliorum placita recenset, & notat, expositurus deinde, quid verius sit. Empedocles, & Democritus putarunt, elementa, etsi sempiterna, alterum ex altero per secreationem ab alio generari. Hi tamen fucatam tantum generationem agnoscere, cum non educant formas ex materia præuiis alterationibus disposita, sed maiorem duntaxat raritatem. Restat igitur, ut vnum elementum per transmutationem ex alio fiat. Verum in hoc duplex est sententia falsa, altera asserentium, transmutationem fieri secundum figuras, altera constituentium in diuisione per plana: priores enim coguntur asserere, prima corpora non esse diuisibilia, neque partes sortiri naturam, totius, cum figuræ hoc non habeant, posteriores sensibus repugnant, & aliqua absurda concedere tenentur.

CAPVT VIII.

Textus Aristotelis.

Omnino autem enti simplicibus corporibus figuras tribuere, metas egreditur rationis, &c.

Breuis expositio textus.

Totus est Aristoteles præsentis capite in refellenda Platonicorum opinione, varias elementis figuras attribuente: id quod variis rationibus exequitur. Prima prolixa satis sumitur ex figuris mathematicis, quæ si iuxta Platonicum placitum elementis accommodentur, planè sequeretur inter elementa vacuum dari, cum illis nequeant vndequeque esse contigua. Et quòd elementa nullam præfixam vindicent figuram, ex eo constar, quòd eorum quodlibet vndique contingit extremitatem rei, cui iungitur, sese ad illius figuram accommodans: quod maxime elementis congruit, cum sint quasi materia mixtorum, & receptaculum, & aliàs non possent elementa venire in compositionem mixtorum, neque in vnum continuum coalescere, si indelebiles

indelebiles ex se figuras haberent. Præterea non rectè Platonici figuras elementis aptant, ad earum potestates, & motus exprimendos, quia igni tribuunt sphaericam, vel pyramidalem, quæ motui recto ignis non congruit: terræ cubicam, quæ etiam motui terræ non deseruit, etsi quidditas elementi in ea consistat figura, cum generet sibi simile, figura figuram generabit, quod absurdum est, & si vna figura est propria vnius elementi, alterius contrarij contraria erit figura, cum tamen figuræ nihil possit esse contrarium. Denique contradictionis Platonicos arguit Aristoteles.

Tractatus de natura, numero, sit, & motu elementorum.

PLura in hoc tertio libro de elementis edisserit Aristoteles, de quibus per otium diximus, cum eodem libro 2. de ortu & interitu, qualia sunt quæ ad generationem & corruptionem, & ad qualitates eorum actiuas spectant. Et ideo illuc spectantibus omissis, solum in hoc tractatu agitabimus, quæ huius loci sunt propria, quæ videlicet spectant ad elementa, vt sunt partes vniuersi, quod, vt non semel monuimus, huius operis scopus, & adæquatum obiectum est.

Q V Æ S T I O I.

An sint elementa, quot, & qualia.

VT ea, quæ titulus quæst. inquiri, dilucidè enodemus, operæ pretium erit omnium firmum fundamentum iacere, quo firmitus esse nequit, quasi ipsiusmet elementi definitio. Hæc igitur prius elucidanda est, vt inde cætera ad elementa spectantia facilius enucleemus.

Aristoteles tertio capite huius libri, sic definit: *Elementum corporum mixtorum est id, in quod cætera corpora diuiduntur, in quibus potentia inest, ipsum verò in specie diuersa est indiuisibile.* Afferit Aristoteles se definire elementum corporum, quia elementum multipliciter sumitur, & ideo laxiori significatione illud definiuit 5. Metaphysicæ, capite 3. prout etiam conuenit elementis scientiarum demonstrationum, elementis literarum, & similibus. Dicitur verò elementum, in quod cætera corpora diuiduntur, quia corpora mixta resoluuntur in elementa, siquidem ex illis componuntur, & vnunquodque in ea diuidi, & resolui potest, ex quibus componitur. Dicuntur præterea elementa manere potentia in mixtis, id est, virtualiter, vt explicuimus libro 2. de generatione, vbi animaduertendum est Aristotelem dixisset in potentia, vel actu, quia nondum stabilierat, elementa solum manere virtualiter in mixtis, quod præstitit postea in libris de gene

generatione. Additur denique in definitione, indiuisibile in specie diuersa, quia licet elementum diuidi possit, non tamen in alias partes specie diuersas, sicut animal diuiditur in caput, pedes, &c. quia omnes elementi partes eiusdem sunt speciei.

Ex iacto tamen fundamento posset inferri, nullum esse in rerum natura elementum, quia nullum est sublunare corpus, quod non sit diuisibile in specie diuersa; nullum igitur erit elementum, quod in specie diuersa indiuisibile diximus. Antecedens probatur, quia quodlibet ex quatuor corporibus simplicibus sublunaribus, quibus si cuiusdam elementi ratio congrueret, diuidi potest in materiam & formam, quæ inter se specie dissident: insuper etiam in alia corpora completa, ut aër, v.g. in ignem & aquam, siquidem ex aliqua illius parte ignis: ex altera vero aqua produci potest.

Ex eodem etiam fundamento videtur elici, non esse elementa quatuor, sed plura, vel pauciora, ut plures antiqui relati ab Aristotele præcedentibus capitibus 1. 4. & 5. arbitrati sunt. Plura quidem, quia partes homogeneæ, ut caro, & os, plures, quam quatuor sunt, & tamen elementi rationem sortiuntur, cum in eas heterogeneæ partes diuidantur, & ipsæ in specie diuersa indiuisibiles sint. Præterea arguere possent, Eleucippus, & Democritus, hoc modo, corpora mixta coalescunt ex infinito- rum simplicium concursu, & in ea diuiduntur: cum tamen simplicia ipsa, seu atomi indiuisibiles sint: igitur infinita erunt elementa. Ratione non dissimili posset arguere Plato, pro sua figurarum multitudine, ex quibus, ut elementis, corpora constari existimauit. Quod pauciora sint elementa, quam quatuor, probare possunt, qui vnum tantum agnouerunt ex eo, quod vni primo tantum definitio allata competere possit, & sufficit nec plura simpliciter prima concedere oportet, id, quod quilibet suo elemento pro libito accommodauit. Alij vero medio cuidam inter aërem, & aquam, & saltem quod non detur elementum ignis ad lunæ concavum, ut nonnullis placuit, ac proinde nullibi, hac via probare possumus: quia ex eo probat Aristoteles 1. Metaphysicæ capit. 3. caelestia corpora non esse ignea, quia iam pridem reliqua contenta corpora incendio conflagrassent. Ast idem sequeretur, si ignis prope Lunæ globum resideret, cum inferiora omnia suo ambitu comprehenderet, quæ, maxime propinquier aër valde calidus, parum admodum summæ ignis voracitati resisterent.

Præterea, ignis nequit sine combustibili conseruari, ut experimento constat: at supra aëris sphaeram hoc pabulum non extat: igitur nec ignis: maxime, quia si sphaera ignis esset prope Lunam, omnes inferiores ignes eò tenderent, cum vnunquodque
elemen

elementum in propriam sedem feratur, quod tamen aliter contingit. Denique hæc videtur mens Aristotelis 1. Meteororum, capit. 4. dicentis, supra aquam esse aërem, & id, quod quamvis ignem consueuimus appellare, ignis tamen non est, quod quidem consonat sacris literis, quæ dum initio Genesis primam rerum molitionem accuratè tradant, nullam ignis mentionem faciunt. Ex quibus inferri videtur, nullum prorsus esse elementarem ignem, siquidem is qui apud nos extat, elementaris esse non potest, nec minùs contineri valet in terræ centro: vt existimant Pythagorici, teste Aristotele 2. de cælo, cap. 13. propter ignis leuitatem.

His tamen non obstantibus, dicendum est primò, cum Aristotele capite 3. citato, & communi iam Philosophorum omnium consensu, esse aliqua elementa in rerum natura: id quod ex ipsa elementi definitione manifestè infertur, quia aliqua sunt in vniuerso corpora, quibus omnes conditiones in definitione elementi positæ apprimè quadrant. Igitur aliqua necessario concedenda sunt elementa. Roboratur antecedens, nam in carne, aliòve mixto, insunt in potentia terra, aqua, & alia, cum ibi horum qualitates reluceant, & in ea prædicta mixta diuidantur: abeunt enim, dum intereunt, in puluerem, humorem, spiritum, & in partes igneas, quæ quidem elementis respondent, cum tamen hæc in corpora specie diuersa nequeant diuidi; siquidem partes elementorum eiusdem sunt rationis, & in nullo naturaliter continentur qualitates, & dispositiones alterius corporis mixti, aut etiam elementaris, ratione quarum dici possit in eo aliud potentia contineri, & hoc in illud resolui posse. Confirmatur, quia elementum in vniuersum ex Aristotele 5. Metaphysicæ capit. 3. est id, ex quo primo insito, & in aliam speciem indiuisibili, aliquid componitur. Sed mixtum componitur ex terra, aqua, aëre, & igne, tanquam ex primis corporibus, quatenus actu continet quatuor primas qualitates illorum proprias: illa verò ex aliis corporibus non componuntur, cum nullius propriæ qualitates illis infideant; igitur sunt propriè elementa, id quod ex solutione argumentorum clariùs elucebit.

Dicendum est secundò cum eodem Aristotele ibidem, & sequentibus, quem omnes iam comitantur Philosophi, elementa corporum quatuor esse, nec plura, nec pauciora. Quæ etiam conclusio infertur ex definitione elementi, & ex dictis in priori conclusione: corpora enim simplicia, quæ potentia in mixtis corporibus insunt, & in quæ mixta resoluntur, cum tamen ipsa in alia corpora diuersa specie non diuidantur, tantum sunt, ignis, aër, aqua, & terra; nec aliud est excogitabile, cui prædicta conue-

conue-

conueniant. His verò quatuor apprimè quadrant, vt per se patet. Probaturs secundò, quia negari non potest, terram esse, cùm experimento constet, ipsam quiescere in medio mundi, & idem experientia conuincit de aqua, aëre, & igne. Et ex eo, quod ponatur terra, quam ponendam esse infert Aristoteles libro 2. cap. 3. ex eo, quòd cùm cælum circulariter agiteretur, eget centro immobili, quòd nequit esse nisi terra; ex hoc, inquam, alia tria admitenda esse elicit ipse hac ratione, quia dato altero contrario in rerum natura, necessarium est dari & alterum (quod saltem verum est, & necessarium secundum naturam, & perfectionem vniuersi) sed ignis ratione sui caloris naturalis, & leuitatis, contrariatur terræ valde frigida, & graui: igitur posita terra, astruendus necessariò est ignis: igni autem & terræ contrariantur aqua, & aër, per frigiditatem, & humiditatem, & media loca inter illa extrema vindicant: alia igitur duo simplicia corpora ponenda sunt, quæ omnia elementi naturam sortiuntur. Tertiò arguit Aristoteles supra 2. lib. capit. 5. quia motus localis rectus proprius est simplicium corporum sublunarium; sed quatuor tantum sunt: motus recti simplices, bini ad locum superum, & bini ad inferum: ergo quatuor tantummodò sunt elementa. Quamuis enim non omnes isti motus locales sint essentialiter diuersi inter se, sicut nec summa leuitas, & leuitas ex parte, aut maior grauitas, indicant tamen diuersitatem essentialem corporum, quibus ex se conueniunt; cùm consequantur specialem rationem formæ substantialis. Et aliàs, si corpus, quod sursum tendit, non esset essentialiter diuersum ab eo, quod mouetur deorsum, illud etiam naturaliter deorsum properaret: quaternaria igitur differentia motus recti, facultatis motiue, & loci naturalis, quaternarium elementorum numerum planè adstruit. Idem probatur quartò, ex quaternario numero primarum qualitaturn, & quadripartita illarum inter se commixtione, quæ propriæ sunt primorum, & simplicium corporum sublunarium: ex quarum inter se commixtione emergunt alia corpora mixta. Id ipsum confirmat quaternarius humorum, & temperamentorum numerus, quæ omnia quatuor elementis iuxta diuersam attemperationem respondent, id quod 2. de generatione fusiùs elucidatur.

Ex dictis manifestum relinquitur, dari elementum ignis ad Lunæ concauum, & in specie confirmatur, quia summus calor alicui corpori simplici debetur: prima enim qualitas corruptibilis primo corruptibilium corporum conueniat, necesse est: at non conuenit aëri, qui humiditatem summam cum aliquo calore vendicat, nec aquæ summè frigida, & aliquantulum humida, nec denique terræ cum aliqua frigiditate summa siccitate prædita: ergo igni. Cùm igitur ex summo calore, & siccitate, summa pullu-

let leuitas, quæ est principium motus sursum, fit, elementum ignis supernum locū in sublunari mundo sibi vindicare. Quod confirmatur ex conatu flammæ ignis apud nos excitati supra aërem confestim ascendentis, qui nequaquam constaret, nisi proprius elementaris ignis locus supra aërem esset.

Infertur etiam ex superioribus, ignem, præ cæteris elementis altiorem naturæ gradum habere, id quod cum Diuo Thoma 1. parte, quæstione 69. articulo 2. ad primum reliqui docent Philosophi. Quamuis enim terram multum commendet illius erga nos beneficentia, mira cum animalibus similitudo, & quasi affinitas, & optatæ quietis in proprio loco possessio: aquam etiam prædicet perutilis, & valdè necessarius illius vsus; & in animalibus procreandis incredibilis fœcunditas: aërem denique plurimum extollat indispensabilis eius ad vitam tuendam continua reciprocatione necessitas: & quod ipse solus, vel ipse maximè ferè omnium animalium domicilium, volatilis naturæ, luminis, & vocis vehiculum sit: quamuis, inquam, hæc ita sint; ex his tamen maior horum elementorum præ igne intrinseca dignitas nequaquam concluditur, ea enim oratorium duntaxat calorem maiori ex parte præ se ferunt, cum tamen ignis in ipsamet intrinseca, & substantiali perfectione cæteris elementis absque dubio præcellat: quia calor inter primas corruptibilium corporum qualitates præcipuum obtinet locum, cum actuosior sit, & ad res efficiendas vniuersalior, sed is debetur natura sua igni in summo gradu, singulis autem aliis elementis singulæ ex primis qualitatibus calore imperfectiores: igitur forma substantialis ignis, à qua exigitur calor, perfectior est, ac per consequens ignis ipse. Confirmatur, quia rectus naturæ ordo exigit, vt quò mobilia sunt corpora, maximè simplicia, & quæ præcipue vniuersi partes sunt, eò altiorem locum obtineant, præstantiorémque facultatem motuam ad illum obtinendum: at ignis eminentiorem habet locum inter cætera elementa, nobilissimamque qualitatū motuum leuitatem: igitur dignitate superat cætera elementa. Id quod etiam probare videtur de cæteris elementis, in quibus etiam vim habere potest prior ratio, si assumatur non vna tantum qualitas, sed coniugatio duarum vniuscuiusque elementi propria. Et confirmatur ex continentia inferioris elementi à superiori, quæ quidem planè denotat maiorem perfectionem continentis, vt diximus libro secundo, capite quinto, quæstione quarta de orbibus cælestibus. Absolutè igitur inter elementa idem assignari debet ordo, situs, & dignitas. Vbi animaduertendum est, licet quodlibet elementum contineat, & quasi comprehendat inferius sibi cohærens, non tamen semper illud magnitudine profunditatis vincere, vt nonnulli putarunt. Nam iuxta probabiliorē Mathematicorum sententiam,

testo

teste Patre Clauio ad c. i. sphæræ terræ profunditas amplius 6070. milliaria continet, & tamen diameter aquæ (quæ loco superior est, vt in sequentibus dicemus) vix ad duo, vel tria milliaria pertingit, vt à nautis compertum est: à nemine tamen est certò exploratum, an maior, vel minor terræ pars sub aquis lateat, detectæve sit, æris etiam profunditas, eisdem Mathematicis testantibus, circiter quinquaginta duo miliaribus continetur, vt ex ascensu exhalationum magna cū probabilitate ab ipsis colligitur. Qui tandem igni attribuunt profunditatem miliarium circiter centum viginti mille quingentorum septuaginta octo.

Tandem in fine huius quæstionis nonnihil dicendum est de figura elementorum, quam variis modis sibi finxerunt Plato, & alij antiqui Philosophi. Nostri tamen Philosophi, & Mathematici vno ore elementis globosam tribuunt figuram, aliqua scilicet ex parte, non omninò perfectè, & simpliciter, hoc est, non ad normā Mathematici globi. Primū vniuersaliter probatur, quia totum vniuersum globosum est, & æthereus mundus: ergo idem de partibus illius primariis sub cælis contentis, cuiusmodi sunt elementa, fateri necesse est. Et de igne ex parte conuexa constat, cū proximè cohæreat superficiei concavæ lunaris sphæræ, quæ spæciem globi habet: ex parte tamen cōcavæ superficiei bene aliqui existimant, non esse ignem perfectè sphæricum: quia in partibus Soli propinquioribus, & quæ velocius rapiuntur cælesti motu, vt sub æquinoctiali, plus æris in ignem conuertitur, & è contrario, in remotioribus, & tardiùs circūactis, plus ignis in ærem commutatur, ac proinde profundior est ignis regio sub æquinoctiali, quàm sub polis: è conuerso verò ær, vnde neutrum ex hac parte, superficiei scilicet concavæ ignis, & conuexæ æris, sphæricam habet figuram, sed oualem potiùs. De terra verò, & aqua probatur esse figuræ circularis, ex eo, quòd orientales priùs surgentia sydera vident, quàm qui ad occasum habitant, & illis prius dies illucescit, & nox ingruit, quàm his: si verò terra, & aqua plana essent, omnibus simul proculdubiò astra orirentur: & similis successio reperitur in Lunæ, & Solis eclipsibus; & similiter ob eandem causam aliquæ apparet stellæ habitantibus ad Septentrionem, quæ ad Austrum incolentibus non sunt conspicuæ, & è contrario, & euntibus ad Austrum celsitudo Australium stellarum continuè excrescit, septentrionalium decrescit; cuius oppositū experiuntur, qui contrà pergunt. Præterea, umbra horum corporum circularis est: aut umbra imitatur figuram corporis, à quo editur: ergo & ipsa globosam habent figuram. Antecedēs probatur euidenter ex eclipsi Lunæ accidenti interiectu terræ inter Solē, & Lunam, quæ proculdubiò accidit in specie circuli. Deniq; corpora graua ita mouentur ad centrum, vt quò magis descendunt, eò inter se magis

coniungantur, & conglobentur: ergo natura sua exigunt, pertinere centrum, vel saltem centro vndique æqualiter appropinquare. Sed nulla alia figura possunt fieri cætro viciniora, quàm sphaerica: ea igitur præditum est elementum graue. Quæ omnia argumenta pariter probant de elemento aquæ, & terræ, immò clariùs de aqua, quatenus experimento compertum est, aquam semper ad humiliora loca defluere: nequit igitur habere partes aliquas à centro remotiores, atque adeò semper in orbem componitur, & perfectiùs longè, quàm terra, propterea quòd terræ partes ob siccitatem, non semper ad inferiora dilabuntur, vt in montibus videre est.

Nonnulla possent aduersùs supradicta obiici, quæ quidem facilia sunt, & cuilibet non oscitanti peruia, & ideò breuitati studens omitto. Oportet tamen argumenta in quæstionis limine adducta soluere, & ad illud, quod contendebar, nullum in rebus dari elementum, negamus antecedens: & ad illius confirmationem respondemus, elementum in eo tantùm genere esse indiuisibile, in quo est elementum; cum igitur sit elementum corporum, debet esse indiuisibile in alià corpora specie diuersa, cui nihil obest diuisibilitas secundùm partes essentielles: in alià verò corpora diuidi nequit aliquod ex elementis, quia licet ex materia vnus, aëris v.g. educatur forma ignis, & aquæ, non dicitur aër diuidi in illa, sicut mixtum in elementa: nam aër non habet in sua materia dispositiones aquæ, & ignis temperatas, sicut illas habet mixtum. Et ideò, hæc non dicuntur esse in aëre virtute, sed in sola radicali, & remota potentia materiæ, ac proinde neque aër dicitur in illa resolui, sicut mixtum in elementa, quorum virtutes temperatas habet, in quo propterea dicuntur virtute & potentia manere.

Ex quibus constat ad primum eorum, qui quaternarium elementorum numerum euertere conabantur. Est enim hîc sermo de elementis corporis, quæ in ipsis virtute manent, & in quæ cætera corpora diuiduntur, quæ partibus conuenire nequit. Quæ verò pro Leucippo, & Platone adduximus, inania sunt, & solum indigent assumpti negatione, eaque per otium confutauit Aristoteles, hoc tertio libro: nec maioris momenti sunt conficta ab vnus elementi assertoribus. Ad primum autem eorum, quæ ignem à Lunæ globo detrudere nitebantur, neganda est minor propositio, cum enim actiuitas ignis tanta non est in materia valde rara, qualem purus habet, tum etiam, quia illa continuò astrorum, Lunæ præsertim, & Saturni influxu compefcitur, necnon humidis aërei repugnantia obtunditur, quæ in cælo, si igneum esset, locum non haberet, vt patet.

Ad secundum dico, ignem egere combustibili ad sui conseruationem extra propriam sphaeram, secùs in illa, quia illic, non hîc
contra

contrariorum pater iniuriis, & in materia pabuli densiori, & ampliori se melius tuetur: non tamen ascendit terrestris ignis ad Lunæ concavum, etsi ascendere conetur, ob contrariorum interiacentium resistantiam. Aristoteles autem, teste D. Thoma ibidem, solum contendit ignem elementarem non propriè significari eo nomine, quo inferior ignis appellatur, quia scilicet eo nomine aliqua accidentia specialia terrestris ignis denotantur.

Ad ultimum tandem dicendum est, in prima rerum conditione omnia quatuor elementa simul fuisse in lucem edita, ut tradunt Diuus Damascenus secundo libro fidei orthodoxæ, capite quinto, Diuus Basiliius Homilia secunda de mundi opificio. Et Beda in libro Hexamerou; sacrum tamen scriptorem duo tantummodò elementa inferiora expresse enumerasse, quia hæc præ aliis rudi populo, ad cuius captum sese effingebat, cōspicua sunt.

QVÆSTIO II.

An terra in medio mundi sita sit, habeatque idem centrum magnitudinis, & gravitatis cum ipso.

QVamuis Aristoteles de hac re lib. 2. cap. 13. & 14. ex instituto differuerit, nos tamen illius discussionem in hunc locum reservauimus, propter rationem in calce illius libri allatam. Et ideo postquam præcedenti quæstione de elementis in communi, ac inter se comparatis, non pauca dixerimus, operæpretium duxi ad explicandam mentem Aristotelis, de terra instituere disputationem: de terra scilicet, quatenus sita in vniuerso habet, de quiete enim, & motu illius agemus quæstione quarta. Vbi missa facio plura, quæ de terræ magnitudine secundum se, & comparatione cælestium sphaerarum, necnon de illius diuisione per otium differunt Geographi, & Topographi, apud quos, utpote quæ institutioni nostri metas excedunt, quærantur.

Circa priorem igitur quæstionis partem, prætermisiss antiquorum Philosophorum placitis, quæ citatis locis refert, & reicit Aristoteles, concors Peripateticæ scholæ sententia est, terram in medio mundi esse constitutam. Probatur primò ratione Aristotelis capite illo 14. quia omnia corpora grauià vndecunque dimissa efficiunt in terra angulos rectos æquales sibi paulatim appropinquando, & non per lineas parallelas, ita ut nullo existente obice sibi in centro occurrerent, siquidem quò magis cientur, magis sibi appropinquant. Hoc verò nullatenus eueniret, nisi locus naturalis terræ esset centrum mundi, ut omnibus est manifestum: in eo igitur proculdubio, ut in naturali loco terra sita est.

Secundò idem probat, quia ut astronomicis obseruationibus compertum est, eclipses Lunares accidunt, quoties Sol, & Luna per diametrum opponuntur, hoc est, illis in punctis sibi aduersis

existentibus : aut hoc contingere non posset , nisi terra medium vniuersi obtineret: hoc ergo necessario fatendum est. Minor euidenter demonstratur , quia eclipsis Lunarise accidit ex interiectu terre inter Lunam & Solem : sed impossibile est terram semper intercipi inter hæc astra in punctis directè oppositis existentia, nisi ipsa existat in spatio æquè distantia ab omnibus partibus cælestis sphaeræ : in hoc ergo iacere dicenda est , id quod naturalis ipsa rerum dispositio suo iure exigebat, vt scilicet elementum infimæ sortis infimum sibi vendicaret locum , & maximè à cælo distitum, huiusmodi autem est centrum mundi. Cuius ratio à priori est, quia grauitas est principium motus deorsum , & quietis in loco inferiori ; igitur summa grauitas erit principium motus ad locum omnium infimum , & quietis in ipso : at terra est summè grauis natura sua : ergo ad infimum locum , qualis est centrum mundi, naturali pondere fertur , & in eo quiescit. Vt enim docet D. Thom. 2.2. quæst. 2 ; .art. quarto, eadem est causa, vt corpus moueatur in locum, & in eo quiescat. Quæ veritas exprimitur in Scriptura, dum dicitur Psalmo 103. Terra fundata super stabilitatem suam, & à Deo firmari dicuntur columnæ eius, Psalmo 74. Et terra super nihilum appendi, Iob 16. Hoc est, naturalis pondere terra in medio mundi constituitur, sine alterius corporis adminiculo. Hoc autem intelligi debet de globo ex terra, & aqua conflato, vt rationes priores probant.

Secunda assertio: idem est centrum vniuersi cum centro grauitatis terre, non tamen cum centro magnitudinis eiusdem. Probaturs conclusio quoad priorem partem, quæ communis est, Mathematicorum præsertim, quia centrum vniuersi est locus omnium infimus, & à superis maximè distans. Est enim punctus, à quo lineæ omnes ductæ ad circumferentiam primi mobilis sunt æquales : ergo illud ex natura rei occupare exigit corpus graue, & quò grauius est, perfectius, & ideò grauissimum corpus, perfectissimè. Si enim grauitas principium est ferendi deorsum , & quiescendi in loco inferiori, maior grauitas perfectius principium erit , & maxima perfectissimum. Aut terra est corpus summa præditum grauitate, vt omnes fatentur , igitur natura sua exigit centrum vniuersi perfectissimo modo , quatenus grauis est, obtinere, & id re ipsa consequitur, siquidem nihil naturaliter obest, sed perfectissimus obtinendi modus est, vt centrum vniuersi intimè penetraretur, seu identificetur cum centro grauitatis terre. Hoc ergo necessario fatendum est. Minor hæc vltima probatur: quia perfectissimè corpus graue, & grauitas illius quiescet, si æquè secundum omnes partes grauitatis, ad centrum accedat, aliàs si versùs aliquam partem circumferentiæ sit excessus grauitatis, secundum hanc partem, vt pote grauiorem conabitur descendere: sed centrum graui-

tatis est punctus medius Lineæ rectæ diuidentis corpus in partes
graves æquæ: igitur tunc terra, utpote corpus summè graue, pro-
priam sedem perfectissimè obtinebit, cum centrum grauitatis
illius idem sit cum centro totius vniuersi. Cum ergo nullum sit
corpus, quod huic tendentiæ obesse possit, terram se ipsa hoc situ
sibi debito gaudere necesse est. Quæ ratio planè conuincit, non
solum de vulgari quadam, & laxa penetratione, ut recentiores
nonnulli existimarunt. Sed de similitudine Mathematica ad amas-
sim, & exactè considerata: falsò enim requirunt prædicti adstri-
ctam hanc penetrationem, quòd globus sit perfectè circularis,
constans ex partibus æqualis grauitatis: quamuis enim hoc ne-
cessarium sit, ut idem sit centrum magnitudinis, & grauitatis
sphæræ inter se, & cum centro vniuersi, non tamen, ut sit idem
centrum vniuersi cum centro grauitatis terræ, quia in partibus
inæqualis magnitudinis potest residere æqualis grauitas, ut per
se euidens est. Quæ ratio probat de centro grauitatis totius glo-
bi ex aqua, & terra conflati.

Posterior conclusionis pars (quæ contra Ferneliū in sua Cos-
motheoria libro primo, capite primo, aliòsque nonnullos, quibus
fauent Patres Conimbricenses secundo de cælo, cap. 14. quæst.
tertia, artic. secundo, amplectuntur aliqui recentiores) euidenter
probat, quia terra non habet propriè centrum magnitudinis:
ergo nec habere potest illud penetratum cum centro vniuersi.
Euidens est consequentia, antecedens probatur: nam centrum
magnitudinis est punctus medius lineæ rectæ diuidentis corpus,
versus quamlibet partem, in duas magnitudines æquales: sed in
globo terræ nullus est punctus lineæ diuidentis illum in æquales
magnitudines, saltem versus quamlibet circumferentiæ partem,
ita ut ex illo ad quamlibet partem circumferentiæ lineæ æquales
duci possint. Hoc enim nequit reperiri, nisi globus sit perfectè
circularis, ut per se patet: quod centrum est terræ non conuenire
propter vallium depressiones, & montium eminentias: nullum
igitur est centrum magnitudinis terræ rigorosè sumptum. Sed
nec datur centrum terræ, sumptum pro puncto lineæ diuidentis
corpus in duas æquales magnitudines versus aliquas partes: licet
enim hoc fieri posset, sine fundamento tamen diceretur, in vna
medietate circumferentiæ terræ easdem prorsus esse elationes, &
profunditates terræ: ac in alia medietate. Præterea, etiamsi daretur
centrum magnitudinis terræ, probatur conclusio, quia centrum
grauitatis terræ est idem cum centro vniuersi, ut probauimus: sed
centrum magnitudinis terræ non est idem cum centro grauitatis
eiusdem: ergo nec cum centro vniuersi. Euidens est consequen-
tia, minor elucidatur. Nam partes terrestris globi non sunt æqua-
lis grauitatis: ergo non est eadem proportio magnitudinis, & gra-

uitatis earum, & totius globi. Antecedens constat, cum aliquę partes terrę solidiores sint aliis, & præ aliis humiditate, lapidibus, & metallis refertę, quę inæqualem grauitatem præ se ferunt. Sine fundamento enim quis fingeret, æqua proportionē ea omnia versus omnes circumferentię partes esse distributa. Tandem probatur: nam vel sermo est de centro magnitudinis solius terrę, vel de centro magnitudinis totius globi ex terra, & aqua compacti: ast neutrum potest esse idem cum centro vniuersi. Vera igitur omnino est nostra conclusio. Maior probatur de centro solius terrę: nam terra ea parte, qua aquis regitur, depressior valdè est, vt ex questione sequenti constabit: igitur minùs habet profunditatis, ac proinde centrum magnitudinis illius non erit simul cum centro vniuersi. De centro autem magnitudinis totius globi similiter probatur. Primò, quia partes terrę, & aquę inæqualis sunt ponderis: ergo non possunt habere idem centrum magnitudinis, & grauitatis. Cum igitur habeant idem centrum grauitatis cum centro vniuersi, nequeunt habere idem centrum magnitudinis cum ipso. Deinde in hoc globo, vt questione sequenti probabimus, excellior est terra discooperta, depressior aqua: ergo non æquę distat superficies conuexa vtriusque à centro vniuersi, atque adeò non est idem centrum magnitudinis globi ex vtraque coalescentis, & vniuersi.

Addendum tamen est, prædictas globi inæqualitates præ illius magnitudine parum momenti habere, atque adeò communiter non censi impedire illius rotunditatem, & ideo vulgari quadam æqualitate dicuntur omnes circumferentię partes ad centrum vniuersi comparari: licet enim Oceani cavitā amplissima sit quoad longitudinem, quoad profunditatem tamē comparatione totius globi perexigua est, vt diximus questione 1. & idem est de montium altitudine, & hac fortè de causa communiter Mathematici asseruerunt, idem esse centrum magnitudinis & grauitatis huius spherę inter se, & cum centro vniuersi: maximè, quia frequentius loquuntur de hoc globo, relatè ad stellatos orbes, quorum comparatione instar puncti se habere demonstrant. Si igitur globus integer in hac consideratione, insensibilem habet magnitudinem, illius depressiones, & prominentię non poterunt alicuius momenti esse. Obiter tamen admonitos velim Philosophos nostros, ne facillè moueantur quouis Mathematicorum asserto. Cum dicitur globus terrę, & aquę instar puncti se habere comparatione cæli, non esse id accipiendum absolutè, sed quoad nostrum aspectum: absolutè enim verum habere nequit, cum diuisibilis sit, & tot regionum spatiis longè, latèque diffusus, & proportionem cum cælo habeat, siquidem aliquoties repetitus cæli magnitudinem adæquabit; quæ puncto conuenire repugnat: intelligitur

intelligitur ergo quoad nostrum aspectum, & adhuc non relatè ad inferiores orbes: comparatione enim orbis Veneris, Mercurij, & Lunæ fatentur Mathematici habere hunc globum notabilem magnitudinem, & ratio id demonstrat, quia terra, ut ex Geographorum disciplina constat, multò maior est quàm Luna. At Luna comparatione sui orbis nobis non apparet instar puncti, sed sensibilem exhibet quantitatem: igitur id potiori iure de sphaera terræ, & aquæ asserendum est. Quæ ratio accommodari potest orbibus Veneris, & Mercurij, & idem suo modo admittunt Mathematici de sphaeris Martis, & Solis, licet comparatione horum parvæ admodum magnitudinis globus noster videatur. Comparatus igitur ad complexum firmamenti, Iouis etiam, & Saturni, instar puncti se habet, nobis non ostentans sensibilem magnitudinem, quod vno consensu tradunt Mathematici cum Aristotele 1. Meteororum, cap. 14. ut testatur Pater Clavius ad caput 1. sphaeræ, pagina 149. & Patres Conimbricenses lib. 2. de cælo ad caput 14. quæstione 2. articulo 2. Probatur, quia quælibet stellarum, quæ in firmamento micant, se habet ad nostrum aspectum instar puncti indivisibilis: sed quælibet stella firmamenti, quæ visu percipi potest, magnitudine vincit terram, & aquam simul sumptas, Astrologis testantibus: sphaera igitur terræ, & aquæ non plus momenti habebit comparatione firmamenti, quàm punctum. Præterea ex quavis terræ parte eodem tempore eadem magnitudo, & distantia eiusdem stellæ deprehenditur à diversis Astronomis: sed hoc non posset evenire, si nostri globi magnitudo alicuius momenti esset, comparatione cæli quoad nostrum aspectum, ut per se liquet: igitur quamvis terræ partes inter se distitæ sint, nullam habent sensibilem distantiam, respectu firmamenti.

Tertiò denique ex quacunque terræ, marisque plaga, medietas cæli, & sex signa Zodiaci, supra horizontem apparent, sex alijs infra absconditis, ac proinde cælum diuiditur in duas partes æquales, quoad nostrum aspectum, ut observant Mathematici: igitur globus terræ, & aquæ habet se ad circuitum firmamenti, ut quidpiam indivisibile. Probatur consequutio, quia si hæc sphaera comparatione firmamenti aliquid haberet magnitudinis sensu perceptibilis, etiam ea sphaeræ portio, quæ inter eius centrum, & extremam superficiem intercipitur, alicuius esset quantitatis, ac proinde hæc superficies ultima non divideret cælum in duas æquales partes, sicut divideret oculus in centro existens contra manifestam mathematicam observationem. Concludamus ergo, globum ex terra & mari compactum instar puncti se habere, quoad nostrum aspectum relatè ad firmamentum, & idem est, si referatur ad sphaeram Iouis, & Saturni, secus comparatione aliorum orbium, ut diximus.

QVÆSTIO III.

An terra sit altior mari. depressiorve.

Conueniunt Doctores Philosophi, & Mathematici communiter ex terra, & aqua, vnum componi globum, eodem communi circulo conclusum: quamuis enim aquæ natura sua totam terram tegere exposcerent, & illis prima die creationis vndique globus perfectè circularis terræ fuerit coopertus, vt tradi videtur Genesis 1. & docet D. Damascenus 2. de fide, cap. 9. & 10. Pater Molina 1. part. tractatu de opere sex dierum, disputatione 11. licet D. Thom. 1. part. quæst. 69. ad 2. oppositum indicet. Ob animalium tamen habitationem, hominum præsertim, in vnum locum, terra die redactæ sunt, ex ipsis, & terra vnica sphaera compacta. Quod ex eo demonstratur à Patre Clauio ad ca. 1. sphaeræ, quia aqua, & terra demissæ per eandem lineam quàm breuissimam sublati impedimentis deorsum feruntur, non minùs quàm duæ partes terræ, vt experimento constat manifestò: at hoc nullatenus stare potest, nisi idem esset vtriusque centrum, cum nequeant diuersa centra eadem via occupari: igitur aqua, & terra idem petunt centrum, & eundem globum constant.

Secundò idem conuincitur, ex Lunari eclipsi, quia eam non patitur Luna, nisi cum ex diametro Soli opponitur, & tunc vnica tatum obscuratur umbra: sed si alius esset globus distinctus aquæ, duplex in Luna umbra deprehenderetur, & his planetis existentibus, sine diametrali oppositione, eclipsis contingeret, siquidem posset globus aquæ extra centrum mundi situs illis interponi: manifestum igitur est, ex vtroque isto elemento vnum confici globum, etsi non ad Geometricam rotunditatem perfectum, eminentiæ tamen, & inæqualitatis non magni momenti. Quòd si sensus globosam figuram non discernit, sed potius planam esse iudicat, ideò est, quia magnitudo huius globi ita sensum in tumorem se attollit, vt per sensum non discernatur.

Verùm in hac globi inæqualitate explicanda magnum est inter Doctores dislidium, quidam existimant mare eleuatius esse terra, hoc est, conuexam aquæ superficiem distantiorem esse à centro mundi, propinquioremque cælo, quàm eam superficiem terræ, quæ aquis discooperta est. Ita Burgensis ad caput 1. Genesis. Ibidem Catherinus, addens non putare se quenquam sapientem vnquam de hoc dubitasse. Accedit Tullius libro 2. de natura deorum. Et fauet D. Thom. 1. pat. q. 69. art. 1. ad 2. necnon D. Basiliius homil. 4. Hexameron, quamuis non eodem modo id explicant. Probari potest primò hæc sententia, ex sacra pagina, in qua sæpè significari videtur, aquas esse terra altiores; & non sine miraculo, & Dei imperio cohiberi, ne iterum operiant terram. Prius habetur

tur Psalm. 103. *Abyssus sicut vestimentum amictus eius*, id est, terræ. *Super montes stabunt aquæ*: hoc est, eminentiores erunt montibus, & eos tegent, idem significatur Psalm. 68. *Veni in altitudinem maris*, & Eccles. 39. *In verbo eius stetit aqua, sicut congeries*: quæ planè indicant mare eminentius esse littore. Et posterius traditur infra: *Terminum posuisti, quæ non transgredientur, neque conuertentur operire terram*. Id ipsum sumitur ex Prouerb. 8. *Legem ponebas aquis, ne transirent fines suos*. Denique Ieremiæ 1. dicit Deus: *Me non timetis, qui posui arenam terminos mari, præceptum sempiternum, quod non præteribit*. Si autem terra esset eleuatio mari, quid mirum si aquis non operiretur? aut in quo potentia Dei commendaretur? cum terræ altitudo naturaliter aquæ ne id faceret, impediret. Secundò probatur, quia flumina è mari ducunt originem, iuxta illud Ecclesiastes, *Ad locum unde exeunt, flumina reuertuntur, ut iterum fluant*. Igitur altius est mare quàm terra. Probatur consequentia, quia flumina è montium fastigiis frequentius effluunt, alt aquæ natura sua ascendere nequeunt, utpote graues, & quæ non plus per meatus, & venas ascendunt, quàm prius descenderint, ut testatur experientia. Igitur mare, unde exire dicuntur, eleuatiùs est montibus, ac per consequens vniuerso terræ globo, id quod experientia confirmat, constat enim sensuum iudicio, teste Basilio suprà, mare rubrum terra altius esse, & in vniuersum id nauigantes affirmant, quibus ad littus properantibus terra infra mare videtur iacere, & quò magis accedunt, eò montium vertices, v.g. magis attolli videntur, quod neutiquàm eueniret, nisi terra mari esset depressior.

Tertiò à priori probare videtur, quia iuxta naturas rerum, corpus minùs graue constitui debet supra illud, quod grauius est: sed aqua minùs grauis est, quàm terra, teste Aristotele primo de cælo, cap. octauo, & D. Thom. ibidem, communisque sensu: igitur natura sua supra terram quiescere exigit. Sic ergo à natura, naturæ auctore constitutum est, cum fieri potuerit: & aliàs neutrum elementum in naturali sede resideret, sed perpetuò essent violentia, cū necessariò ad hoc fuerit terræ partes attollere, ut aquæ in earum cavitatibus exciperentur, ac proinde frustra esset aquæ inclinatio concessa, ut supra terrā sisteret, & terræ, ut supponeretur aquis. Quartò denique hæc sententia corroboratur, quia, ut quæst. præcedenti diximus, centrum grauitatis huius globi ex terra, & aqua cōpacti, debet esse simul cum centro vniuersi: sed hoc fieri nequit, nisi aqua elatior sit terra: hoc igitur fatèdum est. Minor, in quo tota est difficultas, elucidatur, quia cū globus constet partibus inæqualis grauitatis, ita ut versùs aliquam partem circūferentiæ partes grauiiores existant, versùs aliā minùs graues, implicat, idè esse centrū magnitudinis illius globi, & grauitatis eiusdè, ut ex dictis suprà cōstat. At partes aquæ minùs graues sunt, quàm partes terræ: igitur

tur secundum illam partem circumferentiæ, quæ est aqua, eleuatio est globus iste, vt sic partium multitudine compenſetur defectus grauitatis, & huius centrum cum centro vniuerſi penetretur.

Quamuis relata ſententia probabilis ſatis ſit, verifimilior tamen nobis apparet oppoſita, quæ ſcilicet tenet, aquas maris non eſſe eminentiores, ſed depreſſiores potiùs ea parte terræ, quæ aquis diſcooperta eſt. Hanc ſententiam amplectuntur Liponia-
nus, Caietan. & Honcala ad caput 1. Genetiſ, Ægidius libro 2. He-
xameron, cap. 27. Contarenus lib. 2. de elementis. Pater Clauius ad
caput 1. ſphæræ, pag. 528. PP. Conimbricenſes 2. de cælo, cap. 14.
quæſt. 4. art. 1. Periera in opere tertiæ dici, circa illa verba, *Congre-
gentur aquæ*, & præ omnibus P. Molin. 1. par. tract. de opere ſex die-
rum, diſputatione 11. cum pluribus recentioribus, & quod plus eſt,
eam tuerentur D. Hieronym. in illud Pſal. 32. *Congregans ſicut in vtre
aquas maris*. D. Chryſoſtomus Homilia 9. ad populum Antioche-
nũ, D. Aug. in Pſal. 135. & idem videtur ſentire D. Damaf. lib. 2. fi-
dei orthodoxæ, c. 9. & 10. Quæ ſententia probatur primò ex ſa-
cris literis, quæ teſtantur, Deum ſuper aquas conſtituiſſe orbem
terrarum, quod in alio ſenſu non poteſt aptè accipi, Pſalmo 23.
Iſſe ſuper maria fundauit eum. Et Pſalmo 135. *Qui firmauit terram
ſuper aquas*. Dicuntur etiam ibidem qui nauigationi ſe tradunt,
deſcendere, Pſalmo 106. *Qui deſcendunt mare in nauibus*: & id ipſi
comprobant plura loca allata pro priori ſententia: & illud Pſalmi
32. *Congregans ſicut in vtre aquas maris* Hoc eſt, in cavitatibus ter-
ræ. Idem habetur Iob 26. & 38. vbi dicitur Deus circundediſſe
mare terminis, oſtiis, & veſtibus, quæ intelligi nequeunt, niſi de
terra, mari eleuatio. Probatur præterea noſtra ſententia duplici
experimento, nam manifeſtè à nautis deprehenſum eſt, cum na-
uis è portu ſoluit, æquali vento, velociùs ferri, quàm cum por-
tum petit. Præterea, qui è veteri nauigant in nouam Hiſpaniam,
quindecim gradibus tranſactis obſeruant, vna hora citiùs oriri,
& occidere Solem Luſitaniæ incolis: ſed neutrum contingere poſ-
ſet, niſi mare depreſſius eſſet terra: hoc igitur neceſſariò aſſeren-
dum eſt. Minor probatur, quia nauis æquali ventorum ſtatu ve-
lociùs pergit, cum deſcendit, ipſo naturali pondere deorſum im-
pellente: ſegnius verò, cum aſcendit, eodem pondere reluſtante: at
ſi mare in tumorem ſupra terram eleuaretur, nauis, cum ſe in al-
tum dat, proculdubio aſcenderet: tardiùs igitur tunc moueretur
contra experientiam. Altera verò pars minoris ex eo liquet, quia
exiſtentibus in locis ſublimioribus, etiamſi ab oriente longiùs
abſint, citiùs Sol apparet, vt in montium ſaltiſſimis conſtat. Igitur,
ſi mare ſupra terram eleuaretur, non poſteriori, ſed priùs nau-
gantibus Sol oriretur, contra quod experimento compertum eſt.
Deinde probatur ratione: quia in medio maris plures viſuntur in-
ſulæ

sulæ supra aquas eleuatæ: ergo in vniuersum terra discooperta sublimior est mari. Probatur consequentia: nam si aqua esset altior terra, & in tumorem globosum cõiret, medium maris proculdubio eleuatiùs esset: ergo si in ipso maris medio, partes terræ eminent, falsum omninò est, mare esse terra superius, sed oppositum fatendum est. Vtteriùs probatur, quia flumina omnia prono cursu intrant in mare: sed fieri hoc nequit, nisi mare ipsum depressiori loco iaceas; hoc igitur asserendum est. Maior, præterquàm quòd expressa est in sacris litteris, nulli non ad sensum patet. Minor probatur, quia fluuiales aquæ naturaliter mouentur ab insita grauitate: ergo mouentur motu deorsum; aliàs ascendere dicerentur, non sine violentia: igitur mare, in quod tendunt, depressius terra est, vnde descendunt. Maximè cum non moueantur flumina per cacumina montium, sed frequentius per inferiores valles.

Vltimò tandem à priori probatur, quia aquæ postquam redactæ sunt in vnum locum, eiusdem prorsus naturæ, & inclinationis naturalis sunt, ac in triduo, antequàm congregarentur, cum eadem semper persisteret substantialis forma, eadem semper motrix facultas. Sed ante collectionem earum inclinabant ad centrũ vniuersi, ad existendum videlicet, quò viciniore possent, centro, salua consistentia terræ circa illud ad decliuora semper fluentes, alioqui tunc temporis violenter detentæ essent aquæ regentes terram; igitur ad idem modò etiam propendunt. Quod etiam cõfirmat euidenter aquæ motus naturalis, quo sublatis impedimentis per eandem omninò lineam, qua terra, quàm breuissimè in centrum vniuersi redit: igitur fieri nequit naturæ viribus, vt aqua super terram in tumorem eleuetur, sed inferior semper existens. Probatur hæc vltima consequentia, quia nullum habet impedimentum, quominùs deorsum profluat: ruet igitur & terram operiet, vel saltem semper aqua niteretur terram obruere, & ab eo conatu inhibita perpetuam vim pateretur, Deo indefinenter miraculum patrante.

Nec satisfacit Caietanus, respondens, ideò aquas non descendere ad operiendam terram, etsi eleuatiores sint, nec violenter detineri, quia in figuram circularem natura sua effinguntur: nam in primis inde fieret, aquas in prima conditione violenter terram vniuersam operuisse, & ideò productas non fuisse in statu naturali, quod absurdum est, & cõtra Augustinum l. 7. de ciuitate Dei, c. 30. & idem dicendum esset de tempore diluuij, vnde tunc duplex contigisset miraculum: immò superflueret ruptio cataractarum cæli, cum ad id sufficeret, mare terra eminentius supra ipsam descendere. Præterea ex eo quòd aqua descenderet, & operiret terram, non admittèret circularem figuram, sed eam haberet, sicut habuit in prima conditione: denique licet modica aqua figuram efficiat

efficiat circularem, vt à cōtrariis tueatur, eam tamen nequit retinere in magna quāritate accessu grauitatis appetitum illum longè superante, vt ex experimento liquet, & aliàs flumina in mare non laberentur, nec defluerent aquæ ad terram depressiorem operiendam, sed in circularem figuram super terram extollerentur. Et contra responsum, & doctrinam Caietani manifestè reuincitur ex motu aquæ ad centrum vniuersi per lineam rectam.

Et aquam non extolli supra terram in figuram globosam demonstrant etiam duæ rationes initio allatæ ad ostendendum ex terra, & aqua vnum effici globum. Quamuis igitur initio temporum aquæ, vt natura elementorum postulabat, vndique operirent superficiem terræ omni ex parte rotundæ, teste Damasceno suprâ, tertio iam creationis die in vnum locum segregatæ sunt, terra discooperta maxima ex parte relictâ, id naturali hinc in quem cōdita est exigente, vt scilicet apta redderetur ad hominum, terrestriumque animalium, ac volatiliū habitationem, & procreationem, necnon ad frugum, plantarumque generationem. Id quod in hunc modum rerum conditor Deus effecit: extulit quibusdam ex partibus terram, ita vt super aquas emeretur, manerentque cauitates maximæ inter terram hinc inde variis in locis eleuatam, & tunc naturali motu aquæ defluerunt ad cauitates interceptas, quibus vt alucis contineretur, & per varios anfractus terram ferme totam permearent, quo etiam ipsis elementis prouisum est, vt sic terræ partes magis inter se humore aqueo cohærent, & fructus feraciores redderentur; aquæ etiam continua æris inclusi in terrestribus cauernis conuersione iacturam ex Solis, & astorum virtute prouenientem indefinenter refarcirent. Quomodo omnia quidem rectè constant, iuxta ipsarum rerū naturas, & inditam exigentiâ, quod amplius ex argumentorū solutione cōstabit.

Ad quorum primum desumptum ex variis Scripturæ locis respōdetur, ex doctrina Caietani ibidem, Psalmo illo 103. vsque ad illa verba, *ab increpatione sua fugient*, loqui Vatem Regium de terra, & aquis, vt erant à principio, antequam tertia die separarentur in vnum locum; vt pendenti Psalmum illum fiet manifestum; in sequentibus verò, de ipsarum congregatione, & de termino illis posito. Sumitur autem futurum, stabunt, & fugient, pro præterito imperfecto, teste Eugubino, ibidem, quia illo carent Hebræi, dicitur, super montes, hoc est, super terram, quæ nunc in montes extollitur. Præterea dicitur altitudo maris profunditas illius, non quia sit terra eminentius: cum verò aqua stetisse dicitur, vt congeries, intelligitur bene à Lyrano de aqua Iordanis, & maris rubri, in transitu filiorum Israël, vnde nihil contra nos colligitur. Et licet intelligeretur de prima illa congregatione aquarum in vnum locum, pro nobis locus staret: statim enim additur: *sicut exceptoria*

aquarum,

aquarum, id est, cavitates extiterunt, in quibus aquæ congregatæ sunt. Posteriora Scripturæ loca nostram confirmant sententiam, siquidem in illis dicitur: Deus terram, ut terminum aquis posuisse, ad quod eleuatur esse debuit: commendatur tamen diuina potentia, in eo, quod cum natura elementorum exigit, ut aqua terram operiat, Deus sua potentia in terræ cavitatibus aquam incluserit, terram super aquas eleuando, quam fluctus maris intumescens non transgrediantur.

Ad secundum argumentum multi multipliciter respondent: aliqui fatentur flumina proxima, & per se ex mari oriri, & ideo altius esse mare his terræ partibus, in quibus fontes, & flumina nascuntur. Absolutè tamē esse depressius, quia non effluent ex partibus terræ, quæ prope mare discoopertæ sunt: verum hæc solutio ab omnibus ferè refellitur, & meritò quidem: cum enim ex terra, & aqua vnicus conficiatur globus, ut diximus, si terra secundum partes discoopertas prope ipsum mare, & flumina altior est aqua, reliquæ omnes partes terræ, eadem cum illis superficie contentæ, propinquiores erunt cælo, & à centro mundi distantes, quàm aqua, ac proinde non poterit in illas aqua maris erumpere, nisi ascendendo. Et ideo respondet Diuus Thomas in secundo, distinctione 14. quæstione prima, articulo primo ad quartum, cum aliis, aquam fluuiorum è mari sursum trahi virtute corporum cælestium, communis boni gratia, quæ responsio difficilis apparet ex eo, quod ad virtutem occultam, ut ad asylum confugit, non apparet, cur cælorum influxu in hoc potius, quàm in alio loco continuo erumpant aquæ, sursumque euocentur, maxime cum influendi ratio pro diuersitate cælestis motus, accessus, & recessus stellarum, respectu eiusdem loci passim diuersificetur. Quapropter recentiores nonnulli doctissimi in huius solutionis explanationem addiderunt, licet verum sit, aquam non plus natura sua posse ascendere, quàm descenderit cæteris partibus, ratione tamen extrinseci impellentis optimè id posse contingere, & hæc de causa fontes, & flumina è mari oriuntur in partibus terræ eminentioribus, quia scilicet dum aqua maris per terræ cryptas, & cauernas descendit, & quasi transcollatur, subtilior fit, & minus grauis, deposita terrestrium concretionum admixtione, vnde ex amara, & salsa redditur dulcis: cum igitur pars aquæ præcedens defecator, & leuior sit posteriore, illi cedit, & locum relinquit, & quoties aliunde non patet aditus, sursum ascendit per terræ cavitates, impellente posteriori ratione suæ grauitatis, & densitatis, id quod in fontibus arte factis non semel vidimus, & quia in montibus maiores esse solent terræ anfractus, & foramina, hinc prouenit, ut ex illis facilius flumina prorumpant.

Quæ

Quæ solutio mihi valdè aridet, & non videtur aptior alia exco-
gitari posse, in doctrina sancti Thomæ, existimantis flumina, &
perennes fontes copiosos è mari proximè oriri, quæ quidem mul-
tùm consonat, & sacris litteris, & rationi: incredibile enim vide-
tur, tam ingentem & perennem aquæ copiam è mari non egredi,
sed aliunde perpetuò generari.

Si autem amplectamur sententiam Arist. 1. Meteororum, c. 13.
quam profiteretur schola Parisiensium, & cum aliis pluribus Pater
Molina suprà, asserentem, flumina non immediatè à mari or-
tum ducere, nullius momenti esset argumentum. Quæ quidem
sententia congruenter satis, & magna comprobabilitate defendi
potest hac ratione: terra, utpote sicca, vim habet attrahendi ad se
humorem, cum quasi sugendo, ut in aliis rebus siccis, spongia v.
g. videre est, quæ virtus in aliquibus terræ partibus magis vigere
potest, ratione cuius humiditatis, & vaporum, qui virtute Seleni in
aliquibus terræ cauernis, excitantur & aggregantur, aër eidem
inclusus in aquam continuò conuertitur, & foras erigitur: ad quod
plurimum iuuat pluuiæ aqua, tum quia in eisdem cauernis re-
cipitur, vnde paulatim illabitur, & ad orificium sensim accurrit, &
etiam per terræ superficiè vndique ad fluuiorum alueos profluit.
Tum quia inde maior vaporum copia, quæ in aquam conuertatur,
extat: tum denique, quia terra pluuiæ aquis madefacta,
minùs consumit aquæ pluuiæ, & ex vaporibus, & aëris conden-
sati intra ipsam genitæ, potentiorque euadit, ad maiorem aëris
copiam condensandam, & in aquam conuertendam: quoniam verò
tam aqua pluuiæ, quàm subterranea ex vaporibus, & humore,
ac frigiditate aquea oreum ducit, idèò meritò dicuntur fontes &
flumina ex mari exire, ad quod iterum reuertuntur. Vno igitur,
aut alio philosophemur modo, nihil probat argumentum. Ad ex-
perimenta verò in illius confirmationem adducta respondeo, ne-
gandum prius, & pari ratione negari posset posterius: verùm utro-
que dato respondendum est, planè decipi sensum, cuius deceptio-
nis causa ea est, quia terra comparatione maris, atra ferè videtur,
qui color iuxta candidiorem positus profundior, & depressior ap-
paret, ob quod pictores putei, aut alterius rei, profunditatem co-
lore atro depingunt, circumposito candido, seu ad candorem ma-
gis accedenti.

Ad tertium respondetur, integrum syllogismum probare de ele-
mentis, iuxta propriæ naturæ exigentiam, & de triduo creationis,
non deinceps: licet enim aqua natura sua terram tegere postula-
ret, in eum finem, quem diximus, in vnum locum terræ terminis
inclusa redacta est, & idèò vtrunque elementum non remansit ex
toto in sua natiua sede, neutrum tamen violentiam patitur, quia
terra non nritur aquæ, nec hæc habet supra se, nisi aërem, sicut in
puteis,

puteis, neque aqua inferior, neque superior terra circundans concavum putei violenta est, quia scilicet hæc non aquæ, sed terræ inferiori existenti perpendiculariter versus centrum innititur, & aqua solum supra se aërem habet: neque ideo frustra est inclinatio aquæ, ut terram tegat, cum initio, & diluvij tempore eam ambierit, maxime quia aqua non exigit per se primo terram circundare, sed versus centrum moveri, & prope illud quam proximè possit, quiescere, nullo corpore minus levi interiecto, & ideo si terra subtraheretur, & via aquæ ad centrum pateret, illuc usque naturaliter moveretur, in eoque naturaliter quiesceret: solum igitur contra naturam utriusque elementis esset, si gravius, nempe terra, ab aqua minus gravi sustentaretur, quod nullatenus hic accidit, ideoque argumentum non viget.

Ad quartum responderetur, maiori admissa, negando minorem, & ad illius confirmationem dicendum est, maiorem illam veram esse, si aliunde illa maior gravitas non compensetur, ut in præsentis contingit: partes enim terræ, quæ aquis subiacent, ratione humoris aquei, absente etiam ventorum afflatu, & Solis ardore, plus habent densitatis, & gravitatis, quam ficciores alix, quæ supereminent, ut per se constat, & ideo licet minoris sint profunditatis, & aqua tegens minus gravis, quam terra, utraque simul æqualis gravitatis est, cum alia circumferentia terræ aquis discooperta, ideoque optimè potest esse idem centrum gravitatis huius globi, & vniuersi, quamvis terra elevatior sit aqua.

Si verò aliquis nobis obiiciat, quod præter morem nostrum amplexi simus opinionem contrariam S. Thom. & D. Basilii, huic facile respondemus, quamvis S. Doctor oppositam insinauerit, non tamen ex instituto docuisse, sed ad soluendum quoddam argumentum, ad quod eligi sæpè solet. Et sufficit opinio tantum probabilis, & ideo ipsius commentator Caietanus supra nostram tradidit sententiam, existimans sine dubio, in hoc S. Thom. non contrariari. Basiliius autem non de re ipsa, sed de eo, quod sensibus apparet, loquutus videtur. Cum tamen plures Patres supra citati nostram sententiam perspicue tradiderint:

QVÆSTIO IV.

Vtrum terra in medio mundi quiescat, vel aliquo modo moveatur.

Quamvis ex superius dictis breui possit hæc controuersia definiri: tamen ut clarius eius sensus innotescat, operæpretium erit, diuersa auctorum placita circa ipsam referre, quæ quidem tot ferè extirere, quot capita. Fuit enim de hac re magnum apud auctores, antiquiores præsertim, dissidium, ut aperte constat ex Aristotele supra lib. 1. c. 13. & 14. Nicheas enim Syracusius existimavit, terram summa velocitate volui, cui addidit Philolaüs in gyrum verti instar Solis & Lunæ, circum ignem tamen. Ponticus

Heraclides & Ecphantus iudicarunt, terram velut totam agi circa ipsius centum ab oriente in occidentem. Aliqui verò ex Mathematicis recentioribus non dubitarunt pronuciare, terram circulariter cieri ab occasu in ortum corporibus cælestibus omnino immotis. Democritus ipsam à prima origine aberrantem posuit ob exiguitatem, leuitatemque. Thales denique credidit, terram aquis more nauigij vehi. Quorum omnium fundamentum ex aliquibus obseruationibus desumptum videtur.

Alij verò ex opposito asseruerunt, terram omnino immotam semper persistere, ex diuerso tamen principio, vt ex Aristotele l. 2. c. 13. retulimus, vbi diuersæ huiusce rei explicationes, & earum refutationes videri possunt, neque enim hoc loco repetere fas est. Hanc sententiam multi hoc tempore indiscriminatim amplectuntur, amplexique sunt à tempore Aristot. omnes ferè Philosophi, & Mathematici; quæ probari solet multis argumētis. Et quòd non moueatur motu circulari demonstratur primò ex Scriptura Eccles. c. 1. *Terra autem in æternum stat, oritur Sol, & occidit, & ad locum suum reuertitur, ibique renascens gyrat per meridiem.* Et de eodem Sole dicitur Psal. 12. *Exultauit vt Gigas ad currendam viam, &c.* Quod verum nullatenus esset, si Sole quiescente terra in orbem circumuolueretur, quo certè ad rem præsentem confirmandam nil clariùs dici potuit. Ratione id ipsum probatur primò, quia nequit terra circulariter moueri naturaliter, nec mouetur vi ab extrinseco impressa; nullo ergo modo. Antecedens ostenditur: Terra enim natura, virtute, & pondere deorsum fertur, vt constat ex partibus terræ à loco superiori demissis, & tamen eadem est inclinatio totius simplicis, & elementaris, ac partium illius: ergo natura sua & à virtute propria nequit terra circulariter volui; cum nequeat eidem corpori simplici duplex motus naturalis à principio intrinseco conuenire; sed neque terra mouetur in gyrum ab extrinseco, tum quia nullum est mouens, à quo hoc motu moueatur tota terra, tum quia talis motus esset violentus, cum eueniret ab extrinseco, reluctante propria grauitate, & nullum violentum perpetuitatem patitur. Præterea probatur, quia si terra circulariter moueretur à Septentrione ad Meridiem, aut è conuerso, fieret inde contra id, quod experimur, vires horis singulis mutare distantiam ad polos, & nunc nos Arcticum intueri, postmodum Antarcticum: si verò ab occasu in ortum, vel è contrario, sequeretur singulis noctibus easdem stellas nobis diuerso tempore occidere, & nasci, nec certò posse ab Astronomis obseruari solis & lunæ eclipses, siquidem pro hemisphæriorum diuersitate, planetarum, & syderum aspectus quoad nos variari necesse est, quibus sanè manifestum experimentum aduersatur. Denique nullum corpus inanimatum à propria virtute mouetur circulariter in proprio

proprio loco, nec à motore extrinseco in ordine ad propriam perfectionem; cum hæc potius sita sit in permanentia in loco naturali, sed neque est finis extrinsecus, in quem motus circularis terræ ordinari possit, sicut contingit in motu cælesti: igitur terrestris globus nulla ratione in orbem cietur, id quod ex dicendis amplius constabit. In vniuersum tamen, quod terra in medio mundi nulla ratione moueatur, probari potest primò ex sacris Literis, quæ omnimodam terræ immobilitatem videntur planè commendare. De ea enim dicitur Psal. 74. *Ego confirmaui columnas eius.* Iob 26. *Qui appendit terram super nihilum.* Sed expressius Psal. 92. *Firmauit orbem terræ, qui non commouebitur.* Idem habetur Psal. 101. *Fundasti terram super stabilitatem suam, non inclinabitur in saculum saculi.* Et Paralipom. c. 16. *Deus fundauit orbem immobilem.* Quid expressius pro præsentis instituto? Ratione probatur de motu recto: nam aut terra moueretur in medio mundi motu recto per propriam virtutem, vel ab extrinseco motore: neutrum dici potest: quiescit igitur omninò. Antecedens probatur, quia virtus motiua naturalis terræ est sola grauitas: sed hæc solùm potest esse principium motus deorsum: ergo per eam nequit terra sursum ascendere. Ast si terra in centro mundi moueretur per lineam rectam, planè ascenderet, siquidem à cetro mundi omnium locorum infimo recederet, accederetque ad locum cælo propinquiores ac eleuationem: proinde igitur repugnat naturæ viribus in centro terram motu recto moueri à proprio pondere, & tamen illi non conuenit alia vis motrix, cum vni corpori simplici vna motiua facultas, vnusque naturalis motus tantum competere possit, sicut constat partibus ipsius terræ conuenire. Quod autem ab extrinseco terra in centro non cietur, ex eo liquet primò, quia talis motus esset violentus, vtpote ab extrinseco impressus, terra ipsa proprio pondere reluctante, ac per consequens nequiret esse diurnus. Deinde nõ apparet, à quo terra extrinsecè impelleretur, cum non sit aliud corpus grauius, quod eam cogat, locum infimū deserere, nec à cælo is motus prouenire potest: si enim cælum raperet terram, non linea recta, sed in orbem secum ferret. Denique hanc partem efficacissimè suadent experimenta illa Mathematicorum in secundo argumento adducto ad motum circularem terræ refutandum.

Hæc secunda sententia communis Philosophorum verissima est, terræ siquidem immobilitatem, & natiua eius grauitas, & inclinatio persuadent, & experiētia indicat, & relata Scripturæ testimonia ita confirmant, vt prædictum à terra motum excludere necesse videatur, vnde, quæ de motu trepidationis ab aliquibus Philosophis dicta sunt, magis ostendunt disputantium acumen, & arguentium exercent ingenia, quàm fidem mereantur, & terræ trepidationem stabiliant.

Et probatur primò: si enim terra cuiusvis ponderis accessu aliquo modo trepidaret, quò maior fieret additio, maior resularet inotus, qui nullo modo sensibus posset occultari, & cum tam multiplex sit vndequaque in variis terrę partibus ponderis additio, vt dum copiosissimi exercitus inter se præliantur, aut magnis ventorum flatibus, turtæ, aut cacumina montium concutiantur, aut terra paulò antè sicca pluuiæ aquis madida se ipsa grauior existit, tam multiplex, variæque esset terrę trepidatio, vt non minùs illa trepidationis motu, quàm ventorum flatibus vnda maris hinc inde agigaretur: at terra nec trepidare, nec contremiscere sentitur: quis enim ex his, qui hoc astruunt, huiusmodi trepidationem expertus est? Quo solùm argumento Pythagoricum illum cælestium orbium concentum reiecit Arist.

Probatur secundò ex solitis terrę motibus, qui per vim terrę solent accidere ex ingenti copia exhalationum terrę cauernis inclusa, siue ibi genita, siue aliunde delata, quæ Solis ardore, & maximè ratione antiperistasis introrsus collecta nimis rare fit: quapropter sursum ascendere conatur, occluso tamen exitu, nec patentibus meatibus superpositam terrę partem magno impetu, nec sine ingenti strepitu interdum concutit, agit, sursumque ascendere cogit, de quibus ex instituto differit Arist. 2. Meteororum, c. 7. & experientia patet, cum aër terrę inclusus conatur erumpere, sæpè concussis montium fundamentis, & euulsa magna terrę parte, etiam vrbibus excidio est, solùm illam partem terrę, quam sua commotione concutit, & eruptione labefactat, contremiscere; reliquas verò etiamsi propinquæ sint, omninò quiescere, nullusque est huiusmodi violentus motus, qui non percipiatur. Quis ergo dicat minutissimi ponderis additione, hanc terrę bilancem in alteram partem vergere: tanta verò erupentis aëris concussione eiusdem terrę motu nò posse sentir?

Probatur tertio, ex doctrina Aristotelis, qui lib. 1. de cælo in fine docet, contra rationem esse, terrę propriam quietem non concedere, sicut igni in propria sphaera: & cap. 3. eiusdem lib. docet, ex eo quòd cælum circulariter mouetur, egere centro immobili, & lib. 4. c. 5. docet, terram in superum locum non tendere. Testimoniis autem eiusdem Aristotelis, quæ in contrarium citari solent, facillimè potest satisfieri: de impulsu enim virtuali, & de propensione natua terrę ad suum centrum accipienda sunt, vt legenti apertè cõstabit. Illis enim Philosophus terrę propriam quiete potiùs probat, quàm aliquem ipsius motum stabiliat.

Probatur quartò, quia globus ex terra, marisque compactus (vt altitudines montium valliumque depressiones manifestant) non mathematicè, sed physicè cõsiderandus est: quamuis ergo addito aut detractò quolibet pondere centrum terrę mathematicè sumptum variari concedamus, & ita censeatur terra ponderibus librata

brata suis, ex mathematica consideratione motus physicus eliciendus non est, sicut ex non dissimili argumentatione malè inferebat Zenon 3. Phys. impossibilitatem motus per continuum ob infinitatem partium & punctorum, quæ redderet spatium impertransibile, quem Aristoteles confutavit, & nos, nostra, ipsiusque experientia facillime confutamus, qua experimur nos moveri, & spatium quodcunque pertransire, ita astruentes, t. e. n. trepidationem nostra & ipsorum quiete convincimus.

Natiua ergo gravitas terræ (cū maxima sit) efficit, ut ea locum maximè à cælo remotum, hoc est, medium mundi appetat, & naturali nutu eò feratur, ibique fixa conquiescat, ne alioisum nisi per vim educi possit: siquidē oporteret illam, quocunque motu vel trepidatione è centro vergeret, contra naturam ascendere.



ARISTOTELIS
STAGIRITÆ, DE CÆLO,
ET MUNDO,
LIBER QVARTVS.

Rosequitur Philosophus in hoc libro 4. eandem simplicium corporum disputationem, de eorum præsertim facultatibus motuivis, gravitate scilicet, & levis tate accuratè tractans, necnon de locis, ad quæ h. virtutibus feruntur, & hoc est præsentis libri scopus qui proinde longiori non indiget præfatiuncula.

CAPVT I.

Textus Aristotelis.

De gravi autem atque levi, quid est utrunque, & quam est natura ipsorum, consideremus oportet, &c.

Brevis expositio textus.

Postquam Philosophus in capitis limine demonstravit disputationem de elementis quatenus gravia, & levia sunt, ad naturalem Philosophum propriè pertinere, cū ad motum ordinentur, cuius consideratio ad illum spectat, docet grave, & leve non comparatè solum accipi debere, ut antiqui viurparunt, sed etiam absolutè, pro eo scilicet, quod naturaliter cedit in medium, & quod à medio sursum fertur. Sine fundamento enim antiquo.

res aliqui inficiati sunt, dari locum sursum, & deorsum: extremitas nanque, quæ est ad concavum cælestis sphaeræ, planè sursum existit, deorsum verò, quod illi respondet in medio vniuersi.

CAPVT II.

Textus Aristotelis.

Eorum igitur, qui priùs ad eorum considerationem venerunt, &c.

Expositio textus.

Refert Aristoteles in hoc capite, aliorum Philosophorù placita circa corpora graua, & leuia, qui quidè non exposuerunt, quid graue, aut leue sit absolute, sed comparatè ad alia. Plato in Timæo asseruit, grauius id esse, quod ex pluribus partibus eiusdem generis constat; leuius, quod ex paucioribus: quod ex eo coarguit Arist. quia nullam facit mentionem de corpore simpliciter graui, & leui; cùm tamen ista cæteris natura priora sint: deinde, quia ex eo sequeretur, quod maior ignis plus grauitatis haberet, minor plus leuitatis: iminò & maior portio aëris grauior esset, quàm minor aque, quod patet esse falsum, & ideò Democritus, & Lencippus propius ad veritatem accedentes, arbitrati sunt, causam grauitatis, & leuitatis esse solida in aliorum compositionem venientia, ita tamen vt grauitas à pleno corporù proueniat, leuitas verò à vacuo corporibus intercepto. Quod vt insufficiens refutat Aristoteles. Potest enim esse maius solidum cum maiori vacui copia, & in magno igne tot possunt esse partes solidæ, quot in exigua terræ portione: cùm tamen hæc grauior sit, vel ipso testante experimento, nonnulli, qui vacuum negarunt, aut grauitatis, & leuitatis non meminerunt, aut illorum causas non attigere.

CAPVT III.

Textus Aristotelis.

Nos autem primùm id definiamus, oportet, &c.

Explanatio textus.

Accedit iam Aristoteles ad propriam sententiam explanandam, & priùs supponit lationem, sicut alij motus versari inter contraria, & non è quouis in quoduis tendere, & lationis sursum, & deorsum, non omnia corpora capacia naturaliter esse, sed graua duntaxat, & leuia, quæ ad hos motus, & illorum terminos dicuntur esse in potentia, & ideò per illos perfici, dum à generante mouentur, quia proprius locus propria corporis perfectio est: continens enim habet rationem actus, & perfectionis: grauia igitur & leuia deorsum feruntur, & sursum, quia ad talem motum facultatem naturalem grauitatis, & leuitatis sortita sunt, & quidem valde perfectam, & ideò latio absolutissimus motus est, vt potè ortus à re suam perfectionem absolutionemque obtinente. Ratione ergo huius facultatum corpora in loco inferiori vel supe-

ro consistant, aut ad illa tendunt, nullo existente impedimento; & quia hæc virtutes cum substantialibus formis à progenitoribus concessæ sunt, ideo motus grauis & leuis à generanti prouenire dicuntur.

CAPVT IV.

Textus Aristotelis.

Differencias autem, & ea quæ accidunt circa ipsa, nunc dicamus oportet, &c.

Explanatio textus.

Assignat Aristoteles discrimen simplicium corporum inter se, prout grauia, & leuia sunt, quorum aliqua, terra scilicet, & ignis, simpliciter grauia, & leuia existunt: alia verò, vt aer, & ignis talia sunt comparatè, leuia scilicet, collata ad terram, & grauia cōparatione ignis, quas affectiones mixta participant pro diuersitate simplicium, ex quibus constant. Quod autem ignis sit leuis simpliciter, & terra simpliciter grauis ex eo probat Arist. quia ille super omnia corpora naturæ impetu fertur: hæc verò ad medium vniuersi omnium infimum, vnde nec ignis aliquid grauitatis, nec terra leuitatis quidpiam continet: sed hæc summe grauis, summe leuis ille censeretur debet, siquidē ad extrema loca opposita pergunt, quæ determinata existere compertū est; tum quia nequit corpus in infinitū, & in indeterminatū tendere, tum quia quò magis leuia ascendant, & descendant grauia, minùs inter se distant, per æquales angulos sibi appropinquādo, ac proinde coniungi in aliquo puncto remoto obice necesse est. Inter extrema autem pugnatia medium dari oportet, quod vtriusque naturam sapiat; huiusmodi est graue, & leue comparatè, aer scilicet, & aqua: inter quæ simplicia corpora is seruetur ordo, vt superius, & perfectius rationem sortiatur formæ, utpote continens, ac terminans, quod eorum materiis suo modo conuenit, prout diuersas elementorum formas in potentia habent, etsi secundum se eiusdem naturæ sint.

CAPVT V.

Textus Aristotelis.

Id igitur, quod talem materiam habet, leue est, semper, quæ sursum fertur, &c.

Breuis expositio textus.

EX superius dictis infert Philosophus, quaternarium elementorum numerum, quia corpus habens materiam perfectè dispositam ad leuitatem, est simpliciter leue, & omnia supereminet: quod verò contrariam habet affectionem, graue est simpliciter, omnibusque substat. Oportet autem duo alia intermedia esse, quæ medio modo se habeant, & extremorum naturam participant, ac proinde grauia & leuia sint comparatè: & totidem sunt materiæ affectæ

affectu quadruplici dispositione, non solum primarum qualitarum, sed grauitatis etiam & leuitatis. Ex elementis media, inquit Arist. in propriis locis grauitant, si enim inferiora elementa subtrahantur, tendunt deorsum, ut aqua in locum terræ, & in locum aquæ ær: cum tamen sursum non ascendant, nisi ad supplendum vacuum, habent enim materiam in hoc similem terræ: terra verò in superum locum non tendit, neque ignis in inferiorem, quia nec illa in proprio loco leuitat, utpote summè grauis, nec hic grauitat, quippe summè leuis: quatuor igitur sunt differentie qualitatum motricium, & totidem materiæ, secundæ videlicet quadruplici, vi motiua affectu.

CAPVT VI.

Textus Aristotelis.

Figuræ autem causæ non sunt, ut aut sursum, aut deorsum absolute ferantur, &c.

Expositio textus.

Aliquorum sententia reiecta, duplicem dubitationem Aristoteles proponit, & soluit in hoc capite. Falsò itaque existimarunt nonnulli, figuras in causâ esse, cur alia sursum, alia deorsum ferantur. Licet enim figuræ multum conferant ad motuum celeritatem, & tarditatem, ipsos tamen motus per se haudquaquâ efficiunt. In dubium deinde vocat Philosophus, cur graue corpus latæ figuræ aquis innatet, cum tamē aliud minus graue rotunda, seu oblonga figura præditum submergatur? Cur irem particulæ grauius corporum in aëre suspensæ volitent? Quibus dubiis respondet Aristoteles reiecta solutione Democriti, id reducentis ad atomos calidas ab aqua emissas, vtriusque rationem esse inquit, quia ut corpus per aërem, vel aquam descendat, ea diuidit, & rumpit: sed corpus latæ figuræ difficilius diuidit elementum subiectum, quam alia aliis figuris prædita, cum sua latitudine multum de subiecto corpore comprehendat, quod proinde magis sectioni resistit: minutissimum etiam corpus in aëre suspensum minoris virtutis est ad disrumpendum aërem, vel aquam, quam hæc, ut diuisioni repugnent. Mirum ergo non est, si suspensæ sustineantur.

QVÆSTIO I.

De natura grauitatis, & leuitatis simplicium corporum.

Omnia, quæ his sex præcedentibus capitibus tradit Aristoteles, duplici quæstione examinanda sunt, ita ut nihil eorum, quæ ad naturam facultatum motricium elementorum enodandam spectant, missum faciamus; & in hac quæstione breuiter explananda est natura grauitatis, & leuitatis. Quid scilicet grauius, & leuitas sint, & quomodo inter se, & ab aliis differant, circa quod communis sententia est, grauitatem, & leuitatem esse qualita

qualitates secundæ speciei realiter , & specie distinctas inter se, & à substantia. Primum probatur, quia istæ virtutes sunt principia immediata lationis à medio, & ad medium. Ast omnis facultas, quæ est principium proximum operationis, spectat ad secundam qualitatis speciem, cum potentia sit, vel in potentia, ad eam igitur pertinet, grauitas, & leuitas. Quod verò realiter distinguantur à substantia, & inter se, demonstrat mutua separatio experimento comperta. Est enim leuitas in vno subiecto, & grauitas in altero, & vtraque deperditur, aut remittitur, eadem persistente substantia aquæ, v. g. vel aëtis: immò è contrario etiam euenit, vt videre est in speciebus consecratis, in quibus grauitas, & leuitas percipitur, cum tamen substantia panis, & vini iam euauerit. Cuius ratio à priori est. quia grauitas, & leuitas, teste Aristotele secundo de partibus animalium, cap. 1. totaque annuente schola Philosophorum, consequuntur qualitates actiuas elementorum. At hæ separari optimè queunt ab illorum substantiis, & inter se naturæ viribus, & separatæ existere absoluta factoris legē igitur, & facultates istæ motiue vtrunque habere possunt, ac proinde realiter à substantia, & inter se distinguuntur, vt res à re: hoc enim euidenter conuincit mutua extremorum separatio. Denique, quod grauitas, & leuitas specie inter se differant, probatur (à substantia enim non modò specie, sed & prædicamento dissidere nullus iam ambigit) primò ex Aristotele, qui id expressè docuit 5. Physicorum cap. 6. lib. 8. cap. 8. & lib. 1. de cælo, cap. 2. & 3. vbi D. Thom. & cum illis omnes alij Doctores. Deinde ratione, quia hæ facultates consequuntur per se corpora essentialiter diuersa, & diuersam semper exigunt primarum qualitatum temperiem in ordine ad diuersum motum locumque diuersum, & oppositum occupandum: essentialiter ergo inter se differunt. Ex principiis enim adeò diuersis in ordine ad fines, & effectus etiam diuersos, nequit per se eadem vis ortum ducere. Idque confirmatur ex diuersitate motuum sursum, & deorsum, quorum sunt principia: vel enim, vt 5. Physicorum quærit. i. probauimus, hi motus differunt specie, vel saltem modus adeò diuersus causandi illos sufficiens est ad distinctionem specificam principiorum inter se inducendam, aut inferendam.

Rogabit fortasse quispiam, an grauitas terræ & aquæ specie inter se differant, & similiter leuitas ignis & aëris: & affirmantem partem multis probant recentiores aliqui, quorum præcipuum fundamentum est, quia grauitas terræ, & aquæ (& idem est de leuitate ignis, & aëris) à diuersis principiis essentialibus, & à diuersa primarum qualitatum temperie, per se dimanant, ac in diuersa loca natura sua inclinant, nempe grauitas terræ ad centrum vniuersi, grauitas verò aquæ ad superficiem conuexam ter-

exigitur specie inter se differunt, ob hanc enim rationem specie distinguitur grauitas à leuitate. Confirmatur, quia grauitas aquæ & leuitas aëris non sunt simplices facultates, sed mixtæ; grauitas verò terræ, & leuitas ignis simplices sunt. At facultas simplex, & mixta nequeunt esse eiusdem speciei, vt in aliis omnibus per se patet: igitur nec grauitas terræ, & aquæ, aut leuitas ignis, & aëris eiusdem sunt speciei. Maior videtur expressa ab Arist. cap. 4. & 5. proximè præcedentibus, asserente aërem, & aquam partim esse grauiam, partim leuiam, & extremorum naturam participare, quæ quidem elementa extrema simpliciter talia sunt; id quod ex eo etiam constat, quod aqua à loco terræ ascendit, & aër à loco ignis descendit: facultas ergo motrix cuiuslibet elementi mediij principium est motus sursum, & deorsum, ac proinde mixta, & specie distincta à facultate cognomina elementi extremi.

Mihi tamen probabilior semper est visa opposita sententia, quam tradit Philop. vt refert Simplicius 2. huius Operis, cōmentario 1. 1. & communiter recipiunt recentiores. Ratio verò, quæ me ad hoc asserendum impellit, sic efformatur. Nefas est multiplicare entitates, perfectionesve essentielles, nulla urgente necessitate: at necessitas nulla cogit constituere duas grauitandi, aut lenitandi potentias specie distinctas: fas igitur non est, eas distinguere. Minor, in qua tota posita est difficultas elucidatur, quia grauitas, teste Arist. cap. 1. huius libri, & sequentibus, cui omnes consentiunt, est principium motus deorsum, seu ad medium, & leuitas principium motus sursum, seu à medio: grauitas terræ, & aquæ sunt principia motus deorsum eodem modo, & leuitas aëris & ignis, motus sursum; ergo non sunt ponenda principia specie diuersa. Minor proximè præcedens demonstratur, quia pars aquæ è superiori loco dilapsa innato pondere seorsum fertur per eandem omnino lineam, qua descenderet terra indidem emissâ, solo intercedente discrimine maioris, vel minoris velocitatis, quod certum est non sufficere ad distinctionem specificam principiorum inferendam. Confirmatur, quia grauitas aquæ non solum est principium naturale motus deorsum, sed etiam motus ad centrum vniuersi, quantum est ex se, si grauius aliud corpus non supponatur: igitur natura sua est causa motus deorsum in eundem locum, & eodem modo ac grauitas terræ, ac proinde eiusdem speciei cum illa. Illustratur antecedens, nam si terra superna vi à loco inferiori extraheretur, vel corrumperetur, aut in ea foramen aliquod ad centrum vsque mundi constitueretur, proculdubio aqua suæ relicta naturæ, ea, qua pollet grauitate, ad centrum occupandum descenderet; ex quo euidenter inferri videtur, grauitatem aquæ, & terræ eiusdem esse speciei, & solum accidentaliter differre penes maiorem vel minorem intensionem, & idem profus est de leuitate ignis, & aëris, id quod ex solutione fundamenti

fundamenti oppositæ sententiæ constabit clariùs: cuius prior antecedentis pars distinguenda est: principium enim grauitatis terræ & aquæ tam remotum quàm proximum, diuersum essentialiter est secundùm se, & quasi materialiter, non tamen formaliter, & in ratione principij illius: est enim substantia aquæ, & propria primarum qualitarum coniunctio grauitatis principium in ordine ad motum deorsum eiusdem omninò rationis cum motu naturali terræ, ac proinde in ratione formali principij vtrique conuenit. Quod autem additur de locorum diuersitate, ex dictis constat, esse intelligendum ex suppositione, quòd terra grauior in centro vniuersi constituitur; secus verò si inde extrahatur, aut locus detur aquæ descendenti, tunc enim ad centrum vsque aqua pertingeret, quod aliter accidit in corpore leui, & graui, vt per se constat, & ideo grauitas, & leuitas specie inter se dissident, vt diximus. Ad confirmationem verò neganda est prior pars maioris propositionis, quòd scilicet grauitas, & leuitas aquæ, & aëris mixtæ sint, quin potius sunt omninò simplices, vt contra Niphium, & alios docet Maistil. 2. de generatione, quæst. 7. Albert. de Saxonia lib. 3. de celo, quæst. 1. & supponit D. Tho. lib. 1. huius operis, lectione 4. & amplectuntur recentiores. Probarique potest, tum quia qualitas mixta secunda est propria corporis mixti, supponens mixtionem primarum qualitatum contrariarum; tum, quia auctore Arist. 1. de celo c. 7. corpori simplici, quale est quodlibet elementum, conuenit motus simplex: de huius autem ratione est, ab vna simplici potentia prouenire. Arist. verò in confirmationem maioris adductus solum cõtendit, aquam non esse simpliciter grauem, & aërem simpliciter leuem comparatione extremorum, hoc est aquam non esse maximè grauem, sed comparatione terræ leuem reputari, non quia in se aliquid leuitatis habeat, sed quia minori grauitate quàm terra prædita est. Eo modo, quo in prædicamento qualitatis potentiam debilem comparatione potentie perfectioris impotentiam appellauit. Cum igitur aqua à loco terræ ascenpit, & descendit aër ab ignis loco, non à propriis virtutibus motiuis id euenit, sed ab extrinseco impellente, terra scilicet, aut igne, ratione maioris grauitatis, vel leuitatis: neque aliud principium confingere necessarium est; cum assignatum sufficiat, maximè cum grauitas non sit principium contrariorum moruum, & idem est de leuitate. Ascensus tamen aquæ, v. g. à loco terræ verè contrariatur descensui eiusdem ad eundem locum, immò ab eo differt specie, vt c. Physicorum probauimus: igitur nequeunt prouenire ab eadem grauitate, vel ab eadem leuitate, in quo nobis non probatur sententia Patrum Conimbricensium hîc quæstione 2. art. 2.

Quinimmò in vniuersū mihi verum videtur, nullam grauitatem,

centrum, qua relicta quiescerent omnino, in orbem moueantur, vt contingit in motu, quo ignis rapitur ab orbe lunæ, eiusmodi motus, nec naturalis, nec violentus dicendus est, sed præter naturam, quia nec à principio intrinseco actiuo, nec passiuo, cum ad id elementum nullatenus inclinetur, nec ab extrinseco cum reluctantiâ passi, cum nec sit contra virtutem motricem elementi propriam, neque alia virtus obliuiscens appareat. Superest igitur, illum motum futurum præter naturam elementi, hoc est, nec natura ipsa exigente, neque renitente. Ex quibus principiis haud difficile erit, iudicium ferre in specie de singulis elementorum motibus, quos sigillatim recensere, & operosum & inutile censeo.

Circa posteriorem quæstionis partem videtur fuisse sententia Arist. hic cap. 4. & 5. alientis, aërem, & aquam in propriis locis grauitare, deorsumque propendere, id quod hisce probat argumentis: Quia vtres aëre pleni grauiore sunt, magisque deorsum propendent, quam ipsi sine aëre, quod quidem aliunde prouenire nequit, nisi ex eo, quod aër grauitet in proprio loco. Præterea lignum centum librarum velocius per aërem descendit, quam plumbi libra, cum tamen plumbum vnius libræ celerius per aquam descendat, quam lignum eiusdem ponderis. At hoc nequit euenire, nisi quia lignum plus aëris in poris continet, quam plumbum, qui quidem in propria regione deorsum tendat, & ideo plus aëris velocius corpus vehit, minus autem impellit in aqua, & ideo per eam plumbum celerius descendit, quia minus aeris continet, & melius a grauitate aquæ deorsum conantis impellitur: igitur aër, & aqua in propriis locis grauitant. Hæc adduxit Aristoteles cap. 4. confirmat id ipsum cap. 5. ex eo quod, vt experimento compertum est, aër substracta aqua naturaliter descendit, & similiter aqua, si terra ei extrahatur: fateamur ergo necesse est, elementa media in suis locis semper grauitare, atque deorsum niti.

Communis tamen, & vera sententia tenet, nullum elementum in naturali sede grauitare, leuitareve. Ita sentiunt Mathematici ferè omnes cum Archimede, & Ptolomæo, & ferè omnes Philosophi Peripatetici cum Simplicio, Themistio, Syriano, & Alexandro hic, ita vt iam vt commune circumferatur axioma, elementa in propriis locis nec grauitant, nec leuitant. Vnum legi Villalpandum, qui oppositam tueri sententiam tentauerit 4. de calo c. 5. sed adeo rationis momento, & robore eam destitutam comperit, vt coactus fuerit, liberam cuique facultatem concedere tutandi quam maluerit. Probatur ergo hæc communis sententia experimento, & ratione: experimento quidem, quia nullus non expertus est aërem non degrauiare nostra capita, & qui sub aquis natant, aquæ pondus non experiuntur: si verò aër, & aqua in regione propria grauitarent, & deorsum niterentur, non possent non subiecti homines onus magnum sentire, sicut sentiunt, qui terram vel

vel aquam à proprio loco extractam sustinent. Probatur ratione, & primò de elementis extremis certa apud omnes videtur conclusio, quia neque ignis habet quò vltèriùs ascendat, neque terra quò plùs descendat. Igitur neutrum eorum in propria sede ascendere vel descendere conatur: esset enim frustra talis conatus, & ad terminum naturaliter impossibilem. In vniuersum tamen probatur, quia singula elementa mouentur ad propria loca tanquam ad propriam perfectionem, vt illic optata fruantur quiete, & illis adeptis quiescunt: igitur virtus motiua naturalis illorum ad hunc solum terminum propendet, & inclinatur: hoc ergo adeptò non erit principium vltèr tendendi, atque adeò repugnat, quòd si elementa in propria sede perfectè còstituta sint, vltèriùs cieri naturaliter nitantur grauitando, aut leuitando, aliàs aut illa non esset propria elementi sedes, vt supponimus, aut elementum haberet naturalem virtutem descendendi à proprio loco, & tendendi in extraneum: quod planè est absurdum, cum elementis solum sit concessa motrix facultas ad proprium locum, quæ est grauitas, vel leuitas. Dixi, si in propria sede perfectè collocentur, si enim aliqua ex parte à proprio loco extrahantur, ita vt aliqua pars ponderis, aut leuitatis non æquè distet à proprio centro, propriæ sphæræ, grauitabunt: proculdubio, aut leuitabunt. Experimur nanque grauià vbi-
cunque sint, superiorem locum leuibùs, aut minùs grauibùs concedere, & è còtrario, vt còstat in terra supra aquam, aut aère ignem-
ve posita, & in aqua aère, & igne terræ meatibus compressis: quod quidem non aliter euenit, quàm mutuo grauium descendentiũ leuiumque ascendentiũ conatu, & motu, id quod etiam in mixtis videre est, vt in liquoribus, quorum aliqui, quia leuiore, grauioribus innatant, grauiore verò aliis subsidunt. Cuius experimenti ratio est, quia natura grauitatis iure suo exigit ad centrum, quo proximùs possit. accedere, neque quiescere naturaliter potest, donec id assequatur perfectè, ita vt centrum grauitatis simul cum centro vniuersi existat, & grauitatis partes æquè ab ipso distent, proportionè seruata grauioris cum minùs graui, & idem prorsus est de leuitate in ordine ad locum fursum: ita tamen, vt si subtraheretur grauior pars, aut leuior, minùs grauis, & minùs leuis à propria virtute mouerentur, donec illa centrum vniuersi, hæc Lunæ concauum pertingeret, vt supra monuimus.

Superest, satisfaciamus argumentis in contrarium adductis, quæ quidem parum negotij facessunt. Ad primum enim dicimus, idcirco vtres aère plenos grauiore existere, quia aër circa terram degens impurus est, terrestribus scatès halitibus, & corpusculis, vt in Solis radio videre est; secus verò contingeret, si puro ac elementari aère adimplerentur. Ad secundum, vtrumque fatemur experimentum; inficiamur tamen, causam illius esse rationem, quæ in
argumento.

centrum, qua relicta quiescerent omnino, in orbem moueantur, ut contingit in motu, quo ignis rapitur ab orbe lunæ, eiusmodi motus, nec naturalis, nec violentus dicendus est, sed præter naturam, quia nec à principio intrinseco actiuo, nec passiuo, cum ad id elementum nullatenus inclinetur, nec ab extrinseco cum reluctantiâ passi, cum nec sit contra virtutem morticem elementi propriam, neque alia virtus obfistens appareat. Superest igitur, illum motum futurum præter naturam elementi, hoc est, nec natura ipsa exigente, neque renitente. Ex quibus principiis haud difficile erit, iudicium ferre in specie de singulis elementorum motibus, quos sigillatim recensere, & operosum & inutile censeo.

Circa posteriorem quæstionis partem videtur fuisse sententia Arist. hic cap. 4. & 5. afferentis, aërem, & aquam in propriis locis grauitare, deorsumque propendere, id quod hisce probat argumentis: Quia vtres aëre pleni grauiore sunt, magisque deorsum propendent, quam ipsi sine aëre, quod quidem aliunde prouenire nequit, nisi ex eo, quod aër grauitet in proprio loco. Præterea lignum centum librarum velocius per aërem descendit, quam plumbi libra, cum tamen plumbum vnius libræ celerius per aquam descendat, quam lignum eiusdem ponderis. Ast hoc nequit euenire, nisi quia lignum plus aëris in poris continet, quam plumbum, qui quidem in propria regione deorsum tendat, & idcò plus aëris velocius corpus vehit, minus autem impellit in aqua, & idcò per eam plumbum celerius descendit, quia minus aeris continet, & melius à grauitate aquæ deorsum conantis impellitur: igitur aër, & aqua in propriis locis grauitant. Hæc adduxit Aristoteles cap. 4. confirmat id ipsum cap. 5. ex eo quod, ut experimento compertum est, aër substracta aqua naturaliter descendit, & similiter aqua, si terra ei extrahatur: fateamur ergo necesse est, elementa media in suis locis semper grauitare, atque deorsum niti.

Communis tamen, & vera sententia tenet, nullum elementum in naturali sede grauitare, leuitareve. Ita sentiunt Mathematici ferè omnes cum Archimede, & Ptolomæo, & ferè omnes Philosophi Peripatetici cum Simplicio, Themistio, Syriano, & Alexandro hic, ita ut iam ut commune circumferatur axioma, elementa in propriis locis nec grauitant, nec leuitant. Vnum legi Villalpandum, qui oppositam tæri sententiam tentauerit 4. de calo c. 5. sed adeò rationis momento, & robore eam destitutam compertit, ut coactus fuerit, liberam cuique facultatem concedere tutandi quam maluerit. Probat ergo hæc communis sententia experimento, & ratione: experimento quidem, quia nullus non expertus est aërem non degrauare nostra capita, & qui sub aquis nantant, aquæ pondus non experiuntur: si verò aër, & aqua in regione propria grauitarent, & deorsum niterentur, non possent non subiecti homines onus magnum sentire, sicut sentiunt, qui terram

vel

vel aquam à proprio loco extractam sustinent. Probatur ratione, & primò de elementis extremis certa apud omnes videtur conclusio, quia neque ignis habet quò ulterius ascendat, neque terra quò plùs descendat. Igitur neutrum eorum in propria sede ascendere vel descendere conatur: esset enim frustra talis conatus, & ad terminum naturaliter impossibilem. In vniuersum tamen probatur, quia singula elementa mouentur ad propria loca tanquam ad propriam perfectionem, vt illic optata fruantur quiete, & illis adeptis quiescunt: igitur virtus motiua naturalis illorum ad hunc solum terminum propendet, & inclinatur: hoc ergo adeptò non erit principium vltra tendendi, atque adeò repugnat, quòd si elementa in propria sede perfectè còstituta sint, ulterius cieri naturaliter nitantur grauitando, aut leuitando, aliàs aut illa non esset propria elementi sedes, vt supponimus, aut elementum haberet naturalem virtutem descendendi à proprio loco, & tendendi in extraneum: quod planè est absurdum, cum elementis solum sit concessa motrix facultas ad proprium locum, quæ est grauitas, vel leuitas. Dixi, si in propria sede perfectè collocentur, si enim aliqua ex parte à proprio loco extrahantur, ita vt aliqua pars ponderis, aut leuitatis non æquè distet à proprio centro, propriæ sphaera, grauitabunt: proculdubio, aut leuirabunt. Experimur nanque grauià vbicunque sint, superiorem locum leuibùs, aut minùs grauibùs concedere, & è còtrario, vt còstat in terra supra aquam, aut aère: ignemve posita, & in aqua aère, & igne terræ meatibus compressis: quòd quidem non aliter euenit, quàm mutuo grauium descendentiũ leuiumque ascendentiũ conatu, & motu, id quod etiam in mixtis videre est, vt in liquoribus, quorum aliqui, quia leuiore, grauioribus innatant, grauiore verò aliis subsidunt. Cuius experimenti ratio est, quia natura grauitatis iure suo exigit ad centrum, quo proximùs possit. accedere, neque quiescere naturaliter potest, donec id assequatur perfectè, ita vt centrum grauitatis simul cum centro vniuersi existat; & grauitatis partes æquè ab ipso distent, proportionè seruata grauioris cum minùs graui, & idem prorsus est de leuitate in ordine ad locum sursum: ita tamen, vt si subtraheretur grauior pars, aut leuior, minùs grauis, & minùs leuis à propria virtute mouerentur, donec illa centrum vniuersi, hæc Lunæ concauum pertingeret, vt supra monuimus.

Superest, satisfaciamus argumentis in contrarium adductis, quæ quidem parum negotij facessunt. Ad primum enim dicimus, idcirco vtres aère plenos grauiore existere, quia aër circa terram degens impurus est, terrestribus scætis halitibus, & corpusculis, vt in Solis radio videre est; secus verò contingeret, si puro ac elementari aère adimplerentur. Ad secundum, vtrumque fatemur experimentum; inficiamur tamen, causam illius esse rationem, quæ in argumento

centrum, quæ reliquæ quiescerent omnino, in orbem moueantur, ut contingit in motu, quo ignis rapitur ab orbe lunæ, eiusmodi motus, nec naturalis, nec violentus dicendus est, sed præter naturam, quia nec à principio intrinseco actiuo, nec passiuo, cum ad id elementum nullatenus inclinetur, nec ab extrinseco cum reluctantiâ passi, cum nec sit contra virtutem mottricem elementi propriam, neque alia virtus obfistens appareat. Superest igitur, illum motum futurum præter naturam elementi, hoc est, nec natura ipsa exigente, neque renitente. Ex quibus principiis haud difficile erit, iudicium ferre in specie de singulis elementorum motibus, quos sigillatim recensere, & operosum & inutile censeo.

Circa posteriorem quæstionis partem videtur fuisse sententia Arist. hic cap. 4. & 5. asserentis, aërem, & aquam in propriis locis grauitare, deorsumque propendere, id quod hisce probat argumentis: Quia vtres aëre pleni grauiiores sunt, magisque deorsum propendent, quam ipsi sine aëre, quod quidem aliunde prouenire nequit, nisi ex eo, quod aër grauitet in proprio loco. Præterea lignum centum librarum velocius per aërem descendit, quam plumbi libra, cum tamen plumbum vnius libræ celerius per aquam descendat, quam lignum eiusdem ponderis. Ast hoc nequit euenire, nisi quia lignum plus aëris in poris continet, quam plumbum, qui quidem in propria regione deorsum tendat, & ideo plus aëris velocius corpus vehit, minus autem impellit in aqua, & ideo per eam plumbum celerius descendit, quia minus aeris continet, & melius à grauitate aquæ deorsum conantis impellitur: igitur aër, & aqua in propriis locis grauitant. Hæc adduxit Aristoteles cap. 4. confirmat id ipsum cap. 5. ex eo quod, vt experimento comperitum est, aër substracta aqua naturaliter descendit, & similiter aqua, si terra ei extrahatur: fateamur ergo necesse est, elementa media in suis locis semper grauitare, atque deorsum niti.

Communis tamen, & vera sententia tenet, nullum elementum in naturali sede grauitare, leuitareve. Ita sentiunt Mathematici ferè omnes cum Archimede, & Ptolomæo, & ferè omnes Philosophi Peripatetici cum Simplicio, Themistio, Syriano, & Alexandro hic, ita vt iam vt commune circumferatur axioma, elementa in propriis locis nec grauitant, nec leuitant. Vnum legi Villalpandum, qui oppositam tueri sententiam tentauerit 4. de calo c. 5. sed adeo rationis momento, & robore eam destitutam comperit, vt coactus fuerit, liberam cuique facultatem concedere tutandi quam maluerit. Probatur ergo hæc communis sententia experimento, & ratione: experimento quidem, quia nullus non expertus est aërem non degrauiare nostra capita, & qui sub aquis nantant, aquæ pondus non experiuntur: si verò aër, & aqua in regione propria grauitarent, & deorsum niterentur, non possent non subiecti homines onus magnum sentire, sicut sentiunt, qui terram vel

vel aquam à proprio loco extractam sustinent. Probatur ratione, & primò de elementis extremis certa apud omnes videtur conclusio, quia neque ignis habet quò ulterius ascendat, neque terra quò plùs descendat. Igitur neutrum eorum in propria sede ascendere vel descendere conatur: esset enim frustra talis conatus, & ad terminum naturaliter impossibilem. In vniuersum tamen probatur, quia singula elementa mouentur ad propria loca tanquam ad propriam perfectionem, vt illic optata fruantur quiete, & illis adeptis quiescunt: igitur virtus motiua naturalis illorum ad hunc solum terminum propendet, & inclinatur: hoc ergo adeptò non erit principium vltra tendendi, atque adeò repugnat, quòd si elementa in propria sede perfectè còstituta sint, ulterius cieri naturaliter nitantur grauitando, aut leuitando, aliàs aut illa non esset propria elementi sedes, vt supponimus, aut elementum haberet naturalem virtutem descendendi à proprio loco, & tendendi in extraneum: quod planè est absurdum, cum elementis solum sit concessa motrix facultas ad proprium locum, quæ est grauitas, vel leuitas. Dixi, si in propria sede perfectè collocentur, si enim aliqua ex parte à proprio loco extrahantur, ita vt aliqua pars ponderis, aut leuitatis non æquè distet à proprio centro, propriæ spheræ, grauitabunt: proculdubio, aut leuitabunt. Experimur nanque grauià vbicunque sint, superiorem locum leuibùs, aut minùs grauibùs concedere, & è còtrario, vt còstat in terra supra aquam, aut aère ignemve posita, & in aqua aère, & igne terræ meatibus compressis: quod quidem non aliter euenit, quàm mutuo grauium descendantium leuiumque ascendentium conatu, & motu, id quod etiam in mixtis videre est, vt in liquoribus, quorum aliqui, quia leuiiores, grauioribus innatant, grauiiores verò aliis subsidunt. Cuius experimenti ratio est, quia natura grauitatis iure suo exigit ad centrum, quo proximùs possit, accedere, neque quiescere naturaliter potest, donec id assequatur perfectè, ita vt centrum grauitatis simul cum centro vniuersi existat; & grauitatis partes æquè ab ipso distent, proportionè seruata grauioris cum minùs graui, & idem prorsus est de leuitate in ordine ad locum sursum: ita tamen, vt si subtraheretur grauior pars, aut leuior, minùs grauis, & minùs leuis à propria virtute mouerentur, donec illa centrum vniuersi, hæc Lunæ concauum pertingeret, vt supra monuimus.

Superest, satisfaciamus argumentis in contrarium adductis, quæ quidem parum negotij facessunt. Ad primum enim dicimus, idcirco vtes aère plenos grauiiores existere, quia aër circa terram degens impurus est, terrestribus scætes halitibus, & corpusculis, vt in Solis radio videre est; secus verò contingeret, si puro ac elementari aère adimplerentur. Ad secundum, vtrumque fatemur experimentum; inficiamur tamen, causam illius esse rationem, quæ in

argumento

centrum, qua relicta quiescerent omnino, in orbem moueantur, ut contingit in motu, quo ignis rapitur ab orbe lunæ, eiusmodi motus, nec naturalis, nec violentus dicendus est, sed præter naturam, quia nec à principio intrinseco actiuo, nec passiuo, cum ad id elementum nullatenus inclinetur, nec ab extrinseco cum reluctantiâ passi, cum nec sit contra virtutem motricem elementi propriam, neque alia virtus obfistens appareat. Superest igitur, illum motum futurum præter naturam elementi, hoc est, nec natura ipsa exigente, neque renitente. Ex quibus principiis haud difficile erit, iudicium ferre in specie de singulis elementorum motibus, quos sigillatim recensere, & operosum & inutile censeo.

Circa posteriorem quæstionis partem videtur fuisse sententia Arist. hic cap. 4. & 5. ætheris, ærem, & aquam in propriis locis grauitare, deorsumque propendere, id quod hisce probat argumentis: Quia tres ære pleni grauiores sunt, magisque deorsum propendent, quam ipsi sine ære, quod quidem aliunde prouenire nequit, nisi ex eo, quod ær grauitet in proprio loco. Præterea lignum centum librarum velocius per ærem descendit, quam plumbi libra, cum ramen plumbum vnius libræ celerius per aquam descendat, quam lignum eiusdem ponderis. Ast hoc nequit euenire, nisi quia lignum plus æris in poris continet, quam plumbum, qui quidem in propria regione deorsum tendat, & ideo plus æris velocius corpus vehit, minus autem impellit in aqua, & ideo per eam plumbum celerius descendit, quia minus æris continet, & melius à grauitate aquæ deorsum conantis impellitur: igitur ær, & aqua in propriis locis grauitant. Hæc adduxit Aristoteles cap. 4. confirmat id ipsum cap. 5. ex eo quod, ut experimento compertum est, ær substracta aqua naturaliter descendit, & similiter aqua, si terra ei extrahatur: fateamur ergo necesse est, elementa media in suis locis semper grauitare, atque deorsum niti.

Communis tamen, & vera sententia tenet, nullum elementum in naturali sede grauitare, leuitareve. Ita sentiunt Mathematici ferè omnes cum Archimede, & Ptolomæo, & ferè omnes Philosophi Peripatetici cum Simplicio, Themistio, Syriano, & Alexandro hic, ita ut iam ut commune circumferatur axioma, elementa in propriis locis nec grauitant, nec leuitant. Vnum legi Villalpandum, qui oppositam tueri sententiam tentauerit 4. de calo c. 5. sed adeo rationis momento, & robore eam destitutam comperit, ut coactus fuerit, liberam cuique facultatem concedere tutandi quam maluerit. Probatur ergo hæc communis sententia experimento, & ratione: experimento quidem, quia nullus non expertus est ærem non degrauare nostra capita, & qui sub aquis natant, aquæ pondus non experiuntur: si verò ær, & aqua in regione propria grauitarent, & deorsum niterentur, non possent non subiecti homines onus magnum sentire, sicut sentiunt, qui terram

vel

vel aquam à proprio loco extractam sustinent. Probatur ratione, & primò de elementis extremis certa apud omnes videtur conclusio, quia neque ignis habet quò ulterius ascendat, neque terra quò plùs descendat. Igitur neutrum eorum in propria sede ascendere vel descendere conatur: esset enim frustra talis conatus, & ad terminum naturaliter impossibilem. In vniuersum tamen probatur, quia singula elementa mouentur ad propria loca tanquam ad propriam perfectionem, vt illic optata fruantur quiete, & illis adeptis quiescunt: igitur virtus motiua naturalis illorum ad hunc solum terminum propendet, & inclinatur: hoc ergo adeptò non erit principium vltra tendendi, atque adeò repugnat, quòd si elementa in propria sede perfectè còstituta sint, ulterius cieri naturaliter nitantur grauitando, aut leuitando, aliàs aut illa non esset propria elementi sedes, vt supponimus, aut elementum haberet naturalem virtutem descendendi à proprio loco, & tendendi in extraneum: quod planè est absurdum, cum elementis solum sit concessa motrix facultas ad propriam locum, quæ est grauitas, vel leuitas. Dixi, si in propria sede perfectè collocentur, si enim aliqua ex parte à proprio loco extrahantur, ita vt aliqua pars ponderis, aut leuitatis non æque distet à proprio centro, propriæ sphaera, grauitabunt: proculdubio, aut leuitabunt. Experimur nanque grauià vbicunque sint, superiorem locum leuibùs, aut minùs grauibùs concedere, & è còtrario, vt còstat in terra supra aquam, aut aërè ignemve posita, & in aqua aère, & igne terræ meatibus compressis: quod quidem non aliter euenit, quàm mutuo grauium descendentiũ leuiumque ascendentiũ conatu, & motu, id quod etiam in mixtis videre est, vt in liquoribus, quorum aliqui, quia leuiorẽs, grauioribus innatant, grauiorẽs verò aliis subsidunt. Cuius experimenti ratio est, quia natura grauitatis iure suo exigit ad centrum, quo proximius possit accedere, neque quiescere naturaliter potest, donec id assequatur perfectè, ita vt centrum grauitatis simul cum centro vniuersi existat, & grauitatis partes æquè ab ipso distent, proportionẽ seruata grauioris cum minùs graui, & idem prorsus est de leuitate in ordine ad locum sursum: ita tamen, vt si subtraheretur grauior pars, aut leuior, minùs grauis, & minùs leuis à propria virtute mouerentur, donec illa centrum vniuersi, hæc Lunæ concauum pertingeret, vt supra monuimus.

Superest, satisfaciamus argumentis in contrarium adductis, quæ quidem parum negotij faceffunt. Ad primum enim dicimus, idcirco vtres aère plenos grauiorẽs existere, quia aër circa terram degens impurus est, terrestribus scatens halitibus, & corpusculis, vt in Solis radio videre est; secus verò contingeret, si puro ac elementari aère adimplerentur. Ad secundum, vtrumque fatemur experimentum; inficiamur tamen, causam illius esse rationem, quæ in argumento

ærgitur specie inter se differunt, ob hanc enim rationem specie distinguitur grauitas à leuitate. Confirmatur, quia grauitas aquæ & leuitas æris non sunt simplices facultates, sed mixtæ; grauitas verò terræ, & leuitas ignis simplices sunt. At facultas simplex, & mixta nequeunt esse eiusdem speciei, vt in aliis omnibus per se patet: igitur nec grauitas terræ, & aquæ, aut leuitas ignis, & æris eiusdem sunt speciei. Maior videtur expressa ab Arist. cap. 4. & 5. proximè præcedentibus, asserente ærem, & aquam partim esse grauiam, partim leuiam, & extremorum naturam participare, quæ quidem elementa extrema simpliciter talia sunt; id quod ex eo etiam constat, quòd aqua à loco terræ ascendit, & ær à loco ignis descendit: facultas ergo motrix cuiuslibet elementi mediij principium est motus sursum, & deorsum, ac proinde mixta, & specie distincta à facultate cognomina elementi extremi.

Mihi tamen probabilior semper est visa opposita sententia, quam tradit Philop. vt refert Simplicius 2. huius Operis, cōmentario 11. & communiter recipiunt recentiores. Ratio verò, quæ me ad hoc asserendum impellit, sic efformatur. Nefas est multiplicare entitates, perfectionesve essentielles, nulla urgente necessitate: at necessitas nulla cogit constituere duas grauitandi, aut leuitandi potentias specie distinctas: fas igitur non est, eas distinguere. Minor, in qua tota posita est difficultas elucidatur, quia grauitas, teste Arist. cap. 1. huius libri, & sequentibus, cui omnes consentiunt, est principium motus deorsum, seu ad medium, & leuitas principium motus sursum, seu à medio: grauitas terræ, & aquæ sunt principia motus deorsum eodem modo, & leuitas æris & ignis, motus sursum; ergo non sunt ponenda principia specie diuersa. Minor proximè præcedens demonstratur, quia pars aquæ è superiori loco dilapsa innato pondere seorsum fertur per eandem omninò lineam, qua descenderet terra indidem emissa, solo intercedente discrimine maioris, vel minoris velocitatis, quod certum est non sufficere ad distinctionem specificam principiorum inferendam. Confirmatur, quia grauitas aquæ non solum est principium naturale motus deorsum, sed etiam motus ad centrum vniuersi, quantum est ex se, si grauius aliud corpus non supponatur: igitur natura sua est causa motus deorsum in eundem locum, & eodem modo ac grauitas terræ, ac proinde eiusdem speciei cum illa. Illustratur antecedens, nam si terra superna vi à loco inferiori extraheretur, vel corrumpeteretur, aut in ea foramen aliquod ad centrum vsque mundi constitueretur, proculdubio aqua suæ relicta naturæ, ea, qua pollet grauitate, ad centrum occupandum descenderet; ex quo euidenter inferri videtur, grauitatem aquæ, & terræ eiusdem esse speciei, & solum accidentaliter differre penes maiorem vel minorem intensionem, & idem prorsus est de leuitate ignis, & æris, id quod ex solutione fundamenti

fundamenti oppositæ sententiæ constabit clariùs: cuius prior antecedentis pars distinguenda est: principium enim gravitatis terræ & aquæ tam remotum quàm proximum, diuersum essentialiter est secundum se, & quasi materialiter, non tamen formaliter, & in ratione principij illius: est enim substantia aquæ, & propria primarum qualitarum coniugatio grauitatis principium in ordine ad motum deorsum eiusdem omnino rationis cum motu naturali terræ, ac proinde in ratione formali principij vtræque conuenit. Quod autem additur de locorum diuersitate, ex dictis constat, esse intelligendum ex suppositione, quòd terra grauior in centro vniuersi constituatur; secus verò si inde extrahatur, aut locus detur aquæ descendenti, tunc enim ad centrum vsque aqua pertingeret, quod aliter accidit in corpore leui, & graui, vt per se constat, & ideo grauitas, & leuitas specie inter se dissident, vt diximus. Ad confirmationem verò neganda est prior pars maioris propositionis, quòd scilicet grauitas, & leuitas aquæ, & aëris mixtæ sint, quin potius sunt omnino simplices, vt contra Niphium, & alios docet Marsil. 2. de generatione, quæst. 7. Albert. de Saxonia lib. 3. de celo, quæst. 1. & supponit D. Tho. lib. 1. huius operis, lectione 4. & amplectuntur recentiores. Probarique potest, tum quia qualitas mixta secunda est propria corporis mixti, supponens mixtionem primarum qualitarum contrariarum; tum, quia auctore Arist. 1. de celo c. 2. corpori simplici, quale est quodlibet elementum, conuenit motus simplex: de huius autem ratione est, ab vna simplici potentia provenire. Arist. verò in confirmationem maioris adductus solum cõtendit, aquam non esse simpliciter grauem, & aërem simpliciter leuem comparatione extremorum, hoc est aquam non esse maximè grauem, sed comparatione terræ leuem reputari, non quia in se aliquid leuitatis habeat, sed quia minori grauitate quàm terra prædita est. Eo modo, quo in prædicamento qualitatis potentiam debilem comparatione potentiæ perfectioris impotentiam appellauit. Cum igitur aqua à loco terræ ascenpit, & descendit aër ab ignis loco, non à propriis virtutibus motiuis id euenit, sed ab extrinseco impellente, terra scilicet, aut igne, ratione maioris grauitatis, vel leuitatis: neque aliud principium confingere necessarium est; cum assignatum sufficiat, maximè cum grauitas non sit principium contrariorum motuum, & idem est de leuitate. Ascensus tamen aquæ, v. g. à loco terræ verè contrariatur descensui eiusdem ad eundem locum, immò ab eo differt specie, vt 1. Physicorum probauimus: igitur nequeunt provenire ab eadem grauitate, vel ab eadem leuitate, in quo nobis non probatur sententia Patrum Conimbricensium hîc quæstione 2. art. 2.

Quin immò in vniuersū mihi verum videtur, nullam grauitatem,

concauum sponte propria feratur: igitur elemētum terræ summè graue, ignis verò summè leue necessario existit: hoc autem intelligendum est de elementis suæ naturæ relictis, aut in sua puritate, sic enim nihil terra grauius, aut igne leuius reperietur, cum eorum beneficio mixta grauius, & leuia existant. Secus est, si viciniorum elementorum concretionem permixta sint, & ideo plumbum, aurum, argentum, & quædam alia grauiora sunt terra, quæ apud nos est, non tamen terra prope centrum obliuescente: terrestris etiam ignis, ad concauum Lunæ non ascendit, & propter contrariorum obliuescentiam, & ob exhalationum terrestrium permixtionem.

Præterea animaduertendum est, duo elementa media non excludi à ratione summæ grauitatis, & summæ leuitatis, ex eo quòd aqua aliquid habeat leuitatis, & aër aliquid grauitatis: hoc enim planè falsum est, alioqui non conueniret illis motus simplex, cum hic à virtute motrice simplici effici debeat, vt suprà ex Aristotele tradidimus, & hæc elementa non simplicia corpora, sed mixta potius essent appellanda: nec ad vnum tantum locum per vnā simplicem lineam nata essent moueri, quæ planè absurda sunt, & naturæ corporis simplicis manifestè contraria. Dicuntur igitur elementa media, & non summè, aut simpliciter grauius, nec leuia, quia medium sua natura exigit locum, & non subesse omnibus aut præminere: ob quam tantum rationē appellantur ab Aristotele capit. 4. leuia, vel grauius comparatè, quia sedes elementi medijs respectu inferioris superior, respectu superioris inferior meritò dicitur, vnde virtus motiua aquæ cōparatione terræ quodammodò leuitas apparet, quia ad locum supra terram inclinat, relatè tamen ad ignem, vel aërem grauitas nuncupatur, quia ad inferiorem locum ducit, & idem est de facultate motrice aëris, si conferatur ad extrema elementa, vt patet: secundum se tamen, ac simpliciter terra grauis est, leuis aër, vt diximus.

Ex dictis inferre licet, quinam motus naturales sint elementis, qui violenti, qui præter naturam: in vniuersum enim quoties elementum graue descendit, proprio pondere naturaliter mouetur, vtpote innata facultate, idem est, quoties leue ascendit: cum tamen graue sursum, deorsum leue tendit, per vim id accidit, nisi fortè ad supplendum vacuum id contingat, siquidem in eo casu motus euenit à principio extrinseco passio proprio pondere actiue renitente, quod verum habet de quolibet ascensu grauis, & descensu leuis, etiamsi aqua à loco terræ ascendat, descendat aër ab ignis sphaera; semper enim eiusmodi motus erunt contra internum impetum propriæ grauitatis, vel leuitatis, quæ determinatè sursum inclinat aut deorsum, vt diximus quæst. 1. si verò motus eueniat circa proprium elementi locum, ita vt nec sit ascensus, nec descensus, sed partes cum eadem prorsus distantia inter se, & ad

centrum, quæ relictæ quiescerent omnino, in orbem moueantur, ut contingit in motu, quo ignis rapitur ab orbe lunæ, eiusmodi motus, nec naturalis, nec violentus dicendus est, sed præter naturam, quia nec à principio intrinseco actiuo, nec passiuo, cum ad id elementum nullatenus inclinetur, nec ab extrinseco cum reluctantiâ passi, cum nec sit contra virtutem motricem elementi propriam, neque alia virtus obstitens appareat. Superest igitur, illum motum futurum præter naturam elementi, hoc est, nec natura ipsa exigente, neque renitente. Ex quibus principiis haud difficile erit, iudicium ferre in specie de singulis elementorum motibus, quos sigillatim recensere, & operosum & inutile censeo.

Circa posteriorem quæstionis partem videtur fuisse sententia Arist. hic cap. 4. & 5. afferentis, aërem, & aquam in propriis locis grauitare, deorsumque propendere, id quod hisce probat argumentis: Quia vtres aëre pleni grauiores sunt, magisque deorsum propendent, quam ipsi sine aëre, quod quidem aliunde prouenire nequit, nisi ex eo, quod aër grauitet in proprio loco. Præterea lignum centum librarum velocius per aërem descendit, quam plumbi libra, cum tamen plumbum vnius libræ celerius per aquam descendat, quam lignum eiusdem ponderis. Ast hoc nequit euenire, nisi quia lignum plus aëris in poris continet, quam plumbum, qui quidē in propria regione deorsum tendat, & ideo plus aëris velocius corpus vehit, minus autem impellit in aqua, & ideo per eam plumbum celerius descendit, quia minus aeris continet, & melius à grauitate aquæ deorsum conantis impellitur: igitur aër, & aqua in propriis locis grauitant. Hæc adduxit Aristoteles cap. 4. confirmat id ipsum cap. 5. ex eo quod, ut experimento compertum est, aër substracta aqua naturaliter descendit, & similiter aqua, si terra ei extrahatur: fateamur ergo necesse est, elementa media in suis locis semper grauitare, atque deorsum niti.

Communis tamen, & vera sententia tenet, nullum elementum in naturali sede grauitare, leuitareve. Ita sentiunt Mathematici ferè omnes cum Archimede, & Ptolomæo, & ferè omnes Philosophi Peripatetici cum Simplicio, Themistio, Syriano, & Alexandro hic, ita ut iam ut commune circumferatur axioma, elementa in propriis locis nec grauitant, nec leuitant. Vnum legi Villalpandum, qui oppositam tueri sententiam tentauerit 4. de calo c. 5. sed adeo rationis momento, & robore eam destitutam comperit, ut coactus fuerit, liberam cuique facultatem concedere tutandi quam maluerit. Probatur ergo hæc communis sententia experimento, & ratione: experimento quidem, quia nullus non expertus est aërem non degrauare nostra capita, & qui sub aquis nantant, aquæ pondus non experiuntur: si verò aër, & aqua in regione propria grauitarent, & deorsum niterentur, non possent non subiecti homines onus magnum sentire, sicut sentiunt, qui terram vel

vel aquam à proprio loco extractam sustinent. Probatum ratione, & primò de elementis extremis certa apud omnes videtur conclusio, quia neque ignis habet quò ulterius ascendat, neque terra quò plùs descendat. Igitur neutrum eorum in propria sede ascendere vel descendere conatur: esset enim frustra talis conatus, & ad terminum naturaliter impossibilem. In vniuersum tamen probatur, quia singula elementa mouentur ad propria loca tanquam ad propriam perfectionem, vt illic optata fruantur quiete, & illis adeptis quiescunt: igitur virtus motiua naturalis illorum ad hunc solum terminum propendet, & inclinatur: hoc ergo adeptum non erit principium vltra tendendi, atque adeò repugnat, quòd si elementa in propria sede perfectè còstituta sint, ulterius cieri naturaliter nitantur grauitando, aut leuitando, aliàs aut illa non esset propria elementi sedes, vt supponimus, aut elementum haberet naturalem virtutem descendendi à proprio loco, & tendendi in extraneum: quod planè est absurdum, cum elementis solum sit concessa motrix facultas ad proprium locum, quæ est grauitas, vel leuitas. Dixi, si in propria sede perfectè collocentur, si enim aliqua ex parte à proprio loco extrahantur, ita vt aliqua pars ponderis, aut leuitatis non æquè distet à proprio centro, propriæ sphaera, grauitabunt: proculdubio, aut leuitabunt. Experimur namque grauià vbi-
cunque sint, superiorem locum leuibùs, aut minùs grauibùs concedere, & è còtrario, vt còstat in terra supra aquam, aut aère, ignem-
ve posita, & in aqua aère, & igne terræ meatibus compressis: quòd quidem non aliter euenit, quàm mutuo grauium descendentiũ leuiumque ascendentiũ conatu, & motu, id quod etiam in mixtis videre est, vt in liquoribus, quorum aliqui, quia leuiore, grauioribus innatant, grauiore verò aliis subsidunt. Cuius experimenti ratio est, quia natura grauitatis iure suo exigit ad centrum, quo proximùs possit, accedere, neque quiescere naturaliter potest, donec id assequatur perfectè, ita vt centrum grauitatis simul cum centro vniuersi existat; & grauitatis partes æquè ab ipso distent, proportionem seruata grauioris cum minùs graui, & idem profus est de leuitate in ordine ad locum sursum: ita tamen, vt si subtraheretur grauior pars, aut leuior, minùs grauis, & minùs leuis à propria virtute mouerentur, donec illa centrum vniuersi, hæc Lunæ concauum pertingeret, vt supra monuimus.

Superest, satisfaciamus argumentis in contrarium adductis, quæ quidem parum negotij facessunt. Ad primum enim dicimus, idcirco vtres aère plenos grauiore existere, quia aër circa terram degens impurus est, terrestribus scatens halitibus, & corpusculis, vt in Solis radio videre est; secus verò contingeret, si puro ac elementari aère adimplerentur. Ad secundum, vt runque fatemur experimentum, inficiamur tamen, causam illius esse rationem, quæ in
argumento.







